

浙江省社科规划课题研究成果

# 衢州历史文献集成

## 方志专辑

### 【第十二册】

《衢州历史文献集成》编纂委员会主任 郑樟林 主编 程相



中华书局

衢州历史文献集成  
方志专辑

第十二册

江山县志

清 王彬 孙晋梓 朱宝慈 纂修

王志邦 鲍江华 标点

ISBN 978-7-101-06522-0



9 787101 065220 >

定价：1800.00元（全十五册）

《衢州历史文献集成》编纂委员会主任 郑樟林 主编 程相

# 衢州历史文献集成

方志专辑【第十二册】

江山县志

清 王彬 孙晋梓 朱宝慈纂修 王志邦 鲍江华标点



中華書局

浙江省哲学社会科学重大委托课题（编号：08WTWX001ZD）

# 同治《江山县志》目录

## 卷之首

重修《江山县志》序	(1)
序	(3)
原序	(4)
凡例	(24)
编辑姓氏	(26)
《江山县志》目录	(29)
《江山县志》图	(35)

## 卷之一上

輿地志一	(66)
星野	(66)
輿地志二	(69)
疆里附：形勢	(69)
輿地志三	(73)

山川附：岩、洞、冈、岭、溪、滩 ..... (73)

## 卷之一下

輿地志四 ..... (104)  
    关津附：桥渡 ..... (104)  
輿地志五 ..... (123)  
    水利河、池、井、泉、陂、塘、堰<sup>①</sup> ..... (123)  
輿地志六 ..... (136)  
    风俗 ..... (136)

## 卷之二

沿革志一 ..... (141)  
    建置 ..... (141)  
沿革志二 ..... (143)  
    城垣附：街、坊、亭、巷、墟、镇、乡、庄 ..... (143)  
沿革志三 ..... (156)  
    公署附：邮馆、铺司 养济院 育婴堂 栖流所 ..... (156)  
沿革志四 ..... (164)  
    兵防附：塘汛、营寨<sup>②</sup> ..... (164)

① 堰：底本卷首《江山县志》目录有，卷之一輿地志五脱漏。

② 底本卷首《江山县志》目录作塘汛、营寨，底本卷之二沿革志四兵防目中作营寨、塘汛。

## 卷之三

食货志一	(169)
户口	(169)
食货志二	(172)
赋役	(172)
食货志三	(191)
仓储附:躅贩 <sup>①</sup>	(191)
食货志四	(199)
物产	(199)

## 卷之四

学校志	(203)
学官附:名宦、乡贤、忠孝、贞节各祠 <sup>②</sup> 学额 学田 书院 义学	(203)

## 卷之五

秩祀志	(265)
坛、庙附:寺、殿、庵、观、院、阁 <sup>③</sup>	(265)

① 底本卷之首《江山县志》目录作仓储附:躅贩,底本卷之三食货志三分仓储及附:躅贩 2 目。

② 底本卷之首《江山县志》目录作名宦、乡贤、忠孝、贞节各祠,底本卷之四学校志学官目中作名宦、乡贤、忠义、节孝祠。

③ 底本卷之首《江山县志》目录作坛、庙附:寺、殿、庵、观、院、阁,底本卷之五秩祀志分坛壝、庙祠及附:寺、观、庵、院 3 目。

## 卷之六

职官志一	(293)
文职	(293)
职官志二	(317)
文职	(317)
职官志三	(331)
武职	(331)
职官志四	(336)
名宦	(336)

## 卷之七

选举志一	(344)
荐辟	(344)
选举志二	(349)
进士	(349)
选举志三	(370)
举人	(370)
选举志四	(400)
贡生附：监生 <sup>①</sup>	(400)

---

<sup>①</sup> 底本卷之首《江山县志》目录作贡生附：旧志监生，底本卷之七选举志四分贡生及附：监生2目。

## 卷之八

恩荣志一	(428)
戚畹附:选侍 <sup>①</sup>	(428)
恩荣志二	(430)
封赠	(430)
恩荣志三	(440)
荫袭	(440)
恩荣志四	(443)
仕籍	(443)

## 卷之九

人物志一	(457)
儒林	(457)
人物志二	(462)
名臣	(462)
人物志三	(466)
忠烈	(466)
人物志四	(485)
武功	(485)
人物志五	(489)
循良	(489)

① 底本卷之首《江山县志》目录作戚畹附:选侍,底本卷之八恩荣志一分戚畹及附:选侍2目。

---

人物志六	(492)
介节	(492)
人物志七	(494)
孝义	(494)
人物志八	(507)
文苑	(507)
人物志九	(512)
隐逸	(512)
人物志十	(514)
耆寿	(514)
人物志十一	(516)
流寓	(516)
人物志十二	(520)
方伎附:仙释 <sup>①</sup>	(520)

### 卷之十上

列女志一	(524)
节孝	(524)

### 卷之十下

列女志二	(613)
------	-------

---

<sup>①</sup> 底本卷之首《江山志》目录作方伎附:仙释,底本卷之九人物志十二分方伎及附:仙释2目。

节烈·····	(613)
列女志三·····	(638)
贞孝·····	(638)
列女志四·····	(640)
贞烈·····	(640)
列女志五·····	(644)
孝妇·····	(644)
列女志六·····	(646)
寿母·····	(646)

### 卷之十一上

艺文志一·····	(648)
制敕·····	(648)
艺文志二·····	(663)
奏议 <sup>①</sup> 附：申状  详文·····	(663)

### 卷之十一中

艺文志三·····	(682)
文辞碑记  传文 <sup>②</sup> ·····	(682)
艺文志四·····	(706)
文辞序  赞  铭  书  跋  祭文  谀词·····	(706)

① 底本卷之首《江山县志》目录作奏议，底本卷之十一上艺文志二目作奏疏。

② 底本卷之首《江山县志》目录作碑记、传文，底本卷之十一中艺文志三文辞目中作记、传。

## 卷之十一下

艺文志五·····	(750)
诗赋附:诗余·····	(750)

## 卷之十二

拾遗志一·····	(807)
古迹·····	(807)
拾遗志二·····	(820)
冢墓附:义冢 <sup>①</sup> ·····	(820)
拾遗志三·····	(829)
祥异·····	(829)
拾遗志四·····	(837)
丛谈·····	(837)

## 卷之末

邑人纂述书目 <sup>②</sup> ·····	(852)
旧志纂修姓氏·····	(857)
附刊:编辑志书告示·····	(860)

① 底本卷之首《江山县志》目录冢墓有附义冢3字,底本卷之十二拾遗志二冢墓目中无附义冢3字。

② 底本卷之首《江山县志》目录作邑人著述书目,底本卷之末作邑人纂述书目。

## 《江山县志》卷之九

## 人物志一

南塘讲学以来，正传未坠，其间行修名，立大节，彰彰俱卓然，令人起敬。他如以学问显，以齿德尊，为国华，为人瑞，为隐君子，为迁客骚人，缅想风徽，至今如见。下至一伎之长，虽小道亦有可观者，具录之，将以备考鉴焉。志人物。

## 儒 林

## 宋

徐存〔汪浩《志》〕字诚叟。从龟山杨时学，既有得，讲道于家，执经者前后千余人。时相秦桧欲识之，不能得。朱晦庵夫子屡过访，甚敬服。所著有《六经讲义》、《中庸论》、《孟解》、《潜心室铭》。门人有周贲、周孚、柴卫，西安郑雍、陆律，常山江泳，皆卓然名世。卒后，朱子有诗吊之。号逸平先生，祀乡贤。案：朱子少时见存于清湖，存告以克己归仁、知言养气之说。

柴禹声〔汪浩《志》〕字元振，居长台。宣和间，同徐存受业于杨龟山。所居有潜心室，伊川门人邹柄为之记，徐存为之铭。绍兴间，四明高闾为国子

司业，以公堪充史馆，特荐于朝，除国史。兄禹功，晚亦游杨门，颜其堂曰世学。

**郑升之**〔汪浩《志》〕字公明，居协里。师徐存，登进士第，除学官。尝论学术之害，莫甚于老庄，乞勿命题，论甚切至。召试馆职，后为吏部郎，守贺州。累官至御史中丞。著有文集。

**柴中行**〔汪浩《志》〕字与之。第进士。庆元中，倅抚州。时，方以伊洛为伪学，会乡试，漕司前期取家状，必令书以“不是伪道学”五字，公独申漕司曰：“自幼习《易》，读程氏《易传》，如以为伪，不愿考校。”士论壮之。后为太学博士，迁知赣州军。请老归，与弟中立、中守讲学于南溪，从学者数百人。若东涧汤伯纪、双峰饶伯舆，皆出其门。学者称之曰南溪先生。卒，赠通议大夫、宝章阁待制，谥宪肃，祀乡贤。案：《宋史》作余千人，《宋登科记》作江山人。宋成綬《志》以中行列名臣，尝摄韶州郡事，蹶丁钱，减苗斛，赈饥羸，运司委代行部，问民疾苦，捐盐息，加惠远民。知光州，治行为淮右最。入为吏部郎官，上言好进、好同、好欺三弊，持正平允，不为势屈。擢宗正少卿，调秘书监。论欲结人心，莫若去贪吏。欲去贪吏，莫若清朝廷。进秘阁修撰。知赣州，治盗有方，境内肃清。

**周颖**〔《衢州府志》〕字伯坚，江山人。受业安定胡瑗，以文行称。与赵抃、李觐交。抃为谏官，颖移书曰：“当公心以事君，平心以待物，无以难行事强人主，无以私喜怒坏贤士大夫。”抃以书进，仁宗喜欲用之。熙宁初，诏举节行才识，守胡邈以颖应召，赐进士第，授校书郎。王安石礼敬之，问新法何如，对曰：“歌谣甚盛。”安石喜叩其词，颖高诵曰：“市易青苗，一路萧条。”安石不乐，出宰乐清，卒。颖气岸雄豪，行事似张乖崖。门人私谥正介先生。有文集行于世。祀乡贤。

**柴卫**〔汪浩《志》〕字元忠。师徐存，学有端绪。初历肇庆、通州教授，以理学倡士。尚书刘公章以四科剡荐，屡迁大理寺正，治狱宽平。所著有《奏议》、《芹说》等书。

**祝常**〔汪浩《志》〕字履中，一名昌言。举进士，尝从胡瑗学。熙宁中，王安石著《三经新义》，诏以常为编校。常以正义难之，忤安石，出知平阳县。

终殿中丞。〔宋成绥《志》〕《两浙名贤录》作常山人。《宋登科记》：江山人。

江 跻〔《两浙名贤录》〕字元寿，江山人。吴越御史景防之五世孙，第进士，累官殿中侍御史。在朝论事，以正心诚意为本。绍兴初，率全攻丞相朱胜非，更五六疏，忤旨，一时俱罢。后高宗思之，赐手诏，召为司农卿。未及用，卒，赠银青光禄大夫。

毛 琥〔汪浩《志》〕居镇安。治五经，尤淹贯子、史，抱道自晦，不为声利动，时论翕然称之。

毛 文〔陆游《入蜀记》〕毛德昭，名文，衢之江山人，居于秀。予儿时从之甚久。德昭极苦学，中年不幸病盲而卒，无子。其盲后，犹终日危坐，默诵六经。

## 元

郑惟贤〔汪浩《志》〕字齐仲。两举乡贡，不偶用。经明行修，任本县儒学教谕，严立课程，考校文行。作《青鸾赋》，名重一时。监司交荐，将擢为国子助教，以足疾归，结屋梅泉，授徒讲学。蔡元道、姚正传，皆北面事之。

## 明

周 任〔《两浙名贤录》〕衢之江山人。与弟积师事章文懿公，讲明理学，潜心体究。登弘治乙丑进士，预修《孝庙实录》。时，逆瑾用事，诱以殊擢，不听，乃补莆田县令。升刑部主事。武宗南巡，陆震以直谏下狱，抗疏救之。后出守梧州，地方多事，以劳瘁致疾，卒于官。平生师友，尽一时名贤，如王阳明、夏敦夫、魏庄渠。讲明理学，务求真是，直欲追古圣贤而后已。著有《元峰文集》，藏于家。

周 积〔汪浩《志》〕字以善，号二峰，居镇安。天性诚笃，潜心理学，专务实践，动准古人。师事章枫山，受《易》蔡虚斋。举乡荐。复师王阳明。其友王龙溪曰：“君子于枫山得其旷，于虚斋得其博，于先师得其立诚之旨，可谓信道有闻者也。”著《读易管见》、《启沃录》、《二峰摘稿》诸集。历仕皆有惠政，民

立石颂德，从祀乡贤。〔宋成綏《志》〕嘉靖丙戌，謁选授南安推官，有古循良风。阳明征思南班师，得疾薨，积躬亲殓殮，心丧三年如一日。升知沅州，迁德王府长史。逾年，致仕归。性喜讲学，晚年矫其弊曰：“为学如治病，学不身体力行，是徒讲药方类也。”人以为至言。

郑 骝〔汪浩《志》〕字德夫，号鹿溪，居协里。醇和笃至，喜怒不形。学以立诚为宗，参解良知，而立诚愈透。王阳明于《归省序》，以任道相期。任主政，抗疏议礼。守韶冰洁，辟斋讲学，士类宗之。司宪滇中，从征安南，有功预赏。韶祀名宦，邑祀乡贤。〔宋成綏《志》〕《韶州续志》：江山人。进士。嘉靖十二年，知韶州府。宽和乐易，大雅好名，民畏爱之。掌校各庠，士拔其尤，收于明经馆养之，择文学师之，立考德问业簿，以稽勤惰。历官云南副使。

徐 霈〔汪浩《志》〕字孔霖，号东溪，居市后。师事阳明，独契良知之旨。任谏议大夫，疏救夏相国言，受廷杖，谪外。既而视学中州，所拔皆名士。升东粤左藩，引疾归。筑东溪书舍，集同志讲学，多发宋儒所未发。年九十，好学不倦，士林翕然宗之。著有《东溪文集》。祀乡贤。

王西山〔宋成綏《志》〕名未详，江山人。与徐霈同学。宅心制行，卓越流俗。早游阳明先生门，日讲良知格物之学，耽于道腴，淡弃荣利。

林文琮〔宋成綏《志》〕号阳溪，江山人。与徐霈同学。富于学术，叠叠千言，貳南陵士论，翕然称之。

何 鑑〔宋成綏《志》〕号五竹，江山人。与徐霈友善。由贡途补广昌，曲为陶铸，多所成就。旋振铎南阳，遭谗而归。讲学文溪之上，霈引为同志之助焉。

何 潜〔汪浩《志》〕字哲夫，号宾峰。髫岁，即自端趋向，父母欲令事生殖，笑曰：“择术于儒，素愿也。下此，则庸庸耳。”遂学《易》于郑北园、章枫山两先生之门。又得唐渔石、周元峰丽泽相资，故其学有体认之功。后为建阳司训。至，即清理学田，兴修废坠，作新士气。未几，声震遐迩。讲下诸生，多底成效。

朱 夏〔天启《志》〕号华山居士。弱冠，入成均，私淑阳明，潜心理学。王龙溪、李见罗雅重之。著有《明德楼稿》。

王脩易西山下人。嘉靖时，贡生。官学正，为人耿直清介，不附权势。平日以学问、气节自励。督抚闻其名，招之讲学，不轻赴，人服其有节操。或云即王西山，存以俟考。

## 人物志二

### 名 臣

#### 宋

毛 注〔《宋史》列传〕字圣可。举进士，知南陵、高苑、富阳三县，皆以治办<sup>①</sup>称。大观中，荐为御史。蔡京免相留京师，注疏其擅持威福，动摇中外，交植党与。于是，论者相继，京遂致仕。四年，替再见，注又言：“京罪积恶大，天人交谴。宜早令去国，消弭灾咎。”京始出居钱塘。注复采当世之急务，曰省边事，足财用，收士心，禁技巧。所论切于世务类此。迁左谏议大夫，罢，提举洞霄宫。居家数载，卒。建炎末，追复谏议大夫。有奏议、文集。祀乡贤。〔宋成绥《志》〕《宏简录》、《两浙名贤录》俱作西安人。今据天启《志》载，毛注宅在镇安清漾，世住江山，则为邑人无疑。汪浩《志》作字圣远。

毛 友〔汪浩《志》〕字可达。少游太学，与乡人冯熙载、卢襄，号三俊。崇宁间，累迁广陵帅。了翁陈瓘徙山阳，道由江都，瓘先遣书遗之，即出郊候瓘，语极推诚。寻守镇江，方腊已残睦、歙，监司犹不以实闻，友奏言之。时宰

<sup>①</sup> 办，底本作辨。按：《宋史》卷三百四十八毛注本传、康熙《衢州府志》卷三十二毛注本传作辨，本标点本据此改作办。

怒其张皇，遂与宫观。其谢表曰：“两郡生灵已罹非命，一道使者犹谓无他。”擢闻之，以书誉于亲旧曰：“蔽遮江淮，阻遏贼势，斯人有助也。”屡官至端明殿学士。一云西安人。

江 溥〔两浙名贤录〕江山人。字叔源。绍兴十五年进士。除襄阳教授，辑所见成备边书上于朝。历迁殿中侍御史，前后所上凡八十疏。出移京西路计度转运副使。卒，赠金紫光禄大夫。溥资性忠亮，疾恶如仇，多为当事所怒，而上独知之，益明目张胆，无所忌讳。魏邸亲吏马校尝营私居，矫令役民屋，摧压死者十三人，伤者倍之，阅月而上不闻。溥弹之，请以次第议罪。上览疏，曰：“父子之间不谓卿能如此。”亟从，无少忤。于是，权贵敛迹，一时称为真御史。子公亮，任四川提刑，清亮有父风。

刘 章〔《宋史》列传〕字文儒。绍兴十五年，廷对第一。迁秘书郎兼王府教授。事王邸，专以经义文学启迪掖导。秦桧当国，嫌不附己，讽言者媒孽其罪，出倅筠州。桧死，擢秘书少监。议郊庙礼文，当置局讨论，诏行其说。孝宗受禅，念旧学，拜礼部侍郎，奏禁遏淫祀，仍于三朝史中删去道释符瑞志，以为非《春秋》法。进权礼部尚书，以资政殿学士致仕。卒，谥文靖。〔宋成绥《志》〕史传作龙游人，《宋登科记》作江山人。

蒋 傅〔汪浩《志》〕字得宗，住鹿溪。太学生。宁宗时，同杨宏中、周端明、张道、林仲麟、余范，六人伏阙上书，言赵汝愚之忠勤，李祥、杨简之非党，李沐人回邪，乞窜沐以谢天下，还祥等以收士心。韩侂胄大怒，内批编管傅等五百里外。天下号为六君子焉。祀乡贤。

柴 望〔《宋诗记事》〕字仲山，号秋堂，衢州江山人。嘉熙间，为太学上舍，除中书奏名。淳祐六年丙午元日日食，诏求直言，上《丙丁龟鉴》，忤时相意，下府狱。赵节斋疏救，得放归田里，因又号归田。景炎二年，三山孔大諫荐，特授迪功郎、史馆国史编校，辞归山中。宋亡后，称宋遗臣。〔宋彩《志》〕望以赵汝愚申救得归。钱塘吴石仓先生《柴氏四隐集跋》：望下临安府狱，京尹论救得释。考：《临安志》职官表，自淳祐元年四月，命赵与箴知临安府，至十二年正月始罢。则论救望者，与箴也。汝愚卒于宁宗庆元二年，距淳祐六年，已遥隔五十一年矣。

徐霖〔《抚州志》〕字景说，衢之江山人。试礼部第一，理宗喜得人。淳祐十二年，以宣教郎知抚州，祠先贤，宽租赋，赈饥穷，诛悍将，一月而政举化行。以言去，民遮道，不得行，及暝始由径以出。案：《衢州府志》作西安人。

## 明

毛恺〔《儒林录》〕字达和，江山人。嘉靖乙未进士。授监察御史，以言事与执政忤，左迁宁国府推官。升南工部主事。抽税芜湖关，商税不资，恺独厉清操，出纳委之县佐，税银储之县库，一毫不染。其岁额之盈者，则躅以予商。历升瑞州府知府。瑞俗多嚣讼，且多积逋。恺以礼义申之禁令，追积逋必宽其期限，贫甚者以俸余代为之偿。历升右金都御史，巡抚保定，擢左副都。穆宗嗣位，改刑部尚书，严饬邦禁，慎讞刑狱。疾作，乞休归。卒，赠太子少保，谥端简。恺喜讲学，躬行实践，一以养心寡欲为主，先儒语录，罔不参订其异同，究其归趣。历官二十四任，始终一节。〔汪浩《志》〕号介川，居镇安。初授行人，奉使却馈，有清献遗风。性喜讲学，手抄注《薛文清读书录》。清约俭素，当时有四君子之称。卒，祀郡邑乡贤。冢孙允让以任子刺辰州，清介明慎，不忝厥祖惠政，辰民至今诵之。

陆和〔《两浙名贤录》〕字子达，江山人。以进士任监察御史，巡按中外，凡九年。力持风教，所至百司戒飭。立朝抗疏直言，甚裨治体，京师号小铁面。

赵镗〔丁元复《赵镗传》〕字仲声，江山人。嘉靖丁未进士。授河南道御史，督长芦釐政。时军兴，需课甚亟，镗悉心经理，寻究弊端，条上封事，皆中肯綮。改应天巡按，慎举刺，厉风裁，威名大振。适南畿学政缺，命镗董其事。乙卯，按江南，益矢虔慎。擢顺天府丞。时方缺尹，镗以台臣夙望，飭典法绳之，大府帖然。改大理少卿，擢右金都御史。穆宗改元，移疾归，徜徉文溪间，更号留斋居士。〔汪浩《志》〕镗督学南畿，拔士多得人，如申相国时行、许相国国、王相国锡爵，皆出其门，其余不可胜数。世宗欲大用之，不果，遂移疾归，置义田。著有《留斋稿》。祀乡贤。冢子洙，字宗鲁，谦冲自牧，由

岁荐判河间，疏渠筑岸，通商惠民，百废俱兴。归筑三径以自适焉。

郑绩〔宋成绥《志》〕住市后。万历时，贡生。永平知县。初至，革派金旧例，邑人建革金亭，立碑颂之。祀名宦。

徐日葵〔宋成绥《志》〕字叔向，号藿心，世居南门。捷南宫，补刑部郎。值魏珰窃政，以鞠刘铎袂忤奄，廷杖，缙骑集门，虑母年高，举止自若，得旨谪外。珰败，赐还。又以直言谪迁大理寺副。卒于官。

## 国朝

黄大谋字圣筹，号石庵。由侍卫历官军门，赏戴花翎。临清寇起，击贼立功，任永平副将。水患闭余，发署米散赈，得安堵。事闻，擢韶南总镇。每召见，上谓：“卿武臣乃能如此，殊为难得。”又尝语大学士董诰曰：“此即永平赈饥之黄大谋也。”诰对以不徒有治才，兼工诗字，上益喜。先是援台韶兵恤银被干没，公廉知，悉追还，置干没者于法，兵民歌颂。嘉庆四年，以疾优致归家，置义娶田若干亩，族今赖之。

## 人物志三

### 忠 烈

#### 唐

祝 奢〔正德《志》〕字伯宗。隋末丧乱，率子弟以保乡里。唐武德四年，为贼李子通执于杭，死之。制将李大亮疏其忠，驰令异归。九年，诏封妻陈氏为怀德县君。

#### 宋

毛 棗〔《两浙名贤录》〕字叔镇，江山人。少有节操，晚以特恩为歙士曹。睦寇攻城，官吏皆遁，棗曰：“吾职司寇，狱有系囚，谊不可去。”乃摄州事。时，二子贡辟雍，即遣人持印绶城以出，令上之朝。城陷，棗衣冠坐堂上，贼胁助使降，不屈，骂不绝口，婴刃而死。妻钱氏忽忍去，掖其姑，又忽忍去，俱遇害。〔汪浩《志》〕事闻，赠朝请郎，官其后三人。祀乡贤。

毛 奎〔天启《府志》〕旧名侗，字世高。绍圣间进士，为闽曹。建卒张员作乱，奎力疾谕之，遂死于兵，血流如白乳。

徐 揆〔《宋史》列传〕衢州人。游京师，入太学。靖康元年，试开封府

进士，为举首，未及大比，而遭国难。钦宗诣金营不归，揆率诸生扣南薰门，以书抵二酋，请车驾还阙。二酋见书，使以马载揆至军营议难。揆厉声抗论，为所杀。建炎二年，追录死节，赠宣教郎，官其后。〔汪浩《志》〕字宅卿，居仕阳。靖康初，游太学，待试省闈。金人至都城，揆上书责其败盟，不得达。翊日，又往。或曰：“子双亲垂白，无位于朝，乃以死殉国乎？”揆曰：“不然。昔王蠋义不事燕，绝脰而死，齐之残民，感激奋发，而田单得以成功。今国破主辱，可无一士死难。揆不敏，窃自比于蠋，庶几天下士奋义而起。”毅然至敌营，出袖书，且读且责。金人刃之。绍兴初，特赠宣教郎。祀乡贤。《明统志》、《衢州府志》俱作西安人。《两浙名贤录》：江山人。

周随亨〔正德《志》〕崇宁二年进士。绍兴间，以直龙图阁传宣陕蜀，死于闽州乱军。赠忠国侯。

祝梦熊〔《衢州府志》〕字宽夫。嘉泰二年进士。累官监察御史。请弛伪学之禁，又请复朱熹、赵汝愚等。及开禧用兵，疏边臣启衅，忤韩侂胄罢。又以聚徒讲学，谪黄岩尉。寇犯境，率义勇拒之，被执不屈死。赠龙图阁待制，谥献烈。〔汪浩《志》〕居魁潭。谕葬西安之赤塘山。

徐应鑣〔《宋史》列传〕字巨翁，衢之江山人。咸淳末，试补大学生。德祐二年，宋亡，瀛国公入燕，三学生百余人皆从行。应鑣与其子琦、崧、女元娘，誓共焚，子女皆喜从之。太学，故岳飞第，有飞祠。应鑣祀飞曰：“天不祐宋，社稷为墟。应鑣死以报国。”琦亦赋诗自誓。祭毕，以酒肉饷诸仆，诸仆醉卧。应鑣乃与其子女入梯云楼，纵火自焚。一小仆未寐，闻火声，穴牖视之，父子俨然坐立，如庙塑像。走报诸仆，坏壁入，扑灭火。应鑣不能死，与其子女怏怏出户去，莫知所之。翼日，得其尸祠前井中，皆僵立瞪目，面如生。益王立，赠朝请郎、秘阁修撰。同舍生私谥曰正节先生。案：〔汪浩《志》〕正德间，御史高胤、参政梁材请于朝，为建祠，号忠节，祀乡贤。弟应鑣，谏议大夫，弃官隐阳美。其子琨，悯父之志，亦遁居于新安。

毛附凤〔汪浩《志》〕居镇安。宋室北迁，益、广二王入闽，取道江山。元兵急迫，附凤与嵩高、柴希圣以义兵遇之，二王得抵闽，而附凤、希圣同殉难，其死最惨。

## 元

苏幼安〔正德《志》〕字心德。举明经，为衢州路教授。归老时，乡寇犯境，欲执幼安去。大骂不屈而死。贼遂解去。乡人立祠祀焉。

## 明

周广中〔正德《志》〕字子容。官至河南佥事。洪武庚申，雷震谨身殿，三上章，不报，遂致仕。后以直道死于权奸，闻者伟之。

周能〔正德《志》〕字德成。其先江北人，占籍江山。幼骁勇，习武艺。明初，从征鄱阳，授百户，累立战功，升福建行都指挥使。后征云南阵亡，赐地以葬，从祠功臣庙。

柴德载〔正德《志》〕为工部主事。洪武初，以刚直忤胡惟庸死。

王均〔汪浩《志》〕字质平，住三卿口。洪武十三年，充锦衣卫校尉，从征阵亡。弟智，字势明，承其役，从文皇南征有功，世袭鹰扬卫百户。

韩永〔汪浩《志》〕建文时，为兵科给事中，论事慷慨。靖难后，杜门不出。召之任，不应，曰：“吾王蠹也。”遂坐死。

黄埒〔《衢州府志》〕江山人。嘉靖四十二年，处州括贼作乱，率壮丁数十人御于破塘坞口。自辰至午，与黄钰、周梧俱死之。贼稍却，乡藉以全。德其功，为立祠。〔汪浩《志》〕埒死时，长子甫三岁，次仅期月，妻祝氏孤茆矢志。尝罹贪暴之横，九死不屈，人谓节义两全云。

柴荐禔〔汪浩《志》〕字德馨。丙子乡荐。崇禎间，任蒲川令。抵任不数日，流寇猝至，城陷被执，不屈，遇害。祀乡贤。案：《河南通志》所志略同。

柴国楹〔宋成綏《志》〕明末，中书舍人，为兵所执，不屈，死。

## 国朝

王泽浩〔采访事实〕礼贤人。乾隆己卯科武举。历任福建台湾水师游击。戊戌，海氛不靖，檄浩捕剿。八月十五日，巡缉海洋，遭风覆没。五十年，

奉旨赐恤荫一子，承恩入监。

**何肇勤**〔采访事实〕原名朝清，字望远，住大夫巷。以行伍累升广西提标守备，少笃至性，重气谊。乾隆六年，奉剿湖南教匪，力战破贼。主帅见其奋勇可嘉，令督所部直攻贼寨，遇伏阵亡。赐恤世袭，祀昭忠祠，并敕礼部行查事实，付史馆立传。

**周长泰**〔采访事实〕住三圣殿巷。乾隆丙午武举。以军功任南康营都司。奉调征剿湖北教匪，阵亡于宜昌东湖县之连环壁。赐恤世袭，祀昭忠祠。

**林怀玉**〔采访事实〕住大东门。副将林向荣之子也。以行伍历陝西留坝营千总，赏戴蓝翎。调浙剿夷宁波，阵亡。赐恤世袭，祀昭忠祠。

**姜燮**〔采访事实〕潭源人。署衢州右营把总。道光庚子，随征定海夷匪，阵亡于宁海。

**周万治**〔采访事实〕任严州协把总。道光二十一年，随征镇海阵亡。赐恤世袭云骑尉，袭次完时，给予恩骑尉罔替。祀忠义祠。

**姜兆陞**〔采访事实〕任衢州城守外委。咸丰十年，随征粤匪，阵亡于梅溪。赐恤世袭云骑尉，袭次完时，给予恩骑尉罔替。祀忠义祠。

**祝廷楨**〔采访事实〕大溪滩人。道光壬辰武举。任平阳千总。咸丰十年，随征粤匪，阵亡于富阳。赐恤世袭云骑尉，袭次完时，给予恩骑尉罔替。祀忠义祠。

**叶选**〔采访事实〕任华埠头司外委。咸丰八年，粤匪扰华埠，阵亡。赐恤世袭云骑尉，袭次完时，给予恩骑尉罔替。祀忠义祠。

**杨公倬**〔采访事实〕严州把总。咸丰八年，粤匪之乱，阵亡。赐恤世袭云骑尉，袭次完时，给予恩骑尉罔替。祀忠义祠。

**甘彰辉**〔采访事实〕本县清湖人。由勇目历保至花翎游击。同治年，随征陝西，阵亡。奉旨赐恤世袭云骑尉，袭次完时，给予恩骑尉罔替。祀忠义祠。

**余登荣**〔采访事实〕住北乡雁塘。道光丁酉武举。任严州寿昌汛千总。同治元年八月，在乌石滩堵剿粤匪，阵亡。赐恤世袭，祀昭忠祠。

李梦庚〔采访事实〕北乡白渡庄人。中道光壬辰科武举。咸丰四年，檄署严州分水汛千总。十一年六月，粤匪由严州踞境，督带兵团分路防剿。二十日，贼大队至，复奋力打仗，中炮阵亡。子开甲从死，妻、媳俱遇害焉。当时汇报案内未获查明，于同治十一年六月补详请恤。

郑鸿藻〔采访事实〕城庄太平坊人。以邑武生应召募。咸丰六年，粤匪将陷广信，饶镇突出城防堵，奋力打仗，身死行间。事闻，给予云骑尉世袭，祀忠义祠。

徐凤诏〔《殉难册》〕南乡茅坂人。邑诸生。咸丰八年，粤匪自永丰窜浙，县令余以增倡率团勇堵截要害，凤诏率所部屯广邑灵鹫寺。贼纵火焚寺，凤诏身先杀贼，为所围，遂遇害。事闻，给予世袭，祀忠义祠。

是役，从死团民：

徐元海、徐永康、徐春发、徐国恩、徐加满、徐至疆、徐开泰、徐尚炯、徐上达、徐加倍、徐尚元、徐位宗、徐伦明、徐永银、徐上玉、徐上松、徐永林、徐连梓、徐能聪、徐尚清、徐聚毅、徐增贵、徐历塘、徐由虔、徐真学、徐传问、徐文世、徐崇雅、徐尚茂、徐光武、徐履道、徐瑞芳、徐木车、徐大耳、徐好水、徐堆积、徐中员、徐瑞裕、徐达光、徐嘉彬、徐肇福、徐佳宗、徐向荣、徐为武、徐坦吉、徐兆方、徐文招、徐文正、徐永鳌、徐启昌、徐大国、徐玉式、徐应中，俱系本庄茅坂人。姜树河、毛承教、姜树台、姜成名、姜兆旺，俱三十二都人。毛增听、毛承文、周志登、郑双善、王金顺、周文珠，俱万青山人。徐允恭、周嘉祐、柴子均、徐元顺、徐启祥、徐希学、徐肇庆、徐元恭、徐廷泰、周振旅、徐宗海、徐操古、周朝朝、周敏修、徐佳璜、周良楼、周良能、叶炳煌、柴如辉、柴方兴、柴兆富、柴有才，俱学坦庄人。王加珠、柴大兴、王万和、王大坯、王大咏、王大溪、王大魁、王大发、王长青、王循高、王明高、王瑞长、柴寿昼、柴大刚、柴正业、柴允周、柴元面、柴福善、柴德富、柴文庶，俱东儒人。朱文鸿、朱界仁、陈茂烟、陈度川、陈善发、陈乌麦棵、陈南京男，俱深渡庄人。洪茂刚、洪文助、洪文本、洪廷谟、洪廷灿、洪廷杰、洪廷始、洪廷松、洪廷选、洪廷效、洪承隆、洪承喜、徐衰洪、徐衰多、徐善毕、徐华堂、郑赖头、郑祥有、毛兆科、王如蓬、王华庆、王华荣、王大头、王衰头、洪茂泰、郑学隆、郑佩璐、郑学

台、郑庆五、郑庆云、郑庆增、郑庆文、郑庆祥、郑开运，俱贺村庄人。以上均于二月间或以前往助剿死，或以退保本庄阵亡。事闻，并蒙赐恤，祀忠义祠。

深渡庄又有林凤羽，现详请恤。其余各庄团首备录如左：

徐汇水〔《殉难册》〕同上。茅坂人。从九品銜。与徐凤诏同往，率团身死。赐恤云骑尉，世袭次完，给予恩骑尉罔替。祀忠义祠。

周淇园 周淇林〔《殉难册》〕俱凤林人。监生。兄弟俱在灵鹫寺防堵，遇害。

从死团丁：

周邦翰、周新泰、周天甲、周秋狗、周嘉仓、周仁高、周正昌、周永谦、周加兴、姜佐周、徐有发、毛荣衢、毛荣福、毛德寿、毛天由、周襄堂、周大川、周维炎、徐秉旺、黄吉发、朱连泗、叶文泽、杨廷选、周廷寿、陈永邹、周维表、周世栋、周秀洁、周正光、周光福、周茂高、周乾修、周天年、周天运、周光宝、周进宝、姜月林、姜元哲、姜兴连、姜应程、姜连雨、姜绍登、姜盘池、姜永旺、徐翰伦、徐廷长、徐登楷、徐大伴、徐世熙、徐存积、徐绍富、徐有法、徐兆满、徐元坚，俱本庄凤林人。事闻，祀忠义祠。

胡德三官溪人。 祝敏松南坞人。 祝日照石门人。俱监生。  
毛时强监生，江郎街人。 陆际昌监生。 陆长城武生。 陆焯附生。俱和睦人。

以上各率南乡团勇：

官溪：胡日本、胡光舒、胡世裕、明光铸、胡家俭、胡泰律、胡法光、胡善接、胡行三、胡公溥、胡宽三、胡国柱、胡维驹、胡瑞五、胡增丰、胡押全、胡如旺、胡士齐、胡世存、胡仲智、胡世繁、胡梦儒、胡国治、胡国才、胡国挺、胡启凤、胡招红、胡大朝、胡兆科、胡旭寿、胡志明、胡廷丰、胡崇刚、胡崇芳、胡开呆、胡兆盛、胡国昇、宁明开、杨希目、周神祐、周士霖、周家盈、周壬丙、周良森、徐马超、周福庆、周长才、周如福、姜世久、梅天发。 南坞：杨有茂、杨嘉杰、杨介如、杨峰彪、杨世奉、杨朝熙、杨兆宇、杨际盛、杨文郁、杨文耀、杨汝芳、杨万祥、杨万昌、杨在苗、杨邦贤、杨水、徐良渥、徐士元、徐承家、徐崇柏、徐奠漓、徐秉钊、徐奠淖、徐秉镛、徐国定、徐国宅、徐秉杰、徐奠驹、徐秉铎、徐秉铸、徐

秉铎、徐莫洛、徐莫涎、徐秉铤、徐秉鍤、徐莫淙、徐秉阳、徐秉铄、徐秉简、徐秉恕、徐家年、徐毛驼、徐秉苴、徐莫泗、徐莫溶、徐家齐、徐国秀、徐秉豫、徐仁、徐秉矩、潘如发、潘建连、潘建海、胡世龄、毛志仁、祝正璧、周秉诱、周福庆、周亨街、周观成、周亨衢、姜天祥、周进宝。 石门：赵显龙、赵永昇、赵协秩、赵协坛、赵瑞亨、赵如海、赵文华、赵长茂、赵五狗、赵光照、赵如辉、赵光盛、赵恭荣、赵志发、赵顺发、赵茂才、赵礼兴、赵光约、赵袁显、赵袁嘴、周国仓、毛久、毛仁松、毛承仓、周乌毛、周上登、周志元、周志海、周进喜、周元吉、赵麻子、徐祥毛、毛乌毛、赵老五、赵男、赵淮、赵照、王陈香、周大运、柴泽、赵周、赵龙、杨仁才、毛志根、毛金鳌、毛如璧、毛光俊、毛如勋、毛起兴、毛秉安、毛廷经、毛元苞、毛士林、毛礼福、毛有才、毛时强、毛日柏、毛天福、王自楷、王如林、王国员、胡世高、陆兴旺、宋贤禄、屠祈、胡廷位、胡位佳、胡开申、胡官长、胡天赦、林祠堂、陈永福、徐日照、徐自皆、黄宾其、毛廷梧、赵协珍、赵光信、赵光濂、赵日炎、赵家俭、赵树桂、赵志信、赵惠亭、赵廷桂、毛起良、毛家龙、毛良高、毛士雨、毛天保、毛永堦。 廿五都：毛聚海。 和睦：陆加升、陆麟趾、陆立森、陆志宅、陆家臻、陆以信、陆天贵、陆永浩、陆善敬、陆世烈、陆凤台、陆家鹁、王大沅。 江郎街：童生毛承纪。俱以是役力战阵亡。事闻，与诸团首并祀忠义祠。陆焯更给世袭次完，给予恩骑尉罔替。

王宗勋 王宗淦〔《殉难册》〕二人，兄弟也。城庄树声坊人。宗勋，字康侯，从九品銜。戊午三月，粤匪窜踞江城，宗勋因母老，未尝少离。某日，将奉母走避深山，途遇贼，欲杀其母，胁使从，勋谓：“不宥吾母，吾惟有死，断不汝从也。”贼怒，遂两杀之。宗淦，字仿仙。岁贡生。粤匪之乱，率团在城北湖山，为贼所围。协之降，不屈；迫以刃，大骂，遂遇害。事闻，并蒙恤赠云骑尉，祀忠义祠。宗勋更给恩骑尉罔替。

蔡晋升 蔡豫升〔《殉难册》〕晋升，字康侯；豫升，字建侯，城庄经明坊人，俱邑诸生，豫升食饩。咸丰戊午，倡义在西乡上徐地方，督率民团，先后毙贼数十。贼大队至，众溃。兄弟持挺大呼杀贼，贼围愈急，势不能支，阖门死节，仅遗一孤。事闻，给予世袭，祀忠义祠。

何其勇 何汝芳〔《殉难册》〕其勇，字怀德；汝芳，怀德子，俱邑武生，

城庄税务前亭人。咸丰八年三月，率团在里张地方打仗，贼见其躯干修伟，疑为带兵武弁，攒刃杀之。父子俱罹害。事闻，蒙恩赐恤，祀忠义祠。

何隆昌廩生。王槐本州同。毛鹤翎州同。林显达八品。林宝森候训。毛赞行从九。吴吉儒从九。何道心监生。林聚彩监生。毛祥吉八品。毛瞻鲁增生。以上据〔《殉难册》〕，俱城庄人。咸丰八年，在城内率团，阵亡。隆昌，世袭云骑尉。槐本以下六人，更给恩骑尉罔替。道心、聚彩与诸人，并祀忠义祠。祥吉于同治十一年补详请恤。

徐惇 徐振镛〔《殉难册》〕惇，字德一，郡诸生；振镛，字声扬，邑廩生，城庄来桂坊人。粤匪之乱，父子俱协同率团，团众溃，贼先协其父，继协振镛，大骂不屈，贼遂两杀之。事闻，并给世袭，祀忠义祠。

毛晋谔 毛金台 毛晋瀛 毛鸾台〔《殉难册》〕鸾台，守御所銜；金台，议叙八品；晋谔，郡禀生；晋瀛，郡庠生。四人同堂弟昆也，俱城庄雅儒坊人。咸丰八年，率团防堵，力竭阵亡。事闻，给予世袭，祀忠义祠。金台，更给恩骑尉罔替。惟鸾台未蒙赐恤。

毛寅宾 毛壬林〔《殉难册》〕二人兄弟，俱邑诸生，城庄褚厨巷人。粤匪乱，同日率团遇害。事闻，蒙恩赐恤，给予世袭，祀忠义祠。

毛文灿 毛邦昌〔《殉难册》〕文灿，监生；邦昌，武生。父子也，城市心街人。咸丰八年，在城内率团，阵亡。蒙恩赐恤，祀忠义祠。

郑守谦附贡。毛承彝 毛连第 何春华 郑增桂 王惇伦俱附生。毛起澜 郑次槐 毛绍棠 毛时霁俱监生。郑锡锜 郑景沅 王文炳 郑兆良 周登高俱监生。郑元灿 毛增华 徐德裕 王肇忻俱监生。郑朝荣 王炳荣俱武生。以上据〔《殉难册》〕，俱系在城倡率团民：

童生蔡承谟、蔡承训、毛振镛、毛鸿年、毛鸿典、陆元庆、刘起华、毛学奎、毛学玺；礼书毛时森；讲生杨连科；民人王日宣、王崇年、毛廷焯、毛廷焯、何开疆、毛振发、毛天赦、毛万选、毛学尧、毛文开、王金堂、王作义、林承恩、周宇龙、周宇坤、周宇成、周宇福、周志静、杨如金、杨耀廷、杨友梓、杨懋功、金大

德、郑汝泰、郑汝宝、郑元喜、郑元昌、郑家垵、郑文楫、璩元琮、璩永庆、璩元森、徐棠第、王承照、周福庆、毛敦懋、毛树发、毛树高、毛树滋、毛仁储、毛仁中、毛仁於、毛仁罗、毛仁魁、毛仁三、毛仁义、黄文魁、毛增福、王廷训、程文添、毛家旺、杨国成、毛善根、何锡林、何廷锡、林在屿、林长盛、林长泰、林长茂、徐进旺、徐起怀、王大杰、王光兴、刘晋藩、刘尚志、毛庆椿、童生、柴毓葵、王荣恩、王日进、何锦宏、何立绪、何立强、何福攀、王日暹、王荣奎、王锡圭、王开卷、王开经，于咸丰八年在本地御贼阵亡。事闻，郑守谦等五人，蒙恤世袭。起澜以下与团民，并附祀忠义祠。其团首王惇伦、郑增柱二名及团勇王荣恩以下，于同治十一年补详请恤。

姜学淮〔《殉难册》〕一名大英，西乡潭源人。监生。幼负英姿。壮岁，多雄略。咸丰八年，粤匪陷江山，四出掳杀。学淮率团抵御，驰刀入阵，斩首数级。因众寡不敌，阵亡。事闻，给予世袭，祀忠义祠。当日协力率团诸人列如左：

姜廷熊 姜永昌俱从九品衔，新塘边人。 姜步堃监生，俱新塘边人。 姜宗耀职员。 郑耀光监生，俱潭源人。 姜天吉 严荣光俱监生。 姜兆熊武生。 姜如松职员。 姜长富 姜如崧 周亨衡

姜学河俱西乡庄人。监生。以上俱率同西乡各庄团勇：

姜好智、姜来富、姜例考、王科泰、姜连厚、姜时运、姜廷岳、姜成美、姜元圭、毛赖面、王科本、姜玉堂、姜元寿、姜天厚、姜天喜、姜际魁、姜如杰、姜明书、姜明经、姜明天、姜鸿才、姜廷富、郑六指、郑伙头、郑朝华、郑朝东、叶国栋、姜志超、金前亨、姜增荣、姜翰儒、姜德用、姜天瑞、姜良德、姜聚财、姜元煦、姜廷熊、姜文梁、姜发荣、姜志谊、姜文照、姜惟赞、姜在信、姜维群、姜士章、姜继登、姜惟路、姜德望、姜廷富、姜开朝、姜家贤、姜文标、姜来贵、姜大发、姜正业、姜好合、姜文炜、姜志禄、姜海岳、姜廷纪、姜它它、姜贤宏、姜好正、姜仁义、姜聚发、姜良义、姜长兴、姜荷花、姜汝梅、姜希丁、姜天雄、姜之田、姜步壙、姜元恺、姜元昌、姜士明、姜兆璜、姜老鼠、姜文滔、姜连子、姜行天、姜德云、姜元安、姜世深、姜作造、姜连德、姜诗魁、姜文康、姜作教、姜国献、姜六指、姜云兴、姜存积、姜存善、姜锡浩、姜用仁、姜贤金、姜重阳、姜连

均、姜进修、姜时昌、姜文可、姜起富、姜起旺、姜鸿一、姜天恒、姜永宽、姜文煊、姜儒彬、姜儒超、姜士超、姜广士、姜广墉、周位信、周平添、周志忠、周志求、周日华、周红面、周云德、周玉梅、毛维淳、毛瑞庭、毛秉才、毛德超、毛远温、毛才富、毛三阳、毛祖修、毛尚福、严袁东、严太清、严阿五、徐兆坤、徐文纯、陈士有、陈士水、陈毛头、金士超、金超梓、金超相、金超信、金超睦、金超芳、鄢长寿、汪兴五、何殿丰、吴一麟、吴子勉、吴惟泰、吴士发、吴士淇、王连添、王廷明、刘文元、梁天寿、朱绍堂、郑国松、郑淮棊、郑淮篷、郑日暄、郑日清、郑老谦、郑进有、郑春和、郑狗货、郑廷良、郑文朝、李天和、李天福、李乌奴、李樟林、祝崇远、洪老四、姜志超、徐国祚、姜际嘉、姜方寿、姜天富、姜玉堂、吴文训、徐永鳌、徐廷众、金超俗、金士适、金大得、周永璋、周老浩、周锡美、周士拔、柴加謚、严士奇、刘善凤、周盛川、毛日红、金渐亨、毛承海、姜在行、姜廷海、毛德遗、毛三喜、毛振海、毛德豪、毛祖消、姜元寿、吴树才、吴逢基、吴登元、吴志其、吴元利、吴云那、吴仁孝、姜灿、刘黄狗、董招强、董家芝、严国栋、严泰星、严士五、严廷贤、严师效、周廷表、周维冒、姜好安、姜好杰、姜福多、姜寿明、姜永龄、姜天良、姜之琪、姜士佳、姜聚云、姜正茗、姜继周、姜永暄、姜永暄、姜佳招、姜佳锡、姜佳祀、姜德讚、姜希震、姜元煊、姜志恭、姜文贵、姜天乐、姜希均、姜文光、姜世均、姜世训、姜希序、姜克尚、姜寿民、周士全、陈士表、吴佳瀛、祝可进、姜聚金、姚启华、徐世茂、郑永握、严瑞兴、严士琪、郑文学、李宽奇、毛维曾、钱积金、严瑞凤、钱永天、郑景堂、徐天赦、徐元厚、刘赦秋、杨三戒、吴茂栗、吴茂榕、吴寿康、周连聚、吴瑞初、姜功志、周秉权、周志义、周志刚、周允寿、严下元、姜维高、吴天德、吴置临、周平天、周金山、周安祖、何元檀、吴曰勇、吴文炳、叶康表、周日红，于咸丰八年二月，在新塘边阵亡。事闻，祀忠义祠。职员姜宗耀复蒙赐恤云骑尉，袭次完时，继袭恩骑尉罔替。步堃，于同治十一年补详请恤。

汪文澜 汪志远〔《殉难册》〕文澜，郡庠生；志远，八品衔，北乡大陈庄人。咸丰八年三月，粤匪闯境，与同族率团守御，先后毙贼数十名。初八日，贼大队至，远等各发鸟枪，毙贼目数名。贼众麇麇围闾村，被害。事闻，蒙恩赐恤云骑尉，世袭次完，给予恩骑尉，罔替。其同时协力团首备案如左：

汪承照都司銜。汪震庚理问銜。汪晴煦汪金元俱增生。汪如升营千总銜。汪癸滋汪履庚俱州同銜。汪振甲汪士兴俱从九品銜。汪锦彪武举。汪应谦廩生。汪以丙增生。汪坤元汪履鳌汪履暄俱附生。汪士瑞汪士梯汪承谟汪圣龄汪理达汪庭林汪志云汪恩洋俱监生。以上据《《殉难册》》，俱大陈庄人。贼众猝至，均系随团打仗阵亡。事闻，并蒙赐恤云骑尉世袭，袭次完时，给予恩骑尉罔替。祀忠义祠。

是役，从死团目，本庄：佾生汪凤毛，童生汪景埰，昼夜枕戈，先身陷阵，埰尤荡杀悍贼数名。其余童生：汪士舆、汪以寅、汪志逊、汪士苏、汪士柏、汪秉甲、汪占芳、汪志修。团丁民人：汪五天、汪开豫、汪志塘、汪志有、汪红豚、汪德红、汪国一、汪宇高、汪袁妹、汪庆安、汪志梁、汪尚忠、汪瑞元、汪士尊、汪开文、徐尚恭、徐尚友、汪六成、汪士法、汪后生、汪仲璠、汪在熙、汪在鑫、汪士初、汪士训、汪士揖、汪忠天、汪志善、汪士节、汪志雨、汪志安、汪志坚、汪士成、汪承均、汪小毛头、汪志敬、汪士杰、汪志康、汪志进、汪云天、汪志海、汪庆成、汪听天、汪应财、汪学易、汪应魁、汪士乃、汪时可、汪增孝、汪士财、汪振灵、汪志云、汪尚宾、汪志光、徐聚林、徐怀圣、徐尚邛、徐聚志、徐尚作、徐聚勇、徐开明、徐连恭、徐开演、徐尚寿、徐光地、徐开光、徐清吉、徐大德、徐汝有、徐显鹤、徐毓秀、徐汝盆、徐毓财、徐大贵、徐增贤、徐显凤、徐敬祖、徐开训、徐在显、徐开茂、朱大发、郑增寿、陶风日、周元水、周元七、汪在训。八都庄：祝万盛、祝大富、祝太清、祝天赦、祝日贵、祝文表、祝日扬、祝纯兴，均属奋勇可嘉，俱蒙赐恤，祀忠义祠。此外，又有文童汪致焜、汪增镛、汪鹤鸣，民人汪承型、俞德昌、俞德良、揭其友，俱于同治十一年补详请恤。

徐日生从九銜，莲塘人。陈恩垂监生，郑家坞庄人。徐玘附生，五都人。范茹连监生，白渡庄人。徐正纲监生，大陈庄人。汪锡龄从九品銜。汪邦荣监生。俱北乡三都人。以上俱率同西北乡团勇：

徐荣辉、徐荣琪、徐荣彩、徐荣昌。郑家坞庄人：陈顺喜、陈顺泰、郑可积、邵长松、邵长水、邵步贵、郑洪梅、邵团圆、邵大汉、毛仁根、郑洪江、邵世

海、毛高山、毛立庵、毛德熊、毛羽丰、毛羽良、王大雨、王庆成、薛余安、王克明、王天禄、周云超、周昌、周安祖、薛余祥、徐文鸾、詹元高、赵瑞堂、祝德禄、詹怀仁、毛谦亨、邵萃仁、陈泰五、陈聚法、陈聚根、陈廷谟、陈廷花、陈泰阶、陈洪葵、陈洪恩、陈积助、陈聚发、陈太五、徐聚和、徐时喜、郑时甲、王元利、王吉顺、王元寿、王亨发、毛式民、毛余信、严顺发、张双有、张万茂、张四发、江云茂、江大发、江开益、王襄发、郑文魁、郑兆文、郑早塘宜、徐东海、朱试容、余仁、郑德余、郑大修、郑四培、郑利余、祝义科、徐松林、柴五福、蒋廷仓、祝乾元、王歪、祝善沛、祝长寿、朱大齐；八都：徐日祥、徐袁朝、徐秀槐、方仁坤、徐凤翥、徐荣霞、徐荣禄、王献瑞、徐士雅、徐荣福、王永乾、江履谦、江海益，各在本庄御贼阵亡。事闻，俱祀忠义祠。团首徐日生、汪锡龄，更蒙赐恤云骑尉世袭，袭次完时，给予恩骑尉，罔替。范茹连、徐正纲与团勇江履谦、江海益、祝德峻、陈积助、陈聚发、陈太五、徐聚和、徐时喜，于同治十一年补呈请恤。

朱师沅附生。朱履康监生。朱起徽监生。朱镇崑武生。

朱殿荣武生。俱上台人。周之邦附生，张村人。夏维赞从九。

夏尚忠从九。徐华林监生。毛大成监生。陈金荣监生。俱清湖庄人。以上据〔《殉难册》〕，各率东南乡团勇：

上台：朱宗淮、朱增猷、朱可钦、朱起绪、朱陞为、柴海珍、柴长贵、柴中蒙、徐国松；张村：黄发荣、周登鳌、周开贵、周秉宁、周敬贤、黄士增、黄章智、周云鳌、周应起、周世勇、黄明安、黄永昌、周云柏、周东山、陈有开、黄应杰、钟万年、何日臻、毛日容、赖老李、黄廷根、周文淮、朱瑞红、张垦头、徐廷泰；清湖庄：王文昌、周景旅、周学锐、柴尚富、柴伦表、朱茂兰、朱茂先、朱志开、朱志州、朱志兴、朱志盛、朱老三、朱茂和、朱茂成、朱茂九、朱茂挺、朱茂林、朱五九、朱喜添、朱袁塘、朱文禄、朱文东、朱志强、朱狗头、朱文地、朱二九、朱毛狗、朱文树、朱大汉、陈应全、陈长余、陈长盛、陈廷卓、陈志明、陈维强、陈麻子、陈赖面、陈贱坯、陈茂驼、陈赖头、管瑞昌、管瑞贞、陈大贤、陈廷扬、毛连凤、侯公宇、陈家居、侯公锡、朱茂恒、朱大红、朱云贵、陈大林、陈正升、陈家贡、陈家圭、朱四往、徐天开、徐启开、徐士魁、徐兴寿、徐承柏、徐世表、徐世茂、徐世富、徐求富、徐天谅、徐兴助、徐兴洛、徐大年、徐荣德、徐际春、毛重

华、夏聚财、夏行奎、夏永有、夏起松、夏中偶、夏春发、夏大富、夏志道、夏志光、夏志书、夏志仁、夏于静、夏淮、徐大中、徐兴发、徐有序、徐佩琮、徐高容、徐尚欣、徐显朝、徐长衢、徐时进、毛融若，均于本庄御贼阵亡。事闻，并祀忠义祠。师沅、之邦，世袭云骑尉。维贇、尚忠更给恩骑尉罔替。履康、金荣，于同治十一年补详请恤。

姜宗璜从九。周乐天 柴大云 王云达俱监生。以上礼贤庄人。周秉镐 戴自平 郑德强俱坝贺人。监生。刘 溢淤头庄人。从九。毛惠通淤头庄人。约正。以上俱率西南乡团民：

礼贤：周彩柱、周瑞富、周瑞仓、周聚青、周聚焕、周大孝、周家进、周应和、周瑞学、周位宾、周应松、周彩林、周世其、周应泰、周德乾、同德传、周德良、周殿寿、周进贵、周长坦、姜天顺、姜殿照、胡天福、姜殿举、姜殿诰、姜渭川、姜渭洋、姜殿选、毛阜、毛春田、毛部田、郑文遇；坝贺：毛金鸚、毛金鸳、毛廷柱、毛尚盈、毛金鹤、毛永贵、毛永德、毛时霓、毛国松、毛长松、毛永表、姜志寿、姜佐朝、姜师福、毛之骥、姜兆驹；坝贺庄：周德岳、周德宽、姜维柏、戴锡镛、戴锡增、戴维藩；淤头庄：毛颖才、毛长才、毛邦富、毛邦甲、毛献南、汪金英、汪赖头、毛文运、毛文进、蒋宇有、赵知宗、叶大志、汪国仓、汪文瑞、汪祥谷、汪破罗、缪曰信、缪好雨、毛堂股、毛维增、毛维勃、毛尚福、毛元翰，力战阵亡。事闻，并蒙赐恤，祀忠义祠。团首姜宗璜、刘溢，更给世袭云骑尉，次完，继袭恩骑尉，罔替。团民郑文遇，于同治十一年请恤。

吴金麟〔《殉难册》〕东乡协里庄人。咸丰壬子科武举。戊午，粤匪乱，在本庄率团，阵亡。事闻，恤赠云骑尉世袭，次完，给予恩骑尉罔替。祀忠义祠。

郑树棠监生，协里庄人。周 荣从九。周书尧武生。〔《殉难册》〕作书光。俱桑淤庄人。

王锡龄监生，赵家庄人。毛悟淮监生，十四都庄人。以上各率东乡团勇：

桑淤：郑年雨、周世宪、徐学贯、徐学魁、徐学经、徐志文、徐纯熙、徐时安、徐香弼、毛明远、毛大喜、王大根、王衰善、周守兴、何聚容、吴玉书、郑攀龙、郑

福寿、林德盛、陈绍维、林乌卜、王良忠；十四都：徐永周、徐萃思、徐萃华、徐德祥、周守仁、毛高福、杨毓芳、毛兆华、毛大群、柴公福、周元亨、邱大通、黄士登、毛德晋、柴士俊、周承志、邱善进、郑方员、毛尚、柴兆庆、邓光斗、徐乌口、周咏仁、徐天衢、徐良信、林风雨、徐天仓、周天龙、周大本；赵家庄：王福寿、王万生、郑金钱；七都庄：刘光德、刘家坦、王万山、徐怀柱、陈瑞庭、陈海仓、陈西安、钱光耀、吴廷双、吴良仁、吴良余、吴老家、徐华峻、徐可寿、王永福、王奴、金瑞高、祝太元，在各本庄御贼殉难。事闻，并蒙赐恤，祀忠义祠。团首周荣，更给云骑尉世袭，次完，继袭恩骑尉罔替。

杨廷荣〔《殉难册》〕南乡二十八都人。任衢州城守营外委。咸丰八年，粤匪自浦城逸出，廷荣在本庄督团，阵亡。事闻，蒙恩恤，赠云骑尉世袭，次完，继袭恩骑尉罔替。祀忠义祠。

杨德旺外委。姜殿彪诤职。金锡嘏卫千总銜。金永源从九。以上据〔《殉难册》〕，俱廿八都人。均系协同杨廷荣，亲率团民：

金汝听、金时才、金时标、金玉麟、蒋有福、王文煊、林尚荣、夏时香、范金成、谢芝发、吕福安、朱长生、祝贤妹、刘长子、李老五、马必遇、郑缺嘴、吕福良、姜殿魁、吴淑明、刘寿廷、陈茂旺、毕富、毕应昇、余大妹、毛永煊、刘寿龄、王日炳、郑起林、许有庆、谢开顺、沈吉升、杨春狗、王世炉、王郝榻、王开春、祝忠文、王日贵、邱大茂、邱攀枉、饶连升、裴顺保、杨麻子、王文晃、金时富、陈求妹、金廷梧、郑宗昊、毛坑、郑日祥、金永渭、徐元福、饶妹子、黄振先、邱薪田、蔡善狗、陈德在、毛庆仔、杨发魁、邱福元，在本庄力战，遇害。事闻，殿彪、锡嘏未蒙赐恤。德旺、永源，并膺世袭云骑尉，次完，恩骑尉罔替。其诸团勇亦同祀忠义祠。

按：徐凤诏以下至此，均系咸丰八年团练阵亡者。

姜泰〔《殉难册》〕西乡潭源人。武举。严州把总，署金华守备。道光十二年，随征台湾有功。二十年，英夷闯浙，檄守钱仓、石浦、爵溪各海口，极力保全。咸丰十一年，在本庄堵御粤匪，阵亡。赐恤云骑尉世袭，祀忠义祠。一时从死乡团，本庄姜尚志、姜瑞表、姜尚谦、姜师颜、姜王屏、姜燃蔡、姜之升、姜增全、姜志藏、姜志涵、姜志德、姜福榜、姜喜榜、姜明梧、叶国研、姜瑞熊、姜

隆瑞、姜永发、姜元舞、姜天运、姜天荣、姜大义。事闻，并蒙祀忠义祠。

姜大成守御所。姜大佐职员。俱潭边人。姜直方附生，新塘边人。吴云飞职赠，佛堂庄人。周浩生员。吴国琅监生。吴增焘生员。俱吴村人。徐学冉从九，仕阳庄人。祝锦荣附生，仕阳庄人。姜尚志监生，上洋人。咸丰十年，粤匪复至，统率西乡团勇：

姜尚质、姜明华、姜明锦、姜隆吉、姜毓齐、姜袞高、姜明昭、姜崑流、姜明文、姜宝堂、姜炳燮、毛臣居、姜来旺、姜希义、姜贤富、姜才衡、姜长富、姜用方、姜如位、姜男督、王精业、王世良、姜立当、姜康富、王尚勤、姜南恕、姜国荣、姜东红；仕阳：杨三戒；佛堂：吴鸿枢、吴茂果、吴茂榕、吴寿康、周连聚、吴瑞初；吴村：吴如璋、吴乾壺、吴上林、吴八富、吴登鳌、吴松寿、吴大国、吴时运、吴日良、吴作福、吴福朝、吴作镛、吴时高、吴献达、吴大吉、吴恕、吴景仁、吴高良、吴武陞、吴武元、吴佩环、吴天吉、吴元和、夏法、吴定智、吴云鸯、吴廷裕、周仁通、周如安、杨日培、周金表、周日芳、周日礼、周高满、周怀金、周允文、姜荣章、徐瑞国、徐德水、徐瑞训、徐有德、徐遂本、徐瑞太、吴应綏、姜功善、姜善教、周日皦、周敬夫、周志道、周志杰、周在田、周锦川、周在喜、周元盈、周红富、周志勤、周怀忠、周允高、周元旺、周志海、周永昌、周瑞风、周兴安、周正贤、周兴发、周日光、周日志、姜赞、徐遂富、徐有安、徐有用、周日高、吴世吉、吴积兴、吴登元、吴文森、吴仕青；上王：王芸、王在淦、王大纯、王玉书、王承泰、席万元、王誉越、王如提、王光祠、王光裕、王允兴、王登善、王小目、毛际来、周长钦、李先宝、李文金、李朝瑞、邹太发、张永杰、王定君、王太亨、王太仓、王太良、王瑞魁、詹时庆、陈秋狗、刘文斌、刘代达、李连登、郑相材、宁天喜，各在本庄御贼，阵亡。事闻，大成、大佐，世袭云骑尉，次完，以恩骑尉罔替。直方亦恤赠世袭。其余俱蒙赐恤。祀忠义祠。团首徐学冉、祝锦荣、姜尚志，民人吴鸿枢，于同治十一年补详请恤。

汪士苞八品。汪士彩守御所銜。汪品金 汪益谦 汪士敦  
汪士葵 汪金魁俱监生。汪传曾生员。汪邦泰武举。汪长清 汪沐恩 汪炳连俱附生。汪扬烈从九。俱大陈庄人。徐锡

三北乡三都人。监生。以上据〔《殉难册》〕，于咸丰十年、十一年，率同本庄团民：

汪育秋、汪志成、汪瑞图、汪尚宽、汪如旺、汪志熊、汪崇德、汪题金、汪德天、汪则豫、汪景邨、徐增桂、徐献荃、祝荣华、周永信、周永茂；八都：祝文回、徐锡高、祝兆盛、祝天华，俱在本庄杀贼，遇害。事闻，士彩未蒙赐恤。长清以下三人，只给云骑尉世袭。其余团首悉给恩骑尉，罔替。所有团民并拊祀忠义祠。此外，又有汪士荀、汪鹤翔、汪连福、汪连贵、汪志芳、汪景亨、汪士伉、汪志海、汪初一、汪新春，与团首汪扬烈，俱于同治十一年始行补详请恤。

郑廷梓岁贡。郑肇昌州同。毛时霁恩贡。何樾增生。

王莲华附生。郑景洛附生。郑增勋监生。毛维藩八品。

王继祖例贡。俱城庄人。吴开元监生，协里庄人。以上于咸丰十一年，率团勇：

郑昌龄、王聚浦、毛佩涟、郑建元、毛葆元、郑荣仁、毛振华、陈宗荣、王时酿、毛兆坚、陈庆樑，在本城御贼，阵亡。事闻，肇昌给予世袭，次完恩骑尉。廷梓、时霁亦给世袭。其余各团勇并祀忠义祠。何樾以下五人，于同治十一年补详请恤。

朱履通 联华 联萼 朱 燊〔《殉难册》〕履通，营千总銜。联华，邑粟生；联萼，邑庠生，履通子也。燊，大学生、履通堂弟，俱东乡上台人。一家俱笃忠义。咸丰十一年四月，督团在本庄御贼，击毙数人。贼大队至，势不能敌，且战且退，贼追杀履通、联华。时，联萼已突围出，闻父兄阵亡，复大呼入阵，荡杀十数人而死。燊间道出战，复遇害。一日之间，父子兄弟同罹大祸，道路伤之。事闻，并膺恤典，祀忠义祠。联华、联萼，并恤云骑尉世袭。

朱 鏊 朱 鑿〔《殉难册》〕鑿，字茂修，郡粟生，东乡上台人。咸丰十一年四月，与同族率团御贼，被协，大骂，遂遇害。事闻，给予世袭云骑尉，祀忠义祠。兄鏊，由附生加捐按照磨，亦以是年八月殉难。同治十一年补详请恤。

朱凯金武举。朱经昌附生。朱荣魁 柴长武俱武生，长台人。据〔《殉难册》〕俱于咸丰十一年与朱履通等率同团勇：

本庄：柴天配、杨志敦、叶祥运、朱大法、朱大亨、朱克治、朱应富、朱承林、朱云馨、柴加勉、柴上朝、柴长文、柴长安、祝大林、朱朝发、朱可彩、柴学成、柴学良；张村：毛高福、毛羽耀、黄辉光、万宝、周五二、周五三；十四都：祝袁和、马高；石门：赵福星、赵汝梅、赵福荣、赵仁发、朱庆曾、毛大谋、毛家麟、毛如未、毛如昌、毛廷陞、毛兆业、毛大明、毛文贵、毛士教、毛全福、毛黄狗、毛尚兰、毛在寿、毛树祥、毛文正、毛日满、毛志修、毛大成、周清藻、周俊成、周翼廷、周相义、王喜元；二十三都：陆显余，于是年在长台打仗，阵亡。事闻，凯金，蒙赐世袭云骑尉，次完，继袭恩骑尉罔替。经昌，亦予世袭。荣魁以下与各团勇并祠祀忠义祠。

周履和诰职布理。周登华监生。俱三十二都人。毛佩莲广渡人。柴澜乌石坂庄人。俱附生。王寅三卿口庄人。武生。

郑廷桂清湖人。江起图峡口庄人。徐维坎清湖人。俱监生。徐伦选从九，桑洪庄人。以上据〔《殉难册》〕，俱于咸丰十一年，率同南乡团勇：

三十二都：周开南；清湖庄：徐鼎水、徐维坦；二十五都：毛羽翰、毛见益、毛兴祥、毛百员、柴士表、柴士芝、柴士元、柴正善、廖天才、廖日洁、廖大恭、廖朝器、廖朝富；童家：童寿容、童长有、童如岳、童天提、童光灿、钱如元、童长寺、祝三和、徐大风、童源开、童步阶、童嘉有、童起瑞、童达目、童步渊、吴天元、周良高、周良火；乌石坂：柴长华、王起泰、柴凤表、柴春风、王维明、柴咸本、柴连宝、柴本福、柴日炳、柴邦东、萧承海、柴增播、柴大富、柴增勤、柴押四、柴盛林、柴来福、柴沛惠、柴毓荃、柴惟吉、柴老五、柴如国、柴朝临、柴沛元、柴云才、柴惟云、柴朝梧、柴守文、柴好介、柴沛江、柴云谷、柴守诗、柴增谱、柴庭礼、柴日福、柴日多、柴日富、柴沛隆、柴文悖、柴沛悖、柴成几、柴日坚、柴惟星、毛尚仓、毛承禔、毛文言、毛文铤、洪德福、洪开林、洪增朝、周长盛、周添德、周长信、胡名科、毛学庆、程厚田、罗昌仔、徐百龄、刘寿祥，各在本庄御贼，阵亡。事闻，履和，世袭云骑尉，次完，继袭恩骑尉罔替。佩莲，世袭云骑尉三代。柴澜，荫一子，入监读书。其余与各团勇并附祀忠义祠。

按：姜大成以下至此，均系咸丰十年、十一年阵亡者。

刘乔龄从九，城庄人。 徐道修监生，小清湖庄人。 何允照监生，源口庄人。以上据〔《殉难册》〕，粤匪自处逸出，率同近城东西北各乡团勇：

协里庄：陈元泰； 桑淤庄：陈大元； 埭底庄：王崇煥、王廷亮； 北乡：曾道楹，御贼，阵亡。事闻，乔龄，恤赠世袭云骑尉，次完，给予恩骑尉罔替。其余与团民并祀忠义祠。

朱起裕附生。 朱师瀛监生。俱上台人。 赵金澜廩生。 毛士镛监生。俱石门人。 王庆云监生，东儒庄人。 毛德和从九，白石庄人。以上据〔《殉难册》〕，同治元年，粤匪自处逸出，因邀集东南两乡民团：  
长台：朱长萱、柴师臣、柴增族、朱树楠、朱劭晖、朱宗汇、柴维成、柴连富、周文魁、陆文川、叶祥显、朱江洪、徐宗升、朱兰枝、朱可佳、丁文魁、柴际连； 二十五都：赵居六、赵恭潭、毛仁财、祝宏庆、郑佩骝、郑廷金、周在荣、郑昭福、郑瑞五、郑廷英、郑瑞光、郑瑞亨、郑邦华、郑瑞贞、郑允伦、郑廷颺、郑大恩、郑发贵、郑允忠、毛上登、毛上崇、毛上孝、毛国仓、周老九、周邦和、楼文质、毛天才、祝南楨、赵世恒、赵世刚、赵世舜、赵文运、林善宝、汪善贵、毛树木、柴士标、柴士源、毛雨翰、王善狗、毛树林、毛树昌、毛允柏、毛祥泰、方聚波、胡老十、毛袁容、姜玉甫、毛文建、毛献瑞、毛家福、张登明、张曾书、张阿子、柴尚公、毛文元、伍大有、伍天有、伍大松、周汝琼； 二十四都：赵有清、赵顺意、赵庭开、毛止岩、张曾孝、毛家檀、毛尚义、毛长沐、毛秉桐、毛均寿、毛世昌、毛之珩、毛成朴、毛应校、毛良财、毛时洁、毛廷龄、毛光留、毛大才、毛士堂、宋贤禄； 二十三都：李大均； 长安：杨志健、杨志柏、杨志恩、杨方隆、杨国泰、杨国祚、杨志良、杨国清、杨玉龙、杨玉亮、杨大金、杨天才、杨志益、杨志杰、杨天高、杨天景、杨佩鍊、杨佩璜、杨俊杰、杨桂芳、杨遇盛、杨方海、杨国祀； 二十七都：项利禄、毛万权、徐光海、毛扬善、陈天泰、毛邦升、毛万栋、周大滋、王殿魁、吴永和、巫连福、周祥吉、何春雨、毛应章、张永海、朱永裕、廖彩云、祝相济、杨春、廖应财、徐柏林、张兆吉、王有和、邓时喜、毛毓芹、刘荣、徐松、姜梦熊、林干才、周国富、张会朝； 王村：陆桂； 峡口：郑秀武，俱于名庆要口堵御，阵亡。事闻，朱起裕、赵金澜，蒙恩恤赠世袭。其余与诸团民并祀忠义祠。

又有二十三都胡时达,白石庄徐天兴,上洋庄姜克念,东儒庄王锡珪、王聚浦、王源恩、王源树、王志运、王源瑶、王善富等于同治十一年补详请恤。

按:刘乔龄以下俱系同治元年团练阵亡者。

王瑞莹 王寿仁俱州同。 吴云青八品衔。 徐筠心职员。  
徐昌言 徐凤焜 邹景贤 徐殿荣 赵荣植俱生员。 周殿彪武生。  
周应祥 周福徵 杨锡三 郑廷标俱监生。 邹毓松俗生。

以上俱节次率团阵亡。奉文赐恤。瑞莹以下九人,给予世袭有差。其余并附祀忠义祠。

## 人物志四

### 武功

#### 隋

祝桃根〔正德《志》〕字伯芝。平贼蔡通仁、罗惠方，郡督柏懋上其功，授开府仪同三司。

#### 唐

杨郡〔天启《志》〕住虹桥。以武功拜上将军。

#### 宋

邓熹〔正德《志》〕江山人。有勇略，客遂昌梭溪。睦寇余党洪载犯遂昌、松阳，熹与父合乡民御之，大小百余战，载降，二邑获全，父子皆补官，熹尉遂昌。孝宗朝，父为五府官。

赵善孚〔天启《志》〕扈高宗南渡有功，拜武略将军。

毛昂〔天启《志》〕住清漾。知兵法，有勇略，武举及第，累立战功。〔汪浩《志》〕拜大将军。

周易〔汪浩《志》〕住凤林。膂力绝人。开禧乙丑，擢武举第一。累官安边节度使。

蒋仁〔汪浩《志》〕字克安，住东庠。自幼骁勇，年十九，从陆秀夫护驾入闽，屡立战功，授武翊卫千户，赠武节将军。

## 元

徐仲〔正德《志》〕字景吾。有勇略。乡寇金曾三剥掠乡邑，杀官吏，焚庐舍。仲率义兵数千人，捣贼巢，生致其首。以功授本县尹，莅治三十年，民共戴之。

## 明

毛昶〔汪浩《志》〕字伯通。以义兵千户从徐中山王，保全乡里。赵桧志其墓。

汪金恩〔《两浙名贤录》〕字天锡，江山人。以进士主政刑部，历员外郎中，知桂林府。时，土番干纪，屡挫官军。当事议抚，金恩曰：“小夷陆梁，是不一大创，则朝廷声教将有不讫于远者。前委用非才，以致挫衄，奈何因噎废食乎？”当事即以檄委之。金恩乃练精锐，授以方略。适大雾连日，乘雾衔枚疾走，令勇士数百人攀附而上，据险焚其林箐，鼓噪而进，连破一十八寨。当事上其功，刘瑾抑之不叙，转知凤阳府，勒令致仕。归时，饶寇抢攘，力贖县令为立城池，邑人赖之。〔宋成绥《志》〕《省志》：登弘治三年庚戌科钱福榜，作开化人。

祝大用〔汪浩《志》〕宗善长子。有武略，立战功。累官至大同指挥使。

周铨〔汪浩《志》〕读书有武略，剿乡寇有功，授本县尉。

周景昭〔汪浩《志》〕贺村人。以武功授广西浔州卫百户。子亢宗，有功累迁指挥僉事。

毛邦贵〔汪浩《志》〕字德衢，住安和坊。以战功累官至山东总兵。

胡诚〔汪浩《志》〕游太学，值大司马金文靖公出征，献策马首，奏授兵

部主事。从征为首锋，诚素知兵画策，屢中恺旋，录功升职方郎。

## 国朝

周公瑾〔汪浩《志》〕一名玉，住秀峰。以千总平九仙山魏寇之乱，录功扎授守备。

黄瑞秀峰人。总镇大谋胞侄。乾隆庚子，恩科武状元。历官至长沙协副将，旋署宜昌总镇。教匪陷当阳，身经十余战，所向披靡。当阳城复，贼中所获男妇，方议尽屠，瑞设策调置，生活万余。后即以总兵升用。赏戴花翎，又蒙赏荷包二次。

毛秉刚字鍊西。幼失怙恃，伯父母抚养成立。长善骑射。登乾隆己酉恩科进士。筮仕云南，征剿黔楚逆苗，年余奏平，赏戴花翎。川、陕、楚三省教匪滋事，奉调移师剿捕，前后打仗二百余次，深入苗疆，擒获首逆。十余年间，不离鞍马，勇而多谋，身先士卒，故所向克奏肤功。由侍卫历官至广西右江镇总兵，署广西提督。因苗疆之役，受瘴气，抱病旬日而卒。诰授武显将军。

柴大纪字肇修，号东山，东乡长台人。乾隆癸未科武进士。〔《魏源圣武记》〕乾隆五十一年十二月，林爽文陷诸罗，总兵柴大纪御诸盐埭桥，距府城五十里，杀贼千计，贼不敢窥府城。明年正月，提督黄士简檄柴大纪取诸罗，大纪连战破贼，遂复诸罗。上命逮提督任承恩，以柴大纪代。林爽文必欲陷诸罗，昼夜围攻，大纪皆分兵击夺，先后百余战，屢出奇兵。诏以大纪用法严明，载入行军纪律，为各省法。授参赞大臣。诸罗围日密，城中以地瓜、野菜、糝油充食。诏以福康安代常青为将军，又命柴大纪捍卫兵民出城，再图进取。大纪奏：诸罗为府城北障，诸罗失，则贼尾而至，府城亦危。城厢内外，义民不下数万，实不忍委之于贼。上览奏堕泪，诏曰：“大纪当粮尽力竭之时，惟以国事民生为重，古之名将何以加兹！其改诸罗为嘉义县，大纪封义勇伯，世袭罔替，俟大兵克复，与福康安同来瞻觐。”是年十二月，台湾平。初，福康安解诸罗围，柴大纪出迎，自以参赞伯爵，不执橐鞬之仪。安即劾其前后奏报不实。上以大纪屢蒙褒奖，或稍涉自满，于福康安礼节不谨，致为所憎，遂直揭其短，殊失大臣休容之度。会侍郎德成自浙江归，以安所劾大纪事询之，因

奏柴大纪在任贪黷，令兵私回内地贸易，贼起不早扑灭，致猖獗。又逮问提督任承恩，供亦同。命李侍尧、福康安查奏。李侍尧奏至，略如福康安指。福康安奏言：专阍大员，既不能整饬于平日，又不能扑灭于临时，皆纪律不明所致，请即解京正法。大纪逮至京，命军机大臣、大学士九卿覆讯。大纪再三称冤。上廷讯，始引咎，仍微诉其枉。诏曰：“福康安等拟大纪斩决。朕念其守城微劳，原欲从宽未减，乃辗转狡辩取死，岂复可从宽典？其即依所拟正法。”

林天洛东门人。乾隆己丑探花。骑射之暇，雅喜文事。在京邸，与名公卿往还，率以词翰相器重。由涿州参将官至福宁总镇，兼署提督。适台匪扰乱海疆，上有捍御才，谕令进剿，克期飞渡，连获胜仗，贼遂退窜。旋即以积劳致疾，卒于戎行。

姜邦治潭源人。乾隆己未科武进士。以蓝翎侍卫简放甘州守备，累官至凉州游击。调署靖远协副将，随征喀什葛尔等处狃匪，克敌有功，赏戴花翎。

林向荣昌龄坊人。由兵部差官洊历二品。初任守备，即随征川、陕，屡著战功，计自新疆，量移内地，历任四十年，接仗二百余次，身受重伤，毙贼无算。大宪屡誉其精明强干，迭膺保举。年七十，以袁州协镇致仕。优给全俸，闾里荣之。

叶向荣二十九都乌石坂人。字蕃昌。由武生充偏伍，檄署峡口汛外委。咸丰戊午，石逆初遁，另股自蒲城逸出，将度仙霞。时，仙霞屯兵四散，独率所部十余人，轰炮攻击，且于山上多焚柴木，火光四起，贼疑有伏，遂遁。事闻，赏蓝翎，以功升严州把总，阵亡。

## 人物志五

### 循 良

宋

毛 渐〔《宋史》列传〕字正仲，江山人。第进士，知宁乡县，经理五溪，条陈利害，建新化、安化二县，历江东、两浙转运副使。浙部水溢，诏赐缗钱二百万赈之。渐言：“数州被害，即捐二百万，倘仍岁如之，将何以继？”乃按钱氏有国时故事，疏通水道，或达大江，或流入海，自是水不为患。摄帅泾源，日夜治兵，乘夏人犯边，遣将捣其虚，遂破没烟砦。进直龙图阁，知渭州。卒，赠龙图阁待制。〔汪浩《志》〕正仲作进仲，渭州作滑州。有诗文、表奏、《三坟书序》行于世。

周彦质〔《两浙名贤录》〕字文之，江山人。以进士历官循州守。治民以教化为本，民以讼至庭者，先谕以礼义，然后折其是非，无不涕泣悔罪而去。苏轼以默化名其堂。官终转运使。〔汪浩《志》〕著有《齐峰集》。

毛 豫〔汪浩《志》〕知乐平县，部使差官行方田之法，属新进少年，书笔皆远方应募，夤缘为奸。适夏潦漂溢，损民田。转运使虑减常租之入，戒郡县勿得言。豫曰：“吾不为身谋，遗一邑患。”卒受民诉。使者怒，遣健黠吏按视，与同行原隰，竟无以夺。是岁，蠲十之六，方田权止。未几盗发，朝廷卒罢之。

历官朝奉大夫。

毛国华〔嘉靖《浙江通志》〕住镇安。皇祐元年进士。为於潜令，值岁旱，勤于捕蝗。梅圣俞至其邑，作诗赠之曰：宜游逢此岁年恶，飞蝗来时蔽天黑。羨君禾稻熟如云，蝗自识人人不识。

柴瑾〔正德《志》〕字怀叔。绍兴八年进士。倅鄱阳，岁饥，恶少啸聚，发民粟。瑾请赈以常平米，郡守难之，瑾曰：“势且急，当从便宜，愿执其咎。”后摄州，奏免买乌炭与丁砚钱。累官殿中侍御史。〔汪浩《志》〕居长台。师事徐存。后为殿中侍御史，立朝执法，奸回慑服，出漕闽。有《退翁集》、《文选类要》。

赵希漉〔汪浩《志》〕号静斋。登进士。第迁九卿，帅闽。遇旱，累请航京粟二十万斛入闽，全活一路。〔宋成绥《志》〕《宋登科记》作淳安人。登嘉定十四年赵渭榜。存考。

## 元

柴奎〔《浙江通志》〕江山人。至大间，与进士买住同知衢州路。时，湖襄兵起，凶徒教众为乱。共议讨贼，奎毅然单马入贼境，喻以仁义，贼众感动，遂解散，郡赖以安。

徐焕〔《南昌府志》〕字秉文，浙江须江人。至元末，知宁州事，严明干济，狱无留讼，吏不敢欺。兵寇之余，民多流散，公署残毁殆尽。焕劳心招徕创置，公私不扰，而民乐其业。

## 明

姜德政〔汪浩《志》〕字仕初，住嘉湖。正统间，以国子生擢上元令，有《便民三十事》，勒碑县门。修葺程明道祠堂，大兴学校。后以母丧解组，耆民三千余众连章保留，乃夺情，复任九载，报最，特擢南礼部郎中，出为平阳知府，所至有声。致仕归。成化改元，起河南副使，不赴。祀乡贤。

徐福〔汪浩《志》〕徐盛之子。天顺己卯举人。有学有守，分刺克州府

及福建都运盐同知。所至，公忠勤慎，历除弊政。致仕，布袍草履，贫终其身，士论高之。

杨 魁〔汪浩《志》〕字元之，号黼山，居定水华沧。以明经为武学校授，历学正，即条陈太学六事，又尝以靖浙事宜十策及防汛之策五、积储之策八，致当事。穆宗敕谕，有“立言以开后，足为人师”之褒。祀乡贤。

姜宗望〔汪浩《志》〕号渭川。性慈祥。动履不苟，尤善奖后进。隆庆庚午，举于乡。历知濮州。岁歉，活饥民甚众。再知沅州，夷獠怀之。

郑 忬〔汪浩《志》〕字汝敬，号东里，宪副长子。性英敏，涉笔千言。判邵武，革仓羨，清盐窳，活叛民，多惠政，平海寇，曾一本叙功，预朝赏。家居，置义学、义仓。所著有《发瓮集》。孙世熙，登丙午乡荐。

姜尚宾字肖谷，凤林人。万历时岁贡。初任海宁教谕，迁河南归德府教授。其由海宁去官，邑人士惓惓于怀，作《去思碑》以记德，略云：先生端正朴谨，大是葛天，谈经析理，言言入元解，听者忘倦，立身严，竖坊表，以礼义名教为宗，海昌人被其教駸駸化漓为淳，溷却昔日难治声。记载《艺文》。

## 人物志六

### 介 节

#### 宋

毛 抗〔天启《志》〕字节之，镇安人。以唐介荐登甲科。时新法行，抗持论不合去。终祠部郎。

柴天锡〔汪浩《志》〕住长台。为司封郎中。时蔡京当国，郑居中说谒之，升擢可待，天锡曰：“不愿谒，亦不愿迁。曳裾权门，吾不为也。”朝论壮之。

毛方平〔叶适《毛夫人墓表》〕知珍州。毛檝子，为秦司买马干官。是时，吴曦断东道自王。方平虑其国，忘其家，先其君，后其亲，以节闻天下。纵口骂曦，激士大夫心，为贼囚守。蜀复定，用乏，方增赋，佐诸费。数语有位：治叛国当明逆顺。今籍阴通贼十数大家资数千万，何不给，而重敛疲民？皆张目缩舌不敢应。

#### 明

何 郁〔汪浩《志》〕字尚文。襄阳太守。以迟京餉，谪京府治中。未几，投闲林下。所著有《金陵杂集》、《山居疏草》，藏于家。

姜 梁〔汪浩《志》〕字子方，号电山。资禀聪慧，博治强记，饶有傲骨。登进士，授合江令，多惠政。历任平乐守。凡不便民者，辄力争，与当道不合，遂弃官归。

周文兴〔分省人物考〕字用宾，江山人。正德三年进士。甫登第，即疏疾乞归，读书于江郎山中。八年，部檄促之，起为刑部主事。历官鸿胪卿。屡起屡退，特越次迁之，得至列卿。嘉靖十六年，恳章致仕。爱杭山水之胜，筑室清平，寄思尘埃之外。与人交，乐易无城府，元言高论，意豁如也。总督胡宗宪表其里曰高士坊。

## 人物志七

### 孝 义

宋

毛蕃八 毛攀龙〔汪浩《志》〕邑之棠峰人。膂力绝人，晓武艺，尤长于连珠箭。父信叔遭贼欲刀之，蕃八闻之，直冲贼阵，力战于经堂山，贼惮，释其父，且语之曰：“所遇乡邑，破竹而下，无若公骁悍善射者，能献牛酒即去。”蕃八大骂，复前搏战，遂遇害，弃尸石塘泥坳中。是夕，为土掩埋，若神为者。时人叹曰：“死父之难，孝也。骂贼不屈，烈也。天其以六丁葬之乎！”兄攀龙，从径叟徐霖学。遭母丧，庐于墓所。县尹程邨作《孝思记》以表之。〔蔡英《补订县志》〕蕃八，名梦龙。案：〔《两浙名贤录》〕所记略同。

周 旻〔曾巩《周君墓志铭》〕字梦臣，衢州江山人也。以进士及第，历迁秘书丞，知成都府东流县事。少孤，力学，事母以孝称。在任，嫁娣之贫者，居常分俸三之一以奉之，余以予诸弟，君与妻子或止食余券而已。为人和平质简，及至有所必行，人亦多所不能及也。

周子言〔汪浩《志》〕礼贤人。性至孝。与徐应镞同入太学。父母殁，庐墓终丧，寒暑不易。应镞贻诗赠之。

王 撰〔正德《志》〕父枢密副使，被金人执，仗义不屈而死。撰时年十

六，身犯锋镝，寻父尸殍于野，昼夜号泣，庐墓侧者六年。〔汪浩《志》〕事闻，录其官，诏葬其父于江山之严龙谷。

柴元瞻〔汪浩《志》〕父目失明，泣血虔祷，访医求药。途遇老翁，授葫芦丹药，归奉父，双目复明。

祝文仆〔汪浩《志》〕与弟宝，同居五世，聚族六百余口，以孝悌廉让，为里闲所推。

周伯祥〔天启《志》〕性至孝。事祖母郑，晨昏尽礼，终始不衰。郑氏卒，庐墓三年，继筑慈云庵，奉其灵世守之。子仲达，官至副使。案：伯祥事祖母以孝称世，名其所居之巷曰顺孙巷。

毛文粹〔《浙江通志》〕住仁厚。周穷恤匱，输财助公。郡守以闻，敕赐迪功郎。

周自强〔汪浩《志》〕字勉仲，住礼贤。入棘寺三十余年，升刑部侍郎，帅广。先是，任官卒岭南者，妻女不能还，或流落为婢。自强奏请官为嫁之，置接街库，计口给钱米资之还，且虑行之不久，乃以己俸买田三十顷，闻于朝，刻石著其事，至今遵之。

## 元

祝君翼〔正德《志》〕好施与，散赢金，置义田，以赈乡族之贫者。县尹孔淮疏其事，旌之。

郑止〔汪浩《志》〕字居德。有大度，好施予，缔交多贤。士大夫金仁山题其像曰：孝友日笃，忠敬自持。言语不苟，动息以时。生气俨若，仰之敬之。

## 明

王盛〔正德《志》〕事母孝。母死，庐墓三年，乡人称之。赵一斋为作《孝子传》。

毛公器〔汪浩《志》〕住北门。孝行纯笃。父歿，庐墓三年。母歿，复庐

墓侧，朝夕哀号。有乌鸟驯绕墓侧，人以为孝感所致。有司上其事，榜曰孝子之门。

徐 颢〔天启《志》〕字世张，汝舟曾孙。事亲爱，敬笃至。父歿，哀毁如礼，蔬食三年。妻毛氏亦化之。

毛 栋〔天启《志》〕字本材，镇安人。粗通书史，事亲以孝谨闻。父母歿，哭泣几丧明；既葬，结庐墓所，终丧三年，乡族以孝称。

何 伦〔《分省人物考》〕字宗道，江山人。天性至孝。居父忧，哀毁逾礼。事母，尤曲意承颜。家虽贫，甘旨不缺，衣服必备，或营办不足，辄贷于人，曰：“不若是，何以慰吾母心？”及母亡，殓殮遵古礼，蔬食三年如一日。丧毕，犹不释服，不入内，乡饮亦不赴，曰：“吾亲在浅土，吾其忍乎？”郡守李公，县尹刘、黄二公咸贻之葬赙。对使者，拜受于家，终不造谢，曰：“吾罪人，不敢至公庭也。”贫失学。年二十七，始发愤读书。初从阳明先生讲学于越，既而复从王龙溪、王心斋、薛中离诸公游。晚年，复拜甘泉先生于南都。及归，充然有得也。日与西山、东溪诸公切劘，以终其身。〔汪浩《志》〕盗夜入伦室，窃器物而出。伦觉其人而不呼，将收釜，始言曰：“盍留此，备吾母晨炊。”盗还其器物，大声曰：“盗孝子者不祥。”自是其人不复为盗。县令黄纶表其庐曰孝子庐。

赵 夔〔《两浙名贤录》〕字舜臣，世家江山之文溪里。童孺事亲，即知承颜顺志。凡饮食，必后父母。父母怒，则负罪俯伏，必豫亲而后己。弱冠，补邑庠弟子时，奉学规，终岁必官斋肄业。念违定省，辄垂涕泣。尝乞假归侍，父母强之就途，中道而返者数四。比至庠，泣如初。当时称为赵孝子。以岁贡司训高邮。未几，母死，哀毁骨立。服除，补兴化平海卫学。致政家居，尝以宁静名其斋，弟子称为静远先生。〔汪浩《志》〕祀乡贤。

徐 琪〔汪浩《志》〕字献夫。父年四十，患疮毒，昼夜扶掖，汤药必亲尝，衣不解带者数年。及卒，哀毁尽礼。家道致中落，有仲兄不解事生产，琪解衣推食无倦容。后其兄被诬，拟充戍，琪挺身救之，得解脱。生子需，历官至左布政，人称为孝友之报。

璩伯彩〔徐需《孝子传》〕伯霖，世住陌市城南。随父任至郟阳，父感疾，

焚香吁天，祈以身代，父竟不禄，哀毁异常，扶柩归家。贫甚，南乡夹流之间，构屋数间，奉母居之，躬耕执爨，不憚艰苦。凡母所欲，靡不给。母觐危疾，呼医弗及，即引刀剖肤剪乳，煎汤灌母，吐痰数升，即苏，十余年乃卒。伯彩哀毁，庐墓侧三年。有芝草生墓旁，乡里称叹。县令王北山匾其门曰孝子，太守王公题曰：行孚乡里，孝感神明。〔汪浩《志》〕彩母病，躬事汤药。妻拂母意，即出之。母吐痰盈盂，伯彩私取吞之，曰：“痰宁病我。”因引刀剖乳剖股，弟伯缙亦割股煮粥糜以进，疾果瘥。

**璩 鑑**〔天启《志》〕字文明，伯彩从侄。邑庠生。善事二亲。父病笃，躬侍汤药，尝粪甜苦。父卒，悲号几至灭性。及葬，斋宿庐墓三年。每雷震，辄奔墓所，有王伟元攀柏之风。

**赵 桧**〔《两浙名贤录》〕字廷坚，江山人。负气节，博学能文。母周尝鬻钗，遣就学于数百里外。既归，母流涕语桧曰：“吾始可见若父于地下矣。”隐居养母，终身不仕。

**姜 照**〔易仿之《姜晦之墓铭》〕晦之姓姜，名照，别号云石，世为嘉湖里人。生七岁而孤，鞠育于寡母杨氏，备尝艰苦。十五始就学，十八补博士弟子员。事寡母以孝，承颜顺志，循理罔拂。万泉赵公高其行，延居宾席。及母卒，营葬结庐，读礼三载，乡里重之。立教以实行为先，居家以孝悌为训。卒年七十有一。

**蒋宗明**〔汪浩《志》〕兄弟敦睦，房无私蓄，四世同居。

**王仲义**〔天启《志》〕字宜之，居塘头巷。事父母孝。父臣笃疾，吁天愿以身代。及卒，庐墓三年，刻像事之如生。母薛病，剖股愈之。及卒，庐墓哀毁过甚，竟卒墓所。妻徐亦称孝谨。有司旌之曰纯孝。

**璩一桂**〔宋彩《志》〕字惟馨，号霁阳。孝友。工古文词。四方从游，致通显者甚众。万历乙酉，领乡荐，或劝之仕，谢之曰：“远涉违养，非吾志也。”终母寿而卒，所著有《燕山遗稿》。

**何世忠**〔汪浩《志》〕住大夫巷。母患羸疾，躬奉汤药，茹素吁天，七年不倦。母病愈，又数年卒，居丧如礼，事后母孝养益虔。有司屡给粟帛。

蒋绍祯〔宋成绥《志》〕字瑞芝。年六岁失父。家甚贫，母王氏苦节抚养成立。屢遭家难，委曲调护。母卒，庐墓三年，宗党称之。

徐世禄〔汪浩《志》〕伯知仲子。率直无伪，兄弟友爱，终身不析产。弱冠丧偶，不再娶，躬执爨四十年，鞠养二子成人列青衿。府、县俱宾饮，并赠以冠带。

何允秋〔宋成绥《志》〕住大夫巷。承父志，以千金产分让诸叔，自甘淡泊，屢请乡饮不赴。子梧栋，以明经显。

徐溢〔宋成绥《志》〕住西门。父病，刲股调药。父瘳，人谓孝感所致。府、县屢奖。

王道光〔宋成绥《志》〕字孚卿，住景明巷。父兼济卒官邸，匍匐奔丧，结庐墓所。事后母孝敬弥谨。生平笃友谊，好施予。

王瑾〔汪浩《志》〕字公瑾。究心《易》学，家庭以孝友相先，四子俱列名胶序，少子懋学尤称白眉，孙光祀中戊子解额。

徐廷言〔汪浩《志》〕字恂如，郡庠生。幼失怙恃，鞠于祖母王、继母姜。时，姜仅婚半载，守节终身。廷言感二母之恩，集四方士歌咏之，梓曰《淑纪》。居恒以不及事父母为恨，捐租于祠，以饗之。

周科〔蔡英《东轩集》〕科，字九恩，江山凤林人也，以孝闻。明邑尹张公斗旌其门曰奖孝。前志失载，核其族谱，旌额犹在。爰为制主，入忠孝祠，更以“懿行必彰”四字额其间。

胡尚宾〔采访事实〕明万历时人，住石门庄。早岁父歿，母矢志守节。尚宾天性和顺，朝夕奉侍，能得欢心。母病笃，尚宾吁天哀告，割股调药，病竟痊。母卒，哀毁尽礼，尤异寻常。迄今代远年湮，称闻弗替。

王士参 徐廷立〔《浙江通志》〕并江山人。正统间，士参输谷一千二百石助赈，有司以闻，赐敕一道，免差役三年。庭立亦输谷千余石助赈，诏免差役。

周延熙〔正德《志》〕隐居读书，建义仓，辟义塾，施药与棺，乡人德之。〔汪浩《志》〕周灿世敦义让，延熙为灿之孙也。

徐从吾〔宋成绥《志》〕从吾幼抱至性，有财悉以公众，殫力以奉甘旨。叱咤之声，未尝及童孺。妻郑氏相敬如宾，亦能尽妇道。宗党甚繁，有富且黠者相构讼，为之处分，服其忠信，久之自悟。其他唇齿，一言解之释然矣。

郑仕昱〔天启《志》〕造浮桥，善解纷，推余赈族。经火者四，不焚其庐。

徐惠〔汪浩《志》〕字子仁。抚孤恤寡，一生无靳色。其田为豪强势僭作圳，毫不兴较。邑侯薛鸣宇优以乡饮介宾。

应文朴〔天启《志》〕一生周急解纷，助婚葬，士林嘉之。

毛宗仁〔天启《志》〕宅心醇厚，散财周匱，乡评称义。

徐永明〔天启《志》〕务实好义。凶岁，卖田煮粥赈饥，化息强掠。

姜睿〔汪浩《志》〕作矜。姜让〔天启《志》〕同心让义，买地葬贫，赈贷焚券。

毛仲〔汪浩《志》〕嘉靖丙戌，大旱。倾廩赈饥，全活甚众。

徐九皋〔宋成绥《志》〕字汝声，邑庠生。以孝友闻。好为人解纷，必两服而后已。教子日葵，悉由口授。祖璘、父以明，皆有善行，咸称世有阴德云。

徐伯美〔宋成绥《志》〕字日嘉，方伯霈之仲子。入大学，补光禄监事。己丑，捐数千石赈饥。诏建坊嘉其义。卒年八十有三。

蔡仪〔汪浩《志》〕住南门。性孝友。生平每事退让，不与人较，尤好施予。邑有大役，如筑城、九清桥、凝秀塔，皆捐贖助工，群称长者。孙：应显，令新平，悉心爱民，一钱不取，士民共尸祝之。

王立〔汪浩《志》〕住金街巷。负才识。余公一龙建议筑城，分段督工，独如期竣事。建塔助工，输粟赈饥。余公甚礼重之，赠以诗。

徐宪〔宋成绥《志》〕住北门。性狷介，矜矜不失尺寸。抚孤侄，岁积美金，封识无私，宗党称之。

郑杞〔汪浩《志》〕号前山，住市后。乐善慕义，采石铺通城街道，后生孙，遂名街。

郑悟〔朱彩《志》〕号思溪，宪副骠少子，时称长者。居官有文，教子国望，戊子经魁。险关侍御杨，不殫千里，躬载枢归，士论义之。

姜继成〔汪浩《志》〕号绍峰，居礼贤，侨寓武林。倜傥好义，重然诺。朋给借贷，累数千金，恒折券弃负。晚任通渭丞，摄邑篆，多惠政。三子：长启元，辛卯亚魁；次启望、次汉宗，俱有声庠序。

王允德〔汪浩《志》〕号可斋，住三卿口。例授指挥僉事。倜傥慕义，散金赈助，尤好结客。副使许君赠以“阃外散将军，山中闲宰相”之句。

毛通〔汪浩《志》〕住县前。素有才干，公务必先，运粮如期，县官给以冠带。

## 国朝

姜厥美〔汪浩《志》〕字俊生。增广生。性孝友。顺治丙申，父为九仙山贼所执，厥美奔教求代，贼感其孝，释之。有兄子早孤，亦被执，厥美尽变家产赎归。寻卒，得遗腹男。厥美先有弟，亦早亡，其子甚幼，俱抚养之。

王图勋〔宋成綬《志》〕字兆悦，住流砥巷。性孝友。兄和逝世，家无余资，有侄家奇，抚养教诲，以明经显。子嘉捷，登康熙己酉乡榜。

毛之鸿〔宋成綬《志》〕号耐翁，居镇安。父患危疾，刲臂和药。其兄为前母所生，事必任劳归逸，以腴产让焉。岁俭，道殍相望，掩遗骼无算。卒年八十。里人尝公举其实行。

姜国柏〔蔡英《侯采副草》〕新塘边人。字凌苍。父士瀚，母王氏，兄弟六人，国柏居幼。父故，五兄俱婚娶析炊。家贫，独自供母，温清无虚。母老患疾，时或昏迷不省，国柏不敢远离。年二十八，始娶室，次日，仍即侍母，恐母夜或病作也。母寿八十二岁卒，殓葬独任，庐墓三年。积贲购墓田数亩以供祭，价独办而田与兄侄共之。嘉庆九年，详奉学宪潘给匾旌奖。

姜骝〔蔡英《侯采副草》〕字骏功，潭源人。郡庠生。兄弟四人。父故，事继母，以孝闻。母患风疾，不离床褥。诸兄各自营生，骝独尽心奉养。家贫，授徒于外，日必归家省视。母病亟，泣曰：“汝如此孝养我，惟愿汝子孙世世昌盛。”今其诸兄家尽凋零，惟骝后裔丁繁而富。生子五，俱登颀寿。嘉庆十年，详奉学宪潘给匾旌奖。

何兆麒〔蔡英《俟采副草》〕城庄人。幼聪慧，善读书。事亲谨慎，母病刲股和药。母愈，邻族咸称其孝。早卒，妻徐氏守节，抚遗孤怀德，长游郡庠，亦敦笃有孝行。学宪窦给匾旌奖，一曰孝行可风，一曰懿德可嘉。嘉庆十七年，入祀忠孝祠。徐氏详《列女志》。

毛 鹭〔蔡英《俟采副草》〕城庄人。邑庠生。有孝行。居父丧，寝苫枕块，不入内室，三年如一日。母患疮疾，朝夕进汤数药，洗污涤秽，必躬亲为之，九载不稍懈。母卒，居丧尽礼，一如其丧父。嘉庆十年，详奉学宪潘给匾旌奖。

陆曾贵〔蔡英《俟采副草》〕石门人。幼有至性。父少贫苦，中年后多疾，曾贵年十二，即能代父服劳营生理。每日饮食，必躬亲检视，俟父母食之甘，然后退。有三弟，皆教之生理，弟亦惟兄言是听。母卒，刻木为像，朝夕寒暑，供奉如生。父年老，患小溲不通，医治罔效，曾贵以口吮得瘳。嘉靖十年，详奉学宪潘给匾旌奖。

姜日优〔蔡英《俟采副草》〕礼贤人。监生。父素患足疾，兄嫂又俱亡，母以悲痛得心惊之症。日优代父任家事，侍养极谨。父歿，母症益甚，日优思有以解母悲也。有一姊，家贫不能自给，迎其姊与夫与子女养于家，以时时慰解之，母症遂愈。嘉庆十年，详奉学宪潘给匾旌奖。

柴一清〔蔡英《俟采副草》〕东儒庄人。监生。兄弟四人，一清居长。自幼能顺事父母。父歿，时囑一清善训诸弟，勿使荡废。一清遵遗命，刻刻以造就诸弟为心。后弟永青登武科，步青游武庠。事寡母，饮食必躬亲审视而后进，非急务不离母侧。母嗜鱼，而市远不常得，因学钓以遂母意。凡母一言一动，无不极意承顺。母卒，葬所去家可十里。每得时食，必往奠于墓，依依不忍去。族里称为柴孝子。嘉庆十年，详奉学宪潘给匾旌奖。

周年生〔蔡英《俟采副草》〕北乡傅筑街人。早失怙。母氏徐，家贫失节。年生与弟老福力耕奉养，事事能曲体母心。母老病目，步履维艰，出入必从容扶持，藜藿自甘，而奉母务求丰腆。母亡，庐墓三年，晨昏供奉如平时。与弟娣，友爱甚笃。素未就学，而为子侄延师，必尽诚致敬。嘉庆十一年，详奉学宪潘给匾旌奖。

祝开运〔蔡英《侯采副草》〕大溪滩人。郡庠生。年十四，失怙。母氏徐，患痲疾，手足拘挛。开运孑身侍养，每晨，抱母起坐，穿衣纳履，兼代梳洗。饮食，执匙箸进之母口。夕扶母寝，为解衣履，整枕衾，随卧榻侧，闻呼即起，积六年如一日。嘉庆十二年，详奉学宪潘给匾旌奖。

王应魁〔蔡英《东轩集》〕南乡八里坂人。兄应举病歿，遗孤甫一岁，嫂毛氏矢志守节，家贫已析居。应魁素孝友，敦行谊，以寡嫂孤侄食用不给，仍与合爨，尽力培植，俟侄成立，为嫂呈学请旌。训导施凤起为之立传，毛氏见《列女志》。

陆嘉言〔采访事实〕和睦人。至性纯笃，温清定省，感化闾里。道光二年，详奉学宪杜给至孝貽芳匾，入祀忠孝祠。

朱尚聪〔采访事实〕长台人。监生。幼聪慧，有至性。侍奉祖母暨父母，克尽孝道。父染血症，合药需参，尚聪时年十一，冒暴风雨，购参以进，病得安。阅五载，父歿，哀毁逾常。祖母年迈，母又病盲，尚聪出入扶持，益加敬谨，以故二老均安享遐龄。妻徐氏亦能孝养尽妇职。道光六年，题旌双孝，给帑建坊，哀有《双孝录》。

璩维慰〔采访事实〕幼有至性。甫六岁，父故，痛哭不止。及就外傅，读《论语》“事父母能竭其力”，就师询竭力之方。母病，躬亲汤药，号泣吁天。母卒，哀毁骨立，困父母遗像，晨昏事之如生。道光八年，学宪朱给百行无亏匾旌奖。

毛云坎〔采访事实〕天性纯良。父病，尝药调羹，衣不解带者七载。事母，先意承志，孺慕不改。由学详请奉宪给匾旌奖。

毛濬天〔采访事实〕性和顺。父早故，事母孝敬备至，豫顺之休，达于里巷。恩诏给赐节妇绢帛、孝子冠带，闾里荣之。

赵廷昌〔采访事实〕石门庄人。事亲极孝，庭闈养志，具得欢心。母氏吴病笃，割股调药，遂获痊，绝口不言。盛暑之月，未尝解衣见体。父母歿，哀毁如礼。以下八名，同治十二年奉学宪丁给予事先百行匾额。

周良垣〔采访事实〕二十五都人。生四岁，其父天福客山东，托良垣于

所亲，母氏姜与父偕行。良垣十余岁，远道省亲，以先人邱墓为重，劝父归，不果。嗣是长途往返，岁以为常。后闻父病，兼程迨往，及视舍敛，哀毁殊常，寻扶柩渡扬子江，风发，舟溺过半，良垣仰天哀告，风立止。人咸谓孝感所致。

郑日盛〔采访事实〕二十五都人。父圣旦早歿，母氏周素患风挛，晨夕扶持，一如母性之所安。家素贫，藉肩挑以谋饔飧，而甘旨无缺，十余年无稍间。母卒，哀痛至毁形。生平未尝识字，至性所发，士林咸称。

郑俊拔〔采访事实〕三十四都人。五岁，遭父良驥丧，即知哀痛。时嫡母周氏，生母张氏，庶母吴氏、周氏俱在堂，事之均得欢心。居非近市，凡有甘旨，虽数十里必躬致。生母病笃，医药罔效。俊拔跪天默祷，不药而愈。后年逾九旬，卧床数载，一切服劳，虽妻媳求代，弗许也。及卒，哀毁异恒。诸母并年臻上寿，丧葬俱如礼。

毛雨朝〔采访事实〕二十五都人。弱冠父歿，事母氏周，弗忍稍离。家贫，藉肩挑以为养，四十余年，孺慕不衰。母卒，庐墓三年。每闻雷鸣，辄向墓门跪哭，曰：“儿在此，无恐。”咸丰七年卒，时年七十有六。

姜元荫新塘边庄人。家素贫乏，敬事父母。父故，事母尤谨。母久病，左右扶持，不间寒暑。出则樵采给养，入则浣濯躬亲。母病歿，泣血三年，三日必一省墓。其至孝，盖本于天性也。

赵恭纲〔采访事实〕石门庄人。幼读书，敦至行。祖国辍，年八十有奇，于咸丰九年三月间患病，恭纲随父仁基竭诚奉养，数月卧不解带。祖病转剧，服药无效，恭纲对天默吁，割股调药以进，祖病顿愈，复颐养数年，始寿终。恭纲卒于同治元年，时年二十八岁。乡里俱称顺孙，而深悼其不寿。

柴高帆〔采访事实〕长台庄人。兄高帙，邑廩生，力学得怔忡症，高帆友爱性成，事兄弥敬。兄因病，不愿毕姻，力劝始娶，生子女，代为抚养。兄子享荣，读书游庠，皆弟力也。

姜亨肇〔汪浩《志》〕字会侯。以气谊重闾里，好与贤士大夫游。邻邑尝大饥，乞余者阻于禁，亨肇列五病，请开米禁。后有邑志之修，上书朱梁父，力持公论，人竞义之。书载《艺文》。著有《碧梧楼稿》。

朱秀孺〔汪浩《志》〕字遵子。幼习举子业，遭闽乱，辄究心韬略。父母早世，恭于兄，终身不析爨。以赢金置产，悉分诸弟。设塾延师，训宗人之无力者几三十年。尝路拾遗金，俟其人而还之，勿问姓名，士林以为美谈。

徐元选〔汪浩《志》〕字太白，东溪方伯曾孙。恩贡生。慷慨急公，有声黉校。邑自明以来二百余年，有南粮之累。顺治初，衢属四邑士民公吁请厘积弊，于是均摊于田亩，累始免。江邑徂于故，常无人出而请命。元选毅然独任其事，呈经驳查数次，始获一体遵行。其呈状附载《艺文》。

徐廷耿〔宋成铨《志》〕字纯白，住南门。性至孝，母色不豫，必跪请。排难解纷，周急好义，全济甚众。晚精岐黄。

周璠〔汪浩《志》〕字鲁玉，号静虚，住秀峰。天性孝友，励名节而甘淡泊，喜读书，工行草。邑令佟国琪优以乡饮酒礼，以初筵长德旌其庐，学博钟定以乐善不倦奖之。

毛玉郎〔汪浩《志》〕庠生。际飞之子。勤俭积善。岁饥，尽出其粟以赈，远近辐辏，玉郎至日晷不遑食。病革，以积岁贷券，命其子一清付诸火。迄今里人谈行谊者，以玉郎为称首。

毛一清〔《衢州府志》〕玉郎，一清父也。凡父意之所欲为，一清惟恐后。泊卜葬，有周姓者，尝受其父赙恤，酬以地，一清复以五十金酬之。已闻周之祖莹在其下，遂折券，并其值勿取。邑大水，坏庐墓，积骸破柩不胜计，一清募夫择隙地瘞之，费无算。邑侯以中丞命辍楔其门。

王宏璧 王名钵〔蔡英《俟采副草》〕宏璧，字漱轩。幼失怙，鲜兄弟，谨事母，视从昆弟如同胞，足不履公庭，周济贫困无稍吝。乾隆间，邑侯刘称其持躬谨饬，孝友克敦，举列宾筵，不赴。名钵，其子也，字植庵。生平谨慎，有父风。江邑县试向无号桌坐凳，应试者有负携之苦，植庵制备如数，捐贲独任。

郑日临〔蔡英《俟采副草》〕太学生。邑人皆称其善行，而为善不求人知。易箦之时，语其子梦兰曰：“勿留美名，致有过情之誉。”其隐德洵不可及也。

毛德成〔蔡英《俟采副草》〕淤头人。邑庠生。持身正直，家不中貲，总理族事数十年，至公服人。族中年老者，按月给米，按岁给衣。士子乡试，皆有资给。设义塾，训子弟。贫乏者，每青黄不接，以祠谷减价平糶，虽邻村亦殷救恤。其族毛元音，家极寒，赖培植，成孝廉。卒年八十有八。乾隆癸卯，恩赏举人。

何肇瑄〔蔡英《俟采副草》〕字献虞。贡生。素慷慨尚义，平糶之举，首先诸族，出貲运米，减价济众。

毛锡浩 毛国樑〔蔡英《俟采副草》〕锡浩，监生。朴实公正，勤于综理。凡遇公事，无不尽力承任。乾隆间，整葺学宫、城隍庙，建文昌阁，修徐逸平先生墓，建崇贤祠、正学书院。嘉庆间，建忠孝祠，葺明伦堂，皆推锡浩董理。人咸服其精勤无私。〔采访事实〕国樑，锡浩之子也。家政严明，佐父持家，最得欢心。父年高，患瘫痪，尝药调羹，衣不解带者十有六年。父没，泣血衔悲，三年不见齿。事母氏王三十载，孝思无倦。咸丰八年卒，时年八十有四。

徐汉佐〔蔡英《俟采副草》〕莲塘人。素行敦朴宽厚。嘉庆七年旱，四乡米贵，贫民多向富室滋扰，莲塘民亦效尤。汉佐极力劝阻，鬻己产余米分给，不取直，众因惭服而止。

王文潮〔蔡英《俟采副草》〕城北人。闻某年七月，一人将鬻妻偿官欠，妻哀啼不忍去。潮为代偿，夫妻仍得完聚。家素乏财，竟能仗义，士论多之。

郑学淮〔蔡英《郑学淮善行纪略》〕字海东，号沧洲，城庄人。以例授员外郎。邑人啧啧其善行。计一生赈饥所费不下数万金。处事多识力，治家严谨朴勤。内嫉恶而外和婉。各衙门终岁屏迹，惟商办赈恤得相见。夫慷慨慈善，不好名，不趋势，惟豪杰士能之，学淮其庶几乎？按：东轩先生任江山训导时，叠遭水旱，筹办得宜，邻邑闻风，咸移函问讯，先生必举学淮以对。迨先生去官，淮为善益力。凡遇婚嫁无资，考度多艰以及桥梁宜修葺者，俱争先倡。今查淮有子十人，曾玄林立济美，孙举孝廉者二人。

汪光国〔采访事实〕字应旌，北乡大陈庄人。幼游庠序。闽变时，土寇窃发，掠良家妇女，幽闭一室。乘贼出，发扁逸之，全活无算。后寇氛未靖，有

茶客途遇害，里胥欲陷非辜，光国面斥，因遂挟嫌诬狱，迨真犯获，冤始雪。邑侯汪东瀾公浩尝台二事，赠以联句。今子孙科名相继，人谓修德积诚之报。

王名铎〔龚元礼《泽轩王公传》〕字怀光，号泽轩。捐职州同知。世居江邑西门。丰颌修髯，素好行善。凡赈贫恤寡、修桥砌路等事，踊跃争先。尤其大者：乾隆四十九年，贺村仓房，邻境失火，延烧几尽。公命弟怀芳往发仓谷数百斛，偏给之，不取偿。卒前一夕，发篋取戚友署券数百纸，悉焚之。曰：“遗此，恐为子孙累。”其他大率类此。

周登瀛三十二都人。监生。有谏，载《艺文志》。

徐元和茅坂庄人。粟生。有《传》，载《艺文志》。

何纹波税务前人。僧生。咸丰九年，学宪张奖给行宗曾子匾额，入祀忠孝祠。

# 人物志八

## 文苑

### 唐

徐珏〔旧《浙江通志》〕江山人。暗诵《周易》、《小戴礼》。大中十三年，父举明经，携珏诣阙，召试思政殿，赐衣绢。明年，童子科及第，父亦策名，号所居曰稚儒坊。

### 宋

柴成务〔《宏简录》〕字宝臣。乾德中，京府拔解，太宗知其名，擢甲科。为推官，再迁殿中侍御史，历光禄少卿。奉使高丽。远俗尚拘忌，以日月未利，拜恩稽留朝使。成务贻书往返，以大体开谕，国人信服。后迁给事中，知梓州。同修《太宗实录》成，知扬州，入判刑部。生平有《词学博闻》、《稽古善谈论》，士人重其文雅。〔宋成綏《志》〕原文本〔《宋史》〕，作曹州济阴人。〔《宋登科记》〕作江山人，〔汪浩《选举志》〕谓后迁曹州。

毛维瞻〔汪浩《志》〕住镇安。以诗名，与赵抃为友。元丰中，出知筠州。时，苏辙滴监筠州酒税，维瞻倡和尤多。有《凤山八咏》、《山房即事》传于世。〔宋成綏《志》〕《明统志》及《两浙名贤录》俱作西安人，天启《志》则云住镇

安。又维瞻白云庄亦在石门，皆江山地也。仍之，以俟考。

毛滂〔《两浙名贤录》〕字泽民，江山人。元祐中，苏轼守钱塘，滂为法曹。秩满，辞去。是夕燕客，有籍妓歌赠别小词，落句云：“今夜山深处，断魂分付潮回去。”轼以为佳，因问妓谁作，以毛法曹对。轼语客曰：“郡寮有此词人不及知，轼之罪也。”翼日，折柬追还，留连数月，滂因此得名。官至祠部副郎，知秀州。〔宋成綏《志》〕施注苏诗云：元祐初，公在翰苑，泽民自浙入京，以诗贄文一编自通。公出守钱唐，泽民适为椽，是苏与泽民非素不相闻者也。燕客一事，似非实录。案：《尚友录》：苏轼守杭州，滂为法曹。轼得其所为文，深器重之，后荐于朝，擢知秀州。所著有《东堂集》十二卷。

柴绂〔宋成綏《志》〕字元章。宣和进士。尝为临川判官，贼白璫笠破吉州，与纠曹刘敏士捍御保城。著有《宪度权衡》及《须江集》。

毛晃〔汪浩《志》〕字明步，沙堤人。绍兴间，免解，任主簿。尝闭门著书，留心字学，增注礼部监韵，砚为之穿，学者称铁砚先生。其子居正，举进士，校监韵，俱有功字学。明修字韵，宋濂等上言，注释音切，一依毛晃所定，遂取其书名《洪武正韵》。

严瑀〔《万姓统谱》〕字元瑜。绍兴中进士，官平江府录事参军。卜居汎仙山之阳，以文字名家。有《溪上翁草》传于世。

徐慥〔天启《志》〕字以道，以诗名。

柴蒙亨〔《两浙名贤录》〕长台人。母徐娘，梦神人遗大珠，乃生蒙亨。甫能言，即口授书，日万余言，过耳即不忘。六岁，语诵九经，通《春秋》大旨。郡将面试，作文者三，以神童闻，得免解。端平二年初，赴省，尝从幸六和寺，上指示塔云：“一塔七层八面，万佛千灯。”蒙亨即应声曰：“孤舟双桨片帆，五湖四海。”上大嘉之。

毛随〔汪浩《志》〕住镇安。建炎中，为朝散大夫。庚戌，敌骑饮海上，范宗尹荐其有甘石学，诏对行在。随言：“《汉志》岁星所在，国不可伐。今年冬岁当躔而兴宋，自此敌必不能南渡矣。”上大喜。既而果不复来。

徐复殷〔弘治《府志》〕字元礼，江山人。中甲科，召试玉堂，由秘书郎，

历迁左庶子。言不合，遽退学《易》。宋理宗赐克斋二字。鹤山魏了翁称其文，西涧叶梦鼎嘉其行，东涧汤汉铭其墓。

毛登龙〔天启《志》〕字汝作。试礼部，以策论、词、赋冠多士。廷试毕，伏阙上书，论时相，不报。赵汝腾、徐霖嘉其节，后以对策玉堂，除秘书省正字，升秘书省校书郎。

张恪 张恢〔《浙江通志》〕恪，字季武；弟恢，字季长。皆举进士，以文学知名。恪终著作郎。恢尝作《士学圣人之极致赋》。乾道间，入对便殿，孝宗曰：“朕在潜邸，已诵卿赋。”因除太学正。

## 元

祝起龙〔天启《志》〕字云从，号方池。文章特出，从游者众。

龚宗传〔天启《志》〕字须川。绰有文名。所著有《同声录》。

## 明

祝宗善〔《两浙名贤录》〕江山人。博学能诗。洪武间，举文学，为邑庠教谕。秩满，之京，馆鸡鸣僧舍。一日，客有微服倚阑吟者，韵未竟，宗善长揖续之。客骇，问其名而去。翼日，传手诏召见，擢知苏州府，始知微服倚阑者，太祖也。宗善守廉介，以诗文擅名。后坐诬，籍其家，惟图书数卷而已，卒复其官。

徐惟辑〔《衢州府志》〕号紫崖，江山人。博学能文。少时，咏回文诗知名。嘉靖己未进士。为内阁中书舍人，相国徐阶应诏制青词，命惟辑代为之，上未尝不称善。有诗集行于世。

郑一鹏〔天启《志》〕字鹄初，号海翼。苦心力学，经笥之富，后学罕俪。沈相国一贯分校礼闈，亟加叹赏。筮仕漳浦，政声甚著。遽以王事没，漳人立庙祀之。

施幼学〔朱彩《志》〕字德珍，号玉洲，住雅儒里。八岁丧父，家贫，母仰纺织鬻书授之。肆志博古，嗜诗画，善书。所著有《青来阁草》。晚训长兴，加

意造就，人服朗鉴。

**周 柏**〔徐霈《周子墓碑记》〕字国长，春字别称也。五岁，即颖异，通词典。十岁，受《大戴礼》。稍长，好先秦文字，博通诸子、史，又长于《诗》、《骚》，善声律，精古名家书法，梓有《墨林辨体》。尝游武林，登丁野鹤亭，咏五言绝句，观者甚异之。又草老子《道德经》，勒于三茅宫。好寻名山古刹，多所遗翰，以鼓琴草书自适。孝友廉恭，吐词见道。

**胡 敦**〔天启《志》〕字孟文。性纯厚，邃于经学，为文近古，尤善楷书。领乡荐，为国子助教，四方学者宗之。有文集行于世。

**徐必达**〔汪浩《志》〕字去闻，居市后。自幼颖异，博极群书。补庠饩，试辄高等。诗古文辞，各臻其妙。间作小画，俊逸绝伦。蚤世无后，著述散佚，士论惜之。

**何一栋**〔宋成绥《志》〕住大夫巷。由拔贡应部试第一，选授诸暨训导。笃学，工书法，士作有斐集美之。升太仆寺寺丞。

## 国朝

**王卓儒**〔汪浩《志》〕字岸子，住西门。好学能文。垂髻入泮，与名公巨卿游。武林陆丽京以避仇，挈家寓其地。后事解，致书谢之。若曹秋岳、范文白辈，皆赠以诗。数奇不偶，早卒。

**姜启元**〔汪浩《志》〕字长卿。顺治戊子拔贡，辛卯举于乡。性刚方，人不致狎近。生平嗜古博学，行文浩瀚，奔放不可羁。以疾卒于武林僧舍。

**柴 炜**〔宋成绥《志》〕住塘头巷。康熙己酉拔贡。任教谕。为人才蒙学博，工诗古文词。所著有《秋晚堂诗文》二集。

**毛兆铤**〔采访事实〕清漾人。领康熙辛卯乡荐。任山西猗氏县知县。曾奉命清查江苏钱粮事务。平日酷嗜诗书，筮仕后犹不废学，著有《和轩制义》、《云轴诗草》、《退居课徒集》行世。

**杨奏瑟**〔采访事实〕名绍羲，以字行世，住南峰。博学，工诗古文词。乾隆间，圣驾南巡，以岁贡召赴行在廷试，士论荣之。所著《响泉诗钞》，一时争

购，至今犹珍为吉光片羽云。

何茹连〔采访事实〕字萃拔，号吉茆，世居最乐坊。由拔贡充八旗教习，历官至广东潮州府知府，所至有声。平日工书法，出入欧、柳、颜、褚间，得者珍如拱璧。临池之暇，雅喜吟咏。著有《西绿草堂诗稿》梓行。

毛元坤〔采访事实〕字亦方，号补南。领乾隆甲寅乡荐。任平湖教谕，一时髦俊，俱从之游。经其陶铸者，悉破壁去。平湖徐侍郎士芬、钱翰编福昌，其尤著也。本邑后起之秀，亦多出其门。所著有《毛补南稿》行世。

刘侃〔采访事实〕字式端。嗜古博学，综核淹通，每一艺出，同辈论为奇观。故胶庠中，半出门下。弟眉士孝廉，身被教育，仕学兼优。侃以禀贡肄业成均，驰名日下。著有《香雪诗存》二卷。

刘佳〔采访事实〕原名佺，侃胞弟。弱冠，登贤书。幼时，文已惊其长老。闻艺一出，洛阳纸贵。后选授江苏溧水知县。屡与分校，所得皆名下士。簿书鞅掌中，无日不亲丹铅。一时大江以南，群推名宿。所著有《钓鱼蓬山馆集》、《钓鱼蓬山馆时文》梓行。

朱家麒〔采访事实〕长台人。廩贡生。署严州府，临安、上虞、浦江县等学。性嗜吟咏，左右图书，至老不倦。与人交，和蔼可亲。司铎所至，士类多沐薰陶。其所梓《紫霞山房试帖》，为罗萝村学使鉴赏。寿八十二卒。

王钰〔采访事实〕号蓼生，三卿口人，生长江阴。母氏史素工诗，钰之学，得力于母教者多。平生著作甚富，惜数奇不偶，仅以岁贡就职训导，贵志而歿。今所传者，《须江诗谱》五集、《笔帚诗钞》八卷、《陔南杂著》若干卷。已梓行者，《试帖诗》四卷。

## 人物志九

### 隐逸

宋

毛 赫〔天启《志》〕博学多闻，不营利禄。宋仁宗嘉其恬退。卒，赠承奉郎。

周 沂〔《两浙名贤录》〕字翼臣，江山人。趣尚高远，隐身不仕，号白云先生。少与赵清献公抃同砚席，抃甚敬之。既登政府，欲一见沂。沂因入都，扣门，大呼曰：“我欲一见赵四！”阁吏大惊，走白抃，抃曰：“周先生天下士，视轩冕如土苴，岂知有我哉！”整襟肃入，清言数日，不及世务，竟纳履去。

周顺之〔弘治《府志》〕江山人。明《易》学，有节行，与赵抃善。抃遣子候起居，食以蔬食，同行畦町林麓间，进趋极艰苦。既归，抃问曰：“先生何以教汝？”且怒且答，抃曰：“汝处安逸，宁知稼穡！汝享膏粱，宁知藜藿！教汝多矣。”

蒋 芸〔宋成綏《志》〕字克胜，号芹洞。年十六，咸淳丁卯榜第一。上疏论贾似道大奸误国，不报。因隐迹归里，游开化，卜居市埠，教授生徒。元兴被征，不起。〔《两浙名贤录》〕作开化人。

柴随亨〔《宋诗纪事》〕字刚中，号瞻岵居士。宝祐四年进士，知建昌军事。宋亡，与其兄望、弟元亨、元彪隐于榉林九磑之间。人称柴氏四隐。

〔汪浩《志》〕幼颖异，七岁能文，名驰江左，登文天祥榜进士。

柴元亨〔汪浩《志》〕幼试神童科，免解，与兄随亨同登进士。初任春陵令，累官至朝散大夫，转监丞。后隐居榉林九磔之间。

柴元彪〔《宋诗纪事》〕字炳中，号泽癯居士。官察推，有《袜线集》。

## 元

毛德祥〔天启《志》〕柯山人。至元间，授制使，因乱不受职，居江山。

案：德祥隐居江山，置菊所。番禺周伯温以城市山林颇其居，王朴记称为江阳隐君子。

伍 骏〔天启《志》〕字千里。至正间，领乡荐，入太学，不羨荣利，飘然而归。明初，献靖边十策，纳之。授教谕，不就。与鲁桐山同学《易》隐居，鼓琴、读书不辍，学者宗之。〔汪浩《选举志》〕延祐三年丙辰科举人。

郑弥高 弥坚 弥远〔汪浩《志》〕兄弟三人，貌如莹玉，皆读书，不事进取，同居共爨，一食常百余人，翕然和乐。构草堂于双溪之上，匾曰三友儒林。园栽松竹，暇日集宾客，歌咏其间，时号三隐。兼之乐善好施，创建经堂，灵宝碑石可考。

## 明

柴惟道〔汪浩《志》〕字允中，号白岩。体貌古朴，家徒壁立。补博士弟子员，既而弃去，就薛中离、湛甘泉两先生学，充然有得。性喜吟咏，诗益工而贫益甚，所交多海内名公。郡守湖南韩公欲见，不可得，先介之以诗。及见，待以殊礼。著有《玩梅集》，天台王宗沐为之序。

柴天复〔汪浩《志》〕字元甫，号崧皋山人。幼聪敏，屡试俱冠军，数奇，困于场屋，遂厌薄世味，结庐高园，与叔惟道终日倡和，飘然自得，著有《高园漫稿》。

江 厘〔汪浩《志》〕字惟载。少魁伟颖悟，博学能文。隐居，教授衢、信、饶、徽，学者多宗之。

# 人物志十

## 耆 寿

### 明

徐 玘〔汪浩《志》〕市后人。与其子徐惠、徐仁俱叨宾饮。玘寿九十，时两子须发皤然，侍其父往馈。蒋邑令寿饭，孙、曾、玄随其后者四十余人，邑令优礼之，以饭遍给胥役，盖一时之盛也。

毛 轩〔采访事实〕镇安人。嘉靖间，赠百岁寿官。寿九十九。

### 国朝

毛芝文〔采访事实〕凝湖人。奉旨建有百岁坊。

祝兆初〔采访事实〕大溪滩人。亲见七代五世同堂。嘉庆元年，覃恩钦赐粟帛。

徐士伟〔采访事实〕祝礼镇人。年逾九旬，五世同堂。嘉庆八年，奉旨赏给盛世麻征匾额。

祝万朝〔采访事实〕大溪滩人。监生。亲见七代五世同堂。道光元年，覃恩钦赐登仕郎，邑侯李增福给七叶衍祥匾额。

周国麟〔采访事实〕凤林人。监生。道光元年，寿逾九旬，五世同堂。由县申详题奏，蒙恩钦赐八品顶带，给予七叶衍祥匾额。

吴文龙〔采访事实〕白石庄人。道光三年，寿九十九岁。由县申详题奏，蒙恩钦赐顶带，并予建坊。

郑上开〔采访事实〕山塘人。咸丰五年，与妻杨氏俱百有一岁。先一年呈报百龄双寿、五世同堂，蒙赐升平人瑞匾额。杨氏载《列女志·寿母》。

刘 佃〔采访事实〕雅儒坊人。咸丰五年，年逾九旬。重游泮水，由学申详，奉学宪吴给予黄序耆英匾额。

徐步阶〔采访事实〕祝礼镇人。捐授县丞。咸丰十年，年逾九旬，五世同堂。

刘观贤〔采访事实〕雅儒坊人。亲见七代五世同堂。咸丰十年，年九十一，奉学宪张给予积善余庆匾额。

## 人物志十一

### 流 寓

#### 唐

周 美〔正德《志》〕字元美，准右陆安里人。为衢州刺史，爱须江土沃民朴，山水佳胜，乃卜居焉。析子孙为五坦：曰新坦、同坦、学坦、丽坦、平坦。

〔天启《志》、《府志》〕俱作元善。按：元美以武氏当国引退，爱江阳山水之胜，遂卜居焉。守三衢，以惠爱公忠著。杜如晦赠诗，有“冷淡官衙不厌贫”之句，可知其素履矣。著有《河图洛书史略》诸说。

祝其岱字台峰，号东山。明经不仕。〔周元善《序略》〕东山，年少英敏。及长，文章焕然，为两浙诸生钦重，声名藉甚。予刺衢州，奇其有国士风，因荐于朝，简授集贤正字，东山辞不赴职。余因留宾于署，日谈天下事，洒如也。既而长子钦明登第，次子克明尚英公仪宾，世以为荣，而东山容色自若。明年，朝士大夫荐东山内翰检讨，州府催车上道，东山避入江郎山，求之终身不可得。余闻东山隐迹江郎，徒步造访，东山葛巾野服，依然未改。噫！余之不及东山者远矣。

#### 宋

郑子高〔汪浩《志》〕浦阳人。为信安尉，有善政。皇祐间，附籍居协里。

李处全〔天启《志》〕字巽伯，洛阳人。能文，终侍御史。弟处励守衢时，处全择须江仙居僧舍，有林壑之胜，与兄弟家焉。

周次说〔天启《志》〕熙宁间，授通好使，忤权贵，谪衢教授。寓江山。

蒋羽〔汪浩《志》〕字汝翔，家世居吴。高宗朝举贤良，辞不赴。继举文学，亦辞之。适三衢，闻徐逸平讲学南塘里，就访酬和。因见须江山水清邃，遂卜居文明坊。

徐仕安〔汪浩《志》〕字公辅，长沙人。宋乾道间丞江山，有政声，邑人怀其惠。晚致政，爱江俗朴茂，遂卜居邑之南门。〔宋成绥《志》〕本《府志》作士安。

何程〔汪浩《志》〕字鹏望，婺源人。隆兴癸未，举茂才。于淳熙间宰江山。未期月，卒于官。子轲遂附籍，住最乐坊。

郑极〔汪浩《志》〕字惟泰，号一斋。庆元五年，登曾从龙榜进士，授江山丞。莅任逾月，值括寇乱，令长投印夜遁，极率二子以乡兵迎战，中流矢死，二子星月亦遇害。妻周氏仰天叹曰：“父子死国，妾何生为！”遂赴水死。合葬县北青霄桥。惟长子魏珽游学外郡，闻信奔赴，庐于墓侧，因家焉。

徐仕宁〔汪浩《志》〕号学山。其先长沙人。嘉定九年，附籍居利宾乡南塘，后表为祝礼镇。

王得陆〔汪浩《志》〕莘县人。宋宰相王旦六世孙也。任江山教谕，阻于乱，因家雅儒坊。

徐德四〔汪浩《志》〕莘县人。仕宋为制置使，从驾南渡。因妹婿王得陆谕江山，遂偕隐焉。

吴嘉进〔《常山县志》〕吴祐孚，饶州人。八世孙嘉进为江山教谕，迁居松峰。

王计〔采访事实〕字从善，太原人。授左院判。景定间，因王事道经须江，爱其俗美风醇，遂家于太尉庙前，后住景明巷（即经明坊）。乐善好施。子承简，授兵部司务；孙良规，授大理寺丞。三代居官清介，均有声誉。

## 元

吴禄应〔汪浩《志》〕吴佑，饶州人。清泰二年，以进士守衢州，后葬江山梧峰。裔孙禄应授本庠谕，因世守墓所。何梦桂撰《学记》有“诸大夫之功，得吴君而益明”之语。案：〔汪浩《志》〕吴佑、禄应，俱列流寓。考：佑于五代后唐废帝清泰二年守衢州，后葬梧峰。禄应于元至元间任本邑教谕，因世守墓所。是佑未尝居江山也。兹仍以禄应列流寓，而佑不并载。

金敞〔天启《志》〕字尚文，新安人。由侍御谪任本县税院，遂附籍焉。

王肇基〔天启《志》〕信安进士廷芝之后。因元乱，欲入闽，见须江山水佳丽，遂留居焉。

璩可道〔天启《志》〕字元学，龙邱人。元季，以茂才荐授江山尉。有才能，喜山水之胜，卜居南门。晚就西山之阳建紫微观以栖隐。

程宗文〔天启《志》〕徽州人。忠壮公灵洗之后。隐居不仕。元时，避乱，择居何家巷，子孙世处焉。

刘希贤〔汪浩《志》〕上饶令，弃官避元乱，隐居江山之雅儒防。〔天启、朱彩、宋成綏诸《志》〕俱作若贤，入明。今仍汪浩《志》。

张荣元〔采访事实〕须江教谕，爱江郎风景，秩满，遂卜居于外雅峰。今张家源氏族是也。

## 明

徐演〔宋成綏《志》〕字仲永，福建人。洪武乡荐，父宏举明经，任衢州教授，道经浦城，出江山凤林乡，乐其风美俗厚，命演占籍焉。演历官助教、翰林，试楮先生传进呈第一，特拜右春坊，以疾告归。

班琴〔天启《志》〕京兆人，号南轩。福建布政使，占籍江山。子平，字季清，官至河南右参政，有声于时。

胡百川〔天启《志》〕婺源人。洪武初，以镇边授提举，因居镇安。

孙献夫〔天启《志》〕西安人。宣圣五十九世孙，宗人府经历。永乐间，

寓居邑之归厚乡。

施文彩〔天启《志》〕开化人。徽州同知自谦之孙，继娶江山毛氏，以赘为家。

邹 璘〔汪浩《志》〕号复斋，成都人。崇禎庚辰进士，任古田知县，调补余杭，有政声。擢刑部郎中。遇闽乱，流寓邑之南峰。寻，不食死。余杭民追祀名宦。子澄，入籍，登康熙壬子乡荐。

米云卿〔宋成綏《志》〕字君梦，楚人，或以为汴人。少有才名，薄游南北，落落不遇，徙家东郭十年，有《澌水移家诗》。后侨居吴兴，卒。

汪普贤〔采访事实〕子希颜。笃志经学，尤工辞赋，襟怀旷达，更精究方书。时以救人为心，著《医理直格》二卷行世，见《常山县志》。晚年，游须江大陈，爱其山环水漾，林木葱郁，遂居焉，号其地曰环山。

## 国朝

余 锡〔汪浩《志》〕字九如，号舟庵，西安人。祖国宾，江西布政使。父敷，举人，东流知县，卒。奉遗命赘徐日葵家，附籍江山。年十三，补弟子员。甲午恩贡。工诗文。 案：《府志》：余锡，顺治十三年拔贡。

金应祜〔汪浩《志》〕号仁庵，江南定远人。顺治三年，流寓江邑。康熙十八年，补湖协副将。子四：长之振，府庠生；次之捷，己卯科武举；三之抃，功加守备；四之抡，乙酉武举，癸巳进士。

## 人物志十二

### 方 伎

#### 元

顾 辉〔《画法年纪》〕字秋月，江山人。善画道释人物。〔《匏翁家藏集》〕秋月，画鬼尤工，笔法奇绝，有八面生意。

#### 明

伍子安〔正德《志》〕幼通经史，长遂于医，就者如市，皆不责报。郡守张实荐为御医。所著有《活人宝鉴》十卷。学士宋濂志其墓。孙：敬仲，尤能世其业，疗奇疾甚众。

吴 棍〔汪浩《志》〕寺巷人。与俗无竞，悬壶于市，卖药多活人。子一恺，举明经，人以为报。

何 晓〔汤显祖《送归江山序》〕晓，字东白。拳勇任侠，常手杀劫贼数人。遇寄客，口授禁方，为人傅药辄效。客平昌，邑故无城，虎夜半伤童子，取巨胜膏渍墙茨中濡虫杂药灌之愈。时号十全。无子，不治产，岁焚券过半。晚生子归，年已老，犹从使琉球，治其王子妇女，立效，国人神之。得海药以

归。

徐 翮〔汪浩《志》〕号凤石。以医名，时称凤石医仙。

## 国朝

毛 华〔采访事实〕字乐天，江郎街人。潇洒轶尘，工鼓琴，尤善画竹，自号江郎山人。虽尺幅，人争什袭，至今犹远近传之。

## 附：仙 释

### 唐

詹妙容〔《名胜志》〕番阳女子。唐贞元初，修真于须江之筋竹山。褚衣木食，腾空而逝。

大 义〔《两浙名贤录》〕衢州须江人，姓徐氏。得法于怀让禅师，卓锡鹅湖，随机说法。宪宗尝诏入内。有法师问：“如何是四谛？”义云：“法师只知欲界无禅，不知禅界无欲。”法师曰：“如何是禅？”义以手点空，法师无对。义又举顺宗问尸利禅师：“大地众生如何得见性成佛？”尸利云：“佛性犹如水中月，如何攫取？”帝乃问：“何者是佛性？”义对曰：“不离陛下所问。”帝默契。宪宗益加钦重。元和十三年，卒，敕谥慧觉禅师。见性之塔。

### 五代

仪 晏〔《十国春秋》〕湖州许氏子。生唐乾符三年。诞育时，异香满室，红光如昼。开运中，游江郎岩石龕，谓弟子慧兴曰：“予入定此中，汝垒石塞门，勿以为念。”慧兴如所戒。明年，启视，素发披肩，胸尚暖。徐起定，了无异容。已复回信安乌巨山。忠懿王赐号开明禅师。〔汪浩《志》〕开明禅师仪宴者，南唐人也。云游至江郎山，跌坐祠旁丛棘间。鹤巢其顶，叶没其膝。有郡守谒祠见之，年已五十三矣。始为祝发卓庵，有虎跑泉以供其饮。

## 宋

周文霸〔朱彩《志》〕修行于龙泉院，能开晴致雨。嘉祐四年，大旱。师积薪自焚，天果大雨。里人立像祀之。案：龙泉院，即雪村龙泉寺。

毛妙通〔朱彩《志》〕民家女，自幼修真，了悟大道，白日凌空而去。

南台和尚〔朱彩《志》〕持戒悟道，尝作偈曰：南台静坐一炉香，境界萧然万虑忘。不是有心除妄想，却缘无事可思量。后端坐而化。

吴溥〔宋成铨《志》〕秀峰人，宋僧也。修真于白岩洞。一日，往廿七都采山蔬，卒于路。有商人见之，弃其尸于河，逆流而上。是夜，商人梦溥托钵端坐，语以故。明日，往视，果在原所，容貌如生，异香缥缈。因募工塑为像。工私怀其拇骨，天忽大雷雨，出所怀续之，始息。至正元年，众构惠泽庵，以栖其像。里人复筑庵于秀峰西溪之滨，迎归祀之。早祷辄应。康熙十年，邑大旱。常事迎至城，设坛祷之，大雨如沛。

## 明

柴公达〔《两浙名贤录》〕江山人。自号无为道人。有道术。洪武中，寓龙虎山，与张真人游。一夕，真人欲警夜，公达曰：“毋徒劳人，吾已役神兵矣。”是夜，铃杵之声远曙。真人尝遇公达夜归，见其假电烛涂，其明如昼，真人大异之。〔旧志〕作无无道人。

柴用先〔《两浙名贤录》〕江山人。号惟一子。有神术，能呼召风雨。永乐间，自京师迁至武林，值大旱，自言能致雷雨，藩臬以礼迎之，大书一联于坛上，云：“三日登坛三日雨，一声号令一声雷。”及期不雨，众且诃之。用先乃散发呪符，叱官吏跪坛下。须臾，雷电交作，大雨如注，滂浸百里。

柴壮〔《两浙名贤录》〕柴用先族子。少孤，不事生产，其家逐之。居浦城三年，得五雷秘法，祛邪治病，祈晴祷雨，大著灵异。

非幻〔正德《志》〕宝陀庵住僧。谙儒书，精地理。尝应召相地天寿山，太宗奇之，赐以金紫。永乐十八年，遣使者祭其墓，赠五官灵台郎、僧策司

右闾教。

寿青童子〔宋成经《志》〕兴贤马坞口禄川地方多姓叶，俗呼叶村。正统间，有童子寿青，以五月十九日生襁褓中，多灵异。稍长，就学村塾。事无大小，必先告。一日，诸童戏令攫邻园果，即假寐探袖出，邻人侦知，白于师，以方隐几，弗信。尝冒雨归家，勿假盖，讯之曰：“吾从雨罅中行。”值溪涨，众方望洋，童子以所挟荚投水济。其幻化类如此。未几，痘殇，母设灵衣座隅，饮食呼名则应。会母鸡工治庐，斧坠伤母臂，几殒。闻空中语，束以发，立愈。工因诣瘞所谢，见桐树已拱。请斲以肖其像，真生时所遗发于颠。母闻往视，将以神拜之，像仆炉上，面炙如紫金。景泰四年，村氓闻其事于官，为立案，跻主城隍庙。

杨起溟〔朱彩《志》〕号栖碧。强记能文，善书法。致雷雨，不事符咒，人甚异之。〔汪浩《志》〕著有《栖碧集》。

本松长老〔朱彩《志》〕江右人。万历间，来往鹤岩，荷锄自给，不识字而默解经义。有赠以糗者，付常住作供，必令其食尽乃去。不谈祸福，间亦微露先知。寿九十余，坐化。

烟萝子〔汪浩《志》〕不知何代人，修炼于景星山之烟萝洞三年，白日飞升。

大志〔采访事实〕本姓毛，卓锡峡溪白水庵。火化成佛，里人立庙祀之。早祷辄应。峡口同知陈述经勒石于庙，以记其事。

《江山县志》卷之十上

# 列女志一

表扬贞孝节烈，所以彰风化而式閭闾。近复推广恩典，凡从前格于年例，湮没未彰者，悉予题褒，以阐幽光。至年登耄耋，洵为贞寿之征，而偕老期颐，尤为升平之瑞也。志列女。

## 节 孝

### 宋

毛宁妻黄氏〔汪浩《志》〕夫早故，子豫方三岁，氏矢志守节，后豫以文章政事为绍兴名臣，氏封恭人。

### 明

徐祥妻蔡氏〔弘治《府志》〕名贵娘，年二十四，夫故。誓不改节，所生惟一女，立嗣以奉宗祀。遭元季散乱之际，志操益坚。洪武初，旌表。

夏显七妻蒋氏〔天启《志》〕年二十二，丧夫，子在襁褓。值元末兵乱，不以艰窘丧节。洪武十六年，旌其门。宋成綏《志》、《明统志》作西安人。

吳氏双节〔《浙江通志》〕吳士規、士矩兄弟，相繼死王事。規妻張氏、矩妻徐氏年俱二十，共撫三雛以守節。洪武初，旌表。姜德政為作《傳》。按：姜太守傳文舊志失載，今因年遠，無從採輯。

楊忠妻王氏〔《府志》〕忠死賊難，氏年二十二。守節撫孤，至八十而卒。

毛顯聰妻姜氏〔正德《志》〕年十九，顯聰歿，家人勸其嫁，氏涕泣不食，曰：“生為毛氏婦，死作毛氏鬼。”遂割髮垢容，示不易志。

王建妻金氏〔《府志》〕名西娘。年二十，夫故。遺腹生子。夫弟使改嫁，氏以死誓。年七十卒。

王氏双节〔《府志》〕王政妻徐氏，名綾娘。年十九，夫故。夫弟輝亦早卒，妻吳氏，名貞娘。同守苦節，後俱以壽終。

席家郎妻鄭氏〔正德《志》〕嫁未逾月而席故，鄭方十九。家貧，有欲嫁之者，鄭斫白刃自衛，曰：“必殺媒而後已。”紡績自活，守志不渝。

劉夢覺妻嚴氏〔《府志》〕夫故，毀形自匿，足不逾闕。年近八十，有虎入其室，手攫之而去。邑人異之。

王舉妻江氏〔崇禎《府志》〕年二十五，夫、男并故。與其娣毛氏，苦志守節。有司以聞，旌其門。

徐源妻姜氏〔《府志》〕歸三載而源故，子化龍尚幼。適有寇，或勸其依人逃匿者，氏引錐剔目，目眇。化龍後登鄉荐，知河源縣，以政績聞。

王毛妻劉氏〔《府志》〕名科姑。歸二載，毛故。無子，氏闔戶紡績。鄰人失火，几及廬，氏不行，卒免。年八十，有司旌之。

鄭相妻徐氏〔徐需《節婦傳》〕名義。年十八，歸鄭。夫疾，衣不解帶者七月，夫故，自縊，姑覺救免。日懸夫像，夜設寢衣掛床左，哀毀骨立。翁憫之，令人勸其嫁，氏誓必死。有富民重賄欲娶之，即剪髮蓬頭跣足如痴，乃止。守節三十余年。

楊淵妻管氏〔汪浩《志》〕年十七，夫故。饜饜不給，紡績養姑。姑卒，葬祭如禮。母勒其改嫁，不從，投河水，逆行十余里，若有神扶遇救起。年八

十二卒。事闻，建坊于墓。

毛希哲妻王氏〔汪浩《志》〕名凤姑。年二十五，夫故。矢志不二，事舅姑以孝闻。卒年一百一岁。

胡良骥妻毛氏〔天启《志》〕年十七适胡。未几，骥远商二十年，氏事舅姑孝弥谨。夫外娶张氏，生子三，毫无愠色。夫歿，子归，鞠视逾于所生。乡里称之。

胡鼎妻施氏〔汪浩《志》〕名嬉娘。年十九，夫故。誓不改志。七旬卒。詹金宪菜赠诗颂其节。

徐霆妻赵氏〔汪浩《志》〕年二十八，夫故。家贫守节，抚孤成立。隆庆四年，县令邵仲豫旌其门。

毛和妻姜氏〔汪浩《志》〕太守德政之妹。年十九，夫故，生遗腹子。守志。八十余岁卒。

生员姜珊妻徐氏〔汪浩《志》〕年二十二。守节，逾七十卒。

姜成妻毛氏〔汪浩《志》〕进士毛羽女孙，适姜。少寡，生遗腹子谊。母节子孝，乡族称之。按：《姜氏宗谱》：名璫。

徐显荣妻胡氏〔宋成綏《志》〕妾祝氏，生子璘。夫歿，氏纺绩度日，抚教妾子。后璘善行著闻，子孙蕃庶，科第起家。

程锡妻徐氏〔宋成綏《志》〕年二十，夫故。以节孝著。卒年八十三。

周曾妻毛氏〔宋成綏《志》〕夫歿，抚子。子复夭，抚孙。荼苦备尝，赐旌表。孙名周老，时称顺孙。上官屢给粟帛。

邵惟信妻毛氏〔宋成綏《志》〕名淑。姑、夫故，断发自誓，抚子大武成立。年六十七卒。

徐世承妻王氏〔宋成綏《志》〕年十七，夫故。子未周岁，抚孤成立，事翁姑以孝。七十卒。

王尚文妻郑氏〔宋成綏《志》〕夫故，抚侄。荼苦不渝，年七十卒。

毛伏妻徐氏〔宋成綏《志》〕夫故，守志。姑卒，哀毁尽礼，身亲治葬。

吴绍妻章氏〔宋成綏《志》〕年十九，绍卒。侄仅二岁，抚养成立，以寿

终。建坊旌表。

王一经妻郑氏〔宋成绥《志》〕前明人，事实失考。国朝知县雷士佺据墓碑文送入贞节祠。 以上旧志。

周维寿妻王氏〔蔡英《贞节录》〕天顺间人，住十四都青石村。年二十四，夫故。遗子三岁，抚孤贞守。近地璩源寺铸钟，屡治不就，司事者得梦，求氏捐施。氏贫，拔一簪予之，投诸冶钟即成。后人犹传述之。

## 国朝

毛柱妻胡氏〔《府志》〕年二十七，夫故。家极贫，事姑尽孝。姑病革，嘱曰：“吾以幼子措累若。”姑卒，殓葬如礼。后措成立，氏之力也。顺治初，寇乱，氏子被获，将刃之，或云：“此节妇子，不可杀。”郡守袁国梓旌之。 按：蔡英《补订县志考》、《石门乡志》作毛国柱。

王氏双节〔汪浩《志》〕王文焜妻郑氏，年二十四，夫故。子之圻，甫周岁，抚育长成，娶妇。郑氏得孙健，复周岁而之圻亡。姑妇嫠居，苦志四十余年，先后全节而终。

陆世久妻王氏〔《府志》〕年二十生子，夫即世。夫有堂兄弟三，艳其财，欲夺而嫁之，誓死不从，抚孤子，生孙四，曾孙数十人。年八十卒。

刘秉珪妻毛氏〔汪浩《志》〕年二十七，嫠居贞守，事舅姑以孝闻，抚二子中舟、中柱，并游黉序有声。年七十卒。

徐代妻王氏〔汪浩《志》〕名淑媛。年二十，夫歿。矢志守贞，抚侄为嗣。事舅姑以孝，妯娌间无疾言遽色。拮据持家，不辍劳瘁。卒年四十八。

徐时椿妻余氏〔汪浩《志》〕年十九，夫故。誓志不嫁，抚子伯裔，式毅有方。舅以公务居郡城，姑病笃，值寇乱，医药无措，吁天愿以身代，氏竟卒，而姑愈，人以为孝感所致。

夏国光妻周氏〔汪浩《志》〕夫故，年二十九。以节自誓，训诲五子成立。年七十余卒。

王用光妻毛氏〔汪浩《志》〕二十四，夫故。子国祚甫八龄，守贞抚孤，

卒年七十七。节推孙鲁给匾旌之。

周三桂妻詹氏〔汪浩《志》〕年二十四，夫故。抚六岁孤应卿。时值荒乱，斗米千钱，针黹苦度，孀居三十余年卒。长孙瑛以学行显。

王教行妻毛氏〔宋成綏《志》〕端简公孙女，夫故，抚二子一女，颠沛流离，不易其节。年八十余卒。

柴国佩妻郑氏〔宋成綏《志》〕夫故，守志。事姑极顺。子夭，父母欲夺其节，氏益坚初志。邑令旌之。

蒋肇基妻王氏〔宋成綏《志》〕名戎娘。年十九，夫故。夫弟欲夺其志，断发自誓，抚二子成立。年七十五卒。

王廷铨妻毛氏〔宋成綏《志》〕十九，夫故。训子遭甫入泮，而夭，二孙樛、耘皆在抱。郡邑旌之。年六十三卒。

王澧妻朱氏〔《府志》〕年少，夫故。抚二子成立。与孀姑毛氏，一门双节，郡邑旌之。

王极妻毛氏〔宋成綏《志》〕夫故。子方四岁，翁姑相依，孝慈兼致。年八十余卒。

胡见彦妻姜氏〔宋成綏《志》〕名琼姑，明进士姜梁元孙女。夫故，时值鼎革，流离困苦，守节抚孤。康熙十年，邑令万里侯旌其门。

柴学儒妻朱氏〔宋成綏《志》〕夫故，苦志，日用薪米，俱从十指出，抚子成立而卒。

黄一麟妻毛氏〔宋成綏《志》〕夫故，事孀姑以孝，训子游庠，以寿终。

徐有寿妻姜氏〔宋成綏《志》〕夫故，抚四子，俱成立。年六十三卒。

毛鼎元妻徐氏〔宋成綏《志》〕居孀，侍舅姑以礼，抚二子以慈。寿八十终。

胡进吉妻周氏〔《府志》〕凤林鸿胪寺卿文兴裔孙女，名彩蒂。年十八，夫故。抚侄为嗣。五十余年，苦志如一日。

周子仪妻徐氏〔宋成綏《志》〕年二十五，夫故。事孀姑以孝闻。

毛宏柱妻周氏〔宋成綏《志》〕年少，夫故。守节至八十二而卒。

徐文爝妻毛氏〔宋成绥《志》〕年二十一，夫故。守节至七十一而卒。

毛大鹤妻王氏〔宋成绥《志》〕年十七，归大鹤甫一年，而夫故。遗腹生女，乃抚幼侄为嗣，皆成立。姑两目俱瞽，氏扶持左右，亲调汤药者十八年。守节三十二年卒。以上雍正年间题旌。

杨世炳妻余氏〔宋成绥《志》〕年十八归杨，三载，夫故。舅姑相继亡，子家燠甫二岁，孤苦坚守，训子尤严。

叶兆华妻徐氏〔宋成绥《志》〕年二十七，夫故。守节事姑，抚四子成立。

王文甲妻毛氏〔宋成绥《志》〕年二十，夫遭阉变歿。抚遗腹子，日夜纺绩，孝奉舅姑。

徐梦榴妻朱氏〔宋成绥《志》〕年十七，夫故。遗孤逢恩甫六月，矢志守节，孝事舅姑，训子成名及两孙，俱列成均。长孙受职銓选，克绍先声。

周世道妻徐氏〔宋成绥《志》〕年二十四，夫故。无子，孝养舅姑，抚嗣子及孙成立。

柴成茂妻赵氏〔宋成绥《志》〕年二十四，夫歿，一子名振拔，甫四岁。守节抚孤，辛苦备尝。按：赵氏以孙大纪贵，诰赠一品夫人。

姜秉銓妻周氏〔宋成绥《志》〕年二十六，夫故。守志抚孤如澧成立。

刘春喜妻郑氏〔宋成绥《志》〕夫故，子仅二岁，守志抚孤，苦节四十余年。

毛永元妻徐氏〔宋成绥《志》〕年二十二，夫故。守节，抚侄成立。

宋国桢妻毛氏〔宋成绥《志》〕年二十五，夫故。抚侄永宙为嗣，教养成立，孝奉孀姑。守节四十七年。乾隆六年，氏捐金修延龄桥。邑令旌其门曰“节义可风”。子宙复捐田入义学及贞节祠，邑令嘉其孝义，绅士公举，氏入节孝祠。

何兆麒妻徐氏〔顾祖锡《何母徐节妇传》〕年十九，归何。姑徐氏病剧，兆麒剖股以愈，人称为孝。兆麒病不起，氏方娠，乃检生平著作付之曰：“天幸或生男，何氏四世单传，冀延一线。”歿半月，生子怀德。氏年二十三，坚守冰

节，上侍二老，下抚孤雏。子长能文，学行醇笃，游郡庠。三孙：长平，乾隆辛卯岁贡；仲惟康，郡庠生；季惟正，入成均。曾孙辈俱业儒。

郑世纓妻毛氏〔宋成綏《志》〕归邦六年，夫故。子之望岁始周，舅姑年迈，氏事之益谨，教子成立。令阜城，刑清政立，有爱在民，乞养归侍。寿八十余。

何鹄妻郑氏〔宋成綏《志》〕年二十二，夫故。遗孤四月，矢志守节，敬事舅姑，训子成立。

祝会三妻徐氏〔宋成綏《志》〕年十八于归，逾半载而寡，孝养后姑，抚育继子，苦节四十余年。

刘芝芳妻毛氏〔宋成綏《志》〕夫故，励志苦节，孝事孀姑。

王永禄妻毛氏〔宋成綏《志》〕年二十二，夫故。子庆来二岁，遗腹子旭升。家贫，事姑抚孤。守节四十余年。

毛三振妻汪氏〔鲍锬《毛母汪节妇传》〕年十八，归于毛甫八月，而夫歿。姑徐氏双目失明，氏奉事惟谨，以侄羽凤为嗣，襁褓抚育，躬亲蚕绩，苦节四十余年。羽凤游邑庠；孙连甲登武榜，连元庠生。

严道岸妻沈氏〔宋成綏《志》〕夫故，抚遗腹子。苦节四十七年。

王德亨妻柴氏〔宋成綏《志》〕夫故，遗孤未及周岁，抚育成立，敬奉舅姑。守节五十年。

周尚文妻刘氏〔宋成綏《志》〕年二十二适周，夫故。苦节四十二年。孝养衰病舅姑，抚育继嗣，并教幼叔尚亲成名，出宰井陘，感念同于慈母。

徐永忠妻祝氏〔宋成綏《志》〕孝奉病姑，教养嗣子。守节二十六年。

毛在桂妻何氏〔宋成綏《志》〕抚遗腹子，奉姑。守节四十余年。

郑文灿妻何氏〔宋成綏《志》〕奉事舅姑，抚遗孤。守节。按：蔡英《贞节录》：丁酉科拔贡生郑云之母也。年二十归邦，一载夫故，遗腹生云。以上乾隆年问题旌。

柴儒妻徐氏〔宋成綏《志》〕抚孤守志。按：蔡英《贞节录》：年二十归柴，逾年夫故。守节至七十六岁。

· 黄序锡妻周氏〔宋成绥《志》〕抚育遗孤，奉事衰老舅姑。守节三十一年。按：蔡英《贞节录》：氏年二十九，夫故。遗孤二：长五龄，次甫周岁。氏抚孤长成，贞心完节。

张廷煌妻王氏〔宋成绥《志》〕抚嗣守节，奉事舅姑。按：蔡英《贞节录》：氏年十八，夫故，无子。守节。姑早亡，夫弟年仅十三，次十岁。后姑生二子多病，一甫四岁，一两岁。氏佐姑抚养成立，越十载，才得一侄，氏即抚为己子，备历辛劳，秉志不渝。嗣子早游郡庠，其孙亦入泮。嘉庆十三年，旌表建坊。时年已八十有四矣。以上嘉庆年问题旌。

林氏一门双节〔宋成绥《志》〕林滋莢妻郑氏，抚育二子，奉事舅姑。守节五十四年。滋华妻王氏，抚育七月遗孤。守节五十年。按：蔡英《贞节录》：郑氏年十八，归滋莢十载，夫故守节，二子俱幼，抚育成立，年七十七卒。王氏年二十，归滋华。二十七岁，夫故。遗孤未及岁，氏抚孤守节，年八十九卒。夫属同胞，妻俱守义，邻族咸称敬之。嘉庆六年，详奉学政刘给匾旌奖。

祝必达妻王氏〔宋成绥《志》〕守节抚孤。康熙五十八年，由县给匾奖赏。

郑尔潜妻詹氏〔宋成绥《志》〕奉事舅姑，抚孤。守节。乾隆四十一年，由县给匾奖赏。

祝廷增妻金氏〔宋成绥《志》〕夫故子夭，苦节四十余年。住大溪滩。按：蔡英《贞节录》：氏年二十六，夫故守节，遗腹一子又夭亡。家贫，无愿为嗣者，终身茕独，苦节五十二年卒。

郑廷樟妻柴氏〔宋成绥《志》〕奉事孀姑，抚孤守节。

王世发妻林氏〔宋成绥《志》〕守志奉姑，苦节六十年。

郑长享妻柴氏〔宋成绥《志》〕奉事舅姑，抚孤。守节。以上由县给匾奖赏。

周士俊妻柴氏〔宋成绥《志》〕奉事孀姑，抚孤。守节六十年。

毛有元妻王氏〔宋成绥《志》〕抚育继嗣，奉姑。守节三十九年。

杨盛麟妻王氏〔宋成绥《志》〕奉事翁姑，教子灿成名。守节六十三年。

按：道光二十七年题旌。

周增衢妻赵氏〔宋成绥《志》〕成婚一载，夫歿。无子。奉姑。守节三十八年。

毛采芬妻郑氏〔宋成绥《志》〕奉事翁姑，教子成立。守节五十六年。以上呈县请旌。

王良楫妻刘氏〔宋成绥《志》〕奉姑教子。守节四十七年。

王良桢妻徐氏〔宋成绥《志》〕奉姑教子。守节五十二年。

徐世瑞妻陈氏〔宋成绥《志》〕奉姑教子。守节四十一年。

周世烈妻郑氏〔宋成绥《志》〕抚孤。守节四十四年。

朱永湖妻周氏〔宋成绥《志》〕奉事舅姑，抚育继嗣。守节三十五年。

龚天禧妻柴氏〔宋成绥《志》〕奉事舅姑，抚育继嗣。守节三十七年。

林氏双节〔宋成绥《志》〕林播珽妻姜氏，守节四十一年。子三礼妻毛氏，守节已三十一年，两世冰操。

徐鸣皆妻王氏见《府志》。

王永枚妻姜氏〔宋成绥《志》〕抚孤奉姑。守节五十六年。

柴步青妻周氏〔宋成绥《志》〕抚孤。守节三十八年。

柴允元妻宋氏〔宋成绥《志》〕抚孤。守节五十一年。

柴桓妻毛氏〔宋成绥《志》〕抚孤。守节三十三年。

柴象鼎妻徐氏〔宋成绥《志》〕抚孤。守节三十年。

王士彪妻刘氏〔宋成绥《志》〕抚孤。守节四十四年。

祝德纯妻周氏〔宋成绥《志》〕夫故。无子。守节三十七年。

郑廷瞻妻祝氏〔宋成绥《志》〕夫故。无子。守节三十年。

余垂璧妻李氏〔宋成绥《志》〕抚孤。守节三十二年。

朱妃妻王氏〔宋成绥《志》〕夫故守节，抚孤奉姑。以上呈学请旌。

俱见旧志。

毛廷闹妻胡氏年二十四，夫故。子二自基、自启俱幼，抚孤守节。

汪晋妻祝氏年二十二，归汪六载夫故。遗孤甫五岁，无叔伯，姑先夫死，翁后夫数载亦死。子幼多病，誓死守节，抚子成立。年七十九岁卒。

璩兆湖妻毛氏年二十六，夫故。一子名嘉梧，甫四岁，抚孤守节。

以上乾隆年问题请旌表。

王廷祐妻柴氏年二十一，夫故。无子，矢志守节。一侄甫七岁，父母俱丧，氏尽心抚养，视若己子。

杨文在妻王氏年十七归杨，甫十月，夫故。无子，誓死守节，以仲伯之子树本为嗣，才七岁，尽心抚育。姑病五载，侍养顺谨。

监生朱时尚妻柴氏年十九适时尚，未两载，夫故。遗孤培锦生才五月，抚孤守节。

周氏双节 孺童周文准妻毛氏，年十六适周，五载，夫故。守节抚侄鸣凤为嗣。弟孺童文桓妻毛氏，年二十八夫故。长子甫六龄，次子方怀娘，抚孤守节，俾皆成立。

王咏祥妻祝氏年十八适咏祥，四载，夫故。子甫三岁，又遗腹生一子，抚孤守节。

詹兆武妻方氏年二十九，夫故。事姑抚孤，完节终身。

监生毛懋通妻王氏年二十七，夫故。子方周岁，抚孤守节，至七十九岁卒。

璩氏双节 璩家琼妻毛氏，年二十八，夫故。其家七世单传，无期功之亲。氏奉姑抚孤，矢志贞守。次子显祖复早夭，无嗣，媳林氏年十九，青年守节，终丧不茹葷，两世孀居，并完冰操。毛氏卒年七十有八，林氏亦守节四十余年卒。

毛梓妻周氏年二十七，夫故。无子，抚侄。守节。请旌时，年已八十三岁。

朱启泰妻汪氏年十九，夫故。无子，抚侄。守节五十一年。按：氏有婢，名七宝，敬事主母，誓不违人，汪氏卒，投繯以殉。

王明锁妻夏氏年二十四，夫故。一子方四岁，抚孤坚守。

毛如球妻吴氏年二十四，夫故，氏怀娠甫七月，夫死之次日产生得男，励志贞守，抚孤成立。

何益获妻周氏年二十五，夫故，无子。有富室欲重聘娶之，自誓必死，志不可夺，完节终身。

毛连本妻刘氏年二十五，夫故。翁姑以氏年少无嗣，且家贫，劝再适，氏誓不改操，乃以侄鸿贤为嗣，艺圃给衣食，殁齿无怨尤。

王氏双节王泳涟妻毛氏，年二十一，夫故。无子，抚侄为嗣，复夭，遗一孙，与媳郑氏共抚之成立，双节同完。

监生徐廷科继室张氏年二十五，夫故。翁姑早歿，无伯叔可依，一子两女俱幼，矢志抚育，婚嫁皆毕，完节终身。

拔贡生姜文炤继室徐氏年二十八，夫故。无子，抚侄守节。以上嘉庆年问题旌。

毛志魁妻郑氏年二十八，夫故。无子，抚侄守节。乾隆五十八年，奉学政李旌奖。

监生王锦霖妻谢氏江南沛县知县谢纶音女，归安县人，适西塘巷锦霖。年二十五，夫故。无子，抚侄槐洙为嗣。守节四十三年卒。呈学请旌。

洪国珍妻张氏年二十五，夫故。守节，两子俱幼，舅姑垂老，夫兄嫂早亡，庶出一子才五龄，生母替不能养。氏上事舅姑，下抚子侄，俾皆成立。婚娶宜家，夫昆弟似续，均赖氏一人，苦节相延。乾隆三十二年，巡道程以冰雪风清旌其间。

毛国弑妻徐氏年二十五，夫故。抚孤守节，卒年四十九岁。乾隆五十九年，奉学政李旌奖。

郑增盛妻周氏年二十九，夫故。守节抚孤成立。年五十九岁卒。呈学请旌。

生员周际隆妻毛氏年二十六，夫故。家贫，子甫四龄，氏事亲抚幼克成完节。嘉庆元年，奉学政阮旌奖。

缪士良妻朱氏年二十一，夫故。遗腹一子增球，抚孤。守节六十七

年。嘉庆二年，奉学政阮旌奖。

胡氏双节胡元融妻俞氏，年二十，生子世兴，逾月夫故。抚孤。守节十四年卒。媳詹氏，年二十二，夫故。长子早殇，次子未冠而夭。氏矢志不易，抚从侄以延夫祀。嘉庆二年，奉学政阮旌奖，时氏年已八十有六。

童生周思纪妻徐氏年二十一，夫故。无子。守节，抚侄学璠为嗣。嘉庆二年，奉学政阮旌奖。

王显名妻徐氏年二十六，夫故。无子，抚侄守节。嘉庆三年，奉学政阮旌奖。

徐詠隆妻赵氏年二十三，夫故。抚孤守节，卒年五十九岁。嘉庆三年，奉学政阮旌奖。

徐秀来妻胡氏年二十九，夫故。抚孤守节。嘉庆三年，奉学政阮旌奖。

蒋兆祥妻陈氏年二十，夫故。遗腹一子，家贫。守节至七十四岁卒。嘉庆四年，奉学政刘旌奖。

生员邹光焕妻俞氏年二十，夫故。无子，抚侄宏焯为嗣，家贫。守节至七十三岁卒。嘉庆四年，奉学政刘旌奖。

王一鲠妻祝氏年二十八，夫故。家贫守节。孤子早亡，遗孙幼而多病，甫成丁亦殇，备极忧劳，坚贞不改，卒年八十有五矣。嘉庆四年，奉学政刘旌奖。

姜兆大妻徐氏年十七适姜，九月，夫故。遗腹一子，抚孤守节。姑病足不能行，竭诚以祈神祐，姑病渐愈。嘉庆五年，奉学政刘旌奖。

郑兆成妻柴氏年二十四归郑，五月，夫故。无子，抚侄为嗣，坚志守节。嘉庆五年，奉学政刘旌奖。

姜含生妻田氏年二十六，夫故。抚孤成立。守节四十六年卒。嘉庆六年，奉学政文旌奖。

王嘉瓚妻郑氏年三十，夫故。抚孤完节终身。嘉庆六年，奉学政文旌奖。

陆光治妻毛氏年二十五，夫故。遗腹一子，抚孤守节。嘉庆六年，奉学政刘旌奖。

毛之和妻余氏年二十八，夫故。家贫，子幼。姑老，卧病二十余年，侍奉周谨，始终无间。嘉庆六年，奉学政刘旌奖。

姜秉诗妻郑氏年二十五，夫故。遗腹一子，抚孤守节，卒年七十五岁。嘉庆六年，奉学政刘旌奖。

徐有贵妻吴氏年二十九，夫故。抚孤守节。嘉庆七年，奉学政文旌奖时，年已八十矣。

汪必邃妻刘氏年二十六，夫故。遗腹一子，辛勤养育，冰操不渝。嘉庆七年，奉学政文旌奖。

刘学诗妻叶氏年三十，夫故。遗腹一子，抚孤守节，卒年四十六岁。嘉庆八年，奉学政文旌奖。

汪广东妻祝氏年二十五，夫故。遗腹一子，家贫姑老，抚孤。守节四十六年卒。呈学请旌。

毛云驹妻周氏年二十一归云驹，月余，夫故。誓志守节三十五年卒。嘉庆十二年，奉学政旌奖。

毛彬文妻程氏年二十四夫故。子孙相继复夭，抚侄曾孙为嗣。遭遇奇穷，守节不渝。嘉庆八年，奉学政文旌奖。

毛云彪妻蔡氏年十九，于归五载，夫病笃，氏刲股以疗。夫故，氏年二十四。无子，家贫，坚守苦节五十九年而卒。呈学请旌。

毛宏志妻张氏年二十四，夫故。无子，抚侄为嗣。家贫，衣食不给，安之若素，苦节三十八年卒。呈学请旌。

王应举妻毛氏年二十八，夫故。遗孤甫一岁。家贫，励志秉节，仲叔应勉力成全之，卒年四十六岁。呈学请旌，训导施凤起为之立传。应勉，见《人物志》。

郑远琰妻王氏年二十六，夫故。抚孤守节，贫苦自甘。嘉庆八年，呈学请旌，氏年七十有五。

生员毛应森妻郑氏年二十七，夫故。无子，矢志守节，于嘉庆八年呈学请旌，氏年已六十六岁。

王槐纬妻何氏年二十三，夫故。姑衰子幼，家贫。守节年四十岁卒。呈学请旌。

王明钟妻徐氏年二十八，夫故。抚孤守节。嘉庆八年，呈学请旌，氏年六十三岁。

生员毛大升妻宋氏年十九适大升，事姑孝姑。夫病，家贫，氏尽鬻衾装以资医药。二十九岁，夫故。遗孤一，艰辛教育，克绵嗣续。守节二十九年卒。呈学请旌。

何奎宗妻杨氏年二十三，夫故。无子。守节三十四年。呈学请旌。

陈永高妻汪氏年二十二，夫故。遗孤六月，辛勤抚教。守节十五年卒。呈学请旌。

周维梅妻毛氏年二十一，夫故。家贫，遗腹一子，抚孙守节，年至七十二岁。呈学请旌。

刘瑞宝妻王氏年二十九，夫故。无子，敬奉舅姑。守节三十九年。呈学请旌。

生员胡大成妻王氏年二十四，夫故。子幼，抚孤守节。于嘉庆八年，奉学政文旌奖，氏年已八十矣。

毛氏一门双节日烈、日睿，兄弟也。烈妻周氏，年三十夫故。一子善继，甫七岁，抚孤守节，授室生孙，能以读书振家声。睿妻周氏，年二十六，夫故。子善培，甫一周，抚育至二十三岁，患疾成废，不能养母，氏苦节弥坚，殒齿无怨。嘉庆十年，以一门双节，奉学政潘旌奖。

周文鳌妻杨氏举人杨灿之女。年二十七，夫故。无子，抚嗣守节。嘉庆十年，奉学政潘旌奖。

柴邦坭妻黄氏年二十八，夫故。子五岁，家赤贫，破屋两椽，废圃半亩，氏殖蔬采薪以易钱，扫叶煮粥以养子。子长能营生，氏复刻苦节蓄，为子娶妻，未育而儿媳俱亡。茆独终身，阨穷堪悯。嘉庆十年，奉学政潘旌奖。

周起三妻夏氏年二十，夫故。子方七月，抚孤。守节至八十八岁。嘉庆十一年，奉学政潘旌奖。

儒童郑尚敬妻邵氏年二十九，夫故。子方五月，抚孤。守节三十年卒。嘉庆十一年，奉学政潘旌奖。

吴朝进妻姜氏年二十，夫故。遗腹一子，奉姑抚孤守节。呈学请旌。

生员朱桓妻夏氏年二十五，夫故。抚孤守节。于嘉庆十一年，奉学政潘旌奖。

朱聚惟妻毛氏年二十二，夫故。抚孤守节。于嘉庆十一年，奉学政潘旌奖。

郑益谦妻戴氏年二十五，夫故。抚孤守节，七十二岁卒。嘉庆十一年，奉学政潘旌奖。

王师灏妻毛氏年二十四，夫故。无子。翁早歿，家贫，无伯叔之亲，姑老多病，事奉孝谨，抚侄为嗣。姑与侄食必精洁，而自甘粗粝。母家每迎氏暂归，辄辞曰：“姑无奉侍人，不忍顷刻离左右也。”嘉庆十一年，奉学政潘旌奖。

周廷颺妻毛氏年二十九，夫故。家贫，一子又早卒，与媳抚孙守节。嘉庆十一年，奉学政潘旌奖。

毛景闻妻王氏年二十七，夫故。遗腹一子，抚孤守节。嘉庆十二年，奉学政潘旌奖。

范德豪妻祝氏年二十七，夫故。子女俱幼，抚孤守节。嘉庆十二年，奉学政刘旌奖。

祝国旷妻徐氏年二十九，夫故。子幼，抚孤守节。嘉庆十二年，奉学政刘旌奖。

郑兆积妻刘氏年二十六，夫故。抚孤守节，卒年五十一岁。嘉庆十三年，奉学政刘旌奖。

毛氏一门双节武举毛锦彪继室吴氏，年三十，夫故。守节奉侍衰姑，抚前室子，孝感咸称。弟锦鸾妻何氏，年二十四，夫故。无子。守节。于嘉庆十三年，以一门双节，奉学政旌奖。

童氏一门双节童长寿妻潘氏，年二十一，夫故。守节七十一岁卒。侄德先妻江氏，年二十八，夫故。守节七十八岁卒。嘉庆十四年，以一门两节，奉学政周旌奖。

郑克岐妻朱氏年二十五，夫故。无子，抚嗣守节。有思夺其志者，服毒几死，救之得甦。甘贫耐苦，劲节不渝。嘉庆十四年，奉学政周旌奖。

毛氏一门双节毛凤藻妻郑氏，年二十六，夫故。无子，抚侄为嗣，矢志守节。侄元本妻金氏，年二十四，夫故。抚一子，已授室未育，子媳相继而亡，苦节堪悯，年五十五岁卒。嘉庆十四年，奉学政周旌奖。

胡有宁妻祝氏年二十七，夫故。抚孤守节。嘉庆十五年，奉学政周旌奖，氏年已八十六岁。

毛国城妻杨氏年二十，迎娶有期，父母知国城素患羸疾，度不能痊，欲故迟其婚期，氏泣告母曰：“女既受毛氏聘，无论婿病愈否，终身当为毛家妇。”父母嘉其志，遂如期遣嫁成婚，载余，夫故。无子，坚贞守节。嘉庆十五年，奉学政周旌奖。

刘六侯妻陈氏年二十八，夫患风疾，不能行动，谨事六载，无倦容。夫故，氏年三十有四。安贫守节，抚育子女，婚嫁以时。有孤侄仅七岁，抚之如子，长为娶妻，方娠而侄亡，遗腹得子，复勤抚之，为成家生子。嘉庆十六年，由学给 贞淑可风 匾额。

徐汝琳妻邵氏年二十七，夫故。奉姑抚子守节，至五十五岁卒。嘉庆十六年，奉学政周旌奖。

周国柱妻杨氏年二十一，夫故。遗腹一子，抚孤守节。嘉庆十六年，奉学政周旌奖。

生员徐詠妻杨氏年三十，夫故。无子，抚嗣守节。嘉庆十六年，奉学政周旌奖。

陈楚书妻刘氏年二十，夫故。无子，善事后姑，抚嗣守节。嘉庆十七年，呈学请旌，氏年五十一岁。

赵敬琴妻何氏年二十八，夫故。奉姑抚孤，困苦守节。

李潮泰妻叶氏年二十四，夫故。家贫，抚孤守节。

林霄耸妻徐氏年二十九，夫故。无子，抚嗣守节。

武生毛中翎妻徐氏年二十五，夫故。守节四十七年。

毛氏两代苦节毛永琬妻王氏，年二十六，夫故。子廷训，甫六龄，抚育成立，娶媳早亡，再娶媳陈氏未育，而廷训死。姑媳相依，共矢冰柏，两代苦节，里党咸欽。

郑乘驹妻斯氏年二十七，夫故。无子，家贫。从伯某欲强夺其志，受人聘，捆缚就道，氏号哭呼救。族伯日临闻知追夺，冰心不改，日临岁予米粟，以保全之，如是者历三十年而卒。

毛氏一门双节毛文龙妻金氏，年二十八，夫故。孝奉舅姑，抚孤守节，九十二岁卒。孙媳王氏，年二十七，夫故。事姑抚子。守节至六十岁卒。两世冰清，不以贫窶改操，乡党咸欽重之。

徐成俊妻夏氏年二十五，夫故。无子，谨事翁姑，抚嗣守节。至七十六岁卒。

何俟天妻汪氏年二十六，夫故。家贫，无子，苦节终身。

朱氏一门双节朱文长妻毛氏，年二十七，夫故。抚子已成室而亡，媳柴氏时年三十，无子，抚从侄为嗣，孝事孀姑，同守苦节，松筠劲操，两世清芬。

黄大来妻何氏年二十七，夫故守节。姑患风疾，奉侍三十余年维谨，抚子成立，已入郡庠。

璩文宝妻黄氏年二十四，夫故。孝奉翁姑，抚孤守节。

郑汝来妻金氏年二十五，夫故。子甫一岁，家贫，饥粥尝不饱，严冬无衣褐，抚孤守节，百折不回。为子娶妻，甫生孙子又亡，鞠养孤孙，倍历困厄，卒完苦节。

柴善应妻徐氏年三十，夫故。奉姑守节，抚侄为嗣。

郑廷桀妻毛氏年三十，夫故。无子。守节五十三岁卒。

璩应孝妻王氏年二十八，夫故。无子。守节抚侄为嗣。

王永泽妻刘氏年二十六，夫故。守节四十五年。

王学泉妻朱氏年十九，夫故。无子。守节抚侄为嗣。

守备林天汉妾郎氏幼读书，知文义。随天汉之任，善事嫡室陈氏。后陈以姑老回籍奉养，天汉在任病故，氏年二十七。无子女，矢志守节，护柩归里。陈氏患心疾，事之如母。陈氏卒，丧之如母。为家主立嗣，抚嫡出女，皆婚嫁有成。姻族钦其贤节，待以正室礼。

朱咸有妻王氏年二十三，夫故。无子。守节抚侄为嗣。

毛增裕继室叶氏年二十六，夫故。无子，事姑孝谨，抚侄为嗣。守节终身。

王毓藻妻毛氏年二十二，夫故。无子，奉姑守节，抚叔成立，以侄振书天继为嗣。

毛国鈇妻徐氏年二十八，夫故。家贫，抚孤守节。

毛兴都妻周氏年二十七，夫故。家贫，抚孤守节，子已游庠。

毛文轴妻朱氏年二十八，夫故。无子。守节抚侄为嗣。

监生詹文盛妻王氏年三十四，夫故。抚孤守节。其先世道产租入甚轻，氏嘱子孙永远勿增租额。族有售祀产者，氏正言力劝，其人即感愧中止。

以上嘉庆年间，呈学请旌。俱见蔡英《贞节录》。

按：蔡英《须江贞节录》所载节孝，考诸旧志，有详略互异者，为附载旧志各氏之下。核之乾隆四十二年以后《题旌册》，有先由学政旌奖，旋即题请旌表者，悉为归入旌册。其无册可稽而节孝彰著者，俱本《贞节录》登入。

夏浚妻吴氏年二十五，夫故。抚孤守节。

佾生毛永年妻金氏年十九，夫故。冰霜自励，矢志靡他。守节三十五年。

佾生王福斌妻徐氏年二十三，夫故。节励松筠，足不出闾。守节二十八年。

儒童姜万泰妻陈氏年二十九，夫故。茹茶饮药，仰事俯育。守节三十三年。

监生毛奖荣妻郑氏年二十九，夫故。孤守苦节三十六年。

佾生郑锡垣妻姜氏年二十三结褵，半载，夫故。孝奉舅姑。守节二十八年。

朱大受妻柴氏

生员姜桂茂妻林氏年二十四，夫故。敬事舅姑，矢志不渝。守节二十八年。

例贡王锦鑫妻毛氏年二十一，夫故。柏舟自矢，历久弥坚。守节五十年。

卫千总毛瑞龄妻郑氏年二十七，夫故。克勤克俭，立志不移。守节三十六年。

朱曾添妻罗氏年三十，夫故。青年矢志，白首完贞。守节四十年。

生员毛成斌妻王氏年二十七，夫故。坚贞自持，始终不渝。守节三十六年。按：蔡英《贞节录》：拔贡王锡琮之女。夫故，子女又皆殇亡，坚志秉节，犹独自甘。年五十五岁卒。

儒童王槐声妻毛氏年二十五，夫故。松柏贞操，久而不变。守节四十四年。

朱增垵妻徐氏年二十五，夫故。家贫。守志苦节二十八年。

监生毛增鼎妻姜氏年二十九，夫故。勤苦持家，志操不改。守节四十年。

职员王寿岳妻林氏年三十，夫故。节励松筠，里族称贤。守节三十五年。

朱楫妻周氏年二十二，夫故。节励冰霜，心坚金石。守节七十一年。

州同毛成英妻何氏年二十九，夫故。矢志守节四十八年。

佾生余时恭妻毛氏年二十六，夫故。恪守闾范，教子有方。守节三十六年。

何嘉连妻陆氏年三十，夫故。冰霜自励，矢志靡他。守节二十九年。

陆鸿燾妻何氏年三十，夫故。无子，抚侄为嗣。守节四十八年。

朱棉妻柴氏年十九，夫故。矢志完贞，百折不回。守节五十年。

周氏双节周大浹妻杨氏，年二十五，夫故。无子，抚侄为嗣。守节三十二年卒。弟大渥妻毛氏，年二十九，夫故。仁慈好善，抚孤成立。守节四十年卒。今孙曾林立，多游庠者。

郑佩琼妻毛氏年二十五，夫故。安贫守志，纺绩度日。守节三十二年。

汪康侯妻祝氏年二十六，夫故。守节五十三年。

监生毛毓丰妻王氏年三十，夫故。坚贞自励，家固贫，教子力穡。守节十五年卒。

佾生毛毓兰妻周氏年二十二，夫故。事姑教子。守节三十六年。

监生朱时香妻林氏年二十六，夫故。素娴女训，能知大义，九熊画荻，教子家麒成名，出任临安等学谕训。守节四十三年。

儒童王立诚妻林氏年二十四，夫故。盟心井水，历久弥坚。守节四十八年。

监生朱时惠妻周氏年二十四，夫故。事姑抚孤，孝慈兼尽。守节五十年。

王立发妻毛氏年二十三，夫故。家贫，矢志艰苦备尝。守节五十四年。

何应龙妻周氏年二十九，夫故。守节五十四年。

毛文彪妻叶氏年二十二，夫故。守节四十三年。

陆行恒妻王氏年三十，夫故。孝事翁姑，矢志守节三十六年。

周家樑妻姜氏年二十一，夫故。矢志完贞，困阨不变。守节三十二年。

汪必本妻詹氏年二十八，夫故。艰苦度日，立志不移。守节四十一年。

佾生王培崑妻郑氏年二十一，夫故。节励冰霜，心坚金石。守节二十四年。

朱启承妻王氏年二十三，夫故。德性温和，矢志不贰。守节五十年。

毛盛世妻周氏年二十七，夫故。安贫守节四十年。

监生朱培钦妻姜氏年三十，夫故。食贫矢志，纺绩糊口。守节四十四年。

儒童王立勋妻毛氏年二十一，夫故。织纴自给，志操不渝。守节五十六年。

何胜宗妻陈氏年二十八，夫故。励志守节五十七年。

佾生毛祥照妻王氏年二十八，夫故。坚贞守节七十一年。

陆曾圭妻姜氏年二十四，夫故。坚贞自矢。守节十七年卒。

儒童王魏妻徐氏年三十，夫故。境遭荼毒，操励冰霜。守节四十二年。

朱治功妻周氏年三十，夫故。守节四十一年。

毛士鎔妻郑氏年二十三，夫故。茹苦含辛，至老不渝。守节六十七年。

何清海妻余氏年二十五，夫故。克勤克俭，立志不移。守节四十九年。

生员陆鸣鹤妻毛氏年二十九，夫故。无子，伶仃孤苦，敬事迈姑。守节二十六年。

毛开泰妻郑氏年二十三，夫故。守节三十二年。

何殿集妻蔡氏年二十七，夫故。守节四十六年。

何殿陞妻毛氏年二十三，夫故。贫苦守节四十二年。

王德祥妻蒋氏年二十六，夫故。茹茶饮药，白首完贞。守节五十二年。

朱文绅妻徐氏年二十四，夫故。食贫。守节三十二年。

汪士纲妻陈氏年三十，夫故。坚贞自励。守节三十八年。

祝士隆妻李氏年三十，夫故。家贫矢志，备历艰辛。守节四十二年。

按：蔡英《贞节录》：家贫，子幼，伯欲夺其志，氏以死自誓。年七十一岁卒。

周家烜妻王氏年二十八，夫故。矢志不贰。守节四十五年。

毛嘉鱼妻陆氏年二十八，夫故。凡守节二十一年卒。

武生朱起儒妻周氏年二十八，夫故。无子，抚侄为嗣。守节三十八年。

儒童王立梅妻周氏年二十三，夫故。守节三十七年。

何文潮妻柴氏年二十六，夫故。守节三十年。

生员周文熙妻柴氏年二十九，夫故。境遭荼毒，益励冰清。守节五十四年。

毛应翰妻徐氏年二十一，夫故。冰霜自励，矢志靡他。守节四十五年。

陆佩玲妻毛氏年三十，夫故。家贫，事姑尽孝。守节二十五年。

汪士榕妻余氏年二十六，夫故。松贞柏操，久而愈坚。守节三十七年。

佾生王德荣妻祝氏年二十七，夫故。德性温和，矢志靡忒。守节三十三年。

毛国达继室陈氏年二十一，夫故。凡守节二十九年卒。

何廷棐妻陆氏年三十，夫故。甘贫矢志守节四十八年。

王允澄妻柴氏年二十二，夫故。守节六十二年。

毛国叙妻严氏年二十一，夫故。坚贞自守，始终不渝。守节三十年。

毛国志妻祝氏

监生陆增俊妻姜氏年三十，夫故。家贫子幼，孝事重帙。苦节二十五年。

王肇煜妻徐氏年二十五，夫故。荼苦完贞。守节四十六年。

周元赏妻管氏年二十，夫故。守节四十一年。

祝应琅妻刘氏年二十六，夫故。矢志靡他。守节三十六年。

姜殿元妻周氏年二十六，夫故。谢绝铅华，甘心荼蘼。守节四十二年。

汪士虎妻徐氏年二十六，夫故。志操坚卓，里族称贤。守节四十六年。

毛起忠妻姜氏年二十八，夫故。金石之志，历久弥坚。守节六十年。

监生朱永泰妻徐氏年二十六，夫故。妇德素称。矢志守节四十四年。

徐志仕妻金氏年二十四，夫故。清贫守志，不憚勤劳。守节五十九年。

毛增式妻周氏年二十五，夫故。守节三十六年。

祝开洲妻郑氏年二十三，夫故。励志守节五十六年。

周祖祐妻杨氏年二十六，夫故。贞洁自矢，坚守不移。守节五十年。

汪士庄妻祝氏年三十，夫故。守节三十八年。

生员刘懋妻徐氏年二十七，夫故。事姑抚孤，柏舟义守，苦节□□□年。

毛大纲妻赵氏年二十八，夫故。子幼家贫，舅姑年老，养亲抚孤。守节三十八年。

陆功冀妻郑氏年三十，夫故。抚孤成立。守节五十三年。

姜如琪妻毛氏年二十二，夫故。青年矢志，白首完贞。守节五十四年。

郑世康妻徐氏年二十七，夫故。无子，坚守苦节，顺事翁姑。守节四十三年。

姜聚南妻周氏年二十二，夫故。贞守孤帋，穷而弥坚。守节五十年。

何文濬妻徐氏年三十，夫故。家贫矢志，艰苦备尝。守节三十二年。

毛永溁妻姜氏年二十三，夫故。勤俭持家，志操不改。守节五十一年。

陆天德妻徐氏年二十八，夫故。子幼，教养成立。守节三十四年。

监生王履煌妻张氏年二十六，夫故。坚贞自持，足不逾阃。守节十七年卒。

毛家玠妻徐氏年二十九，夫故。矢志守节十四年卒。

姜国庆妻何氏年二十七，夫故。守节五十年。

周日南妻郑氏年三十，夫故。守节五十年。

朱大鹏妻姜氏年二十九，夫故。守节三十年。

何开运妻林氏年二十七，夫故。青年自励，矢志靡他。守节十四年卒。

生员王之麟妻周氏年二十七，夫故。含辛茹苦，勤俭成家。守节四十五年。

姜元炳妻周氏年二十六，夫故。守节四十年。

周时杰妻毛氏年二十八，夫故。秉志坚贞，持家严肃。守节四十一年。

杨天枢妻毛氏年二十五，夫故。淑性贞心，坚持不易。守节三十四年。

佾生余将安妻毛氏年二十七，夫故。守节三十八年。

毛荣栋继室徐氏年二十三，夫故。勤苦持家，贞操不改。守节五十一年。

汪士弁妻应氏年二十九，夫故。苦志坚贞，女红自给。守节四十二年。

周大铤妻毛氏年二十，夫故。坚操自守，言笑不苟。守节四十一年。

王思先妻姜氏年二十九，夫故。守节三十一年。

朱永卿妻毛氏

佾生王与榴妻刘氏年二十四，夫故。守节三十三年。

毛鸣凤妻王氏年二十，夫故。柏舟自矢，历久弥坚。守节六十五年。

陆鸿焰妻吴氏年二十九，夫故。守节四十三年。

生员朱起阶妻姜氏年二十九，夫故。艰苦度日，立志靡移。守节二十七年。

祝朝佃妻毛氏年二十五，夫故。守节三十八年。

周志恒妻杨氏年二十三，夫故。誓永盟必，励志守节五十六年。

汪在榛妻王氏年二十八，夫故。秉性柔顺，劲节凌霜。守节五十七年。

生员毛振鹏妻刘氏年二十六，夫故。冰清自矢，里族咸称。守节三十二年。

姜新桂妻邱氏年二十六，夫故。守节六十八年。

周兆扬妻严氏年二十四，夫故。矢志不改。守节四十七年。

毛茂根妻钱氏年二十四，夫故。孝养翁姑，兼抚子成立。守节二十二年卒。

佾生陆增埰妻毛氏年二十，夫故。坚贞以自励。守节十二年卒。

毛志灿妻杨氏年二十七，夫故。守节四十年。

浩职毛学礼妻郑氏年二十六，夫故。贞静自矢。守节三十三年。

汪士琛妻王氏年二十九，夫故。操凜冰雪。守节二十四年。

周以达妻姜氏年二十五，夫故。茶苦自甘，铅笔悉屏。守节四十六年。

何元涉妻毛氏年十九，夫故。守节五十二年。

毛德芳妻詹氏年三十，夫故。坚贞自秉。守节二十年。

陆世焯妻黄氏年二十七，夫故。勤苦处家，志操不改。守节五十六年。

周国柱妻毛氏年二十六，夫故。玉洁冰清，义不可夺。守节四十四年。

增生毛培兰继室何氏年二十五，夫故。无子，抚侄为嗣。守节二十八年。

杨光家妻祝氏年二十一，夫故。矢志守节四十三年。

监生王肇焯妻周氏年二十三，夫故。青年苦志。守节十四年卒。

毛瑞龙妻戴氏年二十五，夫故。松柏贞操，历久不移。守节三十一年。

生员汪廷萱妻王氏年二十一，夫故。青年励志，茶蘖自甘。守节三十年。

周开元妻郑氏年二十八，夫故。茶苦备尝，志操弥劲。守节四十年。

毛大典妻王氏年二十一，夫故。守节五十三年。

监生陆荣熙妻姜氏年二十六，夫故。青年自励，矢志靡他。守节四十七年。

毛好武妻祝氏

侑生王元鹤妻吴氏年三十，夫故。家贫矢志。守节八年卒。

毛长寿妻陈氏年二十五，夫故。义明惟一，秉志不渝。守节五十五年。

祝有品妻江氏年二十九，夫故。守节二十九年。

周孔文妻何氏年二十二，夫故。节同松劲，心比石坚。守节四十八年。

毛嘉谋妻周氏年二十八，夫故。守节二十四年。

周国桂妻杨氏年二十，夫故。立志不改。守节五十四年。

毛秉纬妻周氏年三十，夫故。困苦守节二十二年。

监生姜国樑妻毛氏年三十，夫故。德性和顺，志操不易。守节四十四年。

周增良妻严氏年二十五，夫故。守节四十四年。

儒童朱起甸妻徐氏年二十三，嫁未逾年，夫故。无子。抚侄凯金为嗣，中戊午武闈解元。守节四十年。

毛儒俭妻陈氏年二十九，夫故。柏舟自矢。守节十六年卒。

生员汪士遇继室徐氏年二十五，夫故。洁贞自矢，坚守不移。守节三十三年。

生员毛廷庆妻陈氏年十九，夫故。持家勤苦，秉志坚贞。守节五十一年。

周肇宏妻徐氏年二十四，夫故。食贫甘苦。守节三十四年。

毛大盛妻周氏年十九，夫故。守节五十六年。

汪熊妻李氏年十九，夫故。无子，菴独自甘。守节四十九年。

武生朱廷杰妻周氏年二十二，夫故。无子。守节四十一年。

毛开元妻饶氏年二十八，夫故。家贫。守节二十三年。

监生王树模妻周氏年三十，夫故。秉贞守礼，乡党称贤。守节三十六年。

毛家瑞妻陈氏年二十三，夫故。守节三十四年。

武生朱履中妻林氏年十九，嫁未逾月，夫故。无子，抚侄为嗣。守节四十二年。

诰职王志略妻何氏年二十八，夫故。誓口盟心，坚同金石。守节三十年。

毛善昌妻陆氏年二十九，夫故。子方襁褓，抚教成立。守节四十四年。

周淑德妻王氏年二十一，夫故。坚贞自励。守节五十三年。

例贡王学浩妻毛氏年三十，夫故。境苦心甘。守节二十一年。

毛宗鲁妻徐氏年二十八，夫故。抚孤。守节三十年。

何文达妻邓氏年二十一，夫故。守节，遗孤甫九月，家贫，艺菜易米，以资事育。年九十三岁卒。

程廷盛妻蔡氏守节三十年。

毛潮泰妻徐氏年二十六，夫故。守节三十六年。

监生朱履成妻黄氏年三十，夫故。守节三十七年。按：氏为生员

黄文楷之女，系出名门，幼知大义。年二十适履成，生三子。夫故，氏矢志不二，事重闾以孝闻，教诸孤读书，先德行而后文艺，俱克有声庠序。季子鏊，发逆之变，临难不屈。长子鏊，已登庚午贤书，母教功深，乡党称佩。

生员王嗣绪妻毛氏年二十九，夫故。矢志守贞，百折不回。守节六十一年。

毛源洁妻鲍氏年二十，夫故。无子抚嗣，嗣子复殇，能孝事翁姑，誓不改志。守节十九年卒。

职员杨志达妻陈氏年二十三，夫故。柏舟自矢。守节二十七年。

周焕妻毛氏年二十八，夫故。庄敬自持，操若冰霜。守节四十二年。

毛学唐妻柴氏年二十七，夫故。家贫矢志，义不可夺。守节二十八年。

周天族妻王氏年二十二，夫故。女红自贍，誓不改志。守节四十三年。

王氏一门四节例贡生王煊妻胡氏，年三十，夫故。抚孤。守节五十年。子监生毓松妻郑氏，年二十二，夫故。抚孤。守节二十二年。孙监生绳階妻郑氏，年二十六，夫故。抚孤。守节二十七年。曾孙职员景曾妻朱氏，年二十九，夫故。二子俱幼。守节三十九年。四世冰操，一线相延。道光年间，奉宪奖给四代坚贞匾额。按：朱氏二子，一入太学，一食廩饩，子孙蕃衍，至今犹称王节妇家云。

毛天华妻王氏年二十二，夫故。恪守闾范，教养有方。守节四十年。

汪塔妻祝氏年二十六，夫故。三子俱幼，教养成立。守节四十六年。  
按：氏子孙繁盛，世业书香，今为北乡望族。

侑生王德纯妻邹氏年二十四，夫故。纺绩度日。守节五十七年。

璩国贤妻王氏年二十二，夫故。立志不移。守节二十年卒。

姜大鳌妻何氏年二十五，夫故。甘守苦节四十六年。

姜大顺妻何氏年二十八，夫故。食贫茹苦，志操不改。守节四十三年。

周自强妻毛氏年二十五，夫故。家计清贫，矢志不贰。守节三十六年。

监生王应泰妻周氏年三十，夫故。盟心井水，励志柏舟。守节四十七年。

生员赵用彰妻毛氏年二十五，夫故。心如铁石，操若冰霜。守节三十一年。

赵树挺妻王氏年二十二，夫故。家贫励志，艰苦备尝。守节三十九年。

王善擢妻徐氏年三十，夫故。茹茶饮蕨，矢志靡他。守节四十五年。

郑景河妻王氏年二十三，夫故。家徒壁立，缝纫糊口。守节三十一年。

王秀明妻周氏年十九，夫故。青年矢志，白首完操。守节六十年。

郑毓桂妻祝氏年二十七，夫故。义守从一，艰苦终身。守节四十一年。

毛应丰妻赵氏年二十八，夫故。守节五十年。

璩世培妻刘氏年二十四，夫故。静守孤帟，冰心独抱。守节三十年。

姜大潮妻倪氏年二十三，夫故。守节三十四年。

周承富妻王氏年二十六，夫故。守节三十年。

僧生徐惟坤妻王氏年二十四，夫故。守节四十四年。

赵景靖妻周氏年二十五，夫故。守节三十六年。

赵文琇妻黄氏年十八，夫故。弱龄劲操。守节四十四年。

监生毛家瑜妻徐氏年二十一，夫故。饮冰操励。守节五十年。

徐绍孝妻毛氏年三十，夫故。守节二十二年。

汪德环继室郑氏年三十，夫故。守节五十七年。

王振子妻刘氏年二十七，夫故。守节五十年。

郑增宁妻何氏年二十一，夫故。志慄秋霜。守节十六年卒。

毛宏论妻张氏年二十八，夫故。孤帋静守，松柏同坚。守节三十八年。

徐文会妻刘氏年二十二，夫故。勤俭持家，志操不渝。守节五十二年。

毛绍暄妻徐氏年二十三，夫故。持家有法，内外肃然。守节三十年。

徐阔口妻祝氏年二十六，夫故。守节六十一年。

周云烂妻徐氏年二十一，夫故。励志完贞。守节五十年。

金瑞珍妻郑氏年二十五，夫故。守节四十七年。

金锡会妻黄氏年二十六，夫故。守节三十年。

林若澜妻徐氏年二十八，夫故。守节五十二年。

廩贡生刘侃继室江氏侃卒于京邸，氏年二十二，矢志守节四十三年。

林天显妻汪氏年二十四，夫故。茹苦含辛，志不可夺。守节三十八年。

林志华妻杨氏年三十，夫故。守节四十七年。

监生林霄搏妻朱氏年二十八，夫故。无子，抚侄为嗣。守节十五年卒。

周彩和妻王氏年二十八，夫故。志坚松柏。守节四十五年。

徐邦宁妻璩氏年二十九，夫故。矢志完操，一成不易。守节四十年。

徐廷美妻毛氏年二十七，夫故。家无担石，志操愈坚。守节二十七年。

王大模妻毛氏年二十五，夫故。冰操自励，贫不易志。守节五十七年。

毛兴臧妻郑氏年二十八，夫故。守节六十三年。

刘尚鉅妻柴氏年二十三，夫故。铅华不御，穷而弥坚。守节四十年。

林中标妻吴氏年三十，夫故。守节四十四年。

刘锡龄妻毛氏年二十六，夫故。冰霜自矢，秉志不移。守节三十八

年。

周维桑妻毛氏年二十二，夫故。守节五十三年。

诰职林起鹤妻王氏年三十，夫故。矢志守节三十二年。按：氏以曾孙天澂贵，赠夫人。

刘伟继室柴氏年二十二，夫故。甘心藜藿，不事修节。守节二十八年。

林兆旭妻郑氏年二十六，夫故。松柏贞操，历久不改。守节四十年。

徐汝谟妻汪氏年二十二，嫁未一月夫故。无子，善事翁姑，抚侄为嗣。守节已三十二年。

周寿泽妻陈氏年二十五，夫故。操若柏舟，足不逾阈。守节五十二年。

林志茂妻王氏年三十，夫故。凡守节十二年卒。

徐惟孝妻刘氏年二十二，夫故。矢志不移。守节三十九年。

徐立鳌妻姜氏年二十七，夫故。守节五十八年。

周天祈妾吴氏年三十，夫故。静守孤帏，足不出户。守节三十二年。

何必铭妻徐氏年二十七，夫故。不施膏沐，勤约终身。守节三十九年。

郑自端妻王氏年二十六，夫故。一生操作，贫无怨言。守节四十六年。

徐尚龄妻刘氏年二十二，夫故。椎髻练裳，循分安贫。守节三十八年。

毛国荣妻詹氏年二十三，夫故。立志不贰，乡里称贤。守节五十一年。

姜善兴妻朱氏年二十七，夫故。守节四十一年。

毛氏双节毛日葵妻郑氏，年二十二，夫故。苦志守节。按：蔡英《贞节录》：郑氏，夫故。遗孤才九月，誓不再适，家贫苦守，年九十二岁卒。孙媳刘氏，年二十六，夫故。困节自贞，以两世苦节先由学政周匾旌奖。

柴仕密妻徐氏年二十七，夫故。守节三十二年。

周登爵妻毛氏年二十，夫故。孤灯苦守，志操不渝。守节四十二年。

毛崇罅妻刘氏年二十六，夫故。蓬首操作，立志弥坚。守节四十六年。

生员徐家址妻汪氏年二十九，夫故。家法严肃。守节四十九年。

佾生郑永进妻朱氏年十九，夫故。心甘孤寂，志谢铅华。守节五十二年。

徐世凤妻柴氏年三十，夫故。守节四十九年。

监生郑文炳妻徐氏年二十四，夫故。茕独自甘。守节四十八年。

毛之祺妻林氏年三十，夫故。守节五十六年。

周序埭妻徐氏年二十二，夫故。针黹度日，坚操自持。守节五十年。

佾生郑文捷妻王氏年二十二，夫故。女红自给，能艰苦终身。守节二十六年卒。

郑招招妻吕氏

徐仲清妻毛氏年二十八，夫故。矢志柏舟，之死靡他。守节二十五年。

增生周绍宗妻璩氏年二十八，夫故。家贫励志，坚不可夺。守节四十二年。

徐逢左妻毛氏年二十三，夫故。静守孤帟，人罕得见。守节五十六年。

徐国材妻王氏年二十四，夫故。坚操自持，誓不易志。守节十七年卒。

吴元钟妻王氏年二十八，夫故。守节四十三年。

汪志宽妻朱氏年二十九，夫故。守节已二十四年。

王锡珣妻郑氏年二十一，夫故。守节四十四年。按：蔡英《贞节录》：氏年二十适锡珣，未十月，夫故。无子，嗣子增泮未冠而夭，复以增溥为嗣。两抚嗣子，备历苦辛，矢志不变。

徐善吉妻金氏年二十七，夫故。守节五十七年。

徐观洵妻周氏年二十九，夫故。守节五十年。

毛志德妻杨氏年二十三，夫故。甘心淡泊。守节三十九年。

佾生徐庆徵妻周氏年二十四，夫故。庄重自持，言笑不苟。守节十六年卒。

吴玉德妻张氏年二十七，夫故。守节四十九年。

徐瑞喜妻严氏年二十四，夫故。纺绩度日，忍饥耐寒。守节十七年卒。

徐世滢妻胡氏年二十九，夫故。守节五十三年。

吴发贤妻徐氏年二十一，夫故。冰霜自矢，百折不回。守节四十四年。

杨天开妻赵氏年三十，夫故。守节四十六年。

刘应桂妻王氏年二十二，夫故。守身如玉，励志若霜。守节三十二年。

徐秉莹妻毛氏年二十四，夫故。守节四十一年。

柴万本妻周氏年二十三，夫故。守节三十年。

周某妻严氏

杨万进妻周氏年十七适万进，未一载，夫故。家贫守节。遗腹一子，抚养长成，授室数年，子复殇，媳亦孀守，遗腹得孙。氏因积哀致疾，卒年四十有八。

郑应麒妻刘氏年二十七，夫故。守节五十一年。

王承宗妻祝氏年二十一，夫故。含贞茹素，肃若冰霜。守节三十年。

郑应祥妻朱氏年二十七，夫故。守节二十年卒。

生员詹懋成妻王氏年二十四，夫故。无子，茹茶饮药，勤苦一生。守节三十三年。

徐世肃妻郑氏守节四十六年。

郑望溥妻王氏年二十七，夫故。守节三十八年。

胡贤修妻吴氏年二十六，夫故。矢志完贞。守节六十五年。

姜崇辉妻叶氏年二十一，夫故。孝养翁姑，抚育幼子。守节五十二年。

胡家能妻徐氏年二十七，夫故。守节四十五年。

周志杰妻璩氏年二十六，夫故。食贫矢志，穷而益坚。守节二十七年。

徐应通妻王氏年二十八，夫故。守节二十四年。

姜应奇妻周氏年二十三，夫故。心如井水，志慄秋霜。守节二十五年卒。

周亨衍妻毛氏年二十六，夫故。守节三十五年。

祝秉铠妻杨氏年二十八，夫故。勤俭持家，志操不渝。守节三十一年。

胡泳坦妻郑氏年二十，夫故。茹苦含辛，贫无怨言。守节六十三年。

蔡香陞妻毛氏守节三十九年。

胡有名妻鄢氏年二十七，夫故。松筠自矢。守节三十八年。

周秉鹑妻杨氏年二十七，夫故。守节四十五年。

徐锡爵妻朱氏年二十四，夫故。孝事翁姑，抚子成立。守节四十六年。

胡廷汉妻管氏年二十三，夫故。无子，家贫。守节五十一年。

姜恭儒妻王氏年二十四，夫故。姑老子幼，孝慈备至。守节四十五年。

胡锡纯妻杨氏年二十五，夫故。苦志守贞，坚如铁石。守节四十一年。

周文仓妻柴氏年二十九，夫故。盟心井水，励志柏舟。守节四十九年。

柴天荣妻黄氏年二十四，夫故。枵食粗衣，终身困苦。守节四十六年。

胡顺江妻邱氏年二十八，夫故。守节四十三年。

徐文成妻童氏年二十四，夫故。甘心孤帋，贫不易志。守节五十六年。

郑良驩妾张氏年二十六，夫故。茆独自甘，守志不渝。守节六十七年。

柴仕毅妻周氏

佻生朱凯旗妻周氏年二十二，夫故。无子，孝事翁姑。守节二十三年卒。

毛时乾妻翁氏年二十九，夫故。家贫励志，艰苦备尝。守节三十四年。

柴仕龙妻何氏

徐学礼妻陈氏年二十六，夫故。遗腹一子，抚育成立，孝事翁姑。守节二十九年。

杨友槐妻刘氏年二十六，夫故。操若柏舟，足不逾阃。守节二十九年。

胡世兴妻邱氏年二十四，夫故。冰霜自矢，立志不移。守节五十年。

陈盖祥妻程氏年二十四，夫故。家徒壁立，缝纫糊口。守节五十三年。

柴德壩妻徐氏

徐日佳妻毛氏年二十四，夫故。家贫无子，抚侄为嗣。守节十五年卒。

周文通妻姜氏年十九，夫故。松柏贞操，历久不改。守节四十九年。

胡世本妻姜氏年二十六，夫故。茶蘼自甘，口无怨言。守节五十八年。

柴德越妻朱氏

毛自强妻徐氏年二十四，夫故。操励若冰，心坚如石。守节五十二年。

刘成楨妻姜氏年二十八，夫故。义守从一，艰苦终身。守节二十七年。

胡元忍妻徐氏年二十九，夫故。食贫茹苦，志操不改。守节四十八年。

姜应发妻徐氏年十八，夫故。孤帋静守，松柏同坚。守节二十七年卒。

刘成橘妻王氏年二十八，夫故。冰霜自矢，秉志不移。守节四十五年。

徐耀兹妻毛氏年二十八，夫故。守节二十三年。

周廷桂妻姜氏年二十八，夫故。甘心藜藿，不事修饰。守节二十九年。

夏金鏊妻毛氏年二十三，夫故。青年矢志，白首不移。守节四十二年。

杨廷灿妻王氏年二十一，夫故。茆独自甘，久而益坚。守节四十二年。

徐向镛妻柴氏年十八，嫁甫五月，夫故。能矢志不贰。守节十七年卒。

祝大丰妻管氏年十九，夫故。矢志完操，一成不易。守节五十九年。

周尔怪妻姜氏年十九，夫故。静守孤帋，足不出户。守节五十二年。

徐尚鉅妻柴氏

柴镇泽妻杨氏

毛凤藻妻郑氏守节四十四年。

王廷荣妻何氏守节五十七年。

周登陞妻毛氏守节三十五年。

徐大和妻郑氏守节五十七年。

童德民妻潘氏守节四十二年。

郑增标妻毛氏守节五十七年。

郑邦璜妻周氏守节四十三年。

杨某妻□氏

詹延安妻郑氏年二十三，夫故。无子。守节六十三年。

徐廷槐妻张氏年二十六，夫故。守节五十五年。

以上自乾隆四十二年至道光三十年，历次具题奉旨建坊旌表。按：以上《题旌册》所载各节孝，其事实有可续采者，均为补入。无考者，俱仍其旧。

生员徐日新妻汪氏年二十六，夫故。矢志青年，完贞白首。守节五十四年。

何如坊妻王氏年二十六，夫故。松柏贞操，历久不移。守节四十九年。

廖乡禄妻陈氏年二十四，夫故。独居一室，言不出榻。守节二十一年卒。

毛文虎妻周氏年二十七，夫故。茹苦含辛，一生勤俭。守节五十六年。

王万潮妻严氏年二十五，夫故。心如井水，操励柏舟。守节五十六年。

廖尚章妻赵氏年二十三，夫故。言笑不苟，持家有法。守节六十四年。

毛秀华妻柴氏年二十八，夫故。菟独自甘，不事铅华。守节三十二年。

柴寿协妻朱氏年二十九，夫故。家贫矢志，百折不回。守节十四年卒。

毛秀举妻周氏年二十五，夫故。茹茶饮药，立志不移。守节五十九年。

徐正嘉妻郑氏年二十九，夫故。静守孤帋，穷而弥坚。守节三十五年。

金锡惠妻黄氏年二十六，夫故。女红自给，安分食贫。守节二十七年。

徐繁祐妻毛氏年二十九，夫故。家贫励志，屏谢铅华。守节二十五年。

柴能智妻毛氏年二十三，夫故。守节二十七年。

何叶涛妻刘氏年二十七，夫故。守节五十四年。

何元镠妻祝氏年二十九，夫故。浣濯缝纫，自甘憔悴。守节六十年。

余嘉贲妻陆氏年二十九岁，夫故。守节十年卒。

生员毛元易妻周氏年二十，夫故。淡泊自甘，人言无间。守节五十年。

监生周天嗣妻王氏年二十三，夫故。纺绩自贍，乡里称之。守节四十五年。

生员王琦妻柴氏年三十，夫故。闾范克敦，持家有法。守节四十年。

监生姜煦元妻王氏年三十，夫故。持家勤苦。守节四十年。

何圣基妻毛氏年二十四，夫故。静守孤帋，誓不易志。守节二十六年。

刘应高妻程氏年二十一，夫故。茹苦含辛，立志不渝。守节五十年。

姜祥铨妻周氏年二十五，夫故。无子。守节。

姜祥铢妻郑氏年二十五，夫故。无子。守节。

以上俱咸丰元年具题奉旨建坊旌表。

毛占怀妻周氏年二十四，夫故。家贫，子幼，孝事舅姑。守节二十九年。

朱澍淦妻郑氏年二十三，夫故。无子。孝事翁姑，抚侄为嗣。守节二十九年。

朱劭暹妻陆氏年三十，夫故。上事舅姑，下抚继嗣。未几，嗣子又故，誓志不变。守节三十二年。

徐庭幹妻汪氏年二十八，夫故。无子，抚嗣子成立。守节三十一年。

毛宏琇妻吴氏年二十六，夫故。孝事舅姑，抚子成立。守节四十八年。

朱起廷妻毛氏年二十九，夫故。范独自甘。守节二十五年。

朱福吉妻周氏年二十八，夫故。家贫矢志，敬事孀姑。守节五十三年。

毛国桦妻王氏年二十五，夫故。家贫如洗，缝纴度日。守节三十三年。

何岐山妻王氏年三十，夫故。抚子成立，足不出户。守节二十八年。

朱桢妻柴氏年二十八，夫故。敬事翁姑，戚党咸称。守节五十一年。

朱毓海妻徐氏年二十八，夫故。言笑不苟，足不出户。守节二十五年。

毛承家妻缪氏年二十五，夫故。事姑抚孤。守节五十七年。

周家俭妻毛氏年二十九，夫故。抚育子女，婚嫁以礼，身任勤劳。守节五十七年。

朱治平妻毛氏年二十八，夫故。事姑抚孤，持家有法。守节六十年。

朱贯妻毛氏年二十五，夫故。善体姑心，食贫甘苦。守节二十七年。

朱象艮妻柴氏年三十，夫故。家贫矢志，有劝改适者，坚拒之。守节四十七年。

朱连高妻赵氏年二十九，夫故。抚子成立。守节五十年。

毛鸣岐妻汪氏年三十，夫故。无子，抚侄为嗣。守节二十九年。

朱元发妻毛氏年二十六，夫故。庄重自持，勤俭中礼。守节二十八年。

朱材妻王氏年二十八，夫故。屏尽铅华，矢志靡他。守节五十三年。

廩生姜廷钰妻徐氏年二十九，夫故。事姑孝谨，教子义方。守节十一年卒。

朱有星妻毛氏年三十，夫故。静守孤帋，人罕识面。守节二十九年。

朱大发妻邱氏年二十九，夫故。家贫矢志，终无怨言。守节五十五年。

毛晖吉妻王氏年二十五，夫故。青年矢志，足不出柵。守节四十一年。

生员朱培錕继室曾氏年三十，夫故。事姑抚孤，视前室子恩勤尤至。守节二十六年。

朱起培妻姜氏年二十九，夫故。敬事舅姑，教子成立。守节三十六年

王锡珪妻徐氏年二十二，夫故。遗腹一子，教养成人，孝事舅姑。守节四十二年。

朱时懋妻柴氏年三十，夫故。勤俭持家，抚子成立。守节三十三年。

朱劭晃妻郑氏年二十一，夫故。翁姑年迈，遗孤尚幼，孝慈兼尽。守节二十五年卒。

职员王耀南妻林氏氏知书晓大义。年三十，夫故。家贫无子，抚养幼叔，连葬三丧。发逆之扰，氏兄宝森殉难，幼弟甫六岁被掳，氏踴躍扞挡赎弟，以存父嗣。今氏尚存。守节已二十年。

朱惠心妻姜氏年二十，夫故。食贫安分，足不出户。守节三十年。

朱天泰妻毛氏年二十九，夫故。家贫矢志，娣姒间无诟谇声。守节三十八年。

李发荣妻毛氏年二十五，夫故。家贫无子，抚侄为嗣。守节三十二年。

朱文联妻姜氏年二十七，夫故。事姑孝。姑疾，衣不解带，及歿，丧葬尽礼。守节二十七年。

朱文美妻徐氏年二十九，夫故。敬事孀姑，言不出柵。守节五十七年。

林泰荣妻王氏年二十九，夫故。守节二十二年。

王氏一门三节监生王崇英妻陆氏，年二十五，夫故。抚孤元杰，甫授室而夭。弟崇炳妻毛氏，年三十，夫故。无子，抚侄为嗣。守节十五年卒。元杰妻朱氏，年十六，嫁甫三月，夫故。无子，时未有应继者，冰霜同矢，形影相依，朱氏守节二十一年先姑卒。阅六载，陆氏始立嗣孙，今陆氏年七十有三，继孙已就傅矣。

朱芩妻徐氏年二十九，夫故。义方训子，纺绩自给。守节三十四年。

附贡朱培钧继室郑氏年三十，夫故。抚子成立。守节五十二年。

汪振鹭妻徐氏年二十四，夫故。家贫事姑，抚孤成立。守节二十七年。

以上俱同治七年具题奉旨建坊旌表。

王廷权妻何氏年二十七，夫故。无子，抚侄为嗣。守节已三十六年。

徐享容妻柴氏年十八，嫁甫三月，夫故。因无子抚侄为嗣。守节十八年卒。

朱惠光妻黄氏年二十五，夫故。家贫矢志。守节已二十六年。

汪志燧妻郑氏年二十九，夫故。无子，抚侄为嗣。守节已二十三年。

朱一文继妻周氏年二十七，夫故。孝事翁姑。守节五十三年。

生员王荣栋妻汪氏年二十四，夫故。无子，孝事舅姑，抚侄邦治为嗣。守节已二十九年。

周学源妻徐氏年二十二，夫故。无子，抚侄为嗣。守节二十八年。

朱应实妻王氏年二十六，夫故。孝事舅姑。守节四十八年。

汪日永妻王氏年二十五，夫故。抚孤。守节已三十二年。

朱扶九妻张氏年三十，夫故。孝事舅姑。守节二十九年。

王元族妻何氏年二十四，夫故。善事舅姑。守节已四十三年。

毛仕升妻戴氏年二十四，夫故。遗腹一子，抚之成立。守节已三十年。

朱文海妻毛氏年二十六，夫故。孝事舅姑。守节四十九年。

周良江妻毛氏年二十八，夫故。事姑抚孤。守节四十四年。

汪士燾妻王氏年二十九，夫故。子志麟方幼，抚养成立，已游郡庠。  
守节二十四年。

生员徐学记妻毛氏年二十七，夫故。事姑尽孝。守节已二十六年。

汪致煊继室徐氏年二十，嫁甫月余，夫故。孝事舅姑，抚嫡子如己出。  
守节已三十二年。

朱九秋继室姜氏年二十七，夫故。抚子成立。守节四十二年。

朱维璧妻王氏年三十，夫故。孝事衰迈舅姑。守节十七年卒。

金云江妻徐氏年二十三，夫故。善事舅姑。守节三十四年。

职员郑宗惠妾许、吴氏宗惠故时，许氏年二十六，敬事嫡室。守节三十二年。吴氏年二十二，抚养嫡子。计守节二十七年卒。

朱大恭妾王氏年二十二，夫故。抚子守节六十一年。

汪士题继室余氏年二十八，夫故。抚孤。守节三十三年。

生员柴毓苍妻毛氏年二十五，夫故。抚子成立。守节已二十九年。

周廷柱妻王氏年三十，夫故。敬事衰迈翁姑。守节十五年卒。

柴佳钦妻杨氏年二十七，夫故。孝事翁姑。守节四十二年。

朱攀麟妻周氏年二十五，夫故。孝事舅姑。守节十九年卒。

汪振泉妻郑氏年二十九，夫故。无子，抚侄为嗣。守节已二十七年。

监生周良澹妻刘氏年二十七，夫故。抚子成立。守节二十年卒。

监生周良汉妻余氏年三十，夫故。抚子成立。守节三十五年。

朱希孟妻郑氏年三十，夫故。抚孤。守节二十八年。

汪士郎妻周氏年二十四，夫故。抚孤。守节已三十八年。

汪志奎妻徐氏年二十三，夫故。抚孤。守节三十二年。

诰职郑宗善妾柏氏年二十一，夫故。抚孤。守节三十九年。

廩生汪燧春妻徐氏年二十九，夫故。抚孤。守节已二十三年。

汪应礼继室朱氏年二十七，夫故。抚孤。守节二十四年。

郑长均妻汪氏年十九，夫故。无子，抚侄为嗣。守节三十三年。

杨培棠妻王氏年二十三，夫故。无子，抚侄为嗣。守节十九年卒。

汪端卿妻杨氏年二十三，夫故。抚孤。守节已三十五年。

毛文煜妻周氏年二十七，夫故。抚孤。守节三十五年。

王道淳妻汪氏年二十五，夫故。无子，抚侄为嗣。守节三十二年。

汪志训妻成氏年二十八，夫故。无子，抚侄为嗣。守节三十三年。

毛锡旒妻徐氏年三十，夫故。抚孤。守节已四十三年。

毛承殿妻王氏年十九，夫故。孝事翁姑。一子病剧，氏吁天泣告曰：“子若夭，夫嗣绝，衰年翁姑何所养望。果天降之殃也，愿以身代子。”病竟愈。氏守节十五年。

汪在稔妻蒋氏年二十七，夫故。抚孤。守节已三十九年。

杨培荣妻柴氏年二十四，夫故。无子，抚侄为嗣。守节三十七年。

毛双义妻徐氏年二十四，夫故。抚孤。守节三十四年。

王道源妻何氏年二十三，夫故。无子，抚侄为嗣。守节三十三年。

柴廷好妻王氏年二十一，夫故。无子，抚侄为嗣。守节已三十九年。

吴登昌妻周氏

徐德扬妻郑氏

以上俱同治十一年由采访总局汇案请旌。

监生王必敬妻毛氏年三十一，夫故。贞静苦守，坚如金石。守节六十一年。

王金珣妻金氏年三十五，夫故。家贫守志，不出怨言。守节四十三年。

陆光洁妻毛氏年三十，夫故。孤帋静守，境困志坚。守节四十年。

汪必迨妻郑氏年三十一，夫故。守节五十二年。

璩国良妻郑氏年三十三，夫故。境遭荼毒，操矢冰霜。守节三十年。

武舉陸振岱妻毛氏年二十六，夫故。艱苦備歷，心志愈堅。守節三十一年。

武舉陸振江妻毛氏年三十，夫故。荼蘼其境，鐵石其心。守節廿九年。

生員王儒楷妻何氏年三十二，夫故。善事舅姑，撫侄為嗣。守節三十五年。

朱酉妻周氏年三十五，夫故。茶苦自甘，誓不改志。守節四十七年。

監生王應林妻徐氏年三十一，夫故。操若冰雪，歷久不移。守節四十三年。

職員姜萬選妻毛氏年三十一，夫故。守節二十三年。

王時恭妻楊氏年三十一，夫故。敬事翁姑，矢志不渝。守節十三年卒。

監生王崇岡妻朱氏年三十五，夫故。靜守深閨，貧不易志。守節三十年。

毛文康妻祝氏年三十五，夫故。矢志柏舟，境苦志堅。守節三十四年。

鄭良駿妻毛氏年三十三，夫故。守節五十五年。

汪士香妻王氏守節十一年。

楊光庠妻周氏年三十五，夫故。守節二十七年。

徐廷鐘妻姜氏年三十二，夫故。守節四十八年。

汪士寶妻徐氏守節三十六年。

周茂穗妻毛氏年三十一，夫故。孤苦守節四十三年。

監生徐大盼妻周氏年三十三，夫故。守節三十二年。

周起建妻毛氏守節五十七年。

徐佐清妻周氏年三十四，夫故。清貧自誓。守節三十六年。

鄭大仁妻徐氏年三十一，夫故。冰雪自矢，窮而益堅。守節三十四

年。

王盛娘妻郑氏年三十一，夫故。守节五十年。

徐上高妻周氏年三十五，夫故。贫不易志，历久如常。守节三十二年。

郑大河妻祝氏守节三十一年。

姜燁元妻杨氏守节二十一年。

生员毛晋台妻郑氏年三十，夫故。贞洁之操，久而弥坚。守节四十一年。

姜煇元妻徐氏守节二十九年。

周仕成妻揭氏年三十一，夫故。缝紉度日，口无怨言。守节五十四年。

祝国宇妻余氏守节三十三年。

徐人懿妻毛氏年三十二，夫故。茹苦含辛，誓不改志。守节五十年。

祝长寿妻杨氏守节二十九年。

郑兆宝妻王氏守节四十八年。

毛镜妻汪氏守节三十七年。

陈献堂妻童氏年三十二，夫故。抚子成立。守节已二十年。

朱友兰妻毛氏年三十二，夫故。孝事舅姑。守节四十二年。

徐文骆妻王氏年三十五，夫故。无子，抚侄为嗣，善事翁姑。守节三十一年。

周福庆妻柴氏年三十二，夫故。抚子成立。守节已二十年。

朱有福妻柴氏年三十三，夫故。孝事舅姑。守节四十二年。

朱希教妻柴氏年三十五，夫故。孝事舅姑。守节四十六年。

毛天恩妻姜氏年三十五，夫故。孝事舅姑，抚子成立。守节三十九年。

朱时栋妻吴氏年三十一，夫故。抚子成立。守节四十九年。

郑洛书妻何氏年三十三，夫故。无子，抚侄为嗣。守节五十一年。

朱文浚妻吴氏年三十五，夫故。孝事舅姑。守节五十三年。

朱文扬妻赵氏年三十五，夫故。孝事舅姑。守节五十一年。

杨懋炤妻周氏年三十五，夫故。抚孤。守节三十一年。

毛瑞龙妻戴氏年三十一，夫故。抚子成立。守节二十六年。

生员汪学醇继室毛氏年三十四，夫故。抚孤成立。守节二十七年。

朱天潮妻冯氏年三十二，夫故。孝事舅姑。守节四十七年。

以上俱由学详请给匾旌奖。附见《题旌册》。

僧生毛廷发继室刘氏年二十五，夫故。抚子成立，矢志守节五十年。

严于前妻周氏年二十九，夫故。孝事衰姑，抚子成立。守节五十四年。

徐为丙妻毛氏年二十八，夫故。无子，静守深闺，矢志靡他。守节二十四年。

童田旺妻宋氏年二十九，夫故。事姑守节二十二年。

夏邦璞妻徐氏年二十一，夫故。家贫无子。守节三十六年。

徐志尚妻姜氏年二十八，夫故。孝事孀姑，抚子成立。守节四十七年。

监生徐宗瀚妻周氏年二十三，夫故。无子，抚侄为嗣，孝事翁姑。守节三十四年。

徐文炳妻王氏年二十八，夫故。孝事翁姑，始终无间。守节四十年。

何兰宫妻刘氏年二十六，夫故。抚养幼孤，俾立家室。守节五十二年。

周应鸮妻何氏年十七，嫁甫三月，夫故。无子，孝事翁姑，茹苦含辛。守节三十八年。

儒童王承寿妻毛氏年二十七，夫故。事姑抚孤。守节已二十六年。

何道忠妻王氏年二十三，夫故。义方教子。守节三十五年。

徐大丰妻何氏年二十七，夫故。家贫，竭力事姑。守节四十五年。

徐大辅妻毛氏年二十二，夫故。善事舅姑，始终不懈。守节五十二年。

刘世芳妻徐氏年二十四，夫故。善事翁姑。守节二十八年。

佾生郑宪年妻周氏年二十，夫故。善事舅姑，抚侄犹子。守节已三十八年。

监生朱履恒妾周氏年二十七，夫故，抚孤成立，勤苦持家。守节已二十五年。

武举毛廷熊妻吴氏年二十八，夫故。事亲守节二十七年。

周子保妻徐氏年二十八，夫故。庄重自持，矢志靡他。守节四十九年。

何汝贤妻王氏年二十，夫故。坚白自持，终身不改。守节三十八年。

陈维虺妻徐氏年二十六，夫故。抚子式麟成立。安贫守节已三十七年。

周日井妻郑氏年二十五，夫故。孝事舅姑，抚子成立。守节四十三年。

徐志贤妻叶氏年二十四，夫故。无子，苦志守节五十三年。

王兆寿妻陈氏年二十八，夫故。深闺静守，事姑至孝。守节二十年卒。

祝允文妻徐氏年二十，夫故。孝养翁姑，食贫自甘。守节二十七年卒。

童六高妻徐氏年二十四，夫故。茹苦含辛，志操不渝。守节二十二年卒。

职员王振凤妻毛氏年二十三，夫故。孝养翁姑，抚侄为嗣。守节八年卒。

周廷樞妻何氏年二十二，夫故。家贫，抚子，孝事翁姑。守节四十八年。

监生毛应泰妻李氏年二十六，夫故。无子，纺绩自给。守节四十二年。

儒童王文诗妻何氏年二十四，夫故。孝事翁姑。守节二十六年。

王开泰妻陆氏年二十二，夫故。家贫无子。守节三十一年。

生员郑凤翔妻王氏年二十一，夫故。孝事年迈翁姑，茶蘖自甘。守节十年卒。

柴廷弼妻詹氏年二十九，夫故。孝养翁姑，甘贫守节四十一年。

柴廷辅妻王氏年二十四，夫故。孝养舅姑，矢志不贰。守节三十四年。

祝善配妻赵氏年二十六，夫故。庄重自持，言笑不苟。守节四十八年。

郑鹤遐妻陈氏年二十八，夫故。安贫矢志。守节十七年卒。

生员周光先妻毛氏年二十四，夫故。青年矢志。守节三十五年。

职员夏维寅妻郑氏年二十六，夫故。善事翁姑，矢志守节九年卒。

何日华妻郑氏年二十五，夫故。孝养二老，不离左右。守节四十一年。

汪在强妾李氏年二十八，夫故，分卑自安，义矢从一。守节三十九年。

佾生王员妻蒋氏年二十七，夫故。孝事翁姑。守节七十三卒。

王佳搃继室董氏年二十四，夫故。矢志抚孤，备尝艰苦。守节六十五年。

毛得绩妻周氏年二十一，夫故。矢志事姑，兼抚孤成立。守节二十八年卒。

祝仕杰妻周氏年二十五，夫故。子甫六龄，矢志抚孤。守节九年卒。

毛云驥妻周氏年二十九，夫故。孝事翁姑，针线度日，里族咸称。守节三十三年。

毛来仪妻赵氏年二十四，夫故。善事舅姑，抚孤成立。守节二十六年。

王允渭妻周氏年三十，夫故。抚孤成立。守节四十二年。

毛永谓妻王氏年二十八，夫故。青年矢志，白首完贞。守节五十五年。

举人郑六吉妻姜氏年二十，夫故。教子义方，持家有法。守节八年卒。

王槐标妻甘氏年二十五，夫故。事姑抚孤。守节十六年卒。

毛廷训妻陈氏年三十，夫故。事姑抚孤。守节三十七年。

王凤旺妻毛氏年十九，夫故。遗腹一子，家极贫，抚之成立。守节十九年卒。

毛秉信妻杨氏年二十五，夫故。阨穷堪悯，誓志不移。守节四十六年。

毛廷瑄妻祝氏年二十八，夫故。奉事翁姑，孝敬备至。守节四十八年。

毛曰洙妻姜氏年二十九，夫故。青年矢志，足不出闾。守节四十三年。

周树梓妾祝氏年二十六，夫故，抚子成立，克振家声。守节已二十七年。

王永祖妻刘氏年二十三，夫故。立志不移，清贫自甘。守节二十七年。

生员毛世泽妻徐氏年二十八，夫故。事姑抚子，孝慈兼尽。守节二十四年。

武生毛世忠妻郑氏年三十，夫故。抚孤。守节二十四年。

毛升亨妻郑氏年二十四，夫故。敬事舅姑，抚侄为嗣。守节四十三年。

周学滋妾项氏年二十八家主故，事嫡室尽礼，抚养幼孩。守节十八年卒。

毛永煌妻王氏年二十八，夫故。奉养舅姑，恪守妇道。守节五十七

年。

毛国茂妻王氏年三十，夫故。奉事翁姑，铅华不御。守节四十一年。

生员毛晋亨妻林氏年二十七，夫故。食贫励志，历久弥坚。守节四十八年。

周邦孚妻赖氏年二十七，夫故。矢志青年，完贞晚岁。守节四十年。

王周纲妻黄氏年二十四，夫故。奉养翁姑，志操不渝。守节四十四年。

毛应逢妻刘氏妾邹氏刘氏年三十，夫故。善事舅姑。守节五十二年。邹氏年二十七家主故，训子成立，甘心守节四十六年。

职员毛振藻妾张氏年三十，夫故，安分守礼，坚贞不移。守节四十七年。

汪尚盛妻毛氏年二十九，夫故。奉姑抚子。守节三十七年。

汪尚积妻周氏年二十四，夫故。贫苦自安。守节三十二年。

毛廷堦妻周氏年二十二，夫故。生子甫弥月，抚孤安贫。守节五十五年。

毛廷国妻徐氏年二十三，夫故。遗腹生子，家贫，谨事翁姑，备历艰辛。守节二十九年。

监生毛之琪妻林氏年三十，夫故。茶苦自甘，闺范不坠。守节五十七年。

徐廷秋妻毛氏年二十八，夫故。茹苦含辛，外顺内和。守节五十二年。

周聚杰妻毛氏年二十九，夫故。抚孤成立。守节四十七年。

毛凤翔妻妾氏年二十五，夫故。无子，视侄犹儿。守节五十年。

毛世杰妻王氏年二十二，夫故。奉养翁姑，教子成名。守节二十七年。

周兆健妻徐氏年二十二，夫故。困苦自甘，抚子成立。守节二十九年。

生员王廷球妻毛氏年二十八，夫故。孝养翁姑，兼抚幼侄。守节八年卒。

毛嘉诰妻王氏年十九，夫故。无子，孝事衰老迈姑，抚侄为嗣。守节三十年卒。

王氏一门双节明铤妻刘氏，年二十六，夫故。抚孤守节，四十四年卒。弟明鐸妻毛氏，年二十三，夫故。无子，矢志守节四十年卒。夫属一本，妻称二难，一门双节，乡党咸钦。

毛廷璞妻周氏年二十八，夫故。勤苦自励。守节三十三年。

佾生毛德普妻傅氏年三十，夫故。奉养翁姑，抚子成立。守节三十九年。

毛嘉芳妻王氏年三十，夫故。课子力田，辛劳弗恤。守节已四十三年。

监生郑咏吉继室刘氏年二十七，夫故。无子，抚侄为嗣。守节已二十六年。

余长发妻祝氏年二十六，夫故。善事翁姑，甘心食贫。守节十一年卒。

戴泰顺妻严氏年二十，夫故。遗腹一子，抚教成立。守节六十六年。

监生毛登元妻朱氏年三十，夫故。善事翁姑，教子成名。守节已二十一年。

戴儒仁妻詹氏年二十三，夫故。无子，抚侄为嗣。守节四十三年。

周德成妻杨氏年三十，夫故。事翁姑，抚遗孤。守节二十二年。

周嘉洎妻戴氏年二十八，夫故。孝事翁姑，抚育遗孤。守节五十九年。

佾生王泽渠妻朱氏年二十六，夫故。敬事舅姑，抚子成立。守节十七年卒。

徐鸿书妻毛氏年三十，夫故。抚二子成立，教养备至。守节十九年卒。

周开泰妻吴氏年二十七，夫故。茹苦含辛。守节已三十一年。

周开荣妻璩氏年二十八，夫故。勤俭苦守，教子有方。守节已二十九年。

毛士富妾张氏年二十六，夫故，子甫七龄，矢志靡他。守节四十九年。

毛嘉树妻邵氏年二十九，夫故。抚育三子，心力交瘁。守节三十八年。

佾生刘兆富妻柴氏年二十三，夫故。事姑尽孝，赋性贞静，平时人罕得见。守节二十九年。

周万林妻毛氏年二十八，夫故。家贫子幼，教养成立。守节四十一年。

生员毛尚炳妻朱氏年二十八，夫故。无子，孝养翁姑，视侄犹儿。守节已四十六年。

毛嘉邦妻胡氏年三十，夫故。抚孤成立。守节二十三年。

徐元琳妻吴氏年二十八，夫故。庄重勤俭。守节已三十九年。

徐元众妻伍氏年二十九，夫故。孝养翁姑。守节已三十三年。

姜廷道妻严氏年二十五，夫故。家贫无子，抚嗣成立。守节已四十六年。

戴儒哲妻叶氏年二十八，夫故。子幼。守节已四十三年。

徐大基妻王氏年二十三，夫故。无子，敬奉翁姑，抚嗣守节已四十八年。

周文仓妻胡氏年二十九，夫故。家贫苦志，抚子成立。守节三十八年。

毛大潮妻柴氏年十九，夫故。无子，嗣子复夭，伶仃孤苦，贞操不改。守节五十二年。

毛大翰妻胡氏年二十五，夫故。无子，嗣子又亡，茕独自甘。守节四十五年。

严在拾妻周氏年二十四，夫故。抚育遗孤。守节三十三年。

毛德佐妻胡氏年二十三，夫故。无子，抚嗣子如己出。守节十八年卒。

毛德仕妻王氏年二十四，夫故。谨守苦节，百折不回，抚孤成立，众口交称。守节四十三年。

柴兆荣妻毛氏年三十，夫故。善事翁姑，义方教子。守节十八年卒。

刘寿益妻徐氏年二十八，夫故。遗孤甫两月，旋殤，矢志守节已四十年。

郑世运妻李氏年二十四，夫故。抚孤成立。守节已四十四年。

傅命天妻毛氏年二十，夫故。矢志完贞。守节四十九年。

傅承昌妻余氏年三十，夫故。奉养翁姑，始终不渝。守节已二十一年。

毛大焜妻柴氏年十九，夫故。无子，抚嗣子已游庠。守节已三十六年。

毛必泰妻周氏年二十七，夫故。无子，抚育嗣子已入武庠。守节已三十八年。

周时杰妻毛氏年二十八，夫故。抚育二子，长已游庠。守节已四十一年。

毛世和妻王氏年二十六，夫故。矢志抚孤，教以义方。守节已二十八年。

姜云本妻王氏年二十二，夫故。奉事舅姑，抚孤。守节三十六年。

生员毛炳文妻周氏年二十四，夫故。无子，抚侄为嗣。守节已三十九年。

姜大寿妻周氏年二十四，夫故。一子复夭，事姑抚嗣。守节十八年卒。

监生王上聘妾何、郭氏何氏年二十四，家主故，矢志守节，抚正室子女如己出。郭氏年二十二，同心守节，敬恭事嫡所出，一子抚养成立。二氏苦守已三十九年。

柴文焯妻毛氏年三十，夫故。茹苦含辛，矢志不易。守节三十九年。

柴文源妻郑氏年三十，夫故。孝奉翁姑，抚孤成立。守节二十五年。

职员毛文灿妾胡氏年二十六，夫故，苦志抚养，嗣子游庠。守节二十九年。

柴兆华妻周氏年二十四，夫故。抚子成立。守节五十一年。

胡益谦妻王氏年二十三，夫故。孝事翁姑，甘贫抚孤。守节六十三年。

柴成櫛妻姜氏年二十九，夫故。苦志守节四十六年。

柴德丰妻王氏年二十六，夫故。家贫子幼，苦志不移。守节四十八年。

武生祝大椿妻赵氏年三十，夫故。无子，抚侄为嗣。守节三十一年。

胡兆亨妻毛氏年二十四，夫故。遗孤苦守，矢志不移。守节六十二年。

柴芬从妻毛氏年二十九，夫故。善事翁姑，抚孤成立。守节五十五年。

佾生祝士鑑妻王氏年三十，夫故。孝事舅姑，矢志不贰。守节四十五年。

赵有耀妻王氏年二十八，夫故。孝事翁姑，勤抚子女。守节二十五年。

赵有韬妻杨氏年二十七，夫故。家贫苦志。守节三十四年。

周大经妻毛氏年三十，夫故。善事翁姑，抚孤。守节三十九年。

赵恭祥妻毛氏年二十九，夫故。善事翁姑，抚养幼孤。守节二十四年。

陆光澄妻周氏年三十，夫故。孝亲教子。守节三十九年。

佾生王允文妻周氏年二十一，夫故。遗腹一子，抚育成立。守节二十六年卒。

赵代潮妻毛氏年二十，夫故。无子，孝养翁姑，立志不移。守节三十五年。

赵逢戍妻邵氏年二十七，夫故。孝事翁姑，矢志守节二十八年。

监生陆荣杏妻徐氏年三十，夫故。敬养舅姑，教子有方。守节二十年。

毛嘉昌妻朱氏年二十四，夫故。家贫，女红自给。守节二十八年。

王永光妻毛氏年三十，夫故。善事翁姑，食贫自矢。守节四十九年。

王杰人妻吴氏年二十，夫故。敬事舅姑，勤抚子女。守节六十四年。

毛永盛继室蒋氏年二十四，夫故。孝养翁姑，抚孤成立。守节七十三年。

王明钟妻徐氏年二十九，夫故。抚孤。守节五十五年。

周继宗妻毛氏年二十九，夫故。奉事翁姑，抚养孤儿。守节十五年。

王尚烈妻陆氏年三十，夫故。孝事舅姑，鞠育幼子。守节二十八年。

毛元俊妻王氏年二十九，夫故。家贫，矢志守节三十八年。

毛茂江妻刘氏年二十九，夫故。茹苦含辛，抚子成立。守节已二十九年。

胡起瑞妻王氏年二十九，夫故。抚教二子，长入武庠。守节已二十四年。

刘奕源妻余氏年二十四，夫故。勤苦持家，志操不改。守节已三十三年。

郑其遇妻刘氏年二十三，夫故。奉事翁姑，抚子成立。守节已四十年。

周瑞杰妻管氏年二十四，夫故。无子，抚侄为嗣。守节已二十七年。

王氏一门苦节 簪旂妻林氏，年二十一，夫故。无子。守节十六年卒。兄职员宝卿继室杨氏，年二十三，夫故。无子。守节已三十一年。一门双节，孤苦堪悯，期功中无应继者，立缙服夫弟遗孤承模兼祧，娶妻毛氏，生子缙杰，甫五龄，承模亦故。

毛凤池妻陆氏年二十九，夫故。无子，柏舟自矢，抚嗣守节已四十七年。

郑一云妻毛氏年二十九，夫故。纺绩度日，茹苦含辛。守节已五十年。

毛应书妻周氏年三十，夫故。善事翁姑，抚孤成立。守节已四十六年。

徐永隆妻罗氏年二十八，夫故。事亲教子，孝慈咸称。守节已四十六年。

祝大泽妻毛氏年三十，夫故。抚育二子，教养成立。守节已四十三年。

毛佩田妻胡氏年二十九，夫故。无子，抚侄犹子。守节已四十五年。

王永平妻周氏年二十八，夫故。抚孤守节，已四十一年卒。

王邦本妻何氏年二十七，夫故。清操自矢。守节已四十一年。

监生黄廷奎继室周氏年二十六，夫故。矢志抚孤，心如金石。守节已四十一年。

周绍考妻祝氏年二十五，夫故。子甫襁褓，备历艰辛。守节已四十一年。

何振邦妻周氏年二十四，夫故。青年矢志，百折不回。守节已四十年。

毛佩瑱妻吴氏年二十九，夫故。事姑以孝，抚子有方。守节已四十年。

王学樊妻周氏年三十，夫故。家贫。守节已三十九年。

生员郑家侨妻毛氏年二十九，夫故。事孀姑而诚敬，抚嗣子以恩勤。守节已三十九年。

郑天丰妻毛氏年二十八，夫故。守节已三十九年。

周天傅妻柴氏年二十七，夫故。奉事高堂，抚育幼子。守节已三十九年。

郑英舒妻周氏年三十，夫故。抚孤。守节已三十九年。

周大兴妻王氏年二十一，夫故。矢志抚孤，得舅姑欢。守节已三十八

年。

毛昌庸妻徐氏年二十八，夫故。教养孤儿，安贫励志。守节已三十八年。

生员黄廷鸾妻毛氏年二十八，夫故。奉侍舅姑，操若冰霜。守节已三十七年。

王家添妻周氏年十八，夫故。无子，事舅姑以孝，抚侄以延夫祀。守节已三十七年卒。

儒童郑鸿江妻李氏年三十，夫故。甘心食贫。守节已三十七年。

夏邦玠妻徐氏年二十，夫故。善事舅姑，杜门纺绩。守节已三十七年。

周振鹭妻陆氏年二十六，夫故。子幼家贫。守节三十六年。

陈定高妻周氏年二十七，夫故。无子，抚侄为嗣。守节已三十六年。

毛兴根妻夏氏年二十八，夫故。善抚子女，敬事舅姑。守节已三十六年。

赵恭祚妻毛氏年二十四，夫故。冰霜自励，矢志不移。守节已三十六年。

郑百合妻周氏年二十三，夫故。翁姑衰老，膝下无儿，立嗣延后，甘心守节已三十五年。

祝善铃妻毛氏年二十六，夫故。事姑以孝，抚侄犹儿。守节已三十五年。

赵夔太妻何氏年十九，夫故，嫁甫五月。遗腹生一子，抚孤事亲。守节已三十五年卒。

生员姜廷楷妻江氏年二十七，夫故。无子，抚侄为嗣。守节已三十四年。

杨茂书妻李氏年二十三，夫故。家贫子幼。守节已三十二年。

武生郑嘉会妻姜氏年二十六，夫故。无子，善事翁姑，抚侄为嗣。守节已三十四年。

佾生赵光洁妻周氏年三十，夫故。抚孤。守节已三十二年。

徐富根妻王氏年二十七，夫故。抚孤。守节已三十二年。

周暄妻陆氏年三十，夫故。孝事衰翁，教育遗孤。守节已三十一年。

姜殿甲妻毛氏年二十七，夫故。朝夕事姑，不离左右。守节已三十二年。

徐纯智妻郑氏年二十六，夫故。事亲抚孤。守节已三十一年。

儒童王培崧妻毛氏年二十二，夫故。孝事翁姑，抚侄犹子。守节已三十一年。

金时耀妻柴氏年二十八，夫故。尽心事姑，清贫自甘。守节已三十年。

严士礼继室周氏年三十，夫故。教子义方，心盟井水。守节已三十年。

王开仁妻汪氏年二十二，夫故。子甫在抱，家贫，矢志守节已三十年。

席尚期妻毛氏年二十六，夫故。守节已二十九年。

毛荣垅妻姜氏年二十四，夫故。无子，孝事迈姑。守节已二十七年。

佾生毛之斌妻胡氏年二十，夫故。敬事高堂，抚胞侄为嗣。守节已二十八年卒。

毛荣本妻刘氏年二十五，夫故。孝事翁姑，抚子成立。守节已二十六年。

赵廷权妻金氏年二十七，夫故。善事翁姑，抚孤成立。守节已二十六年。

儒童严余益妻毛氏年二十六，夫故。善事二老，勤抚孤儿。守节已二十五年。

佾生周世杰妻柴氏年二十六，夫故。子甫在抱，殫心抚育，兼孝翁姑。守节已二十五年。

徐纯祥妻郑氏年二十八，夫故。抚养二子，教导有方。守节已二十五年。

汪开元继室周氏年二十六，夫故。抚孤。守节已二十四年卒。

生员王铨妻朱氏年三十，夫故。抚育孤儿，教养兼至。守节已二十二年。

武举毛国恩妻徐氏年二十八，夫故。抚孤。守节已二十三年。

周昌雨妻毛氏年二十九，夫故。孝事翁姑，抚子长成。守节已二十二年。

毛家驹妻汤氏年二十九，夫故。善事翁姑，训子亦严。守节已二十二年。

陆保宗继室柴氏年三十，夫故。家贫，事亲教子。守节已二十一年。

徐日容妻周氏年二十六，夫故。子甫六岁，教养长成，未婚而夭，复以从伯之孙锦垣为其子立嗣，茹苦含辛，抚育两世，以存夫祀。守节六十三年。

徐文梓妻杨氏年二十五，夫故。子甫四龄，家贫苦志，孝事翁姑。守节四十七年。

武举毛绍寅继室王氏年二十七，夫故。无子，上事迈姑，抚前室子如己出。守节二十年卒。

陆乾山妻冯氏年二十八，夫故。孝养翁姑，勤抚子嗣。守节二十二年。

徐廷珩妻鲁氏年二十八，夫故。抚子成立。守节五十年。

郑文明妻李氏年二十九，夫故。无子抚嗣。守节二十九年。

徐起云妻马氏年二十八，夫故。抚养孤子，备极恩勤。守节五十八年。

徐肇燧妻刘氏年二十三，夫故。抚孤。守节四十五年。

童兆安妻程氏年二十九，夫故。孝事舅姑，抚子成立。守节四十二年。

李德昌妻杨氏年二十四，夫故。矢志靡他。守节三十七年。

徐光涛妻姜氏年三十，夫故。无子，抚侄为嗣，甘守苦节四十年。

徐杓妻邵氏年二十八，夫故。无子。守节九年卒。

童世喜妻王氏年二十四，夫故。遗腹生男，抚养成立，敬事翁姑。守节六十五年。

徐永高继室周氏年二十八，夫故。孝亲抚孤，安贫矢志。守节十九年卒。

徐家壩妻何氏年二十三，夫故。苦志守节四十年。

刘德财妻徐氏年三十，夫故。家贫刻苦。守节十年卒。

翁尚训妻毛氏年二十八，夫故。家贫，抚子成立。守节四十四年。

刘德良妻陈氏年二十五，夫故。无子。守节三十五年。

周允珂妻徐氏年二十，嫁甫一载，夫故。上奉衰翁，备极孝敬。守节三十七年。

王国柏妻柴氏年二十九，夫故。家贫，敬事高堂，抚育二子。守节八年卒。

佻生徐庆全妻毛氏年二十七，夫故。事亲抚孤。守节八年卒。

毛德兰妻王氏年二十二，夫故。无子，抚养嗣子，视若亲生。守节四十一年。

汪聚光妻周氏年二十九，夫故。子方在抱，艰苦度日。守节四十年。

毛成土妻吴氏年二十二，夫故。子方二岁，抚育长成。守节五十年。

职员郑茂良妻周氏年二十一，夫故。姑衰子幼，孝感兼尽。守节三十四年。

邹鸣岐妻蒋氏年二十九，夫故。无子。守节十年卒。

陈国光妻周氏年二十四，夫故。无子，敬奉高堂。守节三十一年。

江云增妻蓝氏年二十八，夫故。家贫。守节三十二年。

周锡瑜妻徐氏年二十，夫故。事姑抚孤。守节十九年卒。

郑永龄妻周氏年二十四，夫故。上事翁姑，抚侄犹儿。守节十七年卒。

徐茂柏妻周氏年二十一，夫故。无子。守节十七年卒。

汪致烝妻何氏年二十九，夫故。无子。守节九年卒。

监生郑会勋妻徐氏年二十四，夫故。事姑抚孤。守节十四年卒。

徐元洪妻毛氏年十八，夫故。善事舅姑，深明大义。守节十年卒。

郑增业妻毛氏年三十，夫故。抚孤成立。守节十年卒。

何俊挺妾金氏年二十五，夫故。善事嫡室，抚孤长成，食饩胶庠。守节已四十八年。

徐殿荣妻杨氏年二十八，夫故。教子有方。守节已四十五年。

何国琅妻刘氏年二十九，夫故。家贫抚孤。守节已四十二年。

詹世恭妻徐氏年二十二，夫故。无子，安贫矢志。守节已四十一年。

周克温妻徐氏年二十七，夫故。抚育子女。守节已四十年。

李隆社妻祝氏年二十七，夫故。无子，孝事翁姑。守节已三十九年。

姜性善妻刘氏年二十九，夫故。抚孤。守节已三十七年。

生员郑连城妻周氏年二十二，夫故。事姑孝敬，抚孤长成。守节已三十五年。

杨友櫟妻姜氏年二十，夫故。无子，困阨备尝。守节已三十四年。

徐文锡妻郑氏年二十九，夫故。抚孤。守节已三十三年。

徐知守妻方氏年三十，夫故。事姑抚孤。守节已三十二年。

武生周朝达继室郑氏年二十八，夫故。事翁姑，抚二子成立。守节已三十年。

毛鸿杰妻刘氏年三十，夫故。无子，抚侄为嗣。守节已三十年。

姜文畅妻杨氏年二十五，夫故。子甫周岁，抚养勤劳。守节已二十八年。

徐高良妻王氏年二十五，夫故。青年矢志，人无闲言。守节已二十六年。

郑连城妻何氏年二十九，夫故。抚孤。守节已二十六年。

徐尚卿妻毛氏年二十九，夫故。上事翁姑，下抚孤儿。守节已二十五

年。

徐秉鑿妻郑氏年二十九，夫故。抚孤。守节已二十五年。

王日焯妻柴氏年二十八，夫故。抚孤。守节已二十四年。

周世应妻陈氏年二十九，夫故。善事舅姑，抚子守节已二十二年。

徐士祥妻王氏年二十九，夫故。抚孤。守节已二十二年。

姜让元妻周氏年二十六，夫故。家贫无子。守节已五十六年。

胡光钊妻吴氏年二十五，夫故。事后姑能尽孝，抚嗣子如亲生。守节已五十四年。

何元龄妻毛氏年二十七，夫故。孝事翁姑，抚孤。守节已五十三年。

吴积泰妻周氏年二十二，夫故。舅姑年衰，子甫五月，家贫。守节已四十六年。

胡国平妻姜氏年二十四，夫故。事亲抚子，安贫守节已四十五年。

周德潢妻王氏年二十六，夫故。遗腹生子，教养成立，善事翁姑。守节已四十三年。

伍仲言妻傅氏年三十，夫故。事亲终老，教子成人。守节已四十三年。

徐世昌妻周氏年二十七，夫故。无子，代夫事亲，抚侄承祧。守节已四十二年。

詹登恒妻林氏年二十三，夫故。襁褓抚儿，克成家室。守节已四十二年。

祝廷振妻郑氏年二十七，夫故。奉姑抚孤，安贫守节已四十年。

胡晋黼妻徐氏年二十七，夫故。事亲抚孤。守节已四十年。

林应炬妻杨氏年二十九，夫故。抚孤。守节已三十八年。

戴文法妻郑氏年二十八，夫故。奉事舅姑。守节已三十八年。

吴学辂妻周氏年二十五，夫故。无子。守节已三十七年。

何承荣妾毛氏年二十二，夫故。安分守卑，礼无僭越。守节已三十七

年。

徐文灿妻毛氏年二十五，夫故。敬事舅姑，抚孤。守节已三十七年。

夏大胜妻徐氏年二十一，夫故。遗腹生子，抚养成立。守节已三十五年。

郑月节妻项氏年二十七，夫故。事翁姑，抚幼子。守节已三十二年。

王名山妻刘氏年二十九，夫故。事亲抚子。守节已三十二年。

虞永穆妻周氏年二十八，夫故。子方六龄，抚育成立，翁姑称贤。守节已三十年。

严应积妻徐氏年二十二，夫故。抚孤。守节已三十年。

武生周鸿恩妻江氏年二十六，夫故。事亲抚子。守节已二十九年。

郑兰亭妻徐氏年二十四，夫故。孤苦自甘。守节已二十九年。

姜启恭妻毛氏年二十三，夫故。抚孤。守节已二十八年。

胡殿光妻徐氏年三十，夫故。奉孀姑，教幼子。守节已二十七年。

徐永臻妻周氏年二十四，夫故。无子，甘守苦节已二十七年。

胡梦玖妻周氏年二十八，夫故。事姑抚子。守节已二十五年。

伍永胡妻毛氏年二十八，夫故。教子成人，深知大义。守节已二十三年。

姜昌基妻吴氏年二十八，夫故。青年矢志，操襟冰霜。守节四十九年。

柴成瑛妻杨氏年二十六，夫故。抚孤。守节四十四年。

姜善兴妻朱氏年二十七，夫故。奉事翁姑，抚养幼子，安贞守节五十三年。

姜国本妻何氏年二十八，夫故。无子，矢志守节四十三年。

姜如槐妻周氏年二十七，夫故。青年励志，殒齿无怨。守节五十一年。

郑遇夫妻刘氏年二十六，夫故。无子，抚养嗣子，爱慈备至。守节二

十二年。

柴峻坦妻毛氏年三十，夫故。孝敬翁姑，抚育子女。守节三十六年。

柴成珍妻姜氏年二十七，夫故。抚孤成立，不渝初志。守节四十年。

姜永毫妻周氏年二十一，夫故。结褵一载，遽惨离鸾。无子，抚侄为嗣。守节十三年卒。

杨延坦妻柴氏年二十五，夫故。抚孤。守节五十八年。

姜有恭妻徐氏年二十四，夫故。无子，安贫守节五十年。

郑体元妻王氏年二十七，夫故。孝事翁姑，抚养幼子。守节二十九年。

郑福元妻毛氏年二十四，夫故。事亲教子。守节三十八年。

杨大光妻吴氏年三十，夫故。孝事衰姑，抚养幼子。守节四十五年。

姜学谦妻王氏年二十四，夫故。遗腹生儿，抚育成立，孝事翁姑。守节三十五年。

姜福安妻郑氏年二十三，夫故。无子，孤守苦节四十五年。

姜祖慰妻徐氏年二十九，夫故。无子，苦志守节四十四年。

金大伦妻王氏年二十八，夫故。孝事翁姑，抚教嗣子。守节三十五年。

生员姜廷鳌妻顾氏年三十，夫故。抚孤。守节三十八年。

姜世琮妻吴氏年二十九，夫故。抚孤。守节三十一年。

毛松年妾叶氏年二十六，夫故。抚子成立，安贫守节二十五年。

姜福泰妻毛氏年二十七，夫故。安贫抚孤。守节二十四年。

周学醇妻陈氏年二十九，夫故。抚孤。守节二十六年。

武举毛凤扬妻蔡氏年二十四，夫故。事姑抚女，困穷守节十六年卒。

姜瑞发妻杨氏年二十三，夫故。无子，孝事衰姑，抚侄为嗣。守节七年。

毛绍桀妻徐氏年二十五，夫故。守节二十年。

杨肇玫妻毛氏年二十八，夫故。无子，敬奉衰翁，抚侄为嗣。守节已五十三年。

徐嘉关妻周氏年二十三，夫故。困守苦节已五十二年。

姜元良妻祝氏年二十三，夫故。抚孤。守节已四十九年。

姜廷渠妻周氏年三十，夫故。无子，抚侄为嗣。守节已四十四年。

柴毓业妻徐氏年二十八，夫故。抚孤。守节已四十二年。

姜元灿妻吴氏年二十六，夫故。无子。守节已四十二年。

杨大谋妻胡氏年二十五，夫故。抚孤。守节已四十二年。

姜文秀妻毛氏年二十七，夫故。无子，抚侄承祧。守节已四十年。

杨朝典妻徐氏年二十五，夫故。孝事翁姑，教养嗣子。守节已四十年。

姜廷模妻周氏年三十，夫故。子天，甘守苦节已四十年。

郑廷交妻徐氏年二十九，夫故。抚育二子，孝事翁姑。守节已三十六年。

毛时镇妻周氏年二十六，夫故。上有翁姑，下无子女，尽孝守节已三十三年。

杨在祥妻胡氏年二十六，夫故。抚孤。守节已三十三年。

胡瑞友妻杨氏年二十三，夫故。事衰姑，抚遗孤。守节已二十九年。

周志挺妻胡氏年二十三，夫故。抚二子成立，孝事孀姑。守节已二十八年。

姜万兴妻杨氏年二十四，夫故。守节已二十八年。

周汝刚妻徐氏年二十六，夫故。孝事翁姑，抚育幼孤。守节已二十五年。

毛攀一妻柴氏年二十八，夫故。善抚嗣子。守节已二十三年。

朱守谟妻周氏年二十九，夫故。子方襁褓，抚孤。守节已二十二年。

周文炳妻王氏年二十八，夫故。抚孤。守节四十九年。

姜兆李妻毛氏年二十五，夫故。无子。安贫守节四十五年。

童德象妻陈氏年三十，夫故。抚孤。守节四十九年。

郑瑞照妻刘氏年十九，夫故。抚子成立。守节五十八年。

徐大朝妻管氏年二十四，夫故。孝事翁姑。守节四十六年。

姜兆发妻严氏年二十九，夫故。无子，抚侄为嗣。守节三十四年。

周永耀妻姜氏年二十五，夫故。抚孤。守节五十七年。

童连魁妻吴氏年二十八，夫故。事姑抚孤。守节五十三年。

毛廷琼继室王氏年三十，夫故，子甫六龄。抚孤。守节五十五年。

毛士行妻何氏年二十五，夫故。无子，抚侄为嗣。守节四十九年。

李尚惠妻祝氏年二十六，夫故。安贫守节四十二年。

林霄连妻徐氏年二十四，夫故。事舅姑，抚遗孤。守节四十一年。

周纯镠妻姚氏年三十，夫故。姑衰子幼，孝感兼尽。守节二十九年。

毛聚堂妻严氏年三十，夫故。抚孤。守节二十九年。

姜秀茂妻祝氏年二十九，夫故。抚孤。守节三十一年。

严钟淑妻姜氏年二十九，夫故。事亲教子。守节四十三年。

邵起祥妻毛氏年二十六，夫故。抚孤。守节四十八年。

郑学行妻姜氏年二十九，夫故。抚孤。守节三十八年。

监生姜恭徽妻刘氏年二十七，夫故。事翁姑，抚幼孤。守节十二年卒。

周承规妻祝氏年二十一结褵数月，夫故。事舅姑，抚嗣子，苦志守节二十七年。

刘起炎妻宋氏年二十八，夫故。抚孤。守节三十一年。

徐佑第妻郑氏年二十四，夫故。遗腹生男，抚孤。守节三十年。

周鸣珙妻管氏年二十一，夫故。姑媳相依，节能兼孝。守节十四年卒。

王瑞光妻周氏年二十六，夫故。无子，为有翁姑，勉延残喘。守节七

年卒。

姜志孝妻金氏年二十五，夫故。抚孤。守节已五十年。

方嘉南妻王氏年二十七，夫故。事亲抚子。守节已四十八年。

陈庆达妻杨氏年二十四，夫故。事亲抚子，安贫守节已四十八年。

严云高妻姜氏年二十，夫故。遗腹生儿，抚孤。守节已四十四年。

祝高极妻毛氏年二十一，结褵数月，夫故。孤身守节已四十三年。

顾时孝妻祝氏年二十九，夫故。抚孤。守节已四十二年。

周典章妻王氏年二十九，夫故。事姑抚孤。守节已三十七年。

夏洪范妻徐氏年二十三，夫故。抚孤。守节已三十三年。

祝玉楼妻林氏年二十三，夫故。事姑抚子。守节已三十一年。

汪志居妻方氏年二十三，夫故。抚孤。守节已三十一年。

毛文琳妻周氏年二十六，夫故。无子，食贫守节已三十年。

王重泰妻徐氏年三十，夫故。抚孤。守节已二十六年。

林在恒妻何氏年三十，夫故。奉亲抚子。守节已二十四年。

毛文举妻姜氏年二十八，夫故。无子，安贫守节已二十四年。

祝廷金继室郑氏年三十，夫故。结褵十载，夫病八年，生无懈于昼夜，没矢志于冰霜，孤苦守节已二十二年。

戴廷惠妻严氏年三十，夫故。遗孤在抱。守节已二十一年。

王天顺妻毛氏年三十，夫故。抚孤授室。守节已二十一年。

祝三芳妻郑氏年二十四，夫故。事姑抚孤，孝慈兼尽。守节六十九年。

汪景埙妻周氏年三十，夫故。事姑孝抚，孤勤守节六年卒。

何性功妻黄氏年三十，夫故。抚孤。守节已二十五年。

毛良楫妻顾氏年三十，夫故。安贫矢志，抚孤成立。守节二十一年。

毛恢妻胡氏年三十，夫故。清贫度日，教子有方。守节四十年。

毛新穀妻郑氏年二十八，夫故。纺绩自贍，足不出闾。守节四十三

年。

职员郑潮妻程氏陕西秦安县知县程玟女。年二十九，夫故。二子俱幼，循循教养，持家有法。守节五十一年。

毛四毛妻方氏年三十，夫故。家贫子幼，孝事翁姑，处妯娌从无间言。守节四十五年。

周承钟妻姜氏年二十一，夫故。无子，孝事翁姑，抚侄为嗣。守节五十九年。

毛世盛妻周氏年二十九，夫故。抚育幼孩，慈严兼尽。守节四十四年。

周瑞画妻王氏年二十六，夫故。无子，视侄犹儿，抚养成立。守节四十五年。

毛世代妻童氏年二十四，夫故。安贫抚孤。守节五十二年。

职员郑渐妻徐氏举人徐煥新女，年二十八，夫故。抚青四子，勤劳备至。守节六十三年。

姜行临妻毛氏年二十一，夫故。乍挽鹿车，旋分鸾镜，无子嗣，事翁姑。守节二十年卒。

生员毛汝登妻梅氏年三十，夫故。无子，抚侄为嗣。守节三十年。

黄乾始妻朱氏年二十七，夫故。事翁姑，抚继嗣。守节五十四年。

毛宦生妻王氏年二十五，夫故。善事舅姑，义方教子。守节二十三年。

毛起乐妻吴氏年二十九，夫故。孝养舅姑，抚孤。守节五十一年。

姜绍宗妻戴氏年二十六，夫故。殫心抚子，竭力事姑。守节五十三年。

柴高暲妻邵氏年二十八，夫故。伉俪未久，志操秉如一日。守节四十六年。

毛国桢妻吴氏年二十七，夫故。事亲孝养，抚孤成立。守节五十一年。

周增乾妻毛氏年二十四，夫故。事姑则采兰著洁，抚子则画荻勗勤。守节四十六年。

柴文鸿妻赵氏年二十一，适文鸿。姑徐氏早寡，苦劳多疾，氏善事之。越两载生一子。又两载，姑卒，数日子夭，夫亦相继而亡。氏年二十五，甘心茕独，苦志终身。守节六十一年。

毛善贵妻姜氏年二十七，夫故。翁姑垂老，子女俱幼，仰事俯教。守节四十六年。

毛长年妻刘氏年二十六，夫故。敬事翁姑，恩勤抚子。守节九年卒。

郑嘉集妻姜氏年十九，夫故。结褵仅两载，无子，以迈姑在堂，勉延奉事。守节十年卒。

毛之昇妻吴氏年二十五，夫故。翁姑在堂，幼子在抱，孝慈兼尽。守节三十五年。

毛世杰妻何氏年二十六，夫故。家贫，半菽不饱，敬事舅姑。守节十年卒。

郑瑞选妻严氏年二十五，夫故。操若柏舟，历久不变。守节三十三年。

黄兆祉妻俞氏年二十三，夫故。抚养二子，事姑以孝。守节五十三年。

生员郑应镠妻周氏年二十七，夫故。善体姑心，矢志不渝。守节十五年卒。

毛联兆妻余氏年三十，夫故。事姑抚子，茹苦如饴。守节四十七年。

毛元铜妻胡氏年二十七，夫故。敬事舅姑，食贫抚子。守节三十九年。

毛大权妻祝氏年三十，夫故。矢志抚教孤儿。守节五十五年。

周惟楠妻王氏年二十一，夫故。五载结褵，一朝破镜。事姑以孝，抚子以慈。守节六十四年。

严志祿妻徐氏年二十六，夫故。境遭荼毒，抚孤成立。守节五十六

年。

毛增芹妻陈氏年三十，夫故。抚孤。守节十六年卒。

毛秀缙妻姜氏年二十四，夫故。抚孤。守节十二年卒。

毛聚勃妻王氏年三十，夫故。深知大义，教子有方。守节四十年。

生员柴高映妻周氏年二十九，夫故。善事翁姑，抚教幼子。守节三十七年。

毛志祥妻周氏年三十，夫故。清贫矢志，敬亲慈幼。守节二十九年。

徐永容妻周氏年二十七，夫故。孝顺翁姑，抚孤。守节六十五年。

毛秀培妻周氏年二十七，夫故。事翁姑，教子女，孝慈兼尽。守节三十五年。

毛应柜妻周氏年二十八，夫故。无子，抚侄昭己出。守节九年卒。

徐文焕妻祝氏年二十四，夫故。事翁姑，教子女，兼抚幼叔，不恤艰辛。守节六十二年。

徐文谦妻祝氏年二十八，夫故。境遭荼毒，矢志靡他。守节三十六年。

王大樟妻郑氏年二十七，夫故。奉养翁姑，贞守苦节十七年卒。

黄学汉妻毛氏年十九，夫故。抚育遗腹成立，奉养翁姑，二十余年不倦。守节五十一年。

周大钦妻毛氏年二十七，夫故。事姑抚侄，均尽心力。守节三十六年。

严有卯妻周氏年二十九，夫故。痛钗凤之分飞，和丸熊以助教。抚孤。守节三十二年。

职员黄芳年妻郑氏年二十三，夫故。孝事舅姑，抚育遗孤。守节四十一年。

监生黄廷嘉妻何氏年二十九，夫故。孝事翁姑，教育二子，俱登庠序。守节五十一年。

毛毓琳妻周氏年二十四，夫故。二子俱幼，抚育成立。守节二十八

年。

郑仕斋妻何氏年二十一，夫故。事翁姑以孝，抚幼子以慈。守节三十八年。

周大始妻徐氏年二十四，夫故。家贫无子，孝事翁姑，善抚嗣子。守节五十一年。

梁永青妻周氏年三十，夫故。苦抚子女，针纫度日。守节十九年。

张永增妻姜氏年三十，夫故。事姑抚孤，均尽其道。守节十三年。

严士仁妻郑氏年二十三，夫故。子方襁褓，翁姑在堂，孝养兼至。守节五十五年。

郑俊萝妻姜氏年三十，夫故。抚育三子，贫不改志。守节五十年。

周有阳妻张氏年二十八，夫故。事姑抚子。守节四十六年。

职员黄鹤年继室徐氏年二十八，夫故。矢志守贞，抚前室子如己出。守节五十四年。

黄梦贲妻朱氏年二十四，夫故。孝姑抚孤。守节四十三年。

毛汝樑妻徐氏年二十九，夫故。有子在抱，食贫抚养。守节四十四年。

柴世福妻徐氏年二十三，夫故。孝敬翁姑，操同松柏。守节五十三年。

儒童郑邦泰妻柴氏年二十五，夫故。善事舅姑，乡里交称。守节五十二年。

王如英妻徐氏年二十九，夫故。子方周月，姑复病盲，奉事不倦，子亦成立。守节十八年卒。

徐家治妻叶氏年二十八，夫故。抚子成立。守节五十三年。

生员毛金简妻陆氏年三十，夫故。孝养翁姑，教子成立。守节三十七年。

毛祥烘妻徐氏年二十九，夫故。屏谢铅华，心如铁石。守节四十七年。

张永培妻周氏年二十九，夫故。无子，善事舅姑，抚嗣成立。守节四十三年。

郑仕本妻祝氏年二十八，夫故。奉事高堂，兼和妯娌。守节四十一年。

徐世禄妻周氏年二十九，夫故。抚孤。守节二十九年。

金永江妻徐氏年二十六，夫故。遗孤尚幼，善事孀姑。守节三十一年。

黄金华妻周氏年二十三，夫故。无子，奉事孀姑，竭诚尽敬。守节四十五年。

柴望茂妻赵氏年三十，夫故。无子，矢志不贰，终身苦节四十三年。

柴学鸿妻周氏年二十二，夫故。事亲守节三十二年。

佾生周位南妻翁氏年二十八，夫故。贫无子嗣，守义不移，事舅姑尤孝敬。守节四十一年。

柴天荣妻黄氏年二十四，夫故。孝事翁姑，坚操苦节四十年。

黄文株妻陈氏年二十八，夫故。事舅姑，抚遗孤，慎言寡默。守节十九年。

黄时达妻柴氏年二十，夫故。无子，抚侄为嗣，善事高堂。守节八年卒。

职员杨友杜妻祝氏年二十六，夫故。无子，敬奉二老，兼抚嗣子。守节五十一年。

黄廷同妻余氏年二十二，夫故。事上抚下，孝感兼至。守节四十二年。

金永瀚妻陈氏年二十五，夫故。翁姑在堂，尽心奉侍，抚子成立。守节三十七年。

柴圣祥妻周氏年三十，夫故。家贫矢志，甘心茕独。守节三十六年。

监生何世雄妻姜氏年三十，夫故。矢志靡他。守节十二年卒。

姜梦瑚妻柴氏年二十九，夫故。殫心抚子，诚敬奉先。守节三十七

年。

何茂源妻徐氏年二十二，夫故。上事舅姑，下抚幼子，矢志守节三十九年。

徐尚福妻郑氏年三十，夫故。敬事翁姑，秉性贞贤。守节三十九年。

毛凤鸣妻杨氏年二十九，夫故。抚教三子，敬事翁姑。守节四十二年。

佾生严士初妻周氏年二十八，夫故。一子方襁褓，姑年七十，奉姑抚子。守节二十七年。

佾生姜明岳妻周氏年二十二，结褵甫七旬，夫故。无子，高堂年老，侍奉惟谨。守节四十一年。

监生姜桂萼妻周氏年二十九，夫故。教养遗孤。守节三十一年。

陈佩粹妻黄氏年二十七，夫故。无子，孝养翁姑。守节三十年。

周文鎰妻夏氏年二十六，夫故。抚孤。守节三十年。

周志亮妻黄氏年三十，夫故。家贫无子，事姑二十余年，里族称孝。守节三十二年。

毛荣台妻陆氏年三十，夫故。孝事高堂，鞠育幼子。守节三十三年。

姜德河妻王氏年二十一，夫故。鹿车甫挽，鸾镜遽分。矢志守节三十三年。

毛荣恕妻王氏年二十七，夫故。家贫无子，抚侄为嗣。守节十年卒。

毛凤舆妻祝氏年二十六，夫故。抚孤成立。守节三十一年。

徐尚和妻周氏年二十七，夫故。孝事翁姑。守节三十一年。

生员徐昂霄妻周氏年二十六，夫故。孝事衰翁，抚育孤子。守节三十三年。

生员王仁本继室郑氏年二十二，夫故。无子女，以坚贞自矢。守节十九年卒。

周绍祖妻张氏年二十八，夫故。矢志抚孤。守节二十九年。

佾生何代松妻毛氏年二十四，夫故。敬事迈姑，抚养孤子。守节十

五年卒。

严利仁妻姜氏年三十，夫故。事姑抚孤。守节三十七年。

毛时雄妻柴氏年三十，夫故。敬奉二老，抚育孤儿。守节二十九年。

毛应洪妻徐氏年二十六，夫故。事姑以孝，教子以义。守节二十六年。

何国通妻陆氏年三十，夫故。教子义方，矢志守节三十一年。

郑瑞耀妻王氏年二十八，夫故。抚育二子，均各成立。守节三十六年。

严瑞琅妻周氏年二十八，夫故。抚孤。守节二十六年。

柴丹墀妻徐氏年二十一，夫故，结褵甫二载。无子，欲以身殉，媵姒劝解得免。守节二十六年卒。

杨德宝妻王氏年二十五，夫故。无子，抚侄为嗣，奉事舅姑，苦志守节二十八年。

诸天明妻刘氏年二十五，夫故。善事孀姑，勤抚幼子。守节二十五年。

邹树型妻吴氏年二十九，夫故。抚子成立，妇道无亏。守节二十六年。

姜在渊妻周氏年十九，夫故。结褵甫半载，又鲜嗣续，茹荼矢志，殒齿无愧。守节二十三年。

周启登妻柴氏年二十六，夫故。尽心抚孤，以延夫祀。守节十二年卒。

汪志岳妻毛氏年二十五，夫故。上事高堂，下抚幼子。守节十九年卒。

严锡良妻董氏年二十三，夫故。子甫三龄，高堂年迈，仰事俯教。守节十七年卒。

严时云妻毛氏年二十四，夫故。抚遗孤。守节二十一年卒。

毛在志妻傅氏年二十九，夫故。抚孤。守节十四年卒。

黄廷叙妻毛氏年二十八，夫故。家赤贫，灌园度日，抚嗣子如己出。守节十四年卒。

佾生赵协华妻朱氏年二十四，夫故。矢志守节六年卒。

廪生毛佩珏妻徐氏年三十，夫故。抚孤。守节十五年卒。

何玉仁妻王氏年三十，夫故。抚子成室，厥子亦孝谨。守节十二年卒。

佾生毛连海妻许氏年三十，夫故。奉高堂而抚子，孝慈不愧。守节十一年。

严开礼妻周氏年三十，夫故。抚孤。守节六年卒。

徐义孙妻周氏年二十七，夫故。奉事翁姑，抚养孤子。守节四十六年。

生员王仕杰妻毛氏年二十六，夫故。家贫，矢志守节五十六年。

王文佩妻周氏年二十，夫故。遗腹生儿，苦成获教，奉事翁姑。守节三十八年。

胡位烈妻毛氏年二十九，夫故。孝事衰姑，爱养孤子。守节五十九年。

胡长富妻毛氏年二十三，夫故。无子，事翁尽孝，抚侄为嗣。守节五十九年。

吴元壩妻姜氏年二十九，夫故。家贫，教子勤苦，终身守节二十九年。

王连仁妻徐氏年二十五，夫故。无子女，孤守苦节三十八年。

祝开运妻徐氏年二十八，夫故。抚孤成立，翁姑称孝。守节三十四年。

周士连妻祝氏年二十六，夫故。事翁姑，抚孤子，孝慈兼备。守节五十七年。

王嘉本妻徐氏年二十四，夫故。母子相依，境苦心甘。守节二十八年。

邵日泰妻徐氏年二十九，夫故。善事舅姑，妇道无亏。守节五十五

年。

潘既睦妻姜氏年二十四，夫故。无子，抚嗣成立。守节五十八年。

周永耀妻姜氏年二十五，夫故。抚养孤儿，甘贫茹苦。守节五十八年。

周仕遭妻徐氏年二十四，夫故。无子，抚侄为嗣，家贫。守节四十一年。

周士遭妻徐氏年二十四，夫故。嗣续无人，孤苦守节四十年。

王有喜妻徐氏年二十九，夫故。子幼家贫，矢志守节三十年。

胡文赞妻杨氏年二十六，夫故。事姑孝，抚子慈。守节六十六年。

胡宗钿妻王氏年三十，夫故。无子，抚侄为嗣。守节五十二年。

郑兆兴妻周氏年二十六，夫故。无子，抚侄为嗣。守节二十六年。

胡凤凝妻管氏年二十，夫故。无子，抚侄为嗣。守节六十年。

王峻华妻周氏年三十，夫故。抚子成立。守节四十二年。

胡家敦妻徐氏年二十七，夫故。事翁姑，抚幼子，孝慈兼尽。守节五十九年。

王峻英妻杨氏年二十八，夫故。冰霜励志，历久不渝。守节四十一年。

周仕滨妻邓氏年二十九，夫故。事姑抚儿，尽孝尽爱。守节二十三年。

周仕鰐妻徐氏年二十七，夫故。无子，孝事舅姑。守节四十二年。

王仕庄妻周氏年二十六，夫故。无子，敬事翁姑。守节五十年。

王善忠妻胡氏年二十五，夫故。奉衰姑，抚幼孤。守节四十八年。

徐有堆妻周氏年二十四，夫故。翁衰子幼，孝养成称。守节五十九年。

林汝畅妻周氏年二十六，夫故。抚孤。守节四十五年。

监生朱芝妻余氏年三十，夫故。义方教子。守节三十一年。

郑名铤妻王氏年二十五，夫故。安贫矢志，之死靡他。守节三十九年。

郑增谱妻马氏年二十七，夫故。抚孤。守节五十三年。

郑仕礼妻张氏年三十，夫故。抚孤。守节五十年。

徐有忠妻毛氏年二十一，夫故。孝事翁，姑抚孤。守节五十九年。

胡毓麟妻吴氏年二十九，夫故。奉姑抚子。守节二十九年。

祝学渭妻王氏年二十四，夫故。奉始抚子。守节四十七年。

徐步陵妻金氏年二十八，夫故。事舅姑，抚孤子。守节四十一年。

徐维三妻吴氏年二十六，夫故。教子有成，得翁姑之欢心。守节三十四年。

胡脩廷妻郑氏年二十七，夫故。髡面毁容，事亲抚子。守节二十四年。

王玉成妻吴氏年二十七，夫故。贞静自守，宗党咸钦。守节四十二年。

胡惟星妻姜氏年二十五，夫故。无子，善事翁姑，爱抚嗣子。守节三十八年。

徐天河妻叶氏年三十，夫故。事亲教子，惟孝惟义。守节三十七年。

徐俊仓妻姜氏年二十六，夫故。抚子成家。守节三十四年。

胡玉行妻周氏年三十，夫故。训女宜家，抚儿成室。守节二十八年。

监生郑之涣妻毛氏年三十，夫故。孝事姑嫜，教养二子。守节三十五年。

胡国政妻周氏年二十六，夫故。抚养子女。守节二十六年。

郑英怀妻柴氏年二十七，夫故。无子，姑媳相依，阨穷不变。守节十七年卒。

徐万塘妻毛氏年二十八，夫故。上事翁姑，下抚孤子。守节三十七年。

徐国纯妻祝氏年二十三，夫故。抚遗孤。守节二十一年卒。

汪人杰妻王氏年二十一，夫故。无子，抚夫侄为嗣。守节二十七年卒。

郑木林妻黄氏年二十五，夫故。无子嗣，家贫。守节二十三年卒。

林庆元妻郑氏年二十八，夫故。孤儿在抱，兵燹颠危，矢志不移。守节二十年卒。

董望积妻王氏年二十五，夫故。姑老子幼，未敢轻生。烽火惊危，克完贞操。守节十五年卒。

王邦佑妻徐氏年十九，夫故。上奉衰姑，下挈幼子，兵燹避危，贞白无忝。守节十二年卒。

以上采访事实，俱于同治十一年里学移详请旌。

周嘉礼妻郑氏年二十九，夫故。孝事翁姑。守节二十六年。

周在瀛妻郑氏年二十五，夫故。抚遗孤。守节二十二年卒。

杨必明妻吴氏年二十四，夫故。无子，孝养翁姑，抚侄为嗣。守节三十一年。

监生郑增勋继室刘氏年二十四，夫故。兰膳承欢，荻灰垂教。守节十年卒。

姜起官妻毛氏年二十六，夫故。侍奉庭闱，提携襁褓。守节十二年卒。

姜积存妻郑氏年二十三，夫故。坚贞矢志，孝养尽诚。守节二十八年。

姜希祥妻詹氏年二十八，夫故。遗腹生子，抚育成立。守节四十四年。

吴绣球妻周氏年二十八，夫故。遗腹一子，家贫。守节三十三年。

生员王堂妻姜氏年二十七，夫故。抚孤。守节五十四年。

王华国妻徐氏年三十，夫故。无子。守节四十三年。

余福有妻汪氏年二十八，夫故。教子有方。守节已三十二年。

周在麒妻汪氏年二十三，夫故。抚孤。守节已二十九年。

戴锡金妻姜氏年二十七，夫故。事舅姑，抚幼侄。守节已二十四年。

毛姿珽妻杨氏年二十八，夫故。无子侍姑。守节已三十二年。

毛远崇妻王氏年二十八，夫故。抚孤。守节已三十二年。

姜应燧妻周氏年二十，夫故。子幼家贫。守节已三十年。

监生王树松继室何氏年三十，夫故。教养遗孤。守节已四十三年。

宋瑞祥妻祝氏年二十八，夫故。抚育子女，矢志靡他。守节已二十六年。

毛懋德妻徐氏年二十九，夫故。冰霜自励，金石同坚。守节已二十二年。

陆享嗣妻朱氏年二十三，夫故。矢志自守。事姑以孝。守节已二十七年。

赖良樽妻毛氏年二十二，夫故。事姑。守节已三十九年卒。

毛茂榕妻徐氏年二十六，夫故。事亲抚孤，孝顺兼尽。守节已二十六年。

姜天集妻徐氏年二十八，夫故。井臼躬操，抚孤成立。守节三十五年。

王成绥妻汪氏年二十九，夫故。教子成名。守节三十七年。

举人王吉士妻郑氏年三十，夫故。善事翁姑，抚子成名，有声庠序。守节二十三年。

周尚福妻吴氏年二十九，夫故。孝事翁姑。守节三十五年。

举人王景星继室胡氏年二十六，夫故。抚孤成名。守节二十四年。

徐庆泰妻汪氏年二十八，夫故。孝敬翁姑，训子有方。守节已二十四年。

毛志烈妻徐氏年二十六，夫故。守节三十三年。

毛茂槐妻周氏年二十七，夫故。矢志不贰。守节二十年。

姜嘉楨妻周氏年二十五，夫故。家貧。守節五十四年。

陳步階妾徐氏年二十九，夫故。撫孤。守節已二十四年。

蔣可發妻周氏年二十八，夫故。守節二十七年。

增生鄭宗煜妻邱氏年二十七，夫故。操勵冰霜，心堅金石。守節已二十三年。

鄭文清妻程氏年二十一，夫故。撫孤。守節三十六年。

余庄頭妻徐氏年二十九，夫故。上奉二老，下撫孤子。守節已三十九年。

余耀南妻鄭氏年二十二，夫故。奉垂老之翁姑，撫孤雛而授室。守節四十三年。

余國听妻呂氏年二十九，夫故。奉堂前之二老，撫膝下之雙雛。守節已四十九年。

余三多妻祝氏年二十九，夫故。撫子成立，力田自贍。守節已四十九歲卒。

監生王銜丹妻毛氏年二十七，夫故。孝事孀姑，撫子授室，教文宜家。守節已二十四年。

王兆福妻潘氏年二十七，夫故。孝養翁姑，矢志靡他。守節已四十一年。

王沾惠妻徐氏

徐天恩妻嚴氏年二十八，夫故。善撫孤。守節七年卒。

祝大滋妻徐氏

侑生邵茂產妻吳氏年二十二，夫故。事翁姑，撫子嗣。守節三十九年。

邵多華妻王氏年二十五，夫故。事姑撫孤。守節四十七年。

汪志乾妻徐氏年二十五，夫故。撫孤。守節已三十八年。

胡瑞盈妻張氏年二十八，夫故。事親教子。守節已二十五年。

汪文恭妻夏氏年二十七，夫故。事始抚孤，克尽妇道。守节四十三年。

毛怀珍妻吴氏年二十五，夫故。矢志抚孤。守节二十七年。

周世福妻严氏年二十二，夫故。抚育二子，教养成人。守节四十五年。

郑次槐妻毛氏年三十五，夫故。抚育三子，甘心矢志。守节十六年。

郑元灿妻徐氏年三十五，夫故。教育二子，恩勤备至。守节十六年。

徐香林妻黄氏年三十五，夫故。抚孤矢志。守节二十八年。

汪士周妻徐氏年三十二，夫故。事姑抚孤。守节已五十年。

以上采访事实，俱同治十二年呈学移详汇题请旌。

徐光玉妻朱氏年三十五，夫故。守节四十一年。

汪志孟妻姜氏年三十四，夫故。守节已三十一年。

汪钟洛妻鲁氏年三十五，夫故。孝事翁姑，教子游庠。守节已二十年。

汪志光妻黄氏年三十五，夫故。事亲抚子，安贫守节已十八年。

黄乾纲妻周氏年三十一，夫故。事亲教子。守节四十年。

王元椿妻璩氏年三十一，夫故。事翁姑，抚幼子。守节四十七年。

周行健妻黄氏年三十三，夫故。孝养衰姑，教育幼子。守节三十五年。

董兆来妻徐氏年三十二，夫故。守节三十八年。

廪生黄允汴妻王氏年三十四，夫故。守节二十一年。

王兆贤妻徐氏年三十五，夫故。抚孤。守节二十九年。

郑瑞周妻姜氏年三十五，夫故。守节三十五年。

柴文遵妻吴氏年三十一，夫故。守节三十年。

金瑞坤妻毛氏年三十三，夫故。侍奉病姑，提携幼侄。守节四十九年。

黄文荣妻程氏年三十一，夫故。无子嗣，敬奉迈姑。守节九年卒。

黄文荣妻朱氏年三十四，夫故。事姑克孝。守节二十年

生员陈廷樾妻刘氏年三十二，夫故。翁衰子幼，事育维勤。守节三十五年。

童尚高妻华氏年三十五，夫故。孝翁姑，抚幼子。守节十二年卒。

监生郑培元妻毛氏年三十四，夫故。事姑抚孤。守节二十年。

武生黄彭年妻刘氏年三十一，夫故。无子，孝事翁姑。守节四十三年。

金殿彪妻周氏年三十三，夫故。无子，孝事衰姑，抚侄为嗣。守节十五年卒。

毛大扬妻王氏年三十四，夫故。子甫六龄，教养兼至。守节四十年。

黄琅妻朱氏年三十一，夫故。事亲抚孤。守节二十年。

郑增训妻周氏年三十四，夫故。食贫守节已四十九年。

柴宗富妻翁氏年三十四，夫故。事亲育子。守节四十六年。

董福盛妻刘氏年三十四，夫故。事亲育子。守节三十四年。

黄鹏飞妻周氏年三十三，夫故。欢承二老，抚育两儿。守节三十三年。

柴翰通妻王氏年三十五，夫故。守节三十三年。

徐秀溪妻胡氏年三十一，夫故。敬事翁姑，抚孤。守节已三十九年。

周应纲妻杨氏年三十一，夫故。事亲抚孤，孝慈兼尽。守节三十七年。

金汝聪妻黄氏年三十四，夫故。事姑抚孤。守节已三十七年。

监生周震声妾邵氏年三十一，夫故。抚孤。守节已三十六年。

姜元坦妻刘氏年三十三，夫故。孝事迈姑，抚侄如子。守节三十年。

金永瀛妻朱氏年三十二，夫故。抚侄勤劬。守节已三十年。

周启瑞妻王氏年三十五，夫故。姑老子幼，组织养生。守节二十七

年。

蔡万盛妻王氏年三十一，夫故。抚孤。守节二十九年。

严士举妻蔡氏年三十四，夫故。守节已二十九年。

毛攀军妻徐氏年三十二，夫故。抚孤。守节已二十八年。

王炳旒妻周氏年三十一，夫故。母子相依。守节二十一年。

严俊发妻吴氏年三十三，夫故。守节已二十三年。

严瑞庚妻姜氏年三十三，夫故。抚孤。守节十九年。

周应明妻陆氏年三十一，夫故。事姑抚子。守节已二十年。

杨茂福妻王氏年三十四，夫故。抚孤。守节已二十年。

金懋诚妻毛氏年三十三，夫故。抚侄为嗣。守节已十九年。

监生郑桂林妻毛氏年三十四，夫故。抚孤。守节已十七年。

徐在镒妻杨氏年三十五，夫故。无子，抚侄如儿。守节五十四年。

徐大濼妻詹氏年三十一，夫故。抚孤。守节四十八年。

李尚德妻祝氏年三十一，夫故。抚孤。守节四十年。

朱廷训妻鲁氏年三十二，夫故。守节四十四年。

武举徐光祖妻周氏年三十五，夫故。抚育三子。守节二十六年。

徐国用妻朱氏年三十五，夫故。抚孤。守节五十四年。

徐瑞阶妻柴氏年三十四，夫故。事姑抚孤。守节十八年。

徐增绪妻毛氏年三十四，夫故。抚孤。守节二十九年。

徐天红妻陆氏年三十一，夫故。无子，抚侄为嗣。守节二十七年。

祝士珍妻郑氏年三十五，夫故。家贫抚孤。守节已二十五年。

徐进协妻王氏年三十四，夫故。无子，奉养翁姑。守节已四十年。

徐和棠妻柴氏年三十四，夫故。上奉翁姑，下抚二子。守节三十年。

朱宝璜妻张氏年三十五，夫故。事姑抚孤。守节已三十二年。

刘藜光妻余氏年三十一，夫故。奉舅姑，抚幼子。守节二十二年。

徐能知妻姜氏年三十五，夫故。抚孤。守节已三十五年。

徐玉璋妻姜氏年三十四，夫故。抚孤。守节十二年卒。

柴乐建妻吴氏年三十一，夫故。抚孤。守节已二十四年。

毛锦耀妻徐氏年三十二，夫故。抚孤。守节已二十四年。

徐於翰妻周氏年三十五，夫故。抚侄如儿。守节已三十年。

徐廷发妻郑氏年三十五，夫故。子甫三龄，家贫抚孤。守节已二十一年。

汪致焕继室毛氏年三十三，夫故。无子。守节九年卒。

徐观国妻余氏年三十五，夫故。家贫，抚育二子。守节已十七年。

毛荣魁妻郑氏年三十三，夫故。青年矢志，白首完贞。守节已三十年。

余起鳌妻王氏年三十二，夫故。善事翁姑，抚侄犹子。守节二十八年。

王元焯妻郑氏年三十四，夫故。守节四十二年。

王金英妻毛氏年三十四，夫故。守节已二十三年。

王若金妻刘氏年三十二，夫故。抚孤。守节已二十八年。

姜学禛妻王氏年三十一，夫故。抚孤。守节四十二年。

蓝长明妻陈氏年三十四，夫故。无子。守节已十六年。

毛文露妻周氏年三十二，夫故。姑老子幼，事育维勤。守节二十三年。

毛树始妻胡氏年三十一，夫故。抚孤。守节十八年卒。

职员王开勋妻郑氏年三十三，夫故。无子，抚侄为嗣。守节已二十八年。

周运启妻严氏年三十五，夫故。抚孤。守节已三十三年。

毛高鼈妻王氏年三十二，夫故。无子女，抚侄为嗣。守节七年卒。

毛高登妻管氏年三十五，夫故。无子。守节已十八年。

周志芳妻洪氏年三十三，夫故。抚孤。守节五十二年。

吴良健妻詹氏年三十三，夫故。抚孤。守节四十八年。

毛汝福妻杨氏年三十五，夫故。守节已十七年。

毛立台妻郑氏年三十一，夫故。抚孤。守节已二十二年。

吴文学妻姜氏年三十五，夫故。事姑抚孤。守节二十七年。

吴朝斌妻王氏年三十四，夫故。事姑抚孤。守节五十四年。

童振义妻李氏年三十四，夫故。事姑抚孤。守节三十一年。

徐多进妻柴氏年三十四，夫故。抚孤。守节已四十一年。

刘维亲妻周氏年三十四，夫故。抚孤。守节已三十四年。

徐德扬妻郑氏年三十一，夫故。安贫守节已三十三年。

范佩玉妻刘氏年三十一，夫故。无子，抚侄承祧。守节三十七年。

姜启廷妻王氏年三十二，夫故。抚孤。守节二十七年。

姜石宏妻童氏年三十三，夫故。事翁抚孤。守节二十年。

姜恭第妻郑氏年三十三，夫故。事翁姑，抚幼子。守节已四十年。

职员姜大魁妻汪氏年三十四，夫故。无子，孝事翁姑。守节已三十一年。

王顺妻毛氏年三十四，夫故。敬事翁姑，抚孤。守节已三十五年。

王朝桢妻周氏年三十三，夫故。勤抚三子。守节已四十年。

詹廷元妻汪氏年三十一，夫故。抚孤。守节三十五年。

杨万族妻周氏年三十五，夫故。事上尽孝。守节五十四年。

王廷杏妻管氏年三十四，夫故。事衰翁，抚幼子。守节三十二年。

徐多脩妻杨氏年三十四，夫故。抚孤。守节三十五年。

徐国富妻杨氏年三十二，夫故。事姑抚孤。守节三十三年。

郑宗芳妻何氏年三十三，夫故。守节十二年卒。

周敬国妻徐氏年三十四，夫故。抚孤。守节已十八年。

毛起占妻郑氏年三十五，夫故。抚孤。守节五十年。

周士遗妻吴氏年三十二，夫故。无子。守节四十五年。

毛云安妻周氏年三十四，夫故。无子。守节十五年卒。

监生王嘉康妻汪氏年三十三，夫故。事翁姑，抚子嗣。守节已二十八年。

徐举仁妻祝氏年三十五，夫故。家贫抚孤。守节已十五年。

监生周元钟妻刘氏年三十二，夫故。孝事翁姑，善抚子嗣。守节五十三年。

潘有寿妻周氏年三十五，夫故。抚孤。守节二十五年。

徐正纲妾吴氏年三十五，夫故。安贫抚子。守节已十六年。

余福泰妻赵氏年三十三，夫故。抚孤。守节已二十三年。

余福朝妻应氏年三十二，夫故。善抚孤。守节十年卒。

姜德和妻张氏年三十三，夫故。抚孤。守节已十八年。

姜聚榘妻王氏年三十四，夫故。抚孤。守节已五十一年。

王明镛妻柴氏年三十二，夫故。事亲教子，孝感咸称。守节三十六年。

江夏喜妻祝氏年三十一，夫故。抚孤。守节二十四年。

谢向高妻徐氏年三十四，夫故。事姑抚孤。守节已二十四年。

周学渊妻姜氏年三十四，夫故。抚孤。守节三十一年。

职员徐庆范妻王氏年三十三，夫故。事姑抚子。守节已十八年。

傅三槐妻刘氏年三十五，夫故。矢志靡他。守节二十八年。

金好华妻郑氏年三十一，夫故。守节三十八年。

郑兆仓妻薛氏年三十三，夫故。家贫，辟鲈抚子。守节四十四年。

王仕厚妻祝氏年三十二，夫故。事亲抚孤。守节二十八年。

王华满妻柴氏年三十三，夫故。抚孤。守节五十一年。

郑大忠妻张氏年三十三，夫故。无子，抚侄为嗣。守节二十五年。

伍应雨妻姜氏年三十一，夫故。守节四十九年。

胡士豪妻杨氏年三十五，夫故。无子，事姑孝，抚侄承祧。守节三十

二年。

何攀龙妻徐氏年三十二，夫故。事亲抚子。守节三十一年。

王元震妻柴氏年三十二，夫故。谨事舅姑。守节已四十一年。

徐昌璠妻周氏年三十三，夫故。守节已四十年。

毛金鹭妻周氏年三十二，夫故。抚孤。守节已三十八年。

郑应麟妻毛氏年三十二，夫故。上事迈姑，下抚幼子。守节二十四年。

毛国坚妻邱氏年三十二，夫故。抚孤。守节已三十二年。

周永仓妻童氏年三十四，夫故。上奉衰姑，下抚幼子。守节已三十一年。

侑生郑元杰妻管氏年三十五，夫故。无子，敬奉衰姑。守节已二十七年。

徐华亭妻郑氏年三十二，夫故。松筠励志。守节已二十二年。

王大垢妻毛氏年三十一，夫故。事翁姑，抚子嗣。守节十一年卒。

姜如佩妻陈氏年三十三，夫故。抚孤。守节五十二年。

姜肇发妻杨氏年三十五，夫故。抚孤。守节三十八年。

杨炉妻王氏年三十五，夫故。奉翁姑，抚孤子。守节三十九年。

姜如漆妻吴氏年三十三，夫故。守节四十八年。

杨时泽妻吴氏年三十四，夫故。事姑抚子。守节三十三年。

姜万福妻袁氏年三十一，夫故。事亲教子。守节三十一年。

姜佳枝妻郑氏年三十三，夫故。子幼，姑病目盲，孝慈克尽。守节已四十八年。

姜元祥妻刘氏年三十一，夫故。抚孤。守节三十四年。

姜福松妻詹氏年三十四，夫故。守节已三十六年。

监生余振玉妻祝氏年三十四，夫故。事翁尽孝，抚子成立。守节十四年卒。

余起秀妻汪氏年三十二，夫故。抚孤。守节六年卒。

柴乾兑妻毛氏年三十二，夫故。抚孤。守节二十八年。

毛继科妻郑氏年三十三，夫故。抚子成立。守节已二十三年。

王寿锡妻何氏年三十五，夫故。守节十七年。

郑廷荣妻毛氏年三十一，夫故。抚育继嗣，成立授室。守节二十年。

徐天叙妻胡氏年三十五，夫故。抚四子成立。守节十一年卒。

徐天顺妻祝氏年三十四，夫故。二子俱幼，抚孤。守节四十二年。

邵殿栋妻江氏年三十五，夫故。敬事迈姑，抚养幼子。守节三十七年。

以上采访事实，俱于同治十二年呈学详请学政丁奖给节励冰霜匾额。

监生刘文炳继室顾氏年二十五，夫故。矢志坚贞，抚子成立。守节五十三年。

徐瑞云妻周氏年三十，夫故。事姑抚孤。守节已二十三年。

郑永富妻周氏年三十，夫故。从一不贰，抚侄为嗣。守节已二十二年。

毛永调妻王氏年二十六，夫故。青年矢志，勤抚子女。守节四十六年。

毛大廷妻祝氏年二十六，夫故。坚操自励，抚育勤苦。守节四十四年。

监生周文举妻王氏年三十三，夫故。辛勤抚育，教子成立。守节三十二年。

以上俱于同治十二年由浙省采访总局汇报题请旌奖。

徐廷幹妻汪氏年二十七，夫故。无子，抚侄为嗣，计守节三十二年。

侑生王炉金妻朱氏年三十三，夫故。孝养兼至，抚子成立，计守节十七年卒。

职员毛国栋继室江氏年三十五，夫故。二子俱成立，抚前室子如己出，计守节三十一年。

职员毛鸾台妻王氏年三十五，夫故。无子，抚妻子如己出。未几，子夭，氏亦遽歿，计守节九年卒。

职员毛鸾台妾祝氏年二十，家主故。一子甫襁褓，越三载子殇，氏哀痛成疾，计守节八年卒。

职员毛金台妻郑氏年三十五，夫故。无子，矢志坚贞，始终不渝，计守节已十六年。

诰职徐大受妻金氏年三十五，夫故。空帋苦守，教子成立，计守节四十年。

徐大法妻郑氏年三十四，夫故。勤苦抚子，教养兼至，计守节四十八年。

增生林茂春妻何氏年二十，夫故。无子，矢志坚贞，计守节已三十年。

以上俱同治十二年续报浙省采访总局汇请分别旌奖。

## 《江山县志》卷之十下

## 列女志二

## 节 烈

宋

徐应鑣妻方氏〔旧志〕系钱塘人，国子司直徐应鑣妻。咸淳末，劝应鑣归，欲椎髻练裳以从。应鑣曰：“朝廷养士三百年，岂可效巢由高蹈！”氏曰：“妾观宋室将亡，不忍见也。”遂作短歌以明志，投后园瑞莲池以死。应鑣葬之西湖八盘岭。明正德时，追赠忠懿夫人。

明

徐某妻毛氏〔正德《志》〕毛冀州女，适徐，早寡。舅欲夺其志，氏避归与母居，抚孤守节。从伯又欲强嫁之，凌逼百端，终不听。异者夜且至，氏度不免，乃给之曰：“俟作衣履，明旦从之未晚。何至相迫！”众以为然，退而安寝。氏乃沐浴更衣，自缢死。〔汪浩《志》〕作毛冀川女。

徐忠妻周氏〔汪浩《志》〕生二子。一日随夫往母家，夫抱幼子过罗娘

桥，坠水死。周大恸，嘱其长子急归，依祖母，遂挽发投水死。方伯徐东溪以诗吊之。

詹启元妻王氏〔汪浩《志》〕启元为人甚愚，嘉靖辛亥，家毁，来依妇翁，翁耻之，欲逐启元。氏泣曰：“世有弃子无弃夫，始之不审，即吾命矣，义不可背。逐启元吾必死。”翁乃诱启元出，将别嫁之。阖户自经死。

## 国朝

林士鼎妻毛氏〔《府志》〕名逊娘。甲寅，闽贼陷江山，氏姑嘱士鼎先行，自同逊娘走。至城隅，与姑相失，因涕泣觅姑，不可得。会日暮，至陈村宿焉。时同行诸妇皆卧，氏独不寐，曰：“吾夫既他去，姑存亡不可知，何用生为！”遂自经死。明日，士鼎至，藁葬之陈村，感其义，终身不娶。

吴三让妻周氏〔毛苍吴《烈妇传》〕名亥贞，周子仪女。年二十三归吴，逾年生女。三让病亟，谓曰：“吾误汝。吾死，汝可他适。”对曰：“妾当随君后。”三让死，氏号恸欲殉，姑及娣姒谨伺之。七日上馈，至柩前哭拜，乘间入室，自经死。康熙丙子十二月二十六日也，年二十六。

徐学源妻姜氏〔宋成绥《志》〕年十八归徐，家贫，敬事舅姑。逾年，夫故。即勺水不入口，七日自经死。潘学师显圻为制哀诔，乾隆十五年入节孝祠。

徐锡禄妻王氏〔宋成绥《志》〕名六姑，年十九归徐。时徐已病瘵，氏衣不解带，侍奉汤药。夫自知病不起，怜其青年，嘱令再适。氏涕泣，誓以身殉。半载，夫歿。殓殓成礼，入室沐浴，栉发整衣，自缢。乾隆四十一年，入节孝祠。

以上俱见旧志。

王增义妻郑氏〔蔡英《贞节录》〕年二十七，夫故。子幼，其伯逼令改嫁，不从，自经死。嘉庆二年，详奉学政阮旌奖。

王之铭妻周氏〔蔡英《贞节录》〕年十九于归，九载未育。夫病笃，氏剖股以和药，夫竟不起。因哀毁，股创溃烂。翁姑为延医，誓不服药，志在必殉，

投缳二次，俱被救解，防之益密。氏知求死不得，乃故减饮食，卒以刳伤流血不正而死。嘉庆七年，呈学请旌。

毛百芽妻刘氏家贫，负债累累。夫欲鬻氏以偿，不从，曰：“身可饿，不可辱。”迫之再三，遂自经。

毛宏策妻徐氏年二十三，夫故。誓以身殉，朝夕饔飧，必亲奠哭，泣尽哀。未逾月，自经死。

毛锡明妻祝氏年二十四，夫故。自经以殉。

以上俱道光年问题奉建坊旌表。

诹职毛翼瀚妻郑氏城庄人，职员郑宗健女。事姑孝顺。夫病癆瘵，延至两载，氏奉侍汤药，无间寒暑。一日，夫忽晕绝，氏误为已死，即仰药以殉。及夫甦，而氏已不起矣。时年二十六。越二日，夫亦卒。同治十一年，由采访总局请旌。

毛开松妻姜氏〔采访事实〕广渡庄人。年三十四，夫故。家贫姑老，终鲜子女。有劝其改适者，以死自矢。迫之再三，乘间自经。于同治十二年呈学汇案请旌。

郑文照妻徐氏〔采访事实〕城庄人。年二十五，夫故。氏痛不欲生，自刎以殉。同治十二年，呈学汇案请旌。

姜之权妻郑氏〔采访事实〕射坞庄人。年二十，夫故。守节。被匪类强抢逼婚，不从，仰药自尽。同治十二年，呈学汇案请旌。

监生毛崇义妻徐氏城庄人。咸丰五年，粤匪窜玉山，讹传贼至，其夫仓皇出走，氏抱铜镜一面，投屋旁井中死。

生员蔡晋升妻周氏城庄人。咸丰八年三月初一日，贼至，其夫率团力战阵亡，贼纵火焚庐，一家数口俱遇害。

毛氏一门双烈城庄人。前任广西守备毛殿彪母蒋氏、妻郑氏。咸丰八年，遇贼，大骂，遂遭害。

监生毛嘉楠妻徐氏

职员王廷鸿妻周氏

监生毛嘉炳妻节妇徐氏

职员王宗勋母刘氏

职员何树松继室方氏以上俱城庄人。咸丰八年，骂贼被戕。

武举王朝墉继室节妇姚氏城庄人。咸丰八年，闻贼警，谓家人曰：“我必先死。”二月二十六日，贼氛急，家人劝令早避，氏不答，是夕仰药自尽。

郑氏一门三烈城庄人。郑其炳妻周氏、妾施氏、子监生锡錕妻王氏。咸丰八年，遇贼，周氏、施氏俱投池死，王氏亦自缢。

职员林锦荣继室范氏

监生毛绍棠妻吴氏

监生周登高妻毛氏

监生何卓三妾郑氏

监生陆懿培妻徐氏

职员陆嘉宾母何氏以上俱城庄人。咸丰八年，骂贼殉难。

周氏一门节烈城庄人。监生周孝先妻张氏、长媳徐氏、长孙媳郑氏、三孙媳郑氏并孙女、曾孙女，咸丰八年，贼至，俱赴水死。

郑氏一门双烈城庄人。监生郑景沅妻毛氏、媳王氏。咸丰八年，贼至，先后自经。

儒童毛世镐妻徐氏城庄人。咸丰八年，避乱上徐。贼至围其村，氏抱幼女奋身坠楼而死。

儒童何道醇妻节妇郑氏城庄人，岁贡生郑瑞麟女。咸丰八年，避乱湖山。贼至欲犯之，氏大骂，以左手掐贼面，贼怒断其左臂，复以右手掐贼面，贼眼破血流，恚甚，遂支解之。

毛氏一门双烈城庄人。毛树发母徐氏、妻蔡氏。咸丰八年，贼至，俱骂贼被害。

毛树高妻王氏

毛树滋妻汪氏

何春海妻节妇余氏

毛家旺妻黄氏

王宝元妻郑氏以上俱城庄人。咸丰八年，骂贼遭害。

佾生杨福坤妻郑氏

毛鸿程妻何氏

王开泰妻节妇陆氏

周观澜母余氏

刘庆怀妻郑氏

何振元妻毛氏

毛振镛妻叶氏

张文高妻郑氏

周荣昌妻郑氏以上俱城庄人。咸丰八年，贼至，惧辱，先期自尽。

毛三福妻节妇徐氏城庄人，岁贡生徐庚瑞女。咸丰八年，贼至索金，欲搜其身，氏大骂曰：“吾守节十余年，鼠辈敢尔！”遂遇害。

郑邦彦妻周氏

郑锡瀛妻朱氏

刘应宗妻严氏

杨世昌妻周氏

刘润曾妻毛氏以上俱城庄人。咸丰八年，骂贼遭害。

职员汪水金妻王氏大陈庄人。咸丰八年，贼至，投水。贼救之出，开目见贼，复翻身入水，贼怒，以枪戮毙之。

生员汪履暄妻周氏大陈庄人。咸丰八年，贼至，杀其舅并杀其夫，氏以身翼夫，愿代其死。贼欲犯之，氏大骂。遂遭割舌断臂，至死骂不绝口。

汪氏一门节烈大陈庄人。岁贡生汪达泉妻、刘氏弟监生执经妻何氏、弟增生晴煦妻郑氏、弟文童廷儒妻林氏。咸丰八年贼至，俱仰药自尽。并达泉之女亦投水死。

监生汪理达妻徐氏

监生汪庭林妻毛氏

职员汪履庚妻郑氏

佾生汪凤毛妻祝氏

儒童汪广添妻徐氏

汪志安妻周氏

徐世炳妻郑氏

徐志根妻汪氏

徐光辉妻汪氏

徐兴周妻汪氏

徐已升媳汪氏

俞某妻郑氏以上俱大陈庄人。咸丰八年，遇贼，不辱自尽。

徐廷泰妻张氏张村庄人。咸丰八年，遇贼，不辱遭害。

柴仕相妻毛氏

柴乐中妻巫氏

邱兆明妻余氏以上俱白石庄人。咸丰八年，贼至，惧辱自尽。

前任山东副将朱昭荣妾范氏找台庄人。咸丰八年，闻贼将至，畏辱，先期自尽。

朱氏一门双烈长台庄人。监生朱起文妻祝氏、妾童氏。咸丰八年，贼至，俱赴水死。

朱氏一门双烈长台庄人。生员朱师沅妻汪氏、子以彩妻汪氏。咸丰八年，贼至，姑见夫被杀，大骂，遂遇害。媳以头触柱死。

柴学成妻余氏长台庄人。咸丰八年，遇贼，不辱被害。

毛承教妻叶氏

毛天福妻赵氏以上三十二都人。咸丰八年，骂贼被害。

监生胡全五妻柴氏

胡公有妻徐氏

胡光现妻詹氏

胡公表妻鄢氏

胡光福妻周氏

胡梦兼妻吴氏

胡万宗妻姜氏

胡梦坚妻祝氏

胡望长妻陈氏

胡元吉妻杨氏

胡喜盛妻柴氏

胡启仓妻周氏

鄢老七妻李氏

胡世繁妻祝氏

邱喜海妻胡氏以上俱官溪庄人。咸丰八年，遇贼，不辱遭害。

胡敬受妻毛氏

胡家邦妻管氏

胡旭寿妻姜氏

胡兆宽妻温氏

胡脩仁妻徐氏以上俱官溪庄人。咸丰八年，遇贼，投水自尽。

缪在廷妻邵氏

毛长兴母何氏以上淤头庄人。咸丰八年，遇贼，不辱遭戕。

胡大海妻周氏

郑祥来母徐氏

毛仁妻陈氏以上俱石门庄人。咸丰八年，骂贼遭戕。

杨文奎妻徐氏

杨天集妻曾氏

杨定国妻徐氏

杨学勇妻周氏

杨元执妻柴氏

杨文照妻朱氏

杨乌毛妻周氏

徐国富妻杨氏

周开元妻柴氏以上俱南坞庄人。咸丰八年，贼至，不辱被戕。

徐国安妻姜氏

徐兆焯妻王氏孙媳杨氏

周秉评妻詹氏

周亨图妻徐氏

周亨衍妻邱氏以上俱南坞庄人。咸丰八年，贼至，仰药自尽。

周志霞妻姜氏

周天星妻胡氏以上南坞庄人。咸丰八年，遇贼，投池自尽。

武生徐显功妻周氏

徐登庸母周氏

徐永强妻胡氏

徐慎焯妻刘氏

徐绍伦母邱氏

徐天庭妻钱氏

徐天助妻毛氏

徐启朝妻王氏以上俱茅坂庄人。咸丰八年，骂贼被戕。

郑邦华妻缪氏江郎街人。咸丰八年，遇贼自尽。

姜承祿妻吴氏麻裏庄人。咸丰八年，遇贼，投水身死。

柴大兴妻余氏东儒庄人。咸丰八年，骂贼被戕。

生员姜桂金妻王氏

外委姜万龄妻郑氏以上礼贤庄人。咸丰八年，贼至，投水自尽。

周士民妻姜氏

周开元妻姜氏

周彩柱妻毛氏

周天福妻陆氏

周应篷妻毛氏

周永昌妻郑氏

周登喜妻严氏

毛起高妻戴氏

毛尚章妻姜氏以上俱礼贤庄人。咸丰八年，骂贼被害。

生员陆棹妻毛氏

监生陆际昌妻张氏

陆文钰妻夏氏

陆永泰妻夏氏

陆麟趾妻徐氏

陆希贤妻毛氏以上俱和睦人。咸丰八年，骂贼遭害。

武生王万青妻节妇徐氏

徐廷泰妻王氏以上乐坦人。咸丰八年，骂贼被戕。

增生夏谟妻姜氏清湖庄人。咸丰八年，贼至，氏见夫被掳，以头触石而死。

王文昌妻朱氏咸丰八年，避乱畚箕塞。贼至焚塞，氏投崖死。翼日家人收其尸，其衣服皆缝纫连缀不可开。

监生徐钟麟妻王氏

夏尚塔妻王氏

陈廷扬妻徐氏

朱茂林妻周氏

徐尚选母朱氏以上俱清湖庄人。咸丰八年，贼至，不辱自尽。

黄茂英妻周氏张村庄人。咸丰八年，贼至，不辱自尽。

监生郑德慎妻汪氏桑淤庄人。咸丰八年，闻贼警，谓夫曰：“君可先行，我妇人义当一死，但父母遗体不可亵。仓卒无棺，可以大瓮覆我尸。”遂入室自经。

朱永卿妻毛氏

徐维俊妻朱氏以上长台庄人。咸丰八年，贼至，先期自尽。

姜文玉妻周氏新塘庄人。咸丰八年，畏贼自经。

监生刘衡先妻郑氏七都庄人。咸丰八年，骂贼殉难。

监生金清涟妻刘氏

祝文俊妻程氏

金瑞坤妻毛氏

熊世妹妻杨氏以上俱二十八都庄人。咸丰八年，遇贼自尽。

徐大喜妻周氏贺村庄人。咸丰八年，贼至，畏辱自尽。

胡贵元妻魏氏

徐玉莲妻朱氏

姜作坤妻毛氏

姜士元妻胡氏

郑仁霏妻周氏

徐盛恭妻管氏

陆元庆妻徐氏

毛天禄妻赵氏

姜德发妻周氏

邱大龙媳韩氏

邱大茂母徐氏

黄坤寿妻裴氏

邱攀桂媳徐氏以上俱南乡人。咸丰八年，贼至，不辱自尽。

裴顺才母罗氏

刘寿龄妻张氏

许有庆妻余氏以上二十八都庄人。俱咸丰八年骂贼殉难。

陈瑞际妻庄氏

陈泰妻王氏

徐松吉妻周氏以上郑家坞庄人。俱咸丰八年畏贼先期自尽。

生员汪振兴妻毛氏

余金鳌妻王氏

徐荣霞妻金氏

徐海南妻祝氏

徐永发妻刘氏

李元恺妻徐氏

江衰表妻郑氏

李隆祚妻郑氏

朱希和妻余氏以上俱北乡人。咸丰八年，贼至，不辱自尽。

职员姜务三妻毛氏

职员姜永昌妻缪氏

监生姜焯元妻朱氏

生员姜正业妻胡氏

廪生姜景阳妻周氏

监生姜桂露妻张氏

姜世钦妻毛氏

姜大川妻杨氏

姜星照妻王氏

姜世泽妻郑氏

姜广墉妻严氏

姜永茂妻詹氏

姜永迎妻毛氏

姜永福妻毛氏

姜贤阁妻周氏

姜殿开妻杨氏

姜贤洪妻毛氏

姜福泰妻毛氏

姜世荣妻徐氏以上俱西乡人。于咸丰八年骂贼遭害。

姜善种妻俞氏

姜希景妻徐氏

姜廷桂妻吴氏

姜元贵妻严氏

姜元焮妻吴氏

姜世国妻毛氏

姜如满妻吴氏

姜天德妻周氏

姜国献妻许氏

姜廷柱妻刘氏

姜高元妻杨氏

钱积禄妻黄氏

钱永新妻周氏

陆进可妻李氏

祝聚刚妻毛氏

郑达贤妻严氏以上俱西乡人。咸丰八年，贼至，惧辱自尽。

郑好登妻姜氏

严瑞兴妻王氏

姜好文妻周氏

郑文学妻刘氏

姜作宽妻毛氏

金永益妻鄢氏

姜定海妻徐氏

姜佳柘妻戴氏

毛童山妻刘氏

郑进达妻王氏

祝帝居妻周氏

刘国有妻毛氏

郑怀荣妻陈氏

王泽治妻徐氏

姜世喜妻郑氏

吴开瑞妻周氏以上俱西乡人。咸丰八年，遇贼，不辱自尽。

柴仲菜妻毛氏念五都人。咸丰八年，贼至，畏辱殉难。

吴宅伦妻周氏吴村人。咸丰八年，遇贼殉难。

姜叙茂妻周氏潭源庄人。咸丰八年，骂贼被害。

毛维藩妻姜氏城庄人。咸丰十年，遇贼，不辱被戕。

姜文良母徐氏

姜如攀妻吴氏

姜茂兴妻毛氏

姜中岱妻郑氏

姜学儒妻徐氏以上俱新塘边庄人。咸丰十年，遇贼，不辱被戕。

杨春狗母徐氏二十八都庄人。咸丰十年，骂贼殉难。

徐元厚妻毛氏

徐元醇妻钱氏

徐廷枝妻毛氏以上湖塘尾庄人。咸丰十年，骂贼殉难。

童和尚妻王氏童家庄人。咸丰十年，骂贼殉难。

恩贡生毛鸾书妻周氏

监生何星衡妻朱氏

监生王振麒继室张氏以上俱城庄人。咸丰十一年，骂贼殉难。

廪生徐振镛妻节妇王氏城庄人。咸丰十一年，殉难。按：氏夫咸丰八年，贼至，率团阵亡。氏抚子女，流离困苦，备极艰辛。十一年，避乱深山，遇贼，欲犯之，不从。贼怒，杀其十三龄幼女，氏大骂，以头撞之，遂遭断首剖腹，惨不可言。

贡生汪俊裔妻毛氏

监生汪士梅妻王氏

岁贡生汪而强妻王氏

附贡生汪汝楫妻孙氏

汪在训妻桂氏以上俱大陈庄人。咸丰十一年，骂贼遭害。

毛大义妻姜氏淤头庄人。咸丰十一年，骂贼遭害。

吴开元妻徐氏

徐绥仁妻祝氏

祝蓬居妻毛氏以上俱协里庄人。咸丰十一年，骂贼殉难。

朱惠连妻毛氏长台庄人。咸丰十一年，避乱徐家源。贼至，欲犯之，氏求死不得，绐之曰：“何不同往馆中？”贼喜释之。氏乃背负幼儿，行至溪桥时，山水暴涨，奋身投水中，与儿俱毙。

朱怀清妻毛氏长台庄人。咸丰十一年，贼至，自尽。

王源智妻徐氏溪口人。咸丰十一年，遇贼，不辱身死。

生员毛登贤妻王氏广渡人。咸丰十一年，讹传贼至，畏辱自经。

生员毛佩莲妻周氏

毛嘉柱妻杨氏以上广渡人。咸丰十一年，骂贼殉难。

毛鸾鏊母徐氏清湖人。咸丰十一年，骂贼遭戕。

薛开元妻周氏

周海扬妻徐氏以上郑家坞庄人。咸丰十一年，骂贼被戕。

姜大头妻周氏

姜毛兴妻毛氏以上新塘庄人。咸丰十一年，遇贼，不辱被戕。

监生毛国勋妻周氏

毛增池妻周氏

胡大礼妻郑氏

徐国泰妻黄氏

徐国盛妻周氏以上俱十四都人。咸丰十一年，骂贼殉难。

柴青云妻黄氏张村庄人。咸丰十一年，骂贼殉难。

胡锡运妻杨氏

黄克仁妻周氏

周黄九妻姜氏

严日有妻姜氏

王白蒲妻陆氏

周海妻徐氏

胡益清妻柴氏以上俱南乡人。咸丰十一年，贼至，不辱自尽。

周尚均妻毛氏湖塘尾庄人。咸丰十一年，骂贼殉难。

柴任脩母廖氏

柴守谦母徐氏

柴士甲妻杨氏

王维明妻姜氏以上俱乌石坂庄人。咸丰十一年，贼至，不辱被杀。

周寿廐妻金氏学坦庄人。咸丰十一年，骂贼殉难。

赵协现妻毛氏

赵协牲妻王氏

赵汝大妻毛氏

赵协乾妻戴氏以上俱念四都人。咸丰十一年，骂贼殉难。

毛长云妻夏氏南乡人。咸丰十一年，骂贼殉难。

毛雨文妻胡氏

廖添丁妻周氏

廖连秀媳毛氏

王天发妻毛氏以上俱念五都人。咸丰十一年，贼至，殉难。

吴新梧妻李氏

吴高楼妻胡氏

吴致高妻严氏

吴国章妻姜氏

吴应纬妻柴氏

吴增有妻姜氏

周仕满妻姜氏

周元泰妻郑氏

周怀志妻姜氏

徐瑞云妻吴氏

杨日易妻姜氏

徐瑞藏妻周氏

周在星妻陈氏

周在田妻王氏

吴日良妻王氏

吴运丰妻姜氏以上俱吴村庄人。咸丰十一年，骂贼遭害。

姜志昌妻王氏潭源庄人。咸丰十一年，骂贼被害。

千总周兆麟妻胡氏源口人。咸丰十一年，骂贼被戕。

祝登羸妻毛氏

祝元才妻陈氏

徐樟林妻郑氏

徐献达妻毛氏以上俱童家庄人。咸丰十一年，骂贼被戕。

生员郑景兰妻毛氏城庄人。同治元年，避乱小塘源，遇贼殉难。

郑石富妻徐氏

赖义乔妻徐氏以上白石庄人。同治元年，遇贼，不辱遭害。

柴维堂妻方氏

朱秉虎妻柴氏

监生朱起徽妻程氏

徐树达妻朱氏

柴望风妻郑氏

朱可观妻周氏

柴上朝妻袁氏

柴际恩妻吴氏

徐志厚妻姜氏以上长台庄人。俱同治元年，骂贼遭害。

罗亦兴妻毛氏

罗善狗妻黄氏

朱天喜妻姜氏

朱光满妻郑氏

朱光书妻毛氏

朱世仁妻毛氏

陆廷国妻郑氏以上长台庄人。俱同治元年，贼至，投池自尽。

杨朝元妻王氏

杨维土妻俞氏

杨志举妻凌氏

杨叙经妻郭氏

杨志宽妻毛氏

杨国祚妻王氏

杨国顺妻何氏

杨老十妻徐氏

杨万卷妻刘氏

杨志魁妻徐氏

杨树昌妻徐氏

柴聚千妻周氏

柴连喜妻王氏

郑光中妻陆氏

柴顺远妻翁氏以上俱长台庄人。同治元年，骂贼遭害。

毛家林妻王氏

毛秀浙妻黄氏

毛家娘妻王氏

祝开礼妻柴氏

郑廷义妻周氏

周宗富妻毛氏以上俱二十四都人。同治元年，骂贼殉难。

周德添妻邹氏俱贺庄人。同治元年，骂贼被戕。

郑允朝妻徐氏

徐俊仲妻毛氏

徐敬元妻廖氏

刘庆之媳黄氏以上俱十四都人。同治元年，贼至，自尽。

王树椿妻毛氏

刘昌妻朱氏

陈光泰妻何氏

赵学贤妻周氏

巫老七妻张氏

毛际泰妻徐氏

陈兆泰妻祝氏

王际荣妻胡氏

陈世亮妻毛氏

徐永德妻祝氏以上俱二十七都人。同治元年，骂贼殉难。

生员祝景星妻朱氏江郎街人。举人朱鋈长女。同治元年，骂贼遭害。

林华兴妻洪氏

赖义桥妻徐氏

周大用妻朱氏

邹大春妻朱氏

郑宗益妻钟氏

郑邦泰妻柴氏

林时平妻周氏

姜廷仓妻董氏

方天成妻徐氏

方赖头妻毛氏

毛志位妻周氏

朱尚培妻郑氏

徐老五妻何氏

陆锡镕妻梅氏

毛文炳妻节妇郑氏

周望英妻毛氏

祝南楨妻毛氏

赵世恒妻王氏

柴于财妻周氏

毛维仓妻祝氏

张曾孝妻毛氏

柴倘从妻毛氏

伍大松妻周氏

朱庆曾妻孙氏

戴尚高妻张氏以上俱南乡人。同治元年，骂贼殉难。

周大勤妻王氏学坦庄人。同治元年，骂贼殉难。

姜老九崽母姚氏新塘边人。同治三年，遇贼，不辱被戕。

以上见《殉难册》，俱于同治四年请旌。

侑生王元鸾妻节妇毛氏城庄人。咸丰八年，贼至，投井自尽。

卫千总黄鹤年妻徐氏

监生周大容妻胡氏

柴之信妻陈氏

黄致和妻周氏

刘起龄妻黄氏

黄恳宜妻柴氏

柴宗望妻毛氏

黄嘉才妻祝氏

黄文照妻周氏

祝海凝妻陈氏

周世考妻毛氏

祝海达妻朱氏

祝步占妻童氏

黄章度妻徐氏

黄建扬妻朱氏

黄国荣妻赖氏

黄文占妻余氏

黄必脩妻毛氏

周哆嘴妻柴氏

黄福大妻朱氏

周丽生妻黄氏

周绍文妻柴氏

祝利和妻黄氏

苏金钱妻周氏以上张村庄人。咸丰八年，俱骂贼殉难。

吴敬受妻毛氏

姜永益妻鄢氏

王曷妻徐氏咸丰八年，遇贼，欲犯之，氏大骂，遂遭害。

毛怀茂妻朱氏咸丰八年，遇贼，投井自尽。

毛学尧妻郑氏咸丰八年，骂贼遭害。

柴乐忠妻巫氏白石庄人。咸丰八年，骂贼遭害。

陈祖林妻王氏桑淤庄人。咸丰十年，骂贼遭害。

王志和妻节妇何氏城庄人。咸丰十年，贼至放火，被焚身死。

徐惠元妻王氏城庄人。咸丰十一年，贼至，掳其夫，复杀其子，欲犯之，氏手执菜刀与斗，被戕。

陈庆樑妻秦氏城庄人。咸丰十一年，避乱东乡，遇贼被害。

李氏一门双烈绕墩人。武举署分水汛千总李梦庚妻刘氏，随任分水。咸丰十一年，贼至，其夫与子开甲俱力战阵亡。氏与媳毛氏亦同时骂贼殉难。

陈元表妻吴氏桑淤庄人。咸丰十一年，骂贼被戕。

生员朱凤藻妻毛氏长台庄人。同治元年，遇贼殉难。

罗善狗妻王氏长台庄人。同治元年，贼至，不辱遭害。

曾道模妻郑氏长台庄人。同治元年，贼至，欲犯之，氏大骂，不从，贼縶其手足，欲强污之，氏嚼舌喋血喷贼面，贼怒焚其庐，尸骸灰尽。

曾德魁妻周氏大埂庄人。同治元年，骂贼遭害。

以上见《殉难册》，俱于同治五年请旌。

周荣昌妻杨氏城庄人。咸丰八年，随夫避乱处州界，贼至，投水自尽。

伍应霞妻刘氏城庄人。夫故守节，咸丰八年，骂贼被杀，时年五十八岁。

林士俊妻王氏城庄人。咸丰八年，城陷遇贼，不屈而死。时年三十岁。

黄起翰妻周氏张村庄人，西邑庠生周原女。咸丰八年，贼至被擄，逼之不从，闭诸室守之。氏求死不得，乃给之曰：“若以礼相就，则可。否则，有死而已。”贼喜，出具礼，及返则已投缢矣。解之已绝，贼众惊叹，具棺殓之，罗拜而去。

佾生余进祥妻节妇王氏北乡人。年三十二夫故守节。咸丰八年，闻贼警，投缢自尽。时年四十二岁。

徐大汉妻毛氏

徐锡通妻何氏

徐大兴妻毛氏以上郑家坞庄人。咸丰八年，贼至，俱投水自尽。

王大护妻董氏严麻车庄人。咸丰八年，贼至，惧辱投水自尽。

毛昌盛妻陆氏二十五都庄人。咸丰八年，遇贼，不辱投水自尽。

徐彩勉妻节妇周氏十四都人。年二十五夫故守节。咸丰八年，闻贼警，仰药自尽。时年三十七岁。

毛文潮妻刘氏城庄人。咸丰十年，贼至遭害。时年八十五岁。

徐懋垣妻节妇周氏东南乡人。年二十四夫故守节。咸丰十年，闻贼警，投缢自尽。时年三十五岁。

王凤潮妻陈氏城庄人。咸丰十一年，遇贼，不辱被害。

儒童毛文墉妻节妇徐氏清湖庄人。年二十五，夫故。抚孤守节。咸

丰十一年，贼至，惧辱投缳自尽。时年五十八岁。

柴高廉妻周氏长台庄人。结褵十二年，夫远出不归，无子女，安贫苦度三十余载。咸丰十一年，骂贼遭害。时年六十六岁。

严志唐妻王氏

严连甲妻陈氏

严永年妻节妇徐氏年二十四，夫故。守节三十三年。以上俱戚里庄人。咸丰十一年，遇贼，不辱被害。

毛文选妻巫氏城庄人。同治元年，闻贼警，投水自尽。

柴能安妻节妇毛氏东儒庄人。年二十九，夫故。无子。守节。同治元年，遇贼，不辱遭害。时年五十三岁。

周汝瑞妻毛氏二十五都人。同治元年，遇贼，不辱被杀。

周大勇妻朱氏二十四都人。同治元年，遇贼，被逼不从，投水自尽。

生员周志仁妻毛氏南乡人。同治元年，避乱江郎山，遇贼，不辱被杀。时年二十九岁。

以上采访事实，俱同治十一年题请旌表。

岁贡生王宗烈妻刘氏城庄人。咸丰八年，贼至，投池自尽。

王荣恩妻汪氏城庄人。咸丰八年，遇贼，不辱，同十龄幼女兰亭姑惨遭杀害。

郑邦贤妻周氏城庄人，武举周振麟女。夫故。家贫守节。咸丰八年，避乱郭前地方，贼至，投缳自尽。时年四十八岁。

徐玉连妻朱氏茅坂庄人。咸丰八年，避乱石灰塘。贼至，氏执棍拒骂，贼剖其腹。时年三十七岁。其三子一女亦同时被杀。死难最为惨烈。

汪士端妻徐氏大陈庄人。咸丰八年，遇贼，不辱被杀。

郑庆五妻周氏礼贤庄人。咸丰八年，贼至，纵火焚掠，氏以夫病死守不去，夫妇并八龄幼子同时焚死。年二十九岁。

郑学俭妻节妇洪氏十八都人。年二十一，夫故。守节。咸丰八年，贼至纵火，母子俱遭焚死。时年三十二岁。

胡万宗妻节妇姜氏新塘边庄人。年二十二，夫故。守节。咸丰八年，避乱山中，贼至，投崖死。时年四十八岁。

姜望贤妻节妇王氏新塘边庄人。年二十九，夫故。守节。咸丰八年，匪扰殉难。

陈维强妻毛氏

陈金荣妻周氏

陈庆安妻陆氏

陈维正妻节妇胡氏年二十三，夫故。守节三十四年。以上清湖庄人。俱咸丰八年遇贼，不辱被杀。

吴逢丁妻黄氏佛堂庄人。咸丰十年，遇贼，不辱遭害。

监生王荣杰妻郑氏

璩永连妻节妇杨氏年二十四，夫故。守节。以上俱城庄人。咸丰十一年，骂贼被杀。

汪志行妻徐氏

汪在训继室冯氏

汪士清妻毛氏

徐良雨妻江氏

汪志海妻郑氏

汪振城妻朱氏

汪士鲤妻朱氏

汪树松妻徐氏以上大陈庄人。俱咸丰十一年，遇贼，被逼不从遭害。

童寿发妻朱氏童家庄人。咸丰十一年，遇贼，不辱遭害。

毛文澜妻王氏一都庄人。咸丰十一年，贼至，惧辱投缳自尽。

叶洪臣妻节妇徐氏乌石坂庄人。年二十四，夫故守节。咸丰十一年，骂贼被杀。时年四十七岁。

陆佳珠妻徐氏和睦庄人。同治元年，遇贼，被逼不从，遭害最惨。时

年二十二岁。

祝士元妻赵氏二十五都人。同治元年，避乱张家源。遇贼，不从被杀。

监生徐文焯妾节妇余氏三都庄人。年二十，家主故，守节。同治元年，遇贼，不辱遭害。

以上采访事实，俱同治十二年呈学移详汇案请旌。

王寿根妻程氏东乡人。咸丰十一年，骂贼遭害。

黄如法妻柴氏

黄章煌妻徐氏以上张村庄人。同治元年，骂贼遭害。

刘延龄妻苋氏深渡庄人。同治元年，骂贼遭害。

以上俱同治十二年采访总局汇案请旌。

## 列女志三

### 贞孝

#### 明

檀亭女〔正德《志》〕氏名莫详。年二十，许字某氏子，未婚病死，女誓无嫁意。或谓之曰：“未接衽席，且无可生之资，将能自存乎？”女不为动，佣女工自给，凡六十余年，凛然风节。〔宋成綏《志》〕旧志俱入宋，今从《省志》入明。按：前志女字皆作妇，今改正，以未成妇也。

郑平姑〔汪浩《志》〕协里庠生国贇女，许字常山詹人伟。未嫁夫死，女闻悲恸。时冬月，服单衣，且不食。或曰：“不冻饿死乎！”女曰：“正恨不速死耳！”父再三劝之，始强食。独处斗室二十余年，每岁一至常山省姑。姑死，哀毁如礼。后得病，泣谓父曰：“所以不轻死者，以父在。今得死，固夙心也。倘得归骨常山，所愿足矣。”父乃如其言，归柩詹氏，合葬莲塘山。

#### 国朝

徐小素姑〔汪浩《志》〕茅坂徐雷震女，字广川毛起蛟。未嫁夫卒，计闻悲悼，即告父归广川，哀毁如礼。事舅姑以孝，守贞三十余年卒。有司屡奖之。按：小素姑于道光七年题奉建坊旌表。

柴瑞云姑〔采访事实〕城庄塘头巷人。事亲至孝，长斋奉佛，守贞不嫁，以寿终。后人因其旧宅建庵，名瑞云庵，并刻像供庵内，即俗传道姑寺也。

刘氏女〔蔡英《贞节录》〕城庄刘兆虞女，幼字大陈汪在荣为室，年十一归汪为养媳。未婚夫死，家贫，氏敝衣粝食，誓以女身守贞。母欲夺其志，不从。事继姑甚孝，完贞而卒。嘉庆二十一年，题奉建坊旌表。有《刘贞女歌》，载《艺文》。

毛氏女〔蔡英《贞节录》〕南乡峡口人。字周良臣长子廷选，八岁归周为养媳。后良臣为廷选另娶，劝其改适，女不从，贞守终身而卒。嘉庆二年，详奉学政阮给匾旌奖。

何双环姑〔《题旌册》〕县城何元锷之女。守贞奉母，终身不嫁，年七十三卒。同治七年，题奉建坊旌表。

姜氏女〔《题旌册》〕诤职姜式范义女。以孝谨称，终身不字，年七十九卒。同治七年，题奉建坊旌表。

姜阿贵姑〔《题旌册》〕潭源姜占熊义女。事父不嫁。年八十二岁，无疾而终。同治八年，题奉建坊旌表。

吴氏女〔采访事实〕二十七都白沙吴廷国女，受本都僧生王世传聘。未嫁夫亡，时年二十四。过门守贞，孝事舅姑，现年五十岁。计守贞二十七年。同治十一年，呈学移详请旌。

汪阿彩姑〔采访事实〕大陈庄汪在前义女。事母甚孝，守贞不嫁，年七十八卒。

汪兰香姑〔采访事实〕大陈庄汪圣集义女。事母以孝，守贞不嫁，年五十三卒。

汪淑意姑〔采访事实〕大陈庄汪一春女。事母以孝，守贞不嫁，年五十七卒。

汪志仁姑〔采访事实〕大陈庄汪士瑞女。事母甚孝，守贞不嫁，年三十九卒。

何阿富姑〔采访事实〕城庄何胜宗义女。敬事孀母，守贞不嫁，年七十三卒。以上同治十二年呈学移详汇案请旌。

## 列女志四

### 贞烈

#### 宋

徐元娘〔汪浩《志》〕应鑣女也。伯颜次临安，同其兄琦、崧作绝命诗，随父登梯云楼，纵火自焚，以救免。翼日，投井死。明正德时，旌为孝烈。

#### 明

柴氏女〔蔡英《贞节录》〕嘉靖间，锦川人。夫王姓，名失考，早亡。有逼女嫁者，不从自尽。乾隆年间，举人毛元坤读其墓碑文，因作记，略以表扬之，并为题名请入贞节祠。按：氏，柴村人。夫姓王，名长凤，荷泽边人。未嫁夫亡，父母劝令改适，不从，强逼之，女暗藏利翦，含笑登舆，行至荷泽边，刺喉而死，时嘉靖十六年也。毛元坤有诗吊之。

#### 国朝

周氏女〔宋成綬《志》〕幼字吴绶雨为室，童养过门，尚未成婚。因人戏言，羞忿服卤而死。乾隆四十年，题奉建坊旌表。

赵氏女〔蔡英《贞节录》〕女幼受常山王永升聘，未嫁夫死，舅姑父母皆欲令改字，氏不从，吞金不死，投缳又不死，卒乃抱石自沉鹿溪。嘉庆年间，由学勒碑溪侧，题曰贞烈赵女。其碑跋采入《艺文志》中。

毛淑瑞姑〔《题旌册》〕南乡市上村生员毛日贤女，字峡口姜渭滨之子。未嫁夫亡，女闻讣饮泣，父母欲为改字，不从。媒妁至，遂服毒自尽。道光二十八年，题奉建坊旌表。

周可爱姑城庄人。监生周孝先孙女。咸丰八年，遇贼，投水自尽。

周可鼎姑城庄人。监生周孝先孙女。咸丰八年，遇贼，投水自尽。

周英珠姑城庄人。监生周孝先曾孙女。咸丰八年，遇贼，投水自尽。

周喜亭姑城庄人。监生周登高女。咸丰八年，贼至，不辱自尽。

杨小妹姑城庄人。监生杨懋和女。咸丰八年，贼至，不辱自尽。

毛兰蕊姑城庄人。毛振发女。咸丰八年，遇贼，不辱自尽。

林氏女城庄人。职员林显宗孙女。咸丰八年，骂贼遭害。

徐氏女城庄人。何绍庭养媳。咸丰八年，骂贼遭害。

章氏女官溪庄人。章金贵女。咸丰八年，骂贼遭害。

宁氏女官溪庄人。宁明开女。咸丰八年，骂贼遭害。

徐配玉姑茅坂庄人。徐辉道女。咸丰八年，骂贼遭害。

徐有缘姑茅坂庄人。徐开先女。咸丰八年，骂贼遭害。

徐淑培姑茅坂庄人。徐桂芳女。咸丰八年，骂贼遭害。

徐紫浩姑茅坂庄人。徐文照女。咸丰八年，骂贼遭害。

徐凤仙姑茅坂庄人。徐道隆女。咸丰八年，骂贼遭害。

周格姑礼贤庄人。周登喜女。咸丰八年，骂贼遭害。

徐衰那姑莲塘庄人。徐日潭女。咸丰八年，骂贼遭害。

徐达娘姑莲塘庄人。徐日廷女。咸丰八年，骂贼遭害。

毛氏女江郎庄人。毛宇超女。咸丰八年，骂贼遭害。

毛氏女西乡庄人。毛祖产女。咸丰八年，骂贼遭害。

汪翠亭姑大陈庄人。贡生汪达泉女。咸丰八年，遇贼，投水死。

汪翠芳姑大陈庄人。增生汪以丙女。咸丰八年，遇贼，不辱死。

汪翠椒姑大陈庄人。汪庆通女。咸丰八年，遇贼，不辱死。

汪明玉姑大陈庄人。汪振家女。咸丰八年，遇贼，不辱死。

徐氏女大陈庄人。徐步安女。咸丰八年，遇贼，不辱死。

俞爱桂姑大陈庄人。咸丰八年，遇贼，不辱死。

朱氏女大陈庄人。朱开兰女。咸丰八年，遇贼，不辱死。

黄爱采姑张村庄人。黄文椽女。咸丰八年，骂贼殉难。

黄采荷姑张村庄人。黄必富女。咸丰八年，骂贼殉难。

吴海英姑吴村庄人。吴鸿宾女。咸丰十年，骂贼遭害。

郑氏女北乡庄人。郑寿喜女。咸丰十一年，骂贼殉难。

徐桂枝姑茅坂庄人。监生徐朝缙女。咸丰十一年，骂贼殉难。

赵衰彭姑二十四都庄人。赵显球女。咸丰十一年，骂贼殉难。

周有方姑二十七都庄人。周时兴女。同治元年，骂贼殉难。

黄妹娥姑二十七都庄人。黄承禄女。同治元年，贼至自尽。

林爱采姑二十七都庄人。林老三女。同治元年，贼至自尽。

朱瑞云姑南乡人。朱茂荣女。同治元年，骂贼遭难。

周金英姑张村庄人。周惠孚女。同治元年，骂贼遭难。

朱氏女长台庄人。朱惠士女。同治元年，骂贼遭难。

朱氏女长台庄人。朱朝勋女。同治元年，骂贼遭难。

刘玉兰姑赵家庄人。刘华山女。同治元年，骂贼遭难。

以上见《殉难册》，于同治四年请旌。

汪兰英姑〔采访事实〕大陈庄人。汪致焕女。咸丰十一年，遇贼，不辱遭害。同治十一年，呈学移详请旌。

郑秀香姑〔采访事实〕溪头庄人。郑寿喜女。自幼受西安宋姓聘。咸丰元年，女年十六，母陈氏患痲疾，女因父母无子，誓志事母不嫁。十年，母

故。十一年，父被贼掳欲杀，女坚抱父首，贼以刃逼胁，女给贼释父相从，贼许之，父得脱。女乃奋力扑贼，贼杀之，至死手指天日，骂不绝口。时年二十七岁。同治十一年，呈学移详请旌。

## 列女志五

### 孝 妇

#### 国朝

徐国祥妻汪氏〔蔡英《东轩遗集》〕汪伯友女，适徐。以孝谨称，姑病笃，氏割股以进，病愈，家无知者。后氏病歿，唁者盈门，忽甦，自言割股事，令子妇共视之，创痕犹在，乃瞑目而逝。嘉庆五年，题奉建坊旌表。

朱尚聪妻徐氏〔《双孝录》〕氏年十二归朱，为养媳。成婚后，舅已歿，时祖姑年老，姑复病盲，氏夫妇扶持，孝养二十余年不懈，二老俱享遐龄，乡里称为双孝。道光六年，题奉建坊旌表。诵美诗章盈牘，择其尤者采入《艺文志》。

徐上理妻王氏〔《题旌册》〕茅坂人。自幼过门，善事舅姑，曲意承顺，得其欢心，始终如一，宗党交称。咸丰元年，题奉建坊旌表。

陈国宝妻柴氏〔《题旌册》〕七都人。事姑尽孝，侍奉汤药二十余年，不离左右，姑享年七旬。氏亦以寿终。咸丰七年，题奉建坊旌表。

赵士魁妻周氏〔采访事实〕石门人。性慈善，事姑尽孝，出于至诚。姑疾，割股以疗。姑歿，朝夕设奠如生。道光四年卒，享寿九旬。

黄亦崔妻姜氏〔采访事实〕住张村新塘边，姜廷扬女。事姑孝谨。姑病，吁天求代，刲股和羹以疗。姑卒，哀毁尽礼。年三十卒。既敛，得其筐衣血渍，人始知其阴孝。

王孔彰妻胡氏〔采访事实〕三卿口人。事翁姑尽孝，姑杨氏歿，翁继娶周氏，病亟，医药罔效，氏默祷愿以身代，梦神告之曰：“汝肯割股以啖姑乎？”氏寤，遂刲左股和羹以进，病果愈，四十余年方卒。后氏年逾入旬，临终始言其事。 以上同治十三年，详奉学政丁赏给孝行可嘉匾额。

## 列女志六

### 寿 母

周之孝妻杨氏〔汪浩《志》〕住凤林。寿登百岁，五世同堂。雍正十年，题奉建坊。卒年百有四岁。

周盛生妻吴氏〔《题旌册》〕住白石。寿登百岁。乾隆四十六年，题奉建坊。卒年百有一岁。

王廷圭妻周氏〔《题旌册》〕住清湖。寿登百岁，五世同堂。乾隆五十六年，题奉建坊。

何炳妻毛氏〔《题旌册》〕住县城。寿登百岁。嘉庆六年，题奉建坊。

姜日优妻夏氏〔《题旌册》〕住礼贤。年九十二岁，五世同堂，亲见七代。嘉庆十年，题奉建坊。

周起凤妻柴氏〔《题旌册》〕住凤林。寿登百岁，五世同堂。嘉庆十二年，题奉建坊。卒年百有二岁。

监生汪宏继妻毛氏〔《题旌册》〕住大陈。寿登百岁，五世同堂。道光六年，详奉旌奖。卒年百有四岁。

童兆杰妻徐氏〔《题旌册》〕住童家。寿登百岁，五世同堂，亲见七代。道光十一年，题奉建坊。

周广森妻徐氏〔《题旌册》〕住长坑。寿登百岁，五世同堂，亲见六代。道光二十七年，题奉建坊。卒年百有二岁。

郑上开妻杨氏〔《题旌册》〕住万青山庄。寿登百岁，五世同堂，与夫同报百龄双寿。咸丰四年，题奉建坊。卒年百有三岁。

毛文烂妻姜氏〔采访事实〕住横塘底。同治五年卒，年百有五岁。

范开桃妻余氏〔采访事实〕住白渡。咸丰六年卒，年百有四岁。

刘永治妻毛氏〔蔡英《东轩遗集》〕嘉庆八年，氏年九十，积银三百两，拟为祝寿贲。因岁饥米贵，氏将银尽捐助平糶。事闻，抚院赐额以旌其门。

《江山县志》卷之十一上

## 艺文志一

天语煌煌，忠言谔谔，固在三不朽中。若夫汇前哲精微，而折衷风雅，文物以纪，歌咏以传，凡有关国典民风者，兼收博采，亦足备文献之征也。志艺文。

### 制 敕

**柴詠袭封崇义公敕** 宋嘉祐四年

敕曰：禅受大事，二代所敦。初严文祖之祠，继载虞宾之位。朕受本朝鸿业，实由有周旧基。继绝世，举废国，怀诸侯之首务。颁以爵，奉以祀，在天子所当为。以尔乃世宗服亲，见居比部显秩，可即承义郎转袭崇义公，永备春秋祭祀。奉敕如右，牒到奉行。

**赐知州毛维瞻敕** 宋元丰三年

敕曰：昔先王之法，道民以德，齐之以礼，而有耻且格。后世不

及，然破觚以为圜，斲雕以为朴，禁罔疏阔，而吏治蒸蒸，不至于奸，犹为近古，朕甚慕之。今能与吾共成此理者，其惟循良之吏乎！尔筠州知州毛维瞻，多识博闻，操守笃实，称尔为能，与在兹选。使刑罚清而风俗美，尔善于其职，则明考察而公赏劝，朕岂贰于必行？其尚自强，以观尔效。

#### 毛渐授秘书监丞敕 宋元祐三年

敕曰：帝王之治，必有图籍之藏，又择当世聪明拔出之士，聚于其间，使得渐磨文学之益，奖成其材，以待国家之用。故书省之设，吾不计近功，而要于广畜德，所以厚其礼秩，而艰于用人，庶以明朕好古乐善之勤，励学士大夫之行也。尔渐性资明敏，问学宏深，诸儒所尚，令问惟旧，延处兹位，蔽自朕知。夫尊其所闻，而行之不倦，使辅于世教而其效可言，非独优游册府而已。在尔自强，以承朕志。可秘书监丞。

#### 柴天因授转运使敕 宋政和七年

敕曰：海岱之间，古称形胜重地。比来习染多盗，思得历练刚明之才，兼膺折冲馈饷之任。以尔知吏，方略为时，老成久分，外计大权，颇熟东州旧事，特简是选，勉为朕行。昔管仲佐齐邦，内修军政。龚遂莅渤海，首散郡兵。絜治术之何常，惟贤明以自择，审思筹策，毋失机宜。

#### 柴瑾授转运副使敕 宋淳熙四年

敕曰：台院森严，法度之所自出，故必以质厚淳直、通练治体者为之。惟尔旧联六察，风望肃然，爰命尔供奉赤墀，弹劾非法，乃谨身奉职，如在绳墨之中，而于论事无所假借，非口无择言，身无择

行，卿大夫之能孝者乎？今尔事亲能孝，自忠可移于君，百司邪正，一道刺举，何中外之别也。可依前朝议大夫直敷文阁、福建路计度转运副使兼本劝农事，替传到任尔往。钦哉。

**蒋伯英授太学博士敕** 宋绍熙元年

敕曰：太学，礼义之所从出也，不择人以为法，而恃法以为治，可乎！汉之郭泰、符融，唐之阳城、韩愈，士皆靡然化之，其贤于法远矣。朕方诏有司，疏理学政，而近侍之臣，言汝可用。必能于法禁之外，使士有所愧而不为，乃称朕意。

**蒋伯英知肇庆府敕** 宋绍熙四年

敕曰：为吏莫不欲威而明。威不可立也，惟公则威；明不可作也，惟虚则明。山遥海舶，群聚剽掠，此吏不称职，备灾无素之过也。今选命汝，惟往安之，非胜之也。民苟有以生矣，其肯自弃于恶。

**一甲进士毛自知出使敕** 宋开禧元年

敕曰：入侍经筵，必资博览之佐；出使藩臬，宜简硕德之臣。苟非闻望素著，安得吏民帖服！今科一甲进士毛自知，龙首高登，蜚声啧啧；鳌头独占，鸿誉巍巍。不特海内推尊，抑亦天朝倚重。兹特委尔荣行，颁朕简命。宣我威信，俾国体之共尊；振尔纪纲，令君命其不衰。如朕亲临，尔其懋哉。

**御史中丞柴霖致仕敕** 宋嘉定五年

敕曰：朕惟陈力就列之臣，不能则止；方招贤聘能之世，以疾而归。正当馈之所深嗟，亦同朝之所共慕。尔朝议大夫、御史中丞柴

霖，器宏以周，学博以达，刚勇自著，忠勤有余。效用以来，勋劳莫既。参谋帷幄，不数月而成功；纓于抱疴，仅逾年而告老。事功昭著，宠礼宜加。进尔阶为寓禄之荣名，锡尔章表褒嘉之盛典。以此茂命，贲其终身，尚期寿康，副兹优奖。

#### 毛玠授中书舍人制 宋宝庆二年

制曰：文章之美，与时盛衰，譬如八音，可以观政。而况诰命之出，学者所师，号令以之重轻，风俗因而厚薄。本朝革五代积衰之气，继两汉尔雅之文，而大运中微，异端所泊。欲复祖宗之旧，必以训词为重。故难其人，不以轻授。尔起居郎毛玠，博闻强识，笃学力行，绰有建安之风流，逮闻正始之议论。径践外制，为朝廷常润色。其精微期配昔人，使天下识典刑之彷彿。务究所学，朕将观焉。

#### 柴中行谥宪肃诰 宋嘉熙二年

制曰：建官惟贤，而全德之贤未易得。自古有死，而吉人之死尤可伤。故上兴愍遗之悲，而下有殄瘁之恨。故中大夫致仕柴中行，学有根本，德无瑕疵，中外践扬，声实英茂。薄蓬莱而不即，瀦彭蠡以遄归。真觉斗南之一人，何但江东之独步！兹闻沦谢，良用齟伤。其升通议班联，更加易名宠锡。恨九原之难作，叹一鉴之云亡。爰告斧封，式歆纶命，可特赠通议大夫、宝章阁待制，谥曰宪肃。

#### 奖谕徐宗文敕 宋景炎二年

敕曰：朕郊祀上帝，以祈谷而，均福釐于在位，疏远微贱无遗者矣，又况于助祭之臣乎？尔将仕郎徐宗文，赞礼读祀，克致民康物

阜，岁歌大有，户颂丰登，非至诚格天，安能若是！兹特表尔居曰“祝礼镇锡”之敕命，永示褒嘉。尔益懋愷乃职，求所以足国裕民之猷，毋忘夙夜，以副朕意。钦哉。

**柴德载授主事敕**明洪武六年

敕曰：九重巍焕，玉殿翠飞，丹雘未施，暨茨为急。尔兵马副指挥柴德载，廉明刚直，处事有方，可授承事郎、工部水利营缮司主事。钦此钦遵，供职无怠。特敕。

**柴观授徽州府绩溪儒学教谕符验**明洪武十五年

制曰：朕闻古昔君天下者，设官分职，以成治功。虽秩有大小，而情无尊卑。自下而上，钤印为尊；自上而下，符验为信。所以遐迩交孚也。朕仿古制，授尔以官，给尔以符，往尽尔心，恪勤乃事，给由来观，将合焉以考尔绩。其敬之哉。

**赠何振之监察御史敕**明洪武三十二年

制曰：国家推恩臣下，必及其亲者，所以重本而劝孝也，而何间于存歿哉？福建道监察御史何远故父振之，庆钟厥子，而禄养不逮，揆厥所自，宜有显褒。今特赠为文林郎、福建道监察御史。灵其不昧，尚克承之。

**何远授福建道监察御史敕**明洪武 年

制曰：朝廷设监察御史，欲其振纪纲而砺风俗，以弼承国家之治，厥任匪轻。尔文林郎、福建道监察御史何远，发身儒术，擢居斯职，既历年岁，式克勤慎。是用锡之敕命，以示褒嘉。夫官以察为名，以言为职，在明大体而略细故，在爱君子而戒小人。其益端尔

志，坚尔守。毋私于法，毋挠于势，毋讦以为直，毋苛以为能。明以烛之，公以行之。懋修而不懈，尚有显爵，以待尔成。钦哉。

#### 谕长史周安敕明永乐四年

敕曰：谕哈密忠顺王长史周安。哈密在中国西边，如今忠顺王脱脱的祖先，世世掌着那一方地面。他的叔安克帖木儿好生敬顺天道，归向朝廷，我封他做忠顺王。安克帖木儿死了，那一方军民无人统领。脱脱从小在我中国住，我父皇太祖高皇帝教养得成人了，一向在我跟前带刀宿卫。我已着人送他回本地面里，袭封了王爵，承奉他祖宗香火，抚安哈密的军民。如今特命你去做长史辅导他，你务要尽心竭力，助他行好勾当，一切军民都听忠顺王管领发放。凡有合行事务，你必须禀知忠顺王，计较得十分停当，然后施行。庶使一方之人安生乐业，同享太平。故谕。

#### 孝子徐俭授提举敕明宣德二年

敕曰：朕闻陶唐氏征一历山孝子，而庶绩以熙，万国以宁。孝之所系，亦綦重矣。尔徐俭孝著江山，寝膳尽问视之节，丧祭竭哀慕之忱。有司以闻，朕甚嘉尔为仁有本，而可以移忠也。特敕尔提举使，为子者劝。尔尚懋勉乃仁，体察乃忠，以俊登庸。钦哉。

#### 封柴成承德郎敕明宣德三年

敕曰：为臣能勤于职务，国家既有以褒荣之，而复推恩及其亲者，所以惇本始，而为天下之为父母者劝也。尔柴成乃行在工部营缮清史司主事柴重之父，积善毓庆，教子有方。兹特封尔为承德郎工部营缮清史司主事。服此隆恩，永绥禄养，益励无怠。钦哉。

**柴重授员外郎诰**明正统二年

制曰：工部掌百工山泽之政令，卿佐朕自择之，其属有四，皆必得人，乃克有济。尔奉直大夫、行在工部都水清吏司员外郎柴重，发身胄监，部属洵更，升秩副郎，考课为称。兹特锡以诰命，于乎士之为学，将以行之也。诚能惕于其心，则宜于其职矣。尔其益思自励，尚有以旌宠尔者其往。钦哉。

**授姜濬文林郎敕**明景泰二年

敕曰：京师天下之都会，其人愚良善恶不一也，故设兵马指挥司，察视而弹击之，所以摧恶佑善焉。尔文林郎、南京东城兵马指挥司副指挥姜濬，发身胄监，历职于斯，勤慎有为，考职维称，是庸锡之敕命，以示褒嘉。夫用上之法以治下，势易行也。惟廉正明慎，则法行而民安之。若侮法以虐下，而惟势是怙，则法乱而民怨矣。毋暴毋纵，从容以和。往益懋修，以称厥职。钦哉。

**毛鼎元授承德郎敕**明景泰六年

敕曰：朕正治官，以熙庶绩。以刑者，民命所系，故矜恤之心实勤夙夜。而典刑辟者，必得公恕之士，以居其职，庶克其称。尔南京刑部福建清吏司主事毛鼎元，发身胄监，擢秋官属，精详明允，克举厥官。兹特进尔阶承德郎，锡之敕命，以示褒荣。服此茂恩，尚益祗慎。《易》曰：刑罚清而民服。必使刑不滥而民不冤，则尔永有嘉誉。钦哉。

**胡敦授修职佐郎敕**明景泰六年

敕曰：国家于太学，既置祭酒、司业以典教事，而又置助教、学

正、学录以分理焉。所以成天下之才，而建出治之本也。非经术明正之士，曷克称兹！尔国子监助教胡敦，发身乡举，累教邑庠，迨历今官，考绩惟称。兹特授尔阶修职佐郎，锡之敕命，以为尔荣。呜呼，为治必本于贤才，朕之属意太学，盖以此也。尔以教为职，可不加勉以副朕意！往益懋，式观尔成。钦哉。

**姜德政授奉政大夫敕**明天顺四年

敕曰：礼部即古之春官，所以掌邦礼也。其属有四，虽其政务繁简不一，要必皆得明敏端慎、补于故实之士，庶克称焉。尔南京礼部祠祭清吏司郎中姜德政，释褐贤关，擢官县正，迨迁斯职，茂著公勤。是庸进尔阶奉政大夫，锡之诰命，以为尔荣。尚益懋修，以称任使。钦哉。

**姜梁授文林郎敕**明嘉靖十年

敕曰：朝廷归长民之权于邑令，令近民，休戚关之，厥责攸重，朕恒以得人为难。尔四川泸州合江县知县姜梁，发身贤科，作宰巨邑，政声昭著，屡被荐扬。兹特进尔阶文林郎，锡之敕命。尔惟祇膺光训，益懋操修。国有峻阶，其罔尔负。钦哉。

**谕监察御史赵镗敕**明嘉靖三十一年

敕曰：朕惟自古帝王治天下者，率以兴学育才为首务。而学校之兴废，人才之盛衰，治道之隆替系焉。此盖已然之明验也。今特命尔往南直隶巡视提督各府、州、县儒学，尔其钦哉。夫总理一方之学政，是即一方之表率也。然率人以正，必先正己。尔其务端轨范，严条约，公劝惩，俾为师为弟子者，一崇正学，迪正道，革浮靡之习，振笃实之风，庶几储养有素，而待用不乏，斯足以称简任之意

矣。尔其勗哉。

**封赵凤山文林郎敕**明嘉靖三十二年

敕曰：人子莫不欲褒显其亲，然有不能自获者焉。兹朝廷茂励臣忠，必先推恩自出，使因遂其孝思也。尔赵凤山，乃河南道监察御史镗之父，孝悌力田，贤德善俗，诒翼足垂乎允祚，名称不愧乎乡间。爰用子贵，特封尔文林郎河南道监察御史。新渥载嘉，荣章其佩。

**封赵镗母胡氏孺人敕**明嘉靖 年

敕曰：语有之母亲而不尊，然古今所记，母训其子于成者不少，矧荣典所当推及哉！尔胡氏，乃河南道监察御史赵镗之母，慈柔性备，孝谨行笃，海育令子，为时彦士。其贤有足征焉，特封尔为孺人。祇膺华命，益介寿祺。

**郑骧授中宪大夫诰**明嘉靖三十二年

制曰：岭南诸郡，韶为交冲。镇定拊绥，使良民有以自安，而风俗由兹移易，斯匪循吏，畴称明扬。尔广东韶州府知府郑骧，比以进士擢任曹郎，视水利，录罪囚，善声流闻；迨迁今官，持身廉贞，莅政宽裕，教养兼修，士民共爱。荐剡数上，朕惟尔嘉，兹特进尔阶中宪大夫，锡之诰命。服此新恩，勉之无斁。

**谕广东左布政徐霈复任敕**明嘉靖四十三年

朕嗣纘祖宗洪业，抚御兆民，四十三禩于兹矣。比岁虽暂免常朝，然裁决庶务，未尝少怠。朕思四海之广，兆民之众，岂皆人君所可亲理！惟尔藩臬诸司及府州县官，实与朕分理民务，故曰：天生

斯民，立之司牧。又曰：天工人其代之。此言有君必有臣也。君臣之责，凡以为民焉耳。夫民，邦之本也。厘身农亩，出租赋，任力役，以供上，盖自有一命之士，皆食于民者。今乃不安养是务，而惟欲戕伐其生，何用心逆天道哉！朕夙夜忧皇，惟敬天保民为务，而吏称民安未效，盗贼、水旱频仍，夫岂无由！诸藩臬等官，贪者则恣溪壑之欲，渔夺百姓，以肥其家；酷者则逞豺狼之暴，残人性命，而不之恤；其他瘵官，糜禄以苟岁月，越职逾法，以干进取。播诸耳目者，何可缕数！夫朝廷设官谓何，而乃若此，岂不为大背负邪？今考察事竣，尔等大小官员已有旨还尔旧职。其自今伊始，各务洗濯淬砺，革心从正，无纵欲败度，无淫虐以逞，无以不禁奸邪为宽大，无以故释有罪为不苛，无饰诈立异以为贤，无阿比逢迎以为能。有一于此，皆非皇极。以是承流宣化、御下牧人，岂不悖哉！是故，慈祥以爱民，严正以去恶，平允以守法，廉靖以持身，宣明教化，奉国宪典，使德泽旁流，兆人咸和，庶几朕无忧矣。岂惟尔等功在生民，乃及后裔矣。尔等勗哉无斁。故谕。

#### 赠杨魁父杨诚登仕郎敕 明隆庆元年

敕曰：朕嗣服大命，需庆廷僚，皆有以褒录其亲，所以广孝思，均恩赐也。矧师儒清重之臣，讵可抑其显扬之志哉！尔杨诚，乃国子监学正魁之父，性敦孝友之良，行履幽贞之吉，邱园自贲，寿考令终，可谓乡之善士已。今尔子振铎，贤关蔚为士望，尔之貽穀，盖可尚矣。兹特俞所请，移赠尔登仕郎国子监学正。祇服国恩，永光庙祀。

#### 杨魁授登仕郎敕

敕曰：师氏之职，训于胄子；儒林之选，必俟贤人；而为六学之

正，三物之教。属兹建储覃庆，而可后欤？尔国子监学正杨魁，蔚以经学，列于宾兴，而载立武胄之师，擢兹今秩。尔能立言以开后，章志以迪人，足为人师者也。兹以覃恩，授尔阶登仕郎，锡之敕命，朕临雍讲艺，将质成贤士以恢张理道之本。尔尚体朕至意，懋以经术，诱率学者，登于至道。钦哉。

#### 赠毛恺祖毛仕安刑部尚书诰 明隆庆二年

诰曰：士家积累世泽，恒翼子以诒孙。朝廷褒宠臣邻，则自亲而率祖，以溯庆源之有自，而明恩数之特隆。尔赠资政大夫南京吏部尚书毛仕安，乃刑部尚书恺之祖父，恢宇修仪，渊心直节。性雅耽乎坟典，吟咏不忘；念尤笃于宗姻，交游罔倦。克衍义方之训，佑启博硕之孙，为时名卿，累著劳勩。爰追惟其原本，是用锡以恩纶。兹加赠尔为资政大夫、刑部尚书。命加八座，焕敷奕世之荣；泽被九原，永绥亢宗之庆。

#### 赠毛恺祖母赵氏夫人诰

诰曰：礼严蒸畀之文，不遗祖妣；诗阐似续之训，宜尔子孙。义既重于本初，典宜隆乎追锡。尔赠夫人赵氏，乃刑部尚书毛恺之祖母，毓粹德门，匹休良士。高明禀性，饬闾政以穆然；慈厚宅心，睦懿亲而蔼若。乃远流乎余泽，爰浚发其闻孙，用符麟定之祥，宜布龙章之渥，是用加赠为夫人。诞膺宠命，恒贲于元扃；不显柔仪，永垂于彤管。

#### 赠毛恺父本荣资政大夫诰

诰曰：人臣敦效忠之实，资事父以事君；王朝广孝理之彝，因教爰而敬。矧典方隆于大庆，而恩宜重于巨僚。尔累赠资政大夫

南京吏部尚书毛本荣，乃刑部尚书恺之父，受性刚方，褻身俭朴。直躬化俗，播王彦方之遗风；力穡起家，称庞居士之隐德。既训成乎喆嗣，丕显穀诒；乃生被乎褒封，尤如韦素。顾禄养之不久，宜愍册之荐加，用阐潜光，以风斯世。是用加赠尔为资政大夫、刑部尚书。赫恩华于三锡，尚克歆承；培芳荫于重原，永垂休贲。

### 赠毛恺母吴氏夫人诰

诰曰：父母鞠育之劳，同归于罔极；国家显扬之典，不靳于并施。若褒命之叠申，乃孝思之克慰。尔屡赠夫人吴氏，乃刑部尚书毛恺之母，柔嘉维则，静正有常。龟勉同心，既拮据于朝夕；俭勤理内，乃雍肃乎闺帏。迪其子以服官，方沾錡釜之养；宜其家以风国，洵加纶綵之恩。是用加赠尔为夫人。慈灵永慰，式酬机杼之贤；母范聿光，兼慰栉櫛之慕。

### 刑部尚书毛恺资政大夫诰

诰曰：朕肇建元储，丕覃闾泽，爰涣颁乎湛綵，用晋锡乎群僚。惟尚书正位，六曹典枢机之重；而士师掌邦，三典综纪法之司。不有褒嘉，曷昭优渥！咨尔刑部尚书毛恺，秉介特之操，而守之以正，蕴渊懿之识，而本之于诚。自将使命，秉台章以直言，而稍抑肆，陟郎闾，跻郡守，惟奏课以益明。更践藩臬，克胜承宣之寄；洵持都宪，丕扬澄激之声。贰冢卿，而辨论官材；跻宗伯，以典司礼乐。迨握铨衡之柄，益彰冰鉴之公。乃转秋官，俾掌邦政。则清操弥励正直，宣素丝之风；朗识愈精明断，叶金矢之吉。以诘奸而禁慝，民自不冤；以教德而斐彝，世几无讼。睠言旧勲，再霏新恩。是用进尔阶资政大夫，锡之宠诰。于戏，有唐之盛，惟伯夷以礼折民；成周之隆，乃苏公式敬由狱。尔其聿追遐轨，懋励初忱，丕彰弼教之功，共

赞协中之治。钦哉弗替，服此训辞。

### 封毛恺妻杨氏夫人诰

诰曰：大臣宣社稷之劳，鸿猷斯远；命妇备河山之德，象服是宜。惟内外之相成，肆褒崇之罔间。尔刑部尚书毛恺妻封夫人杨氏，德媲女师，仪闲内则。安贞自迪，克祗慎乎功容；孝敬不违，尤致虔乎修澹。洁蘋蘩之职，相祀有斋；存荆布之风，主馈无遂。宜颁显渥，以表芳徽。兹仍封尔为夫人。承翟茀之恩，服荣无斁；效鸡鸣之义，交傲相成。

### 朱良会文林郎敕

明隆庆二年

敕曰：都城设兵马司，假之武弁之名，充以儒流之彦，此皆服在庶僚，得与承大庆者也。褒章可无锡哉！尔北城兵马指挥司副指挥朱良会，蚤以才谔，克奋胄闾，抡授今官，服勤靡懈。兹以建储覃恩，授尔阶文林郎，锡之敕命。夫都城俗杂民殷，所以听其狱讼，察其奸宄，尔之责也。尔获承宠渥，尚懋厥庸，以称任使，无怠。

### 追赠赵镗中宪大夫制

明万历二十七年

制曰：人臣有名在先朝，而施及今日者，盖其教忠之所贻远矣。肆国家课功而疏爵，疏从子所疏之爵从父。厥子之树，与厥自为树，固无以异也。尔原任都察院右佥都御史赵镗，乃直隶河间府通判洙之父，中秘探奇，惠文蜚誉。筦醴佐急，青衿兼入其毂中；稽卷考成，少府遂闻于毂下。出入乎银司棘寺，佥贰于石室兰台。迄乎留都之命方新，乃其幽人之致莫挽，荐累勤而不起，竟郁长猷，业以子而弥彰，可无显赠。是用授尔阶中宪大夫。功归自出，彰式毅于重泉；恩覃所生，涣天章于涪锡。

### 赠赵镗妻毛氏恭人制

制曰：妇德惟从，厥从惟夫若子，以故夫爵子爵，亦即其爵。顾畴知夫内则之通于德行也。畴知夫阴教之资于义方也。虽曰从爵，朕岂以其虚贵畀之！尔原任都察院右佥都御史赵镗妻封孺人毛氏，乃直隶河间府通判赵洙之母，嫔职夙娴，慈仪有淑。蔚襄懿宪，霜棱丕振于两都；茂翼燕谋，明训高符于三徙。被笄珈而耀德，业沐宠荣；溯河渠而念功，可忘圣善！即遽树倏谢，堂背为虚，然获海宛存，国章勿斲。是用赠尔为恭人，渥生俎豆之馨，永慰栉椽之慕。

### 追赠尚书毛恺谥端简诰 明泰昌

制曰：国家优礼巨僚，树声永世。存膺显陟之典，没颁追恤之恩。名有抑而弥彰，论既久而始定。尔旧刑部尚书毛恺，性资耿介，操履清贞。抗议宪台，夙著謇谔之节；明刑比部，益隆中允之称。迄终老于菟裘，仅承恩于马鬣。身后之心迹虽白，朝端之勋望未酬。兹特赠尔为太子少保，谥曰端简，锡之诰命。于戏，青宫晋秩，式兼槐棘之荣；华袞易名，载荷丝纶之重。幽灵不昧，显命其承。

### 御祭刑部尚书毛恺制 明泰昌

制曰：耿介之性，端方之才。奋登甲第，简任乌台。精忠为国，义形于言。左选郡理，载起藩宣。秉道不渝，式宏令问。晋陟中丞，保鳌绩奋。擢掌留铨，束治允核。名卿秩官，邦禁维飭。劲节清操，侃侃特立。赐告几何，梁摧奄及。虽遭萋菲，心迹终明。懋尔忠说，嘉尔老成。既复旧阶，仍颁谕祭。卿灵如在，尚克歆食。

**徐日葵奉政大夫敕**明崇禎元年

制曰：朕绎《立政》至“式敬尔繇狱以长王国”，知贯城系国脉重也。高皇帝言：贯索星如贯珠，中虚则刑平。故爽鸠诸大夫宜慎简焉。其有淑问久著，诚为嘉师褒之。尔刑部四川清吏司郎中徐日葵，器局清真，神锋挺拔，轩抡高第，法署含香。乃属奸焰之方张，坐抗爰书而见斥。名流共惜，直道益彰。朕起自大横，召还旧秩。四凶安在？方信杀人媚人之非；十载不迁，弥坚有道不变之塞。比干存其千简，定国高夫驷门，方诸古人，亮无多让。兹用覃恩，授尔阶奉政大夫，锡之诰命。夫秋官，阴也，天之行阴气也。少取以成秋，圣王亦少取以立严。要于以春剂秋，为木深文周内，非朕敬慎之指也。比虽稍有诛殛，乃好生从欲，召对时交勗焉。尔岁阅既深，风裁懋著，其益为朕平两石五听，以佐平明，朕且显陟尔。

## 艺文志二

### 奏疏附：申状 详文

进《丙丁龟鉴》表宋淳祐六年

柴望

臣望伏以正次王，王次春，颁万民之治象。史载事，事载道，有前代之元龟。匪明气数之兴亡，曷示始终之劝戒。言非所当，罪不容诛。伏念臣赋性至愚，读书甚少，自怜孤苦，获际休明。念先世之孝廉，本故家之崇义。夔不恤纬，忧在宗周。值灾见行夏之朔，正运当分晋之年。是殆水阴几胜火德，信知有数，决非偶然。苟曰无之，胡为至此？痛思今日，莫返颓波。尚论古人具垂成鉴。秦汉之君以下千有余年，方册之政可寻，十常九验。栖灯勘义，滴露研硃，姑援实以断时宜，非饰说以欺天听。矧君子虽进，而小人之根未痛绝；天理虽明，而人欲之蠹未尽消。中国或厄于外疆，大纲未联于小纪。四方戚戚以靡骋，万民嗷嗷而不安。辅成有赖于大臣，所重尤关于太子。伏望皇帝陛下，体纯乾之一，法主震之宜，阐大学之明，谨中庸之独，必安国本，以安社稷；必正君心，以正朝廷。当自九重，首图厉精之治；毋使亿兆玩闻更化之言。臣忍死吁天，

措身无地。今来古往，治日少而乱日多；主圣臣贤，前车覆而后车戒。谨具表上进以闻。

**陈言劾奸疏**宋庆元元年

蒋 傅

臣等尝闻，开国承家，小人弗用。自古小人用事，未有不亡其国而丧其身者也。谨接近者谏官李沐论罢赵汝愚，中外咨愤，而李沐以为父老欢呼，蒙蔽天听，一至于此。陛下独不念去岁之事乎？人情惊疑，变在朝夕。是时假非汝愚出死力，定大议，虽百李沐罔知攸济！当国家多难，汝愚位枢府，本兵柄，指挥操纵，何向不可不以此时为利！今上下安妥，乃有异意乎？章颖、李祥、杨简发于中，激力辨其非，即遭斥逐。六馆之士拂膺愤怒。李沐自知邪正不两立，思欲尽覆正人，以便其私，必托朋党以罔陛下之听。臣恐君子小人消长之机，于此一判，则靖康已然之验，何堪再见于今日耶！伏愿陛下念汝愚之忠勤，察祥、简之非党，灼李沐之回邪，窜沐以谢天下，还祥等以收士心。激切之情，惟明主察焉。干冒宸严，无任陨越，俟命之至。

**奏乞训导冠带疏**明兴武初年

何 远

乞赐儒臣冠带以示宠重事：切惟学校乃人才之本，儒臣斯学校之师，所讲者道德文章，所化者英贤俊乂。师道立，则善人多；瞻视尊，则人心服。臣忝由明经之举，谬典分教之司，止戴乎巾，却与庶人无异；虽衣员领，愧无章服之荣。伏仰圣德维新，仁恩一视，乞赐加以训导冠带。如蒙准奏，使天下本职均沾雨露之恩，咸膺覆幬之宠，臣不胜欣跃报效之至。

乞留宫臣疏明嘉靖十八年

毛 恺

为乞留宫臣以备蒙养事：臣闻《易》曰：蒙以养正，圣功也。《书》曰：若生子，罔不在厥初生。自貽哲命，言豫教也。夫三代有道之长，岂非以前后左右多正人也哉！夫众楚之咻楚语，自如芝兰之亲，与香俱化，事有必然，无足异者。然则宫坊之臣，固不可不豫为之备，而尤不可轻易为之转更也。近该大学士夏言等，以南京翰林院掌印学士员缺，推选得司经局洗马兼翰林院侍读邹守益堪任前职。窃惟守益初以翰林，冥心迁谪，迟徊郎署，亦且有年。迺者陛下为皇储端本，念《大易》之养正，体《周书》之貽哲，慎择宾僚，拔置坊局。臣尝观其议论，考其素履，学博而醇，养深而粹，器浑而昌，识明而正，盖时之选也。固宜优养豫待，以备皇太子将来启沃万一之助。且陛下不日亲御经筵，赐讲便殿，如守益者，尤宜充列讲臣，诚不宜投之闲散，淹老岁月也。夫留都重地，学士清秩，陛下之所以处守益者，不为不至。臣虽至愚，夫岂不知？但念陛下既为皇储慎择而来，恐不宜使之他转而去。如去岁僚臣崔铣亦以礼卿南往，已似非计，故近日太子宾客张邦奇以给假请，特赐不允。圣虑殆诚有见于此欤？伏望收回成命，责令守益供职，果以年资颇深合无，量加相应品级，以备陛下朝夕日用，以需东宫殿下左右献纳。臣不胜惓惓。

劾大臣争竞疏明嘉靖二十六年

徐 霏

为大臣互相争竞，乞赐罢黜，以昭圣治事：窃惟六卿者，百官之领，万事之纲。人君所赖以治天下者，即今六部尚书之职。而左右侍郎，则尚书之贰也，其职亦重且尊矣。但冢宰统百官，均四海，又非他卿之比。故各部转迁吏部，非实望素著者，不得以会推，而亦

帝心简在，非臣下所得而觊觎也。切见今礼部左侍郎崔桐，以斗筭之才，窃宗伯之贰，外示朴耿，中藏贪鄙。偶见吏部侍郎员缺，辄自攘臂曰：“即今吏部员缺，例该礼部推补，非我其谁也！”又恐本部左侍郎许成名之夺之也，阳为恐吓，以折其心。而许成名本以诗酒自娱，政务一筹不展，又不肯甘心出其下也，遂忿激而起曰：“吏部之缺，我岂不当补耶！”于是互相排诋，公肆交争，喧腾于各部，传笑于四方。凡兹在廷之臣，靡不骇之。臣谓陛下孳孳图治二十六年，于兹深居渊默之中，而天下雷厉风行，无有一夫之梗化者，以纲纪素存，而臣下畏法故也。今二臣者，为百官之表率，乃以公署而肆交争，以名器而私攘夺，是无纲纪也。无纲纪，是无朝廷之法也。戕朝廷之法以自便，其无忌惮之私，是尚得为大臣耶！为大臣者如此，为小臣者又当何如耶！此臣之所以愤激不平而不能已于言也。今夫人之趋利也，如水之就下，非有礼义以堤防之，莫能止也。桐等乃敢蔑其廉耻，坏其礼义，臣恐习以成风，恬不知怪，虽中智之士亦以为当然，而风俗坏矣。风俗、纪纲相因者也，风俗坏于下，纪纲失于上。恶有风俗坏而纪纲独存者乎？故不避怨，辄敢上陈者，非区区为此二臣也，为天下之风俗也，为朝廷之纪纲也，恶容以缄默矣乎？臣又近闻吏部侍郎王道员缺，少詹事王用宾私念己必当补，又恐少詹事黄佐声望之出己右也，乃为危言以动之曰：“汝职虽吾先而家居十年，实俸不及，乃欲以先吾乎？”黄佐唯唯不敢举争。夫王用宾在翰林素称谨厚，今一旦猖狂至此，岂无自而然耶！良由桐等奔竞之风鼓之。故中智之士堕于其中而不自觉也。故夫廉退之风，百人张之而不足，一人坏之而有余，不亦可惜也哉！再照得崔桐先年在翰林与崔铎等争进取。铎，廉退之士也，避之而去。大学士张孚敬闻而嫉之，改调外补。为桐者今当益励晚节，以盖前愆，所谓失之东隅，收之桑榆可也。乃以衰暮之余龄，复蹈中年之覆

辙，是其嗜利无耻之心，虽至老而不衰也。以斯人而居大臣之任，是率天下以贪昧，坏天下之风俗也，其能以治神人、和上下乎！又能以统百官、均四海乎！伏望圣明，速将崔桐等严加罢黜，以正大臣贪昧之罪，以敦天下廉耻之风，乃敕示中外大小臣工，各宜精白一心，以自洗濯，毋长奔竞，以取厥尤，则改观易听之下，使天下麴麴向风。所谓罚一人而千万人惧，圣王所以馭宇内而鼓舞天下之术，无以易此矣。

### 乞原曾铣疏

徐 霈

奏为边臣妄举，冒犯天威，乞赐辩明心迹事：近因套贼出没，抚臣欲自花马池迤东，定边起营，至黄甫川一千五百里，接修墙堑，以固边防。计人夫二十万，财用二百万余两，期以三年完工。财力浩大，矧雨暘之不一，人夫之逃亡，恐修筑未几，而寇来冲突，不如一举荡平之为愈也。总督曾铣建议，欲大发兵粮为复套之举，以除祸本。计用军马六万，枪手三千，造如意战车数百乘，联结而进，坐则为营，行则为战，器械、火炮布列于上，行粮草料共该二十五万，正驮马匹牛驴几于九万，计程九十日，其用费大略与修筑造墙相当，其谋亦善矣。臣据兵法：十则围之，五则攻之，倍则分之，敌则能战之，少则能避之。今贼据套，积百余年生长蕃育，动称十万，秋间每一入寇，备西则击东，备东则击西，吾兵分布捍御之不遑，况欲直捣其巢穴乎！驱六万之兵入沙漠之地，彼逸而我劳，彼静而我动，欲坐收胜算，难矣！况三军未动，粮草先行。兑运本色，则疲于陟远抄掠之难；贳折银两，又罹于得食饥乏之苦。且精兵尽抽于三边，不顾此失彼。胜负求逞于一掷，抑岂善后良图？故庙堂之谋议方兴，朝野之诽谤迭出，何足怪哉！陛下赫然罢兵，拿回曾铣，可谓明见万里矣。然铣谋未臧，而其心则可悯矣。岂不以套寇盘据巢

穴为边境患，若一举荡平，复汉唐之故地，省八万之粮饷，不亦可快耶！其罪在好大喜功，非徇私以诬国也。陛下诛其迹而悯其心，罢之可也，谪之远方可也，加之以不轨则过矣！自后黠寇陆梁，谁肯奋身为国当事乎？先年名臣杨一清总督三边，尝曰：“兹欲复守东胜，使河套之地归我耕牧，斯为上策。”顾力有所未能，若整饬边防，休养生息于数十年之后，东胜未必不可复。即今财力殫弱，太仓无终岁之储，铄乃轻举妄动如此，不亦狂耶！陛下斥之当矣。但其心亦欲为国当事，有可悯者。昔酈食其欲挠楚，权请立六国后，汉祖曰：“善。趣刻印。”及闻留侯之言，吐哺而骂曰：“腐儒几败乃翁事。”趣销印。夫刻印未几而销印随至，其怛酈生甚矣，然不以其罪罪之者，顾其心非有他也，但谋之不臧耳。今铄倡复套之议，亦口谈而已，未及交锋败北，是亦酈食其之类也。谓之腐儒可也，何足道哉！陛下德包天地，明并日月，凡含灵蠢动之物，莫不孕育于生成之内，矧一夫乎？若怙终贼刑，奸犯天宪，罪不在赦。至于一举之失，一动之愆，容其洗濯自新，稿死于黄馘之下，是陛下再生之恩也。海内之士闻风兴起，莫不攀援而来，奋迅激昂，求报明主于万一，是宥一人而千万人悦矣。圣王鼓舞臣民之术，不在兹乎？今铄被系狱中，群臣震惧，以为必死者，以其不量力也。犹庶几于不死者，幸有陛下之仁也。臣待罪言官，乃昧死言之。以蝼蚁之命，犯雷霆之威，亦恃陛下之仁耳。席藁私室，无任殒越之至。

荐举儒官疏 明嘉靖三十四年

赵 镗

为公荐举以励儒官事：臣窃闻世道之隆污，系于人才；人才之盛衰，本于教化；而所以预养人才，纲维教化者，实师儒之官也。是厥职虽轻，所系实重，诚有不容以易视者。臣职专提学，待罪四载，凡合属教职官员，督责尤切，考核加详，日积月累之余，稍有概于中

矣。除贤能称职升任，任浅者已经礼待，及行业不修者，各行戒饬，不敢概列外，谨于一百二十五学之中，而择其尤者，冒昧陈之：访得句容县儒学教谕胡直、合肥县儒学教谕洪大滨、泾县儒学教谕程学颜、婺源县儒学教谕（今丁忧）苏民牧、宝应县儒学教谕吴阶、休宁县儒学训导戴瑞、丹阳县儒学教谕陈所有、六合县儒学教谕林澄、建德县儒学教谕刘伯源、怀远县儒学教谕林大震、休宁县儒学教谕柳应和、宿松县儒学教谕白世徵，以上诸臣皆学行优异，有立教之功，才识精英，具从政之体，均之所当荐扬者也。伏望敕下吏部，再加查访，如果臣言不谬，将胡直等拔其尤者，听候行取选用。其余酌量年资，先后选擢，则俊又不滞于下寮，而卑疏亦得以向用。凡为师儒者，孰不淬励以自效于尺寸。其于圣世育才兴化之治，亦或有小补也。

题禁滥狱疏 明隆庆三年

毛 恺

为乞禁狱刑之滥，以慎职守，以弭灾眚事：臣等迺者屡睹在外各抚按官，后先奏报灾伤，如洪水暴溢，坏人田舍，雨雹飞蝗，彼此洊作，地方被灾，广且重大。夫变不虚生，灾由人召，将非大小臣工职守未尽有以致之耶？否则何以反常若是也？夫水与雹蝗，皆阴物也，为灾广重，阴莫甚焉。求诸所致，厥类虽多，而刑狱乃其尤者。盖刑秉阴，令主肃杀。臣等职业所在于是，毋亦中外之狱，容有横滥不法，如水之泛滥莫可堤防，如蝗雹之害稼夺民命者乎！谨以中外刑之滥者有六，敬陈之。窃惟词讼自下而上，而越诉者有罚；非系正官而擅受者有罚。今则有舍本县而募告之州，有舍本州而募告之府，有府县未结而募告之监司，志在诬人，纷然无忌，又多私自诉请州县之佐贰首领等官，彼既利其易行，此亦因以自利。至于正官之好事者，则或不审其情之轻重、理之是非，概然准理，遂使

告讦之习惑煽成风，险健之夫终讼不止。是曰滥词。虚诞之词累人众多，本无辜而捏为正犯，非知见而指作证人，蔓引枝牵，动至数十，各该问官，且摘取紧关数名，听审为得。至差人下逮，尽数弗遗，奔突叫呼，惊及鸡狗，束缚驰骤，无异犬羊。投到则累然满庭，供明则被诬过半，而诈欺凌虐无论也。是曰滥拘。人犯到官，审理宜速。然或才性迟缓而未即审，或事势忙迫而未暇，审则不分人数多寡，事情重轻，概行寄仓寄铺。至于追赃之犯，有以斗粟贯钞，而久为拘系，有以家属姻党而幽令代偿，忽慢因循，动淹岁月，被犯之人坐井观天，悲叹抑郁。被累之家晨昏供给，生理俱废。是曰滥禁。从古讯狱，固未去刑，然刑之所加，自有所在。故鞭扑只以作教，决罚不过臀腿，固未尝广为非法之具，而猛以施之遍体也。今之用刑者异于是。刑手则有拶子，刑足则有夹棍，刑首则有脑箍，甚至烙铁灼体，锡龙灌身，打签钉指、烧酒灌鼻，诸如此类，备极惨毒，身无完肤，因或就毙。其意以为不若是，则不足以得其情而服其辜。即未尽如臣等所言，然如伤之念百不闻一，草菅之视十常八九矣。是曰滥刑。狱之议拟贵在明允。与其过求，无宁过恕。故罪有惟轻之拟，杀有不经之失。盖一成莫易，君子慎之也。奈何今之司理，好事吹求，苛刻是务，以深文巧诋为能，以哀矜弗喜为拙，故入夫罪则旋添情节以合律，妄引夫例则勾去字句以从招。至请托徇人，通贿自鬻，于以枉其是非之实，又有不可胜言者。由是扣脑之夫接踵于狱中，茹冤之妇不止东海一人而已。是曰滥拟。狱有定义，自宜查照发落，间有以为情重律轻，罪外加谴，或指修理，或指备荒，或指作兴军饷，巧立名色，重为厚科，遂使卖妻鬻子，散之四方，破产荡家，委之沟壑者，往往如是。是曰滥罚。凡此六滥，刑狱之蠹，民生之殃。召灾致沴，大率由之。伏乞敕下法司并各衙门，一体痛为禁革。夫大事二十日程，中事十日程，小事五日程。

滥禁者应以不及论。刑犹兵也，不得已而用之。因公科敛，律例尤严为之防，而滥刑、滥狱者，应以贪酷论。政出多门，议罪不当，均干法纪者也。而滥词者掌印官以罢软论，擅受与滥议者俱以不谨论。若夫滥拘一节，初犯、次犯量为戒饬，其屡犯者送调别用。以上数者，祛革滥弊，似或宜然，务在着实举行，毋事姑息。庶几从欲几措，太和洋溢，岂惟灾沴不生，将雨旸时若，年称大有矣。

### 申知江山县王执中不职状

宋朱熹

传到报状云云，浙东久阙雨泽，近自衢州江山来者，本县被旱最甚，苗已就枯，民尤乏食，邻邑有米可籴，禁遏不令出境。江山之民为饥所迫，已有夺粮之意，似闻衢、信间更有如此等处。若不预行措置，窃恐小民无知，易致生事。乞令有司检举闭籴，指挥申严行下，已奉圣旨依熹照对。昨巡历至江山县，见得知县宣教郎王执中，庸谬山野，不堪治剧。及据士商词诉，称其多将不应禁人非法收禁，人数极多，尽是公吏画策，务要科罚钱物。后来疫气大作，入者辄病，反以此势吓胁平民，科罚取财等事。熹以所论不系本司职事，兼本官只是庸谬，别无显然赃私罪犯，遂只行下本县禁约去。外，熹又闻衢州诸县，新谷未登，街市全无客贩，及上户闭籴，绝少米斛出粲，数县内江山县尤甚。遂即行下本县，将去年已拨官米及上户未粲米斛接续出粲。如有贫病无钱收籴之人，即行赈济及煮粥存养。其知县王执中，一向坐视，并无一言报申，却据衢州缴到诸县所申，米价每升皆四十文上下。其江山县状内，独称大禾米每升止粲一十八文，小禾米一十七文，足比之诸县米价大段辽远，与所访闻事体不同。方于六月二十九日行下，迨本州县人吏赴司根究。今者伏睹前件，臣僚所奉本县饥民夺粮事理，上勤圣虑，特降指挥，而熹备使一路，曾不闻知，其本州县全无申报。在熹无所逃

罪,其知县王执中委是弛慢不职之甚难以容令在任。除已行下衢州,定将本官对移闲慢职事外,须至供申。

国朝

条陈兴革详文康熙十一年

郭卫民

为广谘群议,条陈兴革事:窃照卑职三晋菲材,谬膺民社,莅兹冲繁残疲之邑,复值灾浸凶旱之年,受事伊始,惟期茹蘖饮冰,与民休息。如广招徠以复故业,严保甲以靖盗源,课士则月试以鼓励,赈饥则捐俸以施粥,催科仍用八限之良法,投纳务革火耗之陋规,省词讼以清刑狱之繁,禁差役以杜乡民之扰,其于地方抚绥之术,无不仰体宪台加惠元元之意,实举而修明之。第有利关于大体,害切于民生,非卑职所可得专者。正欲愷切具详,今奉宪台谕询本管事务与地方利弊,卑职在县言县,断不敢袭陈说,以滋纷扰,谨将地方目前要务详晰胪列,恭呈采择:

一、取士之额宜复也。朝廷设学校以育人材,例以地方之广狭,定入学之多寡。江山幅员三百余里,钱粮四万余两,户口三万九千七百有奇,计口成赋,实为衢属中县。故明三百年间,文章理学,人物科甲,后先相望,不减西、龙,载在郡乘,班班可考。我清定鼎,一仍明例。岁科入学,俱如中县之额。继以兵燹寇荒,户口凋残,文教少衰。自顺治十四年间,前学道谷按衢考试,彼时以冲途人文寥落,反以常、开为中县,而置江山于下县之额。自后每试录科,应试生员不过十余人,儒童入学仅有七人,且科岁并行,三年一试,增进者甚少,事故告顶除名者居多,以致人才郁抑,何以振兴文教,鼓吹休明!况今民已复业,生齿渐繁,弦诵渐盛,己酉乡荐,获隽有人。是以前任知县万里侯通详请复旧额,蒙前任部院赵转批学道行府,覆核在案。所当亟请咨部复额,使人才无沮抑之叹,有

裨学校非浅鲜矣。

一、征收南米之宜改折也。江邑距省八百余里，居浙上游，石溪小涧，滩高水浅，竹筏梭船运米独艰。往例额抽本邑南米一千八百石，就近拨给枫岭营月粮，民最称便。自康熙十年，奉大部将浙省应给枫岭营兵饷及米一千八百石，折银二千四百两，归并福建省兵饷经费内，而江山南米似应仍旧折色解省，凑解协闽兵饷矣。上年奉藩司改拨，四百石解严，一千四百七十石零解省。查康熙十年，任此役者，有舟筏肩挑之费，有沭烂耗截之赔，每解米一石到省，费用浮于米价，视为剧害者。此所当亟请宪台行令，照四钱三斗之例，折银二千四百两解司投纳，凑解闽饷。在藩司以米易银，无减于原额之数，在江民以银代米，岁省解运之费。而省会军旗口粮，仍照旧例于就近府属拨解。一转移间，江民岁省数千之赔累，又免远运之疲困，诚今日救时之急著也。

一、垦荒起课之限宜停也。浙东抛荒一案，康熙三年间，江邑奉蠲积荒银六千一十七两零，计积荒田地七百三十顷零，遵照三年起科之例，递年报垦起课在案。惟是康熙十年，异常灾荒，熟田无收，新垦可知。现奉题蠲十年钱粮六千六百七十一两零，则康熙八年所报开垦，应于十一年起课，相应暂停征一年，改令康熙十二年起课，庶垦户免包荒之累，实出自宪台鸿恩也。至如本年被灾之余，饥谨载道，小民救死不暇。今届东作，谷种绝粒，工力奚施？熟田势且抛弃，荒田何暇开垦？则本年报垦之令，尤宜预请停止，亦甦困之要务也。

一、设驿之议可复也。凡天下驿站，近者七八十里，远者不过百里。江山接壤闽省，自本县至浦城县，二百七十里，兼以山径险峻，高入云表，且邑无骡马，需人抬送。从前每一差至，需夫数百余名。去者每至道殒，回者仅存皮骨。江邑异常苦累，莫此为甚。前

令据民哀呈上吁，蒙前任浙闽部院目睹疲苦之状，特疏具题在案，檄将汀州府长汀县三洲驿改设于江山县二十八都地面，更名小关驿，江民幸得少甦。乃蹇遭委署驿丞之姚朝显与代庖县篆之崔经历，利欲薰心，惮于更辙，诡详钱粮出自闽省，夫役当觅之江民，接应未久，倏而将夫役仍复撤回。在浦邑，县大而富，一城设有两驿，以逸待劳，年复一年，不觉其疲。在江邑，县小而瘠，以寥寥羸夫足未停迹，奔走长途，实有不能支旦夕之虞。伏乞宪台移咨闽抚，俯怜江、浦俱属赤子，一视同仁，檄下所属，一转移间，挹彼注此，站银不烦外设，而两地劳逸适均，自此驿站免于逃亡矣。前知县万里侯撤驿殃邻，详稿并具呈览。

凡此皆江邑切肤无已之害，敢因明命而胪列言之，以冀其害之亟去也。其闾省大事，卑职生长北方，初任边吏，未熟南中利弊情形，不敢冒昧妄谈，为此今备前由具申，伏乞照详施行。

兵船协济详文康熙 年

王宏仁

为驿站用船独累，吁请均平协济等事：看得浙省驿站，惟衢郡为首冲。衢属驿站，惟江山为最苦。盖陆行者至江山而登舟，舟行者至江山而登陆，遇平常勘合，火牌夫船稍次者，犹可支持。若遇内差大人、藩下世子暨投诚兵弁家口，出入浙闽，用夫动以数千，用船动以数百。自江山登舟，顺流长往，直抵省城，计程七站，实有万苦难支者。此江山县知县万里侯所谓一县而当八县之差，一邑而代七邑之过，万不得已，而有吁请均平之文。即卑府亦曾屡具详请协济，未蒙宪定者也。盖衢五邑，止有西、龙、江三县通船，然滩高水急，非驻船之都会，止有小舟往来。至常、开二县，僻在深山，一线之水，并无舟楫，即用船百只以内，亦须各县发价差官，多方雇觅而后得。若有大差大役，风闻需船，则各船皆扬帆顺流而远遁。历

年以来，衢府西、江二县受累独深。查康熙六年，投诚弁兵何政等，奉发山东等处驻扎，经由衢郡，蒙前督宪赵分派杭、金、严三府各县，每县备船若干只，每协差都守官一员，押协至衢，各认装运启行报宪，原有成例。但非奉宪定画一，则各府视同秦越，呼之孰应？今奉宪查该县请协船只、口粮、盐菜、银两事。卑府查得，江山水穷源尽，非集船之所。若用船百只以内，衢府四属量行派协。若百只以外，金、严两府就近请宪派协。若需用更多，则杭、金、严三府均协。悬宪定义通行应协各府，遇部文一到，本府详宪，差檄各府，按时协济，庶劳逸均平，在各府亦安静无扰，而西、江等邑之困疲稍甦，则恤一邑之苦累，以养全衢之元气。在民生，非小补也。至于雇船价值，旧例七站每船给盐菜银一两八钱，遇船少难觅，竟措索至二两以外，止蒙开销一两二钱，似为赔累。卑府酌中而议，以后雇船开销，悬宪以一两五钱为准，通行各协济之县，照例开销，永著为例，则衢属之倒悬可解，而差务往来亦不至有迟误之咎矣。

请增江童取额详文 康熙十年

雷 经

为请增取士之额，以作养人材事：看得取士之额，原以钱粮户口之多寡，分别县分之大小。查江邑田地钱粮四万余两，人丁户口二万九千七百有奇，在衢属原溢于常、开之上。今常、开俱叨定为中县，而江邑取士反置于小县之列。此江令所以有吁增进额之屡请也。至前此未请增额之由，盖缘江邑自入版以来，连年师旅络绎，早潦相仍，户口凋残，人文未起。近荷各宪题请蠲荒招垦，残黎渐集，士子皆知弦诵，赴考者日多，文教亦渐次振兴，而额数尚不及中县之例，是以本府县节次有增额之请。今幸逢宪台下车之始即崇兴文教，鼓励人才，诚千载一时。合无详请宪恩，俯念士子攻苦，三年一试，恩批照例改为中县，则生童稍得增额，咸受宪台作人之

泽于无疆矣。

详请免借南米文 康熙四十八年

汪 浩

查看得南粮一项，夏秋停征，此诚仰体皇仁至意，而转运补解，实为地方重累。在民以长易困，卖贱买贵，每石已多三四钱不等，而舟只费用、胥吏浮冒无算也。在兵驻防枫岭营，赴省搬领七百余里，山路且居四分之一。舟夫运载，动费无穷，而守领未可刻期而论也。至于印官之苦，尤为万难。征银易米，少则累官，多则累民。卑职履任伊始，适当南米还解之时，爰集绅士耆老议价征解，众口哢哢，旬余未定，迹似阻挠而情实可矜，非如他事刁玩，可以王法惩之也。今嘉捷等既情愿春季多输，以备夏季兵食。而江邑夏杪秋初，早禾告成，本于秋季，兵食无误，无容预借。则在民有本色便输之乐，在兵有朝领夕馔之欢，印官亦无议价凿枘之难，洵一举而三善备焉者矣。伏乞宪台俯念江邑运补之苦，恩顺舆情，转详各宪，准循旧例，来年兵米仍为就近支給。高厚殊仁，直与须水郎山共永长矣。

附：王嘉捷等《免借南米公呈》：为恳恩详请就近拨给以苏民累事：窃惟江邑南米一项，历来拨给枫岭、衢协二营，在民有本色就近之乐，在兵无赴省领给之劳。载在县志，诚为两便。自三十八年为仰体皇仁事，夏秋停征，预借省仓支給，冬时完补，詎非生民厚幸。但地各不一，法难画一。江邑居浙之上游，山高河浅，雨集辄涨，雨止立涸，视他邑输挽最难。如今年夏秋所借省仓七百余石，现拨归安、长兴、海宁等处偿完。即由江之衢，不过百里，尚须鸬鸟船百六七十只，方能载入大舟，兼之盘塘过坝，脚费无算。倘遇骤风暴雨，糜烂堪嗟。此运米之万难者也。外此惟有征银就近易米一法，然江米形长价贱，南米形困价贵，卖贱买贵，民累已极。矧异地买运，动经数月，收兑候批，更难刻日，而且吏胥侵浮不可究诘，往往以一倍之费，竟逾两倍。此又征银易米之万难者也。捷等未受停征之益，反受

停征之累，有怀欲吐，已非一日。幸遇抚宪利举弊革，俯从民便，已准金华就近拨给之请。捷等情愿春季多输，以备夏季枫岭营兵食，至于秋季江邑地暖禾早夏终收获，正可及时支给，无庸借兑，万不有误兵粮，自贻伊戚。伏乞仁天轸念民瘼，赐文详请在各宪得悉艰难，自为俯允，则江民世世顶祝，而营兵戴德亦无既矣。

详报牧民堂田租抵赔粮文康熙五十一年

汪浩

为查报垦田，请补赔额以甦粮累事：窃照卑县自闽变之后，户口凋残，从前差重田轻，往往有业去而税仍留者，又有逃亡故绝人户，里甲摊累积年逋赋，上累考成。卑职自四十八年八月抵任，接征从前民欠，至四十九年一载间，竭蹶催科，以副全完之限。因于催比间得以悉察赔累之户。盖从前有逃亡死绝者，照亲属勒令坐赔，以致年深累久，苦海莫拔，种种鹄面鸠形。卑职每为之惻然悯伤，而事关正赋，除豁无由。间又细访得，卑县又有牧民堂田亩一项，系前任杨令于康熙三十四五等年清丈时，有无主承认之田数顷，存为牧民堂名色。其田星散各图，陆续开垦，未纳租税，因经年久，无从稽查。窃念此项田亩，若遽报升科，其于正赋之增，不过沧海之一粒，而于卑县民户无所裨益，且虑大部稽查，反滋文案。不若以此清出之田课，垫补绝户之额粮，则既无加赋之虞，稍省勒赔之累，亦事之两利而可行者也。随经面禀，奉示遵行。因一面清查，委婉出示，晓谕民间，令照自首例报出，不追既往。倘隐匿不首，查出照例问罪。又谕以禀明上宪，将报出之田按输租课，以抵绝粮之百一。咸陆续首报出田共税四顷四十二亩一分九毫，各取认税，甘结在案，理合备造花名田亩清册，并另造赔户册各一本，通行申报。请自康熙五十一年为始，其田每亩按则共应征银四十二两六钱八分五厘六毫，俱令抵入赔户名下。虽所征租课无几，不足

以全抵赔粮，然酌量其间，照户摊补，庶于粮累亦或轻减。切恳宪允，以便摊抵，并大书晓谕，立案遵行。此后若有重征情弊察出，以私征钱粮论罪。如此则官民均益，利非小补。为此备由另具书册具申。五十年十二月十二日详，本年正月十七日批。照户名摊补，尚未明晰。仰再确议报夺。

### 覆详牧民堂田租抵赔粮文

汪 浩

覆查得卑县所开赔粮六十余户，共该粮银一百八十一两九钱六分零。其牧民堂田应征课银四十二两六钱八分零，不足以全抵赔户之数。今将此项课银均匀摊补，则于赔粮项下，每两代完粮二钱三分有奇，其赔户每两豁除二钱三分。稍减赔累之苦，事可垂远。今蒙宪批，理合覆查，粘连原详申请宪夺。为此备由另具书册具申。五十一年二月十三日详，本年二月二十八日批。据详已悉，但期实减均沾，方不虚牧民堂命名之意。此缴。

### 崇祀乡贤文案

明万历十三年

易仿之

为申明崇祀乡贤事：案查本县特祠，原有逸平、正节二公二祠。正德十六年，知县吴仲案详请两建特祠。逸平在步鳌之西，上巳祭山川，即祭逸平；正节在通安之东，上戊祭社稷，即祭正节。各申奉祀生员一名。又据江山县儒学生员周文兴、郑骝、周积等公呈，为垦酌祀资事，本县遵行捐俸一十两，置买十六都田五亩，目连上西山该税三亩、地二片，造祠供祀。嘉靖二十年，知县黄纶据生员毛恺、毛文琳、应昂等公呈，为增定祭祀事。本县牒学细查徐逸平先生祀产。据覆，祀田现在，奉祀生徐元掌管所有；葬逸平山被土豪何杰谋卖等情，即发价二十两赎还，又捐俸资起造坟庵，建立石碑为记，使后人不得图谋。嘉靖三十一年，本府总捕厅司周公幹至县

谒祠，捐俸八两，付廩生鲁应华、徐霏、赵镗、徐惟辑等，面同奉祀生员徐玠，置十六都田地共三亩，取依准讠。隆庆年间，知县邵仲禄莅任，见其人材迭出，科甲屡登，询其情由，皆步鳌山徐逸平先生正学书院，宏文社会广盛，因而捐俸四十两，置买二十四都田租一十八石五斗供祀。万历十三年，本县访先生之后仅二人，已削发为僧，亟召还，出俸二十四两，聘娶孔氏与继昌为妻。又捐俸二十两置买五都田租九石。因前祭仪动支备用钱粮裁减，今议详请，存留水脚银内，每年动支二十两，春秋二祭给付逸平、正节二公奉祀生员领办祭仪致祭，祭帖付与奉祀生员徐继昌据帖掌管。衙役欺瞒侵骗，许执帖呈禀，以凭重治。须至帖者。

#### 申请蔡英入祀名宦文案

冯 崧

为吁乞崇祀名宦以彰教泽而光典礼事：嘉庆二十年十一月初七日，据卑县阖邑绅士毛锡浩等呈称：切原任本邑儒学训导蔡英，于越隽流，暨阳名宿，蜚声桂籍，群推淹贯之才；司铎须江，大阐彝伦之教。初下车时，即以宣扬碑训，敦厉人才为事。逮恭谒圣庙，见栋楹之倾圮，倡议葺修；承祀上丁，缘笱豆之缺残，按图制造。藻蘋必洁，恒越宿而致斋；瓠叶可陈，与诸生而习礼。斋规峻整，经义流昌。弗贪束修之羊，常满问字之屦。由此范为士则，学有师承，既衿习之聿新，亦科名之相继。而且崇节孝之祠，以扶伦纪；读岁时之法，用晓颛蒙。邑旧有溺女风及不嫁婢女者，公刊文遍谕，自是淳风鬯古，化雨流今。胡安定之教人，堪著为令；贾新息之革俗，宜名所生。又本邑每逢水旱，公协县诣坛，虔心默祷，旻雨应时。倡劝分之义，族相救赙；开续命之田，民无流徙。迄今江邑平巢之法行于他县，赖全活者无算，皆公遗泽也。又尝周视城居，旁稽旧乘，浚通渠以决壅，禁凿石以禳灾。一碧流甘，并有邳侯之泽；百寻

叠翠，山留羊祜之名。其尽心于江邑民事者如此。公之提身也，食不二味，裘尝十年，卧起有常，日忘疲惫，笑嘏不苟，人惮威严。法诚叟之潜心，此志弗欺乎暮夜；继考亭而论学，其功自勉以圣贤。虽博士田贫，常为孤寒而分俸；纵广文氈冷，且多宗党之待炊。由是妇孺知名，士民怀德。及告归时，自庠门达水次，衣冠饯送者数百人，虽疏广之出都门，搢绅祖道；侯霸之去淮郡，耆艾攀辕，不是过焉。谨查名宦有政绩彰著、乡评允协者，例应入祠祭祀。今公虽属闲曹，实多善政，舆论之称扬无间，黉宫之教泽常存。伏望请宪台，用光二十四年之嘉绩，转咨大部，俾分千百载之馨香。仰见圣朝之褒德无虚，风生泮藻；闾邑之去思弥远，荫在甘棠。拟合僉禀，叩乞察详，以昭典礼，藉慰下情。激切上呈，加看申详，会题请旨。奉旨：该部议奏。钦此。

礼部议得蔡英应准入祀名宦祠。谨题请旨。嘉庆二十一年三月奉旨：依议。钦此。

### 请恤大陈庄殉难申文

沈起鶚

案奉督宪札开同治二年四月十五日，据江山学附生汪敦厚禀称，为吁求补请赐恤，以慰忠魂事：窃生籍隶江山县，住居县属北门之大陈村。咸丰八年，石逆窜陷江邑，直扑生村。闾村团练，堵剿兼施，犹复相持七昼夜。后因大股骤至，众寡不敌，遂于初八日即被闯入，团丁阵亡者百余名。男妇或被掳不屈，登时遇害，或投缢自尽，同时殉难者亦属不少。旋于六月间贼遁后，当经生村绅耆禀明前县尊徐，转详议恤有案。缘徐县尊旋即卸事，此案曾否转详，无从查悉。伏思该团丁等同心杀贼，猝遭死亡，实属深明大义，忠烈可嘉，情殊悯恻，急应为之请恤，不便使其淹没。可否仰祈札飭江山县查明详办，以彰忠节之处，出自恩施，等情到本部堂，据此。

除批候，即札飭江山县查明详办，以慰幽魂。缴。等因印发外，合行札飭，为此札仰该县，即便遵照查明详办，毋违切切。等因。遵经卑职谕令，该村绅耆秉公查覆去后，兹于十一月二十三日，据大陈庄耆民汪位廷、县丞汪膏、训导汪敦厚、生员汪秉癸禀称：切耆等奉宪团练，于咸丰八年三月初一日，发逆窜陷江城，阖村齐心杀贼，斩获甚多。迨初八日，该逆大股骤至，众寡不敌，团丁阵亡者百余名，妇女节烈遇害亦多。当经禀蒙转详在案。本年夏月间，复恳查案详请。兹缘当时殉难情形，未经分别呈明，理合分别赴案再禀，并将十一年阵亡团丁及殉节妇女实在情形，开列名单。伏乞电核，恩赐分别专详，以慰幽魂，生死均感。计具清单一纸，等情到县，据此。卑职查看得江邑士歌置兔，俗强甲于三衢；民叹屋乌，城破丁夫四次。当咸丰八年暨十一年间，城乡各庄，痛分离于比户，张弧载车；明守望于井田，坚壁清野。其间北乡大陈村汪姓，居原聚族，志合成城，说礼乐而敦诗书，大节不亏于士庶，执于戈以卫社稷，孤忠自效夫童殇。临敌捐躯，识成仁之不易；阖门殉难，知视死之如归。巾幅有须眉志，不亚挖睛割鼻；渔樵谈节义事，无殊饮血椎心。洵皆一邑之完人，实秉两间之正气。宜标青史，以慰丹忱。曾经卑前县徐令据报，汇册转详，未蒙议恤。兹据该绅耆查明，咸丰八年死节实在人数，分别绅民、妇女，并将遇难各人，逐一声叙前来。卑职覆查无异，理合备文详请，仰祈察办施行。

《江山县志》卷之十一中

## 艺文志三

### 文 辞 记 传

薛侯去思碑记 明万历五年

徐 霁

古人有言，龚遂之买犊，一郡之三代也；鲁恭之驯雉，一邑之三代也。夫三代之治，超轶古今，若龚若鲁，一郡邑之良耳。后之论者，跻之三代之隆，以是知循良之治，自古为难。乃今观于鸣宇薛公，悦所谓龚、鲁之俦非耶？公膺简命，出宰江邑。江拥浙上游，山峭水激，民俗果悍，号称难治。迺因岛夷、矿盗煽孽，邻壤群蠹乘之，编氓益梗，遂用弗靖。余见田、邵养斋二公相继牧守，殚心抚循，甫克康乂。公整饬官常，剔除民垢，夙夜罔倦。法令齐一，毋苟文具。时方有垦田之役，弊端丛委。当事者欲速其成，公宽限而审核之，宿弊尽厘，卒以就绪。江俗负气而好讦，睚眦之怒，辄诬以格杀。伺公始政，相煽以眩听。公具烛隐慝，摘其一二大愆痛惩之。他邑之狱有不决者，当道屡委谏之。理幽伸抑，讼者胥服。岁比荒

歉，积诚露祷，不遑起居，又请官钱平糶储粟以赈贷之，故民不枵腹而旱不为灾。步鰲山水，其流峻急，自通贤门入，循渠而达北，汇于溪。渠道多为豪家湮塞，每霖雨浹旬，则浸灌庐舍，往来者率褰裳以济。公复其故道，而浚导之，民甚称利。公操履端方，性资耿介，包苴私谒，不敢至庭。贪墨豪右之党，尤所屏斥。暇尝下学，必课文会讲，剖析疑义，指示为文之标的，故一时士类喁喁向方。保伍乡约，行之既久，法弛弊滋，申令举行，剽窃潜踪，强梗循轨。其所以奠丽率作吾民者类如此。天子深嘉，擢为巡按御史。髦士父老，遮留弗克，然戴公之政如一日，相与鳩工凿石，建亭立碑于分司之侧。因次公之德政书之石，以垂久远。后之传循吏者有征焉。

易侯生祠记 明万历十六年

黄汝良

怀棠祠，江民怀邑侯易公而建，以尸祝之者也。祠在步鰲山正学书院之后。上倚岩石，下俯文江，人烟万井环列。仰眺俨若公之常坐堂皇而临莅之者。祠既成，邑父老子弟相与祝其上，而祀田未备，惧无以垂永久。属郡大夫鵝湖李公两视邑事，内美公德，外督輿情。于是嘉兴士民，拓田奉守，仍谗新尹紫垣张侯竣其事。侯歆仰规画，悉象公指，以故一时争输恐后。凡置田若干亩，以供岁时伏腊。适不佞之燕道衢，门人蔡惟范等授简不佞记其事，不佞得为李公倩，素熟三衢故事，闻公治状甚具。公故常守御史台，风裁峻整，号为贤使者，会以他事，左迁江山令。始江人慑之。公至，独循循为理，其言曰：“御史务在激扬，宜一切以柱后惠文从事，令乃奉法循职耳。且吾终不薄令而弃民。”故其治要在坦易而廉平，諏咨民瘼，起便除害，使人人得所欲。邑无问士庶，妾有媵，莠有恤，鰥有娶，以至吁神澍、驯妖鸞、清丈田税，以汰宿弊，积年狙佞无敢窥牟者。致庭无宿讞，野无捐瘠，岁稔物阜。乃开文明池，创文昌阁，

诸士奋兴，藉以起家高第，接踵于公车，斯不亦悦安强教、恺悌父母者哉！世之迁客傲吏，往往厌薄卑琐，视令若不屑，大率秦越其民，民亦秦越报之。乃公之秉宪，严重若彼，而其为令，优优若此，此殆中心慊怛，而百世之仁已。盖畏垒大穰，庚楚祠焉。凡以报有功，志不忘也，固有血气之所同也。以公之为德于江，固宜永永食报弗绝。后之观是祠者，感江人报德之厚，而思所以及人之深，其亦足以风矣。不佞乃不辞而为之记，俾问俗者采焉。

翁先生去思碑记明万历十九年

陆可教

见溪翁先生，得海滨邹鲁之学，以闷抱醇诣，推轂闽土。及授江山谕，立规条，率弟子，务在敦伦常，诚心意，培节气，戒靡随，黜浮崇恪，先行谊而后文艺，申飭乡射祭飨，咸悉追初制。严核校课，出俸为饷。有寒馁不给，葬娶不迨，请学租贖之。岁连饥，先生蔬糗自节，推食馁士。时倏陈荒政，曰闾阎之枵腹，尚得颡首求殮，独衣冠槁立者，既不能出污力以潦口，又不能捐廉耻以苟生，所赈宜在民先。当事者感动，济特厚。有负冤蒙辱者，核其状，力白于郡邑。及申行古礼明正，学邑之风习以变，文运日隆。适擢授延平郡，江人士乃植石于明伦堂，以志不忘。不佞有感于先生，而深尤世之官校序者，漫处其地也。当汉任律令刑名，董、贾辈忧之，遑遑陈说王道，在兴学校，正博士官，修举礼、乐教化。考汉中叶，风移俗易，彬彬三代风，是詎无本哉？今列土籍者，稍负岐玮，辄薄俎豆为不足。若先生之身任世教，而悉心造士，端表维风，非以道守官，不随世流者哉？后之立此堂者，无漫视其官而虚国家化成大端也。

薛侯祠记明万历二十二年

西安徐一横宾梧

祠在江城北。江民感侯德而树之，以传后世者。以徐正节祠

为宾，以余、邵二公祠为邻。缙绅过是都者，谏其恺泽，靡不式而叹曰：“此真父母，生民者模楷也！”维时郡大夫鹅湖李公、邑大夫紫垣张公，嘉民之久不能忘，而益重侯德之人人者深，爰以其事命记之。余与侯契，知侯治为甚，悉侯性度廉平，才算精敏。初莅江时，尝揭示曰：“理民如理苗，欲苗之茂，必先耨其害苗者。”故意在煦妪振刷先焉。江俗故刁犷，动以睚眦小忿构结大狱，执牍之吏久从利其陷，遂令坏费者接踵。侯深烛奸欺，以片言折之，而曖昧立晰。赋税输纳，包揽侵牟而管钥乾没。侯痛摘夙弊，仍立缓征调停之法，凡豁鬻贷而赔国课者，不啻数百十家。且此时务如蝟起，而侯爱民造士之心殷殷不少，置立保甲，建义仓，申乡约，奖节孝，扬隐逸，时诣学宫，扶輿讲艺，立会设饩，躬亲品题，有校士录以行于世。他如祷云墮，甘澍随车，民颂之曰薛公霖；行街衢，疏壅拯淖，民颂之曰薛公河，皆班班可书者。侯之为政，大都期便，民不恤不黷，剔<sup>①</sup>蠹不畏强御。见人肺肝，不伤于苛。悯人洼误，不沦于愒。应纷拿繁剧，不辞劬瘁。居官数年，行李不能易敝篋。以故中外震肃，比户可封。当时清丈有碑，恒爰有录，薛神明有谣传，至今一衣一粒之安享，一子一女之畜衍，一俊一髦之奋兴，与夫一作息、一出入之熙熙愉快者，咸归侯之盛德培养有以也。夫涂民之耳目者，上下秦越相视，不可胜数，安有如侯之感民、民之戴侯愈久而愈不忘者？余故乐为之记，以俟传循吏者采焉。

### 养斋邵公不諠碑记

明赵 铨

公蜀都夔人也，讳仲禄。登隆庆戊辰进士，初拜令江山，膺内召已七载矣。父老子弟思吟日起，其教化风声在人心者，若一日

① 剔，底本误作则，本标点本据康熙《江山县志》卷之十《薛侯祠记》改。

朝。侍御霍冈易公令邑，首以是请，遂植碑于泮宫之左，题曰不諛，托卫风遗咏也。属余笔其事而镌之，余曰：侯天下士也，昔召司舶九江，秋毫不浼，除旧舶税半，商民父之，构洗心亭，勒功江浒，声满朝野，即推司天铨，世仰贞白，当有太史笔之者。余无远引，略志其令江之迹，以风来世。侯性廉介，鸩视势利，卓然有激浊之志，治江剔污弊，罢冗力，抑靡度，口不兼旨，体不重帛，尚德劝义，贵嘱豪赂之风熄。约老幼士庶于乡，月谕而旬劝，有服义敦行者奖，不率者警，民争向风，途揖让，户仁义。当宿税祸民，境多流散，乃举清理法，民乐更生。又收其闲田租二百石，籍于学，岁赙乏士，及给缮宫宇，月校士者三，有饷有劳，躬亲面订，肯肯发圣贤大旨。凡此蒸动骏泽，皆根于心，率于身，而沦于民之肝腑，培于民脉，垂之山川，耿耿而不磨者也。他若迁启圣祠而庙制崇，开四门墟而方物通，崇正学，君子有所劝，小人有所耻者，奚愧于卫风所咏哉？故碑之宫墙，非曰志思树师的也。后之履斯庭诵斯碑者，惕然师公于百世上，斯碑之补于风教者，岂浅鲜哉？

### 张侯怀德亭记

侯官翁正春

士才在宇中，为气化符征，陶植振育，以长其才猷，全其节义。使出而经国庇民，砥砺世道，良有司事也。江山昔称才藪，无论藉载，诸贤哲以正学大义昭揭百世，即嘉隆间，名弼萃兴，天下且藉藉焉。紫垣张侯令邑，先軫民隐，息惫役，蠲冗课，汰积奸，布利剔瘼，百颓具举。悉心造士，约文课于序堂，严规优饷，熟校而精别之。妾赈以粟帑，助以婚葬，表孝旌义，激励其行。且深为气化虑，度山川之胜，而巩其邑脉。重构明伦堂、新宫庑，相邑北缺捍，亟为建塔。是侯于士也，振文艺以立其基，布惠泽以养其廉，隅修山川以培其气，化于心力，不殷且周哉！适擢召庠弟子员相谓曰：“自令邑

来，育才若侯，希遽也。弗志何以示不忘？”乃琢石构亭于文明池上，属不佞记之。不佞以家君常谕是庠，时趋省，稔侯殊迹，遂颀然曰：令所职，邱乘校序，以养民教士，两者相济。《春秋》称子产众人之母，以能养之不能教也。夫士为邦国赖，方阨在莽泽中，犹嘉苗芳荃，弗灌而培之则萎矣。惟良有司匡直汲引，全其气，展其抱，使出而上干宗社，下惠群生，其资于养民者，顾不巨耶？近世吏类薄令，而邮旅其邑，则视学校人才之隆替，何啻秦人肥瘦。今侯为国育才，殷于为家人子孙谋。他日有奋文章、负节义而起，光炳天壤，翊宇宙之气化者，侯所遗也。侯之急民务与造士，类若建义学，起社仓，申乡约，正礼俗，鼎造正堂，创药皇阁，疏水利，布荒政，修大义祠、正学书院，而选置其田，枚枚皆不朽图。已载于仁政，录去思碑，为士氓所讴吟而尸祝之矣。是为记。

### 姜肖谷广文海宁去思碑记

陈扬明清源

方今智愚共治，利钝聚域，鼓铸转掬，俾顾化无败群，重在守令乎？师表乎？读周官设庠序，联师儒以离经辨志，阅三载而知类通达，然后可化民成俗，师表实藉令功半矣。扬明奉天子命，治海昌，窃有志兴教化，自揣无文翁武子之德，约结未遑，居常深念曰：“安冀得如苏湖，共翼重肩？”下车，接广文诸先生，皆有道仁人也。辄然，姜君肖谷尤端正朴谨，大是葛天，骤之而木鸡乎？杜德机乎？徐之而金相玉质乎？习处狎主，扣之而腹笥武库乎？暇时与长水李君云麓倡和春深词，汪洋洒瞥，吾惊悚其言如江河之无极乎？有诗籍行于世，惚恍貌沉宋，其谈经析理，摭古抽今，言言入元，听者解颐。木樨风传，玉尘挥指，不啻生公说法，参证无上法门，石自点头也。渊源家学，盖不虚云。立身严，竖坊表以礼义名教为宗，多士心仪之，被于海昌，浸浸化漓为淳，溯却昔日难治声。夫学校有

师表，贤士之关，众庶所风也。不模不范，士奚则焉？士不率则民其颇矣。守令即日绳三尺鞭其后曷益，是师表大有裨我吏治也。予沾沾私自喜，藉手报命矣。主爵廉君善状，超擢河南归德府授。河南古中都地，盛衰关天下治忽，非得君模范不可。归德者，意取归有德也。显标有德，以公之天下，海昌人士安得私之？予亦安得私之？余今有人觐之行矣，三年奏绩，无寸善可自述，恃有君师表在。倘主爵者谕及君德行文学何似？可以速肖海昌人士乃尔，予将昌言之。计且宠以蒲轮，征三老五更，裹智愚利钝，入大炉锤中，化民成俗，岂局在海昌，局在中都地？诸士去思，转自辄然，奚独余哉？因诸士请，记之石。姜君讳尚宾，字用光，别号肖谷，浙衢之江山人。

国朝

铁井阑记康熙四十六年

宋俊

读《易》至有言不信，尚口乃穷，而窃叹黄寓庸之善于谈《易》也。其言曰：孔子韦编三绝之后，至亢龙有悔，喟然曰：知进退存亡而不失其正者，其唯圣人乎？至困而亦喟然曰：困而不失其所亨，其唯君子乎？一则得意之极，而知失故常得；一则失意之极，而知得故无失，旨哉言也。然愚又读序卦传而得其解矣，曰困乎上者必反下，故受之以井，井木上有水，象谓养而不穷，而象以劳民，劝相释之。呜呼深哉！愚于丁亥夏抵须江，盖三十年前缮兵之地也。谒先圣于学宫，拜且起，瞻顾旁皇，有风景不殊之感。继饮水而甘，以为殆汲诸流泉者。有一小史髭而皓进曰：是井也，在坏墙之西。偏趣视之，荒榛蔓草，若有岿然现头角于中者，则一铁井阑在。予环视大骇，而叹此物之不与钟镛鼎釜铸而为炮铍而为丸者，必有造物以主之，而非人力之所能藏弃也。俯而思，仰而吁曰：九三之爻

命之矣。解之者曰：井渫不食，而使人心恻，则可用汲矣。施与受并受其福者，微高宗之梦賚，则霖雨为版筑之污泥，非穆考之后车，则磻溪亦钓徒之腐水。然则无禽者，时舍也。射鲋者，无与也。逮瓮之食之，而归于勿冪，则出之有源，而应乎无穷。井之时义，顾不大哉！虽然井道不可不革也，阑亦无所用之，乌乎铁。

### 新建广益斋记

康熙四十六年

山阴吕光祖耀公

尝考邑之有黉校也，于司铎外，例设东西二斋以佐之，法至善也。国朝省其一，而两斋亦毁。康熙甲辰，裁教谕，以训导兼。丙辰复旧制。然自闽逆之变，学宫沦于马肆，官斯土者，率僦屋以居。岁癸未，余捧檄至此，仅有敞屋数椽，依于讲堂之右，乃稍葺之，以蔽风雨，颜其额曰集思。又数年，始于东偏缔构三楹，为燕寝之斋，额曰广益。华则不足，朴乃有余。宁敢效卫公子之居室哉？亦聊以容吾膝而已。按邑志，学斋创建于明之嘉靖，实邑侯陈福清任之，嗣后兴废不常，亦无有人起而仔肩其事者。余不敏，不能为芹茆生色，第拮据经营，历有年所，而泊于落成之候，始觉日计之不足而月计之有余也。姑为之记。

### 京都江山会馆记

明天启三年

邑人徐日葵藿心

天启癸亥，九月既望。新馆成，维时乡绅梓戚咸造焉，举觞酬贺，谈及不佞功。不佞则避席谢曰：“以天之道，须江之灵，荐绅耆硕之力，获报成事。不佞何功之有？”虽然无言今日，请言往日。于是座中悉颺言曰：“吾邑先大夫或筮仕郡邑，或晚秩台衡，或出入京华，迄无常趾，嗣牵车服贾者间一二至焉，岂有待未遑与？馆之议自毛子应麟始，慕义乐输者踵相接。第居城东偏，制故庠小，天意与之更新，而藉手于大夫，卜居城西，厥地爽塏，厥材孔良，且念力



## 省会須江公所碑記

邑人何咏梅雪堂

杭為東南一大郡，士人輻輳，商賈雲集，蓋會集之區也。凡各鄉應試省垣，暨貿易斯土者，置舍其中，以為往來憩息之所，謂之會館，稱美舉焉。吾鄉須江，浙之上游，自灤溪以達錢江，計程將六百里，舟檣無恙，共慶安瀾，使非有安居以栖止之，不几動離鄉之感乎？今構館於杭之江干，實此意也。余嘗讀《周官》之書，見三代之世，十里有廬，廬有飲食；三十里有宿，宿有路室，路室有委；五十里有市，市有候館，候館有積。悠然想見其物產豐饒，人民和樂。舟車所至，異地如歸。非但風俗之茂，經畫之詳，實由上之人，正民之德，厚民之生，任之以九職，頒之以十二事，其大者則有候人掌客，授旌節以迎送之矣。而又慮小民牽車服賈，野宿堪虞。于是有安商旅之政，相矜相恤，所至獲安，而無行道之苦焉。然則今之寓于斯者，當思聖天子德恩汪濊，無微不至，以故百靈效順，六合同風，市廛之間，粲乎隱隱，各得其所。凡吾儕之得安業而樂生者，其由來豈偶然哉？廟凡數十楹，前臨江干，後倚河側，穹窿高寬，規制粗具。自嘉慶戊午捐金創置，葺而新之，嗣又歲入商捐，續增產業。不特來斯貿易者有所栖止，即勤王事者，經此亦堪以資晏息。凡我始事諸君，其志誠足尚也。後之附其役者，亦頗竭力效能與有力焉。此余所以樂為記也。

## 文溪書院新置萬青山莊田碑記 乾隆四十一年

宋成綏

從來善作不必善成，非事勢有必至。人心不足以持久也，惟守之以誠。精明強干者為能，積久而不弛。文溪書院經始於宋君雲會，廓而大之則雷君士佺。斷歸訟田，弦誦有資，藏成在余。經畫既定，眾善欣助，則毛君錢實專主其事焉。弗制以官，弗扰以吏，以

邑善士所出，以善邑士，立法善已。然而为之甚难，田亩不一其处，佃户不一其人，出纳不一其期。催收谷硕，担运崎岖，雨霖日炙，疲茶已极。脱遭歉岁，更逢敞户，时绌举赢，先事之谋，倍劳心力。故短于才者不能为，有才者亦不肯为。而毛君则不惮为之，不特仍岁无乏，且谋所增益以补不足，使更为之数十年，其规模又当何如哉！夫力出于众则易成，事归于一则不紊。毛君约丰歉之通而为之计，择人而分其劳，铢金粒米无敢私，故数一切经费，月要而岁会，必核其实，故出课则盘餐供顿，出诸君厨婢仆执勤奔走，给使如家事，故用不滥。盖惟其好义之诚，果于自任，不避怨嫌，而一出于公正廉洁，故能始终如一也。毛君敦族谊，重然诺，豪骏伉直。人有不可排之难，得君即解。家非饶裕，而邑有善举必先众，诸皆倚君以办，无论贤愚、识与不识，莫不以为江山巨擘焉。今修邑志甫竣，而君遽没。行道之人，靡不太息。余愧未能以其行谊列诸传，以激扬风义。因诸绅士请，植是碑，附述君大略，以视久远。庶后之辑志者，亦有所稽云。

### 孝妇汪氏救姑记

蔡 英东轩

江邑南城民徐国祥之妻汪氏，北门汪伯友女也。翁早逝，事姑甚谨。姑病瘫危笃，氏刲股以疗，姑寿复延五载，举家人无知之者。今十一月二十五日氏病已绝，邻之唁者数辈矣，忽甦而语，徐自道其疗姑刲股之事，且令子妇共视之，创痕犹在。少顷乃瞑。余尝稽之律典，刲股卧冰，均不予旌表。然如氏之情切爱姑，无可如何而出此，且隐之终身，至死而不以告人，其志亦大可悯矣。迨既死而甦，而后言之，此非其卒欲人知，乃天之鉴之怜之，而不忍没之也，抑或特彰显之以教孝也。故为记其实，而赠额以表其闾曰孝妇之门。

## 须江各姓平糶记略

蔡 英

岁壬子，江之邻邑广丰、玉山，均以饥资余于江，而江岁亦不甚稔。癸丑夏初，二麦歉收。五月中旬，米价腾贵。其素称殷饶积粟诸家，多于春杪糶卖，仓庾一空。贫民有赍钱携囊，犇走街市而不得粒米以归者，众惶惧不知所出。城乡诸族好义士，爰倡议设厂平糶。旬日间，远近响应，其赍或举族量力输捐，或一族中竟出数家独任。有储粟者即以粟输，无粟者捐钱向龙游、兰溪、桐庐各邑购买转运，并有家非素封而勉力踊跃以应者。其厂则或设于本族宗祠，或别择公共房宇。其任事之人，则各姓族房长为之董，率而少年强壮有干能者，或采运于外，或筹办于内。其价较市值每升或减八文或十文或十数文。或只及本族；或兼及外姓；或按户计口，每人一日给余若干；或不计丁户，凡遇一人赴余，即定限给米若干。始于仲夏，届秋而止。当青黄不接之候，市铺中米日益少，余日益艰，而向之负囊奔走不获粒米者，竟咸得减价，而不虑无告余之地，则诸族捐设平糶之施惠于贫户，甚不浅也。夫人情一钱一粟取诸己以与人，辄有吝色；一朝一夕出其力以济人，即有德色。而是举之费，有一家而输金千计与数百计者；是举之劳，各祠内族长董事多历三四十日不得自视家事者。于此，见此乡人士之竞于趋义，而异日凡有灾歉，皆得举此法以惠济族党，救恤困穷，安知暂行之善举，不即为永垂之仁术乎哉？因为略记巅末，俾诸族各志字名，以为后来者劝。

## 毛赞行墓碑记

长沙徐树铭

浙江自三天子都回折而下，与浙江合流。其在富春以上，潮汐所不至，故无惊波鬣澜，冲融演漾。岩石如玉，草木秀乎。江岸三

郡，为严州、金华、衢州。其君子都雅而多文，其小人夷怪而不竞，往往俊人逸士生于其间。毛君者，衢之江山县人。少读书为学，不自达于有司，乃去学贾。行止必端，取与必慎，侪偶咸推之，以起其家。君无喔咻出内之习，尝自恨废学，故课二子，寒暑受书，二子遂能文。咸丰八年之春，粤贼石达开自江西窜浙境上，仙霞岭有兵阨之，不得上，乃间道入江山。君素为里党推敬，有司任君练集壮勇子弟千人，君遂将之，数战山野间，贼少挫。当是时，浙东诸郡戒严，省城震动，而江山蔽其冲。诸郡邑机捏守御，无能为江山助者。君转战于野外，贼大队淹至，众溃，城遂陷，贼大焚掠。君时收余烬于山谷中，谋收复，为贼所侦。顾贼已踞城，衔君甚，百方罗得之。君义不受辱，不屈而死。既死，贼众惊叹，予以棺，寘神祠中。六月，县城复，君妻子乃得归，始知君死状，易棺以殓，盛夏颜如生。其妻乃恸哭殉君也。予视学入闽，溯江至其地。兵火之后，逆旅无所，馆于其家。同行友人得其事以告，其子泣血匍匐来，乞为表幽之文。予哀君抗威不辱，义气之大感动豺虎，向所谓匹夫不可夺志者非耶！君名赞行。祖镜，县学生。父鹤仙，监生。卒时年六十岁。妻严氏哭君继丧。子鸿泰、翰藻，方读书。予见之朴而有礼，知君之教也。君居乡行事多可称，今志其大者。铭曰：

三峰□立，江郎之山。如古丈夫，端委佩环。彼都人士，毛君无愆。幽宫沉沉，安兹九原。

### 毛谏议传

《宋史》

毛注，字圣可，一字圣远，衢州江山人。举进士，知南陵、高苑、富阳三县，皆以治办称。大观中，御史中丞吴执中荐为御史，诏赐对，未及而执中罢，注辞焉。徽宗固命之，既见，谓曰：“今士大夫方寡廉耻，而卿独知义命，故特召卿。”即以为主客员外郎。俄擢殿中

侍御史。蔡京免相留京師，注疏其擅持威福，動搖中外，以葉夢得為腹心，交植黨與。帝逐夢得，遷注侍御史。遂極論京“受孟翊妖奸之書，與逆人張懷素游處，引凶朋據置政府，用所親宋喬年尹京。其門人播傳，咸謂陛下恩眷不衰，行且復用”。於是論者相繼，京遂致仕。四年，彗再見。注又言：“臣累論蔡京罪積惡大，天人交譴，雖罷相致政，猶怙恩恃寵，偃居賜第，以致上天威怒。推原其咎，實在於京。考京之罪，蓋不可以縷數：陛下去《黨碑》以開自新之路，京疾其異己而別為防禁；陛下頒明詔以求天下之言，京惡其議己而重致於法。以嚴刑峻罪挾持海內，以美官重祿交結人心；錢鈔屢更而商賈不行，邊事數興而國力大匱，聲焰所震，中外憤疾。宜早令去國，消弭災咎。”奏上，京始出居錢塘。注復采當世之急務，曰省邊事，足財用，收士心，禁技巧。大概謂：“近年以來，邊民僥倖苟得；昔所入貢者，今必城為郡縣；昔所羈縻者，今盡納其土疆。以內地金帛，而事窮荒不可計之費。今黔南已有處分，如夔、渝新邊，宜在裁省。運鹽昔主于漕計，今移於他司；常平昔積於外州，今輸於都下。經費安得不匱，財貨何以轉移？願詔有司，悉講復元豐舊制。湯之遭旱，以士失職為辭。今學校養士，蓋有常額，額外之人，不復可預教養。歲貢之余，略無可進之地。願留貢籍三分，暫存科舉，以待學外之士，使無失職。東南造作奇玩、花石綱舟，與后苑工徒、京城營繕，並宜暫罷，以抑末敦本。凡此，皆聖政之所當先。人心悅則天意解矣。”注所論切於世務多類此。遷左諫議大夫。張商英為相，言者攻之力，注亦言其失大臣體，罷，提學洞霄宮。居家數歲，卒。建炎末，追復諫議大夫。

### 正節徐先生傳

劉汝鈞

徐應鑣，字臣翁，衢之江山人，世為衢望族。咸淳末，試補太學

生。宋恭帝德祐二年，元将伯颜帅师次于皋亭山阿，刺罕、董文炳之师皆会游骑至临安府北关。宋臣文天祥、张世杰请移三宫入海，自乃帅众背城一战。宰相陈宜中不许，而太皇太后、后遣监察御史杨应奎奉表，上传国玺以降。伯颜受之，遣人奉玺表赴上都。张世杰以不战而降，遂与苏刘义刘师勇各帅所部兵去临安，入于海。宋以文天祥为右丞相，至元军，见伯颜，辩论不屈。伯颜大怒，遂被拘留。伯颜自湖州市入杭城，馆于万松岭卢原宅，大宴诸将。谢太后及宋帝欲与相见，伯颜固辞曰：“但见天子可也。”伯颜命阿答海、张惠阿、刺罕、董文炳等迁宋三宫，期会于瓜步。阿答海等人宫宣诏，免牵羊系颈之礼，宋帝拜谢。礼毕，与皇太后全氏、福王及度宗母隆国夫人黄氏出宫。时宫室暨驸马都尉杨镇、知枢密谢堂、签院高应松、庶僚、三学诸生、内侍等皆北行。惟应镗不从，乃与其子乡贡士琦、崧，女元娘誓共焚，子女皆喜从之。太学故岳飞第，有飞祠。应镗具酒肉，祀飞曰：“天不祐宋，社稷为墟。应镗死以报国，誓不与诸生俱北。死已将魂魄累王作配神主，与王英灵永永无斃。”作诗云：“二男并一女，随我上梯云。”琦亦赋诗以自誓。祭毕，以酒肉饷诸仆。诸仆醉卧，应镗乃与其子女入经德斋梯云楼，积诸房书籍箱笥四周，纵火自焚。一小仆未寐，闻火声起，至楼下穴牖视之，应镗父子俨然坐立，如庙塑像。走报诸仆，坏壁入，扑灭火。应镗不能死，与其子女怏怏出户去，仓卒莫知所之。翼日，得其尸祠前井中，皆僵立瞪目，面如生。诸仆为具棺，殓殡之西湖金牛僧舍。益王立福州，褒其节，赠朝奉郎、秘阁修撰。后十年，其同舍生刘汝钧率儒者五十余人，收而葬之方家峪，私谥曰正节先生。

## 国朝

## 柳待制传

宋 俊

柳待制，名贯，字道传，浦江人。生而颖异，弱冠受经于仁山金履祥，既而从方韶父凤、谢皋羽翱诸先辈游，历考秦汉以来文章之变化，师友相资，渊源不绝。稍长，入大都。吴文正澄一见奇之，程文宪鉅夫授以古墨一丸曰：“文章正印，今属子矣。”大德间，以荐举为江山教谕。颜其斋曰静俭。起衰救弊，多士景从。同里宋潜溪濂闻风向往，受业其门。而临江危素，复间关来访，馆留者久之。未几，迁昌国州学正，历国子助教、太常博士，预太子册礼，与袁学士桷、马中丞祖常扈蹕上都、桓州、滦水之区，凭吊者无虚日。有柄臣欲以其祖配食孔庙，众莫敢迁，公毅然争之，乃止。有神降于洛，守吏乞加封号。公谓：“神奸鼓民，不治将乱。”礼部如其言，事得寝。未几，出为江西儒学提举，士风大振。檄讯南康狱，平反者多。至正初，召为翰林待制兼国史院编修，策进二充阅卷官，左右二榜，号称得人。公历仕九朝，始终一节。年七十三，以疾卒于官。谥文肃。有集四十卷，同郡黄文献溆称其“沉雄雅健，一如其人”。吴渊颖莱亦谓“尚有欧、曾旧典型，森然人物，照青冥也”。余具《元史》。

外史氏曰：江学有永怀堂，俎豆前哲学博，得三人，皆明达也。其行谊不少概见，而待制声名藉甚，与黄、吴二公鼎峙浙东，吾家文宪实为高弟。而邑志不为立传，此邦人士亦无有识其姓名者。愚于三百年后，而适继其席，因铭其轩曰授墨，以志景行之愿云。

## 方虎邻传

施润章

方召，字虎邻，宣城人。为诸生，贫蹇矢志。明亡，山谷兵起。召辄集乡勇号义兵，久之不利。闻明之宗藩有称国闽浙间者，脱身

走从之，授兵部司务，署衢州江山县事。县交闽越，道苦驿骚，官又乘乱渔利自便，有急则走，民益病。召至，誓父老，宽征敛，自谓：官兵曹法，得戢兵禁，往来骑使，毋暴民，毋横索厨传。民呼真父母。时王师定浙江，金华府久抗不下，屠其城。师次江山，人皆震恐。召谓事已去，毋徒残民，许父老迎师，而肘系其印，冠带北向拜曰：“孤臣无状，以死报陞不。”自投井死。丙戌八月七日也。在县仅二十九日。出其尸，如生。咸叹曰：“骨冷泉香矣！”今置亭井上，曰冷香亭。盖县斋之西偏也。昼夜常形见，官为位祀于署，民像祀于庙。左右二楔，大书：不爱钱，不怕死。盖其视事时，常牌书此六字，出则使人负以前驱云。墓在城南景星山，碑曰：明忠烈江山县侯方公之墓。康熙七年，同里施润章过江山，至井亭，赠以诗曰：濯骨寒泉回绝尘，为全黎庶不全身。谁知一月江山令，竟作千秋俎豆人。邑人哀思之，复乞为之传。

### 吴烈妇传

邑人毛 苍玉茵

烈妇姓周氏，名亥贞，余里吴三让之妻，秀峰周子仪之女也。年二十三归吴，奉箕箒成礼，处妯娌成欢，事姑嫜成敬。邻族交羨，谓吴门有贤德妇。逾年，三让婴瘵，妇日侍床药无倦容。及产一女，尤自若也。让瘵入膏肓，遍医莫效，密夜祷天，请以身代，因女啼自讼，让始觉曰：“尔无过哽，我自悔以数年夫妇误尔身。若死期年，尔当别适。”言之舌梗，妇泣对曰：“君幸自爱，倘不幸，不疾七，妾当随君后。”复强颜抚摩其女，以宽让心。某月日以急事归宁，与母道让疾，辄失声不食。未几让告笃遣迎，辞母曰：“儿去，此后恐不能再见母也。”抵间，越二月，让死。妇擗踊号恸，投地欲殉，见者莫不流涕。姑嫜环护，妯娌伺起居，即改容如平时。午夜犹与让尸同寝兴，迨易箴，亲为涤沐，凡纪纲殓具，周身周衣，必信必诚。至

七日暮夜，有上馈涂羹之例，以迎亡者，随众出，从容叩拜如礼毕，还至柩前，犹哭拜，复遍拜姑嫜妯娌。少顷婉颊，自抱其女授之姑曰：“如此襁褓，半向自如，亦可渐离母也。”乃乘间入室自经。良久，姑往视，惊呼殒地。众迫视之，气已绝。及解，上裳缝于袂，下裳缝于裤，袜履并缝，无一不密。呜呼，烈矣！妇之践言于一七日者，信矣！及阖棺时，颜色如生，不少变，贞矣！时康熙丙子年十二月二十六日也。距其生年二十有六，以岁除二十九日，同穴葬于蔡家山之阳。呜呼，烈矣哉！

### 毛立斋先生行传

李因培

余考自来吏治，惟汉最为近古。然前汉所载循吏仅六人，后汉所载则十有一人而已。何政治之卓卓可纪者鲜也？乃观我老父台立斋先生，非所谓古之循吏欤？先生自乾隆甲戌授北城兵马司正指挥，留心弹压，境内肃然。时谓北门锁钥，非公不可矣。既而秩满，升授云南晋宁牧。晋宁，余父母邦也。公莅任，家属不携，只以一子一仆自随，视当年清献入蜀，其清风不几与俦耶！且晋地当滇东孔道，民苦差役。自公下车后，大宪往来，一切夫马，未尝累及民间。而又勤于听政，庶务躬亲，并不假缺客莲宾之手。暇即亲至庠序，激浊扬清，俾士子争自濯磨，至今文物之盛，犹感公作人力云。然而公之德化，尤有神者。曩余郡中有某，自晋宁来谒余，语次及公，说某夜城中失火，比屋延烧，风势甚猛。公不遑俟车，披衣出救，望空祝拜，火遂灭。余曰：“异哉！昔《汉史》称刘昆守江陵，反风灭火，不图于公今日见之。真可谓吾滇地庆矣！”未几，岁庚辰，余奉命视学浙省，正欲临衢，而公之讣适至。余震悼者久之。盖以为当世哲人云亡，哭且为桑梓失贤父母悲也。呜呼，公今逝矣，遗爱在人心。吾知必有如尹翁归之治蜀，召信臣之治南阳。生有荣

号，歿则奉祀者，谓为古之循吏，洵不诬也。

### 太守何公传

帅承瀛

公讳茹连，字萃拔，号吉茆，姓何氏，宋鹏望先生之后，江山人也。四世祖封襄阳太守，治第市东，名大夫巷，迄今世其居焉。余自癸丑与公哲嗣雪堂同寓京邸悯忠寺读书，其中晨夕盘桓，爱逾兄弟。时雪堂为贤公子，每述其家君宰闽政绩，卓然可纪。丙辰，余幸捷南宫，雪堂以孝廉例授内阁中书，母老乞养在籍。今岁复会于浙江巡抚使者之署。离别良久，得见故人，快何如也。雪堂出自撰其尊人行状，余因为传。按状：公以乾隆乙酉选拔考补正蓝旗官学教习，选福建海澄县知县。澄邑滨海，洋匪出没。公擒获巨魁，盗风大息。上台由是器重之。历任南平、尤溪、同安、台湾诸剧县。所至望风慑服。去任之日，父老以彩帛书“民之父母”四字，焚香送者，随地皆然。嗣由卓异保荐，题补淡水同知，寻擢广东潮州府知府。潮与闽接壤，公以治闽者治潮，积劳成疾，遂卒于官。呜呼，公之治闽也，闽之人能言之；治潮也，潮之人能言之，奚待余言？而余由数十年入于耳，尝记于心者，独于公宰同安御事时，委鞠盗案。闽之官多以缉盗为能，盗既获，杀无赦。中有无辜株累者，不知凡几。公廉其实，一一均予省释，活人甚众。其阴德非偶然也。宜其后人，衣冠济济，项背相望，诗书之流泽孔长矣。可不勒为家乘，载之邑志，以俟采风者之择而取哉！是为传。

### 蔡东轩先生传

道光十二年

开化戴敦元

壬辰之春，吾邑学博蔡君莱峰以书来，乞余为其尊甫东轩先生作传。初，癸丑释褐回籍，得晤先生于须江学舍。余固习闻其官声，而又亲炙其道范者也。今其嗣莱峰又司铎开阳，为两世道义

交，是传先生之为人，宜有待余一言矣。按先生讳英，字蕃宣。东轩其别号也。居诸暨之岛桥路里仁庄。祖芦山公，邑庠生。父蕙亩公，郡增生。蕙亩公卒时，先生甫九龄，赖母钱太孺人辛勤抚育。年十四五，立志即以圣贤自期。弱冠后，家贫，授徒于外，从游者数十人。先生先器识而后文艺，时飭以孝悌忠信、视听言动之则，行止偏僻者正之，天资钝劣者不苛责之，诸弟子无不中心悦服。乾隆丁酉，领乡荐，时年已四十矣。先生锐志名场，非欲博朱紫邀显荣也。盖实有为国为民之心，故六赴南宫不第，未尝愠见于色。庚戌，铨授衢州府江山县学训导。既履任，凡有关于学校者，悉心尽职。丁祭必诚也，月课必严也。又尝修葺学宫，创建书院、文昌阁，工作不惮一举再举。其受业门下者，薰陶切劘，咸知砥砺名节，不独文章蔚然可观。先是，岁偶歉，江民艰于糴。先生劝于各族，平糴以周民食。嗣后，每遇荒饥，踵行之，活人无算。辛酉五月，衢属水灾。抚宪阮委查五县仓廩煮赈，单舸往返，不受馈遗。七月，暨邑水灾，专委赴原籍董理捐赈事，次年事竣回任。又江邑有斋徒抢夺畜牧，至擅杀人者，几酿变，先生廉得其人头目里居，稟请巡道，获其魁首，党徒遂散。朱大府、阮中丞并欲保荐卓异，固辞乃得已。癸酉夏，告归。自庠门达水次，钱送者数百人。道旁观者咸歔歔叹息曰：“好官去矣！”甲戌年，七十有七，寿终于家。江人士闻讣哭泣，即制木主，送入怀棠祠。越二年，江人吁请从祀名宦，暨人吁请从祀乡贤。余详览事实，知先生少孤，不逮事父，犹逮事王父，尝得老人欢，又事母，侍养葬祭，尽礼无憾。与从兄比居，若亲昆弟，视从侄犹子，所得馆谷，半以资之。戚友有窘迫者，倾囊以济。遇乡里义举，不恤勤劳，为人排难解纷，出数语剖之，悉平。及服官，淡泊自奉，宦橐萧然，不复增置一产。是盖孝友本于天性，俭朴得之生成也。平居著作甚多，凡传记无关于名教者，概不录存。晚年乃

手集一编，名曰《俟采副草》。其人品学术，略见于书。而要以诚意正心致知力行为实功，故临歿前一月，病几殆，有与江山门人书云：一息尚存，此志不容少懈。盖自道其实也。今先生不可见矣，莱峰倘以先生之训江山者训开庠。余能无厚望乎哉！爰乐为传，附诸邮筒以寄之。

孝子朱尚聪传道光六年

徐庚瑞

太学生朱公讳尚聪，字作谋，号南麓者，旌褒入祠孝子也。其先世瓌公，原籍徽州婺源，至副使公迁衢之西安，至大受公移居吾邑南乡长台。曾祖万缙公，祖职员孔阳公，父上舍项公。孝子系项公所出长嗣也。孔阳公早世，其孺人柴氏守节。项公娶孺人汪氏，生三子一女，旋以咯血成疾。孝子年方幼稚，即知侍奉汤药，衣不解带者累月。及父病笃，焚香吁天，请以身代。无何父卒，一痛几绝。因上有重堂，勉进饘粥，克终大事。盖是时朱姓一门两世孀妇矣。先项公未亡日，为孝子聘小清湖徐氏归朱门为养媳，当项公弃世，孺人汪氏又患目盲，缘命完婚成服，欲令徐氏得主中馈。孝子哭跪母前曰：“今不孝抱痛终天，何忍逾礼从吉？容俟服痊未迟也。”一切饮食起居，孝子先意承志，徐氏亦勿离左右，服勤不倦，人咸谓朱家有孝子兼得孝妇矣。嗣终丧成室，夫妇相敬如宾，而其事母兼事祖母，事姑兼事祖姑，两人益加敬谨。历二十余年，无敢少懈，以故二老皆得享其寿康。母迟祖母一年歿，孝子葬祭尽礼，泣血三年，有子羔风焉。其平日与徐氏朝夕定省，冬夏温清，交相劝勉，惟恐不尽。至若勤俭持家，俾弟妹均得婚配，教养成人，特慰亲心之一事耳。闻公生平效张公，尝书“忍”字，恐所行不检，必貽父母忧。此非举足不忘亲者，能如是欤？今者孝子孝妇亦既往矣，而其人其行深入乎人心，族戚为之请旌。圣恩予以褒奖，士大夫闻

之，有不翘首企慕，怦怦心动者，非人情也！瑞居戚末，与先生之孙女婿郑大培为外兄弟，尝于外祖家获晤先生，聆其言论，心甚钦之，因悉先生暨德配之懿行独详。适先生三嗣世泐属瑞作传，瑞不文，援笔而志其一二，以俟后之采风者取焉。

郑太守传 道光二十一年

开化陈芝龄

公讳廷望，号脩轩，江山人也。由乡贡官至刺史。幼时天性纯笃，成童即奋志诗书，曾受业名进士周方炽先生门，勤学不辍。封翁见功名念切，令援川运例授同知，铨选山西。到任，裁陋规，绝苞苴，杜私谒，上台咸器重之。越三载，署大同府篆，奉檄赈饥。时道殍相望，公出俸囊，施棺木，掩遗骼，惠泽及泉壤焉。寻圣驾巡幸五台山，委办千佛洞金灯寺古南台胜迹，得瞻天颜，赐缎匹。次年，复以解饷入覲。又明年，修浑源州城告竣，升贵州遵义知府。士民攀留不得，制“德服民心”额为颂，犹古甘棠遗意也。至遵义，值征剿缅匪。绥阳令因公罪误，公以失察属员效力军台回籍。时堂上须鬓皓然，虽去官，犹逮终养，意泊如也。迨乾隆庚戌，晋京祝釐，蒙复原职，自是遂不复作出山想矣。居家，惟延名师训子孙，尊师重道之诚，近今罕匹。龄于嘉庆庚申，应公聘主西席。每接见，道及曩时故旧刘石庵、姚秋农诸先生，恒心折之，盖重其人，非以其官也。晚年尤喜接引后进，谈论古今，至老犹不能自己。今岁辛丑，去公歿已三十余年，冢孙瑞麟明经以状乞为公立言。余按生平行事可传者，未易枚举，若夫乐善好施，望重乡党，在公犹微焉者尔。因乐次第其事以书之。

徐元和传 同治七年

嘉善许汝璜

徐元和，原名起华，字荣春，号静轩，宋状元元杰公裔也。世居

江山双溪之株树村。父名升，邑增生，字斗章，号丽垣，品优学粹，性好善，教子有义方。元和其长子也，幼颖异，束发受书，随父就读于外。道光戊申，补弟子员。咸丰辛亥，食饩乡校。尝语人曰：“吾人读圣贤之书，当学圣贤之行。文艺末也，岂沾沾于科第为？”甫五岁，生母杨氏歿，赖继母邵氏抚养。元和事之如生母。邵氏尝患鼻衄，亲侍汤药，衣不解带，目不交睫者累月。弟二人，志和、谦和，均受学焉。元和循循善诱，二弟皆笃于学，谦和有声庠序，其孝友性成，人无间言。生平善交，久而能敬于乡党，豆觴无犯，而节操谨严，取与之间，一介不苟。好善克承父志，曾手辑《训俗遗规》一书，梓以劝世。同治元年，粤匪窜扰江邑，东南一带荼毒最惨，民食无济。偕同人集厚资，并向邻邑劝捐以赈，活人无数。是年，抚军左公统师援浙，饬立同善局。二年，令捐赈龙游。三年，龙邑以下渐次肃清，复于建德、桐庐二县设局赈济，与周登瀛诸人同司其事，积劳成疾，在桐邑蒋家埠扶病归。未抵家，于衢郡邸次卒。生于道光辛卯正月初二日巳时，卒于同治甲子六月十九日子时，年三十有四。娶王氏，子一，尚幼，闻者惜之。时抚军知其事，檄学同周登瀛立传载志，以传其人。

论曰：昔人有言，国而忘家，公而忘私，求之缙绅中尚难其人，况元和一诸生耳！国计民生，本非其责，即旁观袖手，亦孰从而非之？而乃急公赴义，不惜其生，贤已。或曰：乐善不倦，而竟暴卒。倘所谓天道，是耶非耶？余曰：不然。天与人以善名，及与人以富贵寿考，孰重而孰轻耶？是以没世无称，君子疾之。脱令天永其年，纵躡科第，跻膺仕，百年旦暮，生荣歿已，与草木同腐，何能以乡里善人见称于后哉？呜呼，试以余言质之，徐生亦可以无憾于地下矣！

## 祝東山先生傳 同治十一年

閩縣王 彬

先生，唐高士也。諱其岱，號台峰，別號東山，世居江陽梅泉。性閑靜，淹貫經史。弱冠選明經，以文名，弟子自遠至者甚眾。刺史周公元善奇其才，力荐于朝，聘三至，辭不就。周公知其志不可奪，益相友善，并遣子從學。未几，武后當國，周公亦引退，尤服先生之識。當唐室盛時，山林隱逸，云興霞蔚。而世慕先生盛名，亦以高爵厚祿相期許，先生弁冠草服，晏如也。愛江郎峰山水奇秀，結廬其下，講經談道，至耄期不倦。親見二子四孫皆貴顯，尤征積善之報。其後人以江郎峰為先生游詠之地，卜葬于其下。迨明季多故，及國初耿逆之變，數十年兵戈蹂躪，墓始失。越二百年，先生裔孫附生祝敬敷輩稽諸家牒，求遺墓不得，與周姓構訟不已，牒几盈尺。歲壬申，余宰是邑，集兩造于庭，委曲開導，為定地立碑建亭，開明寺前右邊，高石磅五尺，高右牆脚四丈九尺。讞乃定。噫！先生往矣，先生之風固可與江郎并壽也。顧湮沒已久，而微有以顯，隱有以彰，莫或使之，若或使之，謂非先生之灑氣精靈，自能流行乎天壤而罔漸滅，豈可得耶！時方修邑志，爰為之傳，俾後之學者知邑中有此隱君子云。

## 艺文志四

文 辞 序 赞 铭 书  
跋 祭文 诛词

### 送郑惟泰之江山丞序

宋曾从龙

郑子惟泰之倅江山也，凡同年契家，咸惜别赠言，拳拳懋勉，期无负君相升秀职任之意，此朋友之伦，切偲规诫之道。余不敏，不敢默让。夫官人者，必论贤能，任以子民之职。职必求称，然后可以为民父母。父母者，赤子之天也。竭慈爱则易使，躬辅翼则易教，心诚求之则易保。故欲正其民，先正其己。犹夫发矢者，必先直其志。君子曰：“贤父母矣，父母贤则子贤，吏循则民循哉。”然为县令，为丞，官职虽长贰，而政出一体。昔崔斯立丞蓝田，哦松之政称曰丞哉。第五琦丞江山，官至宰相。郑子恬德博爱，知不负丞必矣。江山百里耳，奚足以淹贤者耶？

### 《丙丁龟鉴》序

宋柴望

臣望闻以铜为鉴，可知妍丑；以人为鉴，可知得失；以古为鉴，可知治乱。人主任社稷之重寄，系亿兆之休戚，其于历代之盛衰，

尤当究心者，故人主不可不观史。观史则警省之功深，而是非之鉴明。其裨益于治道，可胜言哉！昔唐仇士良教其党以固权宠之术，曰：“天子不可令闲，常宜以奢靡娱其耳目，无暇他事，则吾辈可以得志。勿使读书，亲近儒士。彼见前代兴亡，心知忧惧，则吾辈斥矣！”士良为计，不欲人主读书，正欲愚人主之耳目，蔽人主之聪明也，巧矣哉！臣区区忠赤，无以自见。每有夔不恤纬忧宗周之心。况当丙午、丁未之厄岁，而又日蚀元旦，昭示谴告，殆如杞人忧天，不遑宁处。臣不佞，遂遍搜诸史，窃惟是岁为厄，从古而然。帝王之世，史籍略而不书。今自秦汉以下数之至于五代，为丙午、丁未者，凡二十有一，上下通一千二百六十载，灾异变故，不可枚举。独汉延禧丙午朔，日有食之；晋太康丙午、丁未，朔日皆食，信乎阴阳之有数也。然数生于理，理有是非得失，则数有吉凶祸福。自昔变异之来，未有不兆于人为者。帝王盛时，格心有道，则变异疏；帝王以后，格心无术，则变异密。丙丁之厄，皆厄也。其厄于延禧者，以延禧之时，小人之厄君子也；其厄于太康者，以太康之朝，边徼之厄中国也。臣故采摭其实，目曰《丙丁龟鉴》，厘为十卷，卷各有事，事各有断，凡所以致变之因与消变之由者，了然在目。则求天于天者，果不若求天于我；求数于数者，果不若注数于理，是为得之。亦知有天下者，知天根于我，数根于理，必以是书而尽见，且知人主不可一日不观史也。臣故总其说而为之序。

### 送柴仲山归田序

宋何中行

名者，人之所忌也。京师众大之区，如溟渤邓林，何所不有，要不过争名与利耳。然君子为名，小人为利，今世峨冠幅袖，号为君子，放利而行，溢于小人。其能以名自见者几何？歌酒陷其半，博弈陷其半，惑异鹊而谄于虞人，总总也。其能以名自全者几何？故

真狗名者，必冰雪刻厉，风雪翕张，特立而不可陷没，宜其为人之所忌也。吾友柴君仲山，素以特立名，其才足以躡余子，其气足以吞王公。所不为一介不易，所必为万牛莫挽，盖卓乎达人矣。乃元日以《丙丁龟鉴》进，螭纬一寸，炳如丹如。意且必有四辈趣召，顿首殿陛下，尽吐其胸中之奇。一旦天府奉诏逮诘，身几不免。赖天子圣明，可大尹所奏，听归田里，瘦仆羸马，触暑问途。公卿比而叹惜者几人？朋侪聚首而扼腕者几人？见其书，闻其事，相与切齿者几人？于是《龟鉴》之名，赫赫乎不可掩。然则忌之者，乃所以彰之也。嗟乎！臧仓毁孟子，宏石杀望之，彼其于世之亚圣、国之大臣，犹所不恤，于仲山乎何有？仲山庾有粟，壶有酒，架有诗书，归时却扫松阴，绝口不臧否世事，破芋魁，摘豆荚，父子兄弟，骨肉团圆，皆天子赐也。于是从游最密者十有五人，饮饯于涌金门外，其能诗者，各以所感为辞，而中行为之序。

### 太学正节先生徐公序

元何梦桂

夫国之危亡，必有死节。然死者，人情之所甚难。而食人禄，死人事，义有不得不然者。故其忠肝义胆之所激烈，虽太华颓乎前，不吾压。况婴斧钺，蹈鼎镬，赴水火，尚复回顾却虑哉，抑古今不能多见。吾于战国得一人，曰王蠋；于晋得一人，曰嵇绍；于唐得二颜、张、许而下六人；五代得王彦章、姚洪而下十一人，如此而已。宋三百年宗社，覆坠于怙权误国者之手。忠臣义士死社稷，死封疆，死学校者相继，固未可谓国无人也。太学徐应鑣巨卿，不忍从三宫以北，将蹈火死，不克，迄沉诸井以死，且与二男一女俱。夫国亡，当事操兵者任其咎；六馆诸生亦微矣，岂义有不得不死者而若此，亦既难矣。况儿女睨睨，能使之骈首相从于九地而无怵色，难矣哉！臣为君死，子为父死，一举而忠孝萃焉。所以敦彝伦，媿教

化，而惧天下后世之为乱臣贼子者也。呜呼！天地无穷，事会无极，安有无君无父之国哉？微斯人吾谁与归！义士刘汝钧倡议，葬之毕事，以私谥正节易名，且征予序其事。君经德诸生，仆亦经德旧人也，义不得辞，三叹为之书。

### 送柳道传赴江山序

元戴表元

古之用人，权尊而法疏。权尊则易于取人，法疏则人得以尽其才。吾观《周官》，六卿属吏多出其长所自命，汉晋之相沿，三公皆得开府，收召名士。故薛宣有欲吏朱云之嗟，而桓温亦以能客孟嘉为喜。然不闻于庠校师儒之员，有所辟置，惟其学行有称于乡，则人自闻风裹粮而从之，此非独其人之难，而道固不可易而屈也。科举兴，铨格密，其说先裁之以中人可能之文艺，然后拘之，以愚不肖易成之，岁月以至，江南异时。自通守、令、丞、主簿、尉，若钱谷刑狱诸僚，若州县学官注调，一决于选部，法不可谓陋，而人情往往不难于为通守、令、丞诸僚，而一闻师儒之号，虽百里之学，亦赍赍畏赧，而不敢轻赴。彼诚知夫通守、令、丞诸僚，不过簿书胥吏，勾稽剖析之类，而师傅之职，有不正是焉者。则法之所不及，又系乎其人之自为之与！属者科举之弊既除，诸选犹守铨格，惟县学官以其秩卑，付诸下大夫之领之者，使得专置。有志节者，或耻为之，而官益不重。大德庚子岁，吴楚阙待命于中书行署，行署长取阙升府宰士，捧牒以次礼进其人，廷授之，观者以为荣。而吾友金华柳道传得衢之江山焉。江山固衢佳邑，气清而俗简，贵僚使客，车马之迹罕至。道传又金华良士，攻文章，通记览，不患无以尽其才。昔夫子叹十室之邑必有忠信，而忧好学之不至。道传往，而以好学鼓动江山之人，道之成也，岂惟江山！闻江山之风者，且将四面裹粮而来，于以为明时兴文美化之助，以成诸公能取人之名，不亦可乎？

道传曰：唯。是为序。

### 赠郑德夫归省序

明王守仁

江山郑德夫将学于阳明子，闻士大夫之议者，以为禅学也，复已之，则与江山周以善者，姑就阳明子之门人而考其说，若非禅者也，则又姑与就阳明子。亲听其说焉，盖旬有九日，而后释然于阳明子曰：“释与儒孰异乎？”阳明子曰：“子无求其异同于儒释，求其是非，于学可知矣。”曰：“是与非孰辨乎？”曰：“子无求其是非于讲说，求诸心而安焉者是矣。”曰：“心又何以能定是非乎？”曰：“无是非之心非人也。口之于甘苦也，与易牙同；目之于妍媸也，与离娄同；心之于是非也，与圣人同。其有味焉者，其心之于道，不能如口之于味、目之于色之诚切也。然后私得而蔽之。子务立其诚而已。子惟虑夫心之于道，不能如口之于味、目之于色之诚切也。而何虑夫甘苦妍媸之无辨也乎？”曰：“然则五经之所载、四书之所传，其皆无所用乎？”曰：“孰为无所用乎？是甘苦妍媸之所在也。使无诚心以求之，是谭味论色而已，又孰从而得甘苦妍媸之辨乎？”因郑德夫还江山，遂书以为赠。

### 赠周以善归省序

明王守仁

江山周以善，究心格物致知之学有年矣，苦其难而不能有所进也。闻阳明子之说而异之，意其或有见也，就而问之。闻其说戚然若有所省，归求其故而不合，则又迟疑者旬日。如是往复数月，求之既无所获，去之又弗能也。乃往告之以其故，阳明子曰：“子未闻昔人之论弈乎？弈之为数，小数也。不专心致志，则亦不可以得也。今子入而闻吾之说，出而有鸿鹄之思焉，亦何怪乎勤而弗获矣。”于是退而斋洁，而以弟子之礼请阳明子与之坐，盖默然良久，

乃告之以立诚之说，耸然若仆而兴也；明日又言之加密焉，证之以《大学》；明日又言之加密焉，证之以《论》、《孟》；明日又言之加密焉，证之以《中庸》；乃跃然喜，避席而言曰：“积今而后，无疑于夫子之言，而后知圣贤之教若是其深切简易也。而后知所以格物致知，以诚吾之身。吾喜焉，吾悔焉，十年之攻，徒以敝精神而乱吾之心术也。悲夫！积将以夫子之言告同志，俾及时从事于此，无若积之底于悔也。庶以报夫子之德，而无负于夫子之教。”居月余，告归。阳明子叙其言以遗之，使无忘于得之之难也。

### 送徐东溪按察贵州序

明张天复

东溪徐公之参湖藩政也，今年春三载矣。秩既满，当以考绩行。巡抚剑门赵公、巡按尧夫吴公，曾疏留之。疏中言“参政某贤能，分守所部，有惠爱在百姓。臣等为百姓请，令其上计簿于考功，弗与计偕”。奏可，诏可封议典秩，赐封其二代褒嘉之，随擢为贵阳宪使。初抚巡疏上，藩臬诸公咸拟徐公且暂留，竟以久任超格进矣。及贵阳命下，胥訝而疑焉。张子曰：“诸君远贵阳而难之耶？明天子盖重之也。夫贵阳，荒服也，民夷杂居，山多挺峭，溪涨毒淫，诸夷犷悍，迅激之气率类之。既列官司，比于内地。而其暴黠者，狼跳狐嗥，辄敢干纪，恃险阻拒，狃薙则难。虽然，其性犹我良民也。治在拊循而化之耳。不当以一切之法，绳缚如束薪也。方其犯于有司，萌芽尚微，诚得博学通方之士，总宪率属，潜消而早禁之，宁至于不可化乎？故贵阳宪使，尤重于诸藩臬者。谓内地专以法从事，而夷方则有张弛之宜、缓急之剂焉，类非等常者所能辨也。东溪公粹然德器，笃志力行，学问渊源，上溯濂洛而扩大之矣。往由谏院出典学政，秉道敷文，齐鲁之士翕然有誉髦之化焉。兹而拊循湖湘，政有成也。天子念贵阳远且险，加意怀柔，非名宪使莫属

也，故擢公于政成之后，俾以化齐鲁者化之，拊循湖湘者拊循之，余以邦法申饬整齐之，俾夷方辑宁，功著于万里之外，然后下玺书，征人为九卿，如西京选诸郡国所表也。柔远能迩，叙贤展能，圣天子默运而并操之者，不在兹乎？两司诸公闻之，蹶然而起曰：“公一言，而东溪公褒嘉之荣，简命之重，两得之矣。”书之文锦，以侈一时之美，不揣弁为之叙。

### 送徐华阳先生之江山序

明许 国

江山故有江郎之秀，峰石插天，其间故多卓诡异常之士。大夫士之卓诡异常者，往往自负其奇，以傲睨有司。有司者，一政之施，一令之布，稍不当其心，即各以其见议之，故其治之甚难。然有司者，苟始至，而其所施布，辄有以当其心，使皆相顾骇愕。而所谓卓诡异常者，且各输其能以求效于我，而惟其政令之听，则又未尝不易也。江山故小而僻，铨司故不以甲科往，而甲科者，故不屑往。今上方留意吏治，而江山之在铨部者，始为其乡请甲科，于是得华阳君。夫曩不以甲科，而今往焉，彼所为卓诡异常者，必且谓甲科者，固非恒有司比也，望之过厚而责之太苛，即一政一令罔不当其心，犹然夷视之，而愿求所谓赫赫声者，故其治之愈难。然甲科者，即不自多，其甲科而循，恒有司之迹，日蒸蒸焉。上之操三尺以督群吏者，亦必优视之。故其志易行，而其声易起也。彼下之人，见其上之优之也，必且耸然环视，而不敢玩，而惟其政令之听，此所谓可藉之资也。夫如是，则亦未尝不易也。夫士之吏于其土者，视其土之官于朝者，以为难易。故官于朝者，公其令以为民则易，私其令以自为则难。夫令近民而秩卑，而以朝之赫赫尊显者，从中制焉，鲜不为其家役矣，政施也而或格之，令布也而或挠之，彼以为吾固置之者也。是以朝违命而夕得谴，此其治之愈益难。然其缙绅

先生之请置令者，曰我为一邑，非以为吾家也。诚开之利弊，而假之便宜，其耳目之习知者，坐而授之成，盖不出国门，而其民之风、土之俗，固已了然形于胸中，而可坐蓂矣。此所谓天与之助也。故曰未尝不易也。夫徐君者，妙龄而巍科，固卓犖非常之士也，而少宰毛翁得之，以为江山僻小，而君才固优，即彼卓诡异常者，知不足以难君矣。而又挟可藉之资，获天与之助，譬之太阿出匣，涂以赤堇，运以浑脱，陆试犀兕，水试鲸鲵，有迎刃而解耳。会徐君且行，于是乡之同年进者属余赠言，为具论其难易之故，曰吾欲于君之行也而卜之。

#### 送余君汝化之任江山序

许 国

故事，六郡乡先生官京师者，约为会。会有行者，属其同郡为文送之。于是余郡授县令行者二人，而汝化得江山。地小而僻，故不以授甲科。以甲科授者，自宛陵徐汝贤。汝贤行时，余有赠言，大要谓江山多卓诡异常之士，往往自负其奇，以傲睨有司。故有司者能当其心之难，而以甲科授者，彼又高视而求多焉。故于卓诡异常之士，尤难有以当其心者。吾方释褐试政，其邑中利弊，既未得尽其处，将从其邑之先达官于朝者，受成以行。是故邑之先达，公其令以为民则易，私其令以自为则难。令近民而秩卑，彼以为吾故，得请置之也，稍稍从中制焉，鲜不为其家役矣。江山令固难为，乃今所以易者，本其邑人毛公守少宰也。少宰以桑梓故，重江山之选，始得汝贤而喜，汝贤既以忧不之官，顷又得汝化而益喜。汝化与汝贤，俱甲科士也，妙龄而高才，如太阿出匣，莫有撓其锋者。今之往也，知必有以当江山之心矣。少宰以识鉴闻天下，乃其所取于汝化者，汝化岂负之哉？会汝化捧檄且行，而乡先生使数辈来督余言，又冗不能择言，即余有言，固无出其所以赠汝贤者矣。于是对

使操牍，书其向所赠汝贤者而以为汝化赠云。

### 《孝经》序

明徐 霏

孔子既叙六经，曾子之门人乃述孔子问答之辞，别为《孝经》一书，以传诸后。盖六经旨意散出，各为一事，而《孝经》则其支流统会也。何也？良知良能，弗虑而获其机根于一心，其妙括乎万善，其效溥乎四海。是故天子、诸侯、卿大夫、士、庶人者，分之殊也。始于事亲，中于事君，终于立身者，道之一也。以治天下，以保社稷，以守宗庙，以养父母者，效之著也。乃若明王事父孝，故事天明；事母孝，故事地察；天地明察，神明彰矣。则又极乎天地之大，而兼乎幽明之理也。是故孝悌之至，通乎神明，达乎四海，岂诳语耶？世之人不知己也，父母也，天地也，一也。乃执蕞尔之躯，认为己有，于是为悖逆，为争斗，祸乱相寻于无已，其弊果安在哉？不明孝之理尔矣。婺源寒塘余公有志是书，乃取朱子之刊误，稍更定之，别为注释，以衍其义，而诸儒之舛谬一正。翁事二亲，夔夔日尽其孝，乃子见田公，承乃翁之志，又从而扩大之，以化民成俗。则于是书也，非苟知之，亦允蹈之。吾庠司士文谷谢公，与翁同乡，知翁最深，取《孝经》旧所考释者，梓之以训多士，其用心亦勤矣。不靳属余为之序，余复为之说曰：“孝者，源也；经者，径也；风之者，上也。指孝之径路以示人，俾土氓翕然以趋，不迷其源，非风曷以哉？”则二公交相责焉耳，余何言哉？

### 《忠经》序

徐 霏

夫子著《孝经》十八章，其言简而尽，肆而隐，孝道蔑以加矣。汉马融以天地之大德曰生，圣人之大宝曰位，由生所以尽孝，由位所以尽忠，二者犹车轮然，缺一不可。今孝备矣，而忠若缺焉，其可

乎？于是作《忠经》十八章以续之，犹束皙补《南陔》、《白华》之意也。逸于《汉·艺文》中几千年矣，未有能述之者。霍公思斋邃于稽古，乃于代巡暇日，取其书附于《孝经》后，并古小学合为三编，以惠多士。其用意勤矣。或曰：“圣人之言犹天然，故六经道在万世。文中子强而续之，是以有吴楚僭王之讥融之作毋乃类是矣乎？”余曰：“不然。君子评物，不惟其人，惟其言。若融之言，可尽譬乎？今夫忠孝一道也，世未有孝而不忠者，但孝之事易见，而忠之理难明。何也？迩之事父，远之事君，其分殊也。惟迩则切切则感，惟远则离离则忘，履霜之变亟矣。不曰吾亲也，其可逃乎？若狡童之刺，几乎骂矣，非人情之反也。孝则中人可勉，忠则上智犹或懵焉。则《忠经》之续，其可已乎？矧时当阳嘉嬖倖擅权，忠贤倒置，下替其德，上文其奸，瘵官败绩者，将寻列焉。《忠经》之作时当然□□□诟耶？苏子曰：君子处世，不求有功，不得已而有功，天下以为贤；不求有言，不得已而言，天下以为不贤。《忠经》之作，不得已而言者也。王氏续经，几乎赘矣，可已而不已者也。子比而同之过矣。且其所著十八章，自家臣以至兆庶，君臣致理之具，天地证应之理，靡所不该，实有不可废者，此霍公表章之意也。其功不亦大乎？”于是闻者以余为知言，遂从而梓之。

### 贈易霍岡邑侯旌異序

徐 霈

易侯以風憲借重敝邑，余逆之上館，見其容嶷嶷，其言鏗鏘，若高山大川，可望而不可即。余閱人多矣，未見其俦也。疑楚之英也，歸而檢楚傳讀之。楚自文昭以來，稱雄上國，文章勛業之盛，后先相望，彪炳海內。迄我睿宗景皇帝肇封郢中，化敷江漢，而人才愈彬彬焉。侯挺其間，抱衡湘云澤之奇，蚤掇巍科，觀政春曹，即負朝亡望，不二載以行人選道清軍江右。今天下莫淆于軍政，亦莫難

于清军之任，缓之则其弊日滋，急之则相引而起。其突梯脂韦，不可方物。我侯称其旧籍，而正其占伍，名以是彰，而谤以是起，于是有东平之行，未几转浙之上游尹。人心排下而进上，如凝冰焦火然，而侯无织毫芥蒂。入其境，孜孜焉以民瘼为先，其气度有过人者。江邑在万山中，民负气好讼，至孥裔弗息。其强者鸱张鸢击，任一切之法，使民惴惴然不敢吐；其弱者则含糊姑息，法令罔娴，一委之于吏，二者胥失之矣。侯负挥霍之才，而持之以中。呼吸之间，有雷有风，而亦舒徐焉以尽其变。其听讼也，事之小者，一鞠之余，是非昭然，须臾而判，吏抱成案而已。事之大者，亦为之踌躇四顾，务得其情。其愿息者允之，不穷其根株，其平恕有如此。五方之俗不同，乃为之因俗设教，彰善瘅恶，树之风声，民皆嚮嚮日趋于善而惮于为恶，其感化有如此。其兴起斯文也，甄拔士类之有志者，会期课文，以要厥成。其崇尚正学也。若逸平先生之后之几绝者，则为之婚娶以续之。其赋役也，征敛有时，科条惟中，民可裕也。其理财也，敛散有法，经商惠氓，财可阜也。仍为浚城外之河，决上游之水，入于白渡田八万余亩，民赖以苏。盛夏赤地千里，百姓嗷嗷，侯濯心修政，祷不崇朝，而灵雨连集三日，稿禾尽起，民欢呼鼓舞，翕称德感。于是，颂声四播，上彻两台。代巡李公复命乃为旌奖，二尹徐唐、三尹李守魁、四尹风应选，谋所以为侯贺者，乃相率造余庐而请焉。余蹶然起曰：李公之所奖者，特侯之弃余耳，何足以尽侯哉？窃闻之，古之人臣，不弃凉而猎华，昵近而疏逖，风之弊也。乃怀二心，异哉。庄子曰：夫事其君，不择事而安之，忠之盛也。今我侯斥回错枉，不避艰阻，如立于千仞之巔，而四顾无援，神气不动，其自得有如此者，遑恤人之毁誉哉？故其在台宪不为荣，在县令不为辱，自是为监司、为部院，兹常事耳，何足为侯轩轾哉？余今耄矣，不读目录已二十年矣，因公而张胆一言耳，诸君以

為何如？乃僭為之序。

### 《留齋漫稿》序

徐 霈

留齋者，方泉子晚年所更號也。漫稿者，方泉子自名其所作也。春元楊君節庵匯集之，間以序請于余。余與方泉知且二十余年，則知方泉者莫余若也，而可靳乎一言哉？乃作而言曰：文者，聖賢不得已而有言，筆之于書，以化天下，以垂後世者也。然隨時有作，不能盡同。故孟氏之文，不盡同于孔氏；孔氏之文，不盡同于周公。雖其並世而生，會聚于一堂之上，其聲音氣象，亦自不同，況筆之于書，以垂後世者乎？故論文當隨時可也。國初宋濂氏以昌大之文，潤色鴻業，觀其廟制諸作，足以備一代之典章，為百王之大法矣。弘治以來，有崆峒李子崛起于其間，靈珠獨握，兼總諸家，自為文之大成矣。然其機軸出于左氏、《國語》，雖肆力斲削，而鎔陶未盡。何仲默訕其高者不過古人影子，其下者已落近代之口信矣。甘泉湛氏獵取左氏之音响，飭以理窟，著述甚多。其大者在《中庸》訓測，自謂羽翼孔氏矣。然用古句為訓釋，而《中庸》之義益晦，所謂庄周注郭象，非郭象注庄周也，奚以訓測為哉？公自釋褐登廷，即選翰林庶吉士，讀中秘書。凡我朝典章，古今因革，人物事宜，靡不得其要領。故其一出而巡歷鹽海，條陳七事，宿弊厘革，國課賴焉。再出而典學南畿，端其刑范，彰之訓典，士風正焉。蓋其以精深之學、淵涵之度，陶以玉堂，煦以天藻久矣。及入內台，協掌院事，獨持風裁，不奪不茹，百僚肅焉。故其文思涌出，如長江大河，數千言立就。其率爾成章，莫不抒指道情，旁通物理，宛然自成一家人，非蹈襲前人以為尺度也。或曰：“文則似矣，律之于古，則未也。”余應曰：“不然。惡衣菲食，土階不剪，其後世乃有九延之台，五清之衣，清廟之瑟，朱弦疏越，一唱三嘆，其後世乃有大成之乐，

备极声容之美。山壘与牺尊并陈，宏璧奇珍，非兑戈和弓伦也，而中国皆世宝焉。则所谓古，岂必尽同哉？若崆峒、甘泉殆有心于古而反失之者也。以是论文，思过半矣。乃屑屑然较方泉之非古，不亦左乎？”问者唯唯而退。遂书之以为留斋稿序。

### 《毛介川文集》序

明赵 铨

介川先生诗文世少概见，晚年独注意于读书录抄释，自为序以授见田余公，业已刻之县斋，复梓其散见诗文三卷，以并行于世。未久而先生捐馆，予子河与其孙允让乃哀集其奏议及诗文遗稿数十卷，藏于家。适余公再莅浙藩，闻之将梓行以成全书，未及也。无何而公有滇臬之转，取道三衢，谓允让曰：“此吾素志也。成之者不在子乎？”允让惶恐谢不敏，亟谋诸河曰：“奏议我不敢辞，诗文全稿敢以累之君。”于是河手自编录，以授之梓人。凡一十卷，阅数月而告成。允让请序于予，予曰：“今世所称作家，畴不以文自名，而争雄长于艺圃哉！然求其可信而传焉者，何寥寥也！盖世之信而传焉者有三：以道性情也，期于正；以阐学术也，期于绝；以昭功业也，期于伟。三者备，而后其文始取重于天下。不然则疑而弗信，骇而弗传，天下其孰与之？予观先生幼负奇质，以古人自期，弱冠连登科第，不即仕，移疾归卧山中。以大遂所学，视世味纷华，淡然不入于心。及出而拜大行，官侍御，揭揭諤諤，凜然铁面之风，虽经左迁，而其操愈励，学愈笃。晚由藩臬而中丞，而八座，洊历两都，始终一节，天下至今称正人君子，无异词焉。今取斯集读之，其诗清以婉，其文雅以鬯，其书启杂著，咸本于理而泽于气，沛如也。再观前后奏议，又皆关系国家大体、民生大计，凿凿经济实事，匪空谈者。学者观斯集也，而先生情性之正，学术之纯，功业之伟，概可见矣。先是隆庆丁卯，先生自南太宰改北司寇，以疾乞身，优诏不允，

趋赴任。将行，余公求其诗文，以授诸梓。先生手持读书录抄释语之曰：‘恺平生精力颇在此书，愿公梓之以与吾党共，他非所敢闻也。’噫！先生师淑文清之学，意盖有在如此。然则以诗文名世，岂先生意哉？而奚计其信今传后也欤哉？虽然先生之可信而传焉者，固不专在斯集，而天下后世之欲知先生者，舍是集其何以焉？兹固余公先刻抄释，后刻全集之意也。学者合二书而并读之，其于知先生也庶其深乎？”因书此以并其端。

### 《东溪先生文集》序

赵 鏞

文之难言久矣，是故先秦两汉，号称近古。自秦汉而下，若唐之韩、柳，宋之欧、苏诸子，号称大家。作者藐不多见，岂不诚难哉？愚以非文之难也。文本诸学，学深于养之难也。韩昌黎曰：“根之茂者，其实遂。仁义之人，其言蔼如也。”斯不足信矣乎？国初文运，与时并隆。宋、刘、王、方诸公，后先迭起，相与鸣一代之盛。以明润简洁为体，以通达政务为尚，以纪事辅经为贤，盖一洗前人风沙浮靡之习，直追古作者而并之矣。世宗初，阳明先生以振古之豪，发明良知之学，开示群蒙。其所为文，不事钩深奇棘，而从容宏衍，如长江大河，浑浩流转。而人望见渊然之光，苍然之色，亦自退避，不敢仰视。一时从游之士，登堂入室者，亦罕俪焉。吾邑东溪先生，自弱冠即抠衣其门，盖亲承良知之学，而得其上乘者。故自荐登高魁，回翔谏垣，以至宗文河洛，藩臬湖湘，贵阳岭表，及今悬车以来，讲舍会聚，启口扬声，皆所以扩大阳明先生之学。而涵养之深，造诣之邃，真非夷所及者。宜其文之足以名世而无疑也。间出兹集以示余，余受而卒業焉。如神理道器诸书，真妄无思诸说，则宋大儒之未发也；賑济修堤诸议，则贾太傅之通达也；奏疏明庭条陈诸篇，则陆宣公之流亚也；其序记碑铭杂作，又皆醇雅典则，

如削金璞玉，不见搥琢刻画之工，而光彩袭人，睹者倾动，可与古之作者相颉颃，信无愧于阳明先生之文之学也已。是集也，汇成于讲舍同志施、梅、石诸公，校伪正讹则成于从游赵宜之、王维新诸生。梓成，乞余一言以弁其端。余愧鄙劣，不足以知先生之奥，其敢评先生之文哉？顾承教有年，谊不容辞。窃谓先生之文本之于学与养，似足以窥先生之大者。世之君子苟未知先生之学之养，观于兹集，亦可以得其大端矣。是为序。

### 《三苏文抄》序

明郑德启君一

夫蜀多文人，自相如、扬雄、王褒以后，独眉山苏氏以家学显。其文离奇变化，不可名物。要皆取先秦两汉而冶铸之，以为立言之准，盖自宝元、庆历以来绝调也。当时上至九重，下至数万里，隳毳鸩舌之流，莫不知有苏氏文章。惟是，老泉能见知于韩、富，而官不过主簿；子瞻、子由能见知于人主、太后，而流离窜谪于风波瘴疠之乡，身几不免。不知其赴节义，立功业，投之忧患而干局益峻，学问益醇，奇萃一家，别立天地，岂若相如、扬雄、王褒，仅以丽藻鼎足于峨岷间哉！议者谓其未免荀、孟、贾、陆杂仪，秦而用之，故得谗以纵横好胜，不亦谬欤！今海内人士之奉三苏选也，彰名者不下数十种，而鲜撮其要。兹得李温陵先生帐中之秘，为三苏文抄，备不苦繁，精以赅博，诚足为学者津梁，且兼诸公间评鹭得当者，手次其上。余因授诸梓人，以广其传。公车之张本，经济之先资，于是集实多裨焉。

### 甘棠遗爱序

明余 锡如庵

尝读《诗》至《蔽芾》、《甘棠》之章，窃叹诗人爱慕之诚，追思之切，勿剪勿拜，一篇之中三致意焉。盖其时俗古民淳，戴上之泽者，

往往发为讴吟，传诸奕禩。后世治不如古，虽有舆诵之词、庚桑之祝，不一再传，辄荡为寒烟荒草，比比而是。若我江山邑侯见田余公、九觐蒋公，遗爱在人，阅两朝如一日，而后知古今民情，不甚相远也。江山故礼贤徙也，自有宋咸淳迄元至正而迁今治，至明嘉、隆之际，三百余年而未城。筭路蓝缕，庶事草创。余侯以通敏强干之才，因矿盗之警，建议筑城，得请于上，度地鳩工，不日而竣，民不知劳。间以余力浚九连池、七星井，以通水脉，而生聚浸繁；建天一楼于坎位，以镇南离，而郁攸不作。盖公精于青乌白鹤家言，诸所建置，裨益宏多。而且礼士爱民，清通简要，百废具兴，邑人至今赖之。专祠崇祀在邑北门负郭数十武。至万历中叶，蒋侯以循良最绩，宽仁慈惠，黎民怀之，卜祠于左。时人比之召之与杜、龚之与黄焉。祠之左右，市廛数楹，往昔士民醴饗创置，为春秋牲醴费，以规久远，历数十年于兹矣。迩来兵燹频仍，居民庐舍暨两祠尽圯，而祠前供祀数椽，巍然如鲁灵光。此固两公英爽不磨，不至泯没。惜为邻寺冒占，转鬻居民。客岁同学诸友，按额清厘，虔修祀事，以寓甘棠之思。即从前首事诸公之令嗣，继志述事，莫大于此。但虑岁月绵邈，后且无征。爰立尺籍，备载缘起，请给印识以示将来。吾知蒙庥食德，服教畏神，谅有同心，必无覬觐如畴昔者，庶遗爱在人，甘棠之思且与召伯并垂千古矣。

国朝

徐巨翁《忠节录》序

林云铭

纲常为世道之柱。维吾儒读圣贤书，知大义在天壤间，本无可逃。宋末临安徐巨翁先生，厕身太学，以圣贤为师，乃真儒也。元伯颜兵至，先生誓死报国，夫人方氏以殒身莲沼为倡，子琦、崧二君暨女元娘，相从溺井。忠孝大节，虽僮竖亦知之。但所云朝廷养士

三百年，似专指太学而言，前此关闽濂洛之盛，悉本崇儒治化，无论已仕未仕，大义总无所逃。且是年元制人为十等，儒列娼丐之间。世道之变已极，人道之灭几尽。道存与存，道亡与亡，故不惜以一身一家为千古纲常之寄。非有迫于势，非有慕于名，非有激于气，成仁取义，其心安焉。越数年，孔圣贬为中贤，而太学鞠为茂草，尤甚于暴秦之焚坑。始知先生于此，兼为斯文抱痛，以不及见为幸，未可徒执鲁连蹈海之言例，论其迹也。余尝按文信国死于至元十九年，其答王积翁有黄冠归故乡之说，人或疑之，不知焚毁道藏，作妖书以诋昊天上帝，乃十八年之事。信国欲择其所弃者自处以明，此身必不容于元世之意，而衣带则书孔孟之言，亦取其所弃者为绝命词，以谢先圣而示后学，与先生之死，俱于忠节，内寓卫道之深心，古人措意，其不易明类如此。先生裔孙浴咸上扶二子有文行，卜地移祀，曲尽崇先之劳，可谓克知所务。诸巨公序之甚详，故余独推言其所未及云。

### 《忠节录》序

王 揆 颀 庵

《忠节录》者，宋忠节先生徐公闾门殉节之始末也。宋自南渡以还，天道则板荡疾威，疆宇则日蹙百里。降而至德祐改元之际，亡锥失鹿，虽有智勇，亦不能搆大厦于将倾。当其送款皋亭，内禁则自太后妃主以逮宫人，外朝则自省院台司以及散职，莫不偷延视息，系累而从迁焉。先生乃率二子琦公、崧公暨女元娘，酌酒于忠武岳公之祠，各赋自悼短章，矢志不辱。乘夜登楼纵火，会家人惊救，扑燎破壁，出之烈焰。不得已则又转而共趋于井，卒死之。至先生之配忠懿夫人，居常每谓：宋运将终，愿椎髻练裳与先生偕隐。见先生抗志不回，则先赋哀祠，自沉莲沼。呜呼！精燐碧血，争照千古。一部十七史，为求忠孝节义萃于一门，孰有能比烈先生者

哉！间尝论之，先生之死，后于岳少保，前于文信国。顾少保身为大帅，志复神州，唾手燕云，业有成算，长驱逐北，首与和议牴牾，取忌权臣，势必不免，壮男弱女，咸杀身以成仁。虽贞烈钟自先天，亦覆巢本无完卵。信国科名既盛，物望必归，收余烬以图存，则昊天不吊，仗孤忠而尽命，或分宜然。若先生止一太学儒生，进退绰有余裕。琦、崧二公虽云少年登第，然服官则未绾半通之绶，诏禄则未叨升斗之糈。使父子抱瓮深山，投簪空谷，冥鸿藏豹，亦可称归洁其身矣。至元娘以幽闲之德，髫髻之年，追随父兄，愿同焦烂，宁为玉碎，甘之如饴；忠懿夫人则又识炳几先，事倡义始，此皆烈丈夫所变色而道者，而顾从容两见于闺阁乎？今读五人之遗诗，想见当日无复返顾之情状，气足以配河岳，而言足以泣鬼神。天地无终穷，则此同一不可磨灭矣。康熙乙丑，余视学两浙西陵，采厥贞风，亟拜先生之墓。祠宫有恤，栝桧阴森，瞻仰屏营，如睹英灵。陟降殆若史迁所云：登仲尼庙堂，见其车服礼器，徘徊不忍去也。遂檄郡县，厘正祀典，申禁樵苏焉。盖余受知于先生裔孙散庵夫子，即出先生之门，亟与先生裔孙旭旦、旭升重订是录，题之简端，以识高山仰止、渊源向往之意云。

### 《须铎余音》序

汪 浩东瀛

自古文章之士未有不优经济者。汉儒以经术饰吏治，其事最为近古。唐宋以来，今世家弦户诵所称八家者，其制事施政之文，靡不曲鬯旁达于民情治体，非剪剪拘拘，雕绘以为工，而自诩为文者。明兴一代之文，开自青田、浦江二公。青田精奇遁之学，佐高皇帝帷幄谋论者，比于汉之留侯，所著《郁离子》，规橛先秦，有纵横之气，不及浦江之醇正。浦江文于理法最为严密，而考据今古，尤极其精核。顾论者犹惜其不能劝明祖兴起礼乐如三代时。不知明

祖起自田间，素不知学，其优柔渐饫，使知崇儒而右文，开有明二百年文物声名之盛，不可谓非景濂诸人启沃之功。是真所谓以文章为经济者也。余鄙陋，不敢言文。己丑筮宰须江，学博宋君长白，当世知名士也。家多藏书，为学探极根本，著述甚富。既乃为余手定其曩时敝帚之文，往来唱和，兼知君少壮时，以上马击贼，下马草露布之才，上功幕府，例当得高职，以格于铨曹议，遂小就而为此，盖君之才将老矣。君与景濂同姓，系景濂师承黄、柳二公，而待制在元大德间曾为江山教谕，君名其轩曰授墨，志景行之意。夫以君之才与学，使之遭时得试，何遽不如刘、宋二公？读其文知其人，所谓以文章为经济者，吾何间焉。其言理之文，精微溟滓，则探天心，穿月胁也；记叙之文，雄奇古穆，则拔鲸牙，酌天浆也；诗体在唐宋之间，不拘一格，才不轶法，学不掩性；诗余馥馥入南宋人之室。载是编者，曰《须铎余音》，盖鬻龙之片鳞，而威风之一羽也。陈同甫曰：研心于杪忽，析理于毫芒。又曰：开拓万古之心胸，推倒一世之智勇。君殆兼而有之。抑君又精于禅悦，好与浮屠氏游，能彻其宗旨。此又昌黎所云，能通其术，则吾不能知者矣。

### 崇贤会序

蔡 英

崇贤会，所以祀邑宋先贤徐逸平先生也。先生自前明建祠于西郭外鳌峰之下，名正学书院。岁春秋二祭，其墓亦以时祭。国初时，先生裔绝，祭产皆掌于甥裔王姓者。迩来祠既久圯，王姓盗鬻其产而逃，祀事遂废。癸丑夏，有控盗先生墓荫者，英即往视。荫果被盗，而墓亦将芜没于荆棘中矣。英以告署县事于侯，拘盗者严惩之，追木直充公。英思祀事不修，故祠墓俱无人整理，爰与同寅应君告之邑绅士，先为举一祀会，目其会曰崇贤，得同志者三十人，得钱一百五十余贯。即于是月致祭先生之墓，并即以所追木值为

墓地，按照志载弓丈，勒石定界。甲寅冬，葺其墓而新之。月余墓竣，因告邑宰熊侯，共谋建祠。侯即为序，付英与诸同人劝捐庀材鸠工。阅一载，祠成。迁祠前僧刹于祠下右旁，傍崖积石拓基，构书院一十四楹，仍名正学，不忘旧也。二载，书院亦成。祠后故有怀棠祠，以祀前邑侯易公，旋亦圯毁。今为重建于书院之左，增祀凡有功于先生祠墓及能振兴江邑文教者六人。落成后，乃谋置产以供祠墓永久享祀之需。兹仅得田十亩，当倍其数方足于用。所幸兹土人士，乐襄义举，故自此会伊始，历今六载，而捐资、监工、规画、措置任事者，靡不殚心尽力，始终不怠。则由此扩充之计，善后之图，尤所望于勇义乐善诸君子共葺厥事，以垂之久远，庶崇贤之道勿替矣。至一切祠墓祭祀规约及董理诸人姓名并列于后。

**宋徐进士双像赞** 兄讳琦、弟讳崧

明方孝孺

垂髫之年，并掇巍科。夙闻家学，卓尔不磨。志存勤王，返日挥戈。邦家弗造，慷慨兴歌。视死如归，孝义足多。英风烈烈，壮砥山河。

**宋孝女徐元娘像赞**

明商 格

孝女元娘，芳年十六。质比兼金，姿同连玉。经明行修，未字闰淑。从父殉难，节孝最笃。甘蹈烈火，甘沉深渎。岳娥先型，文媛后续。有宋三贞，允堪鼎足。

国朝

**方城何守府赞** 并序

蔡 英

征苗阵没广西提标中营守府何肇勤，原名朝清，字望远，别号方城，致身疆场，膺受恤命。国史中自宜立传。今其族葺家

乘，余不敢以传名，惧其僭而且赘也，谨拟赞词，而并叙其巛末焉。方城先世，于宋淳熙间由婺源迁须江，贤俊世出，夙号江之望族。曾祖乡饮宾玠，赠文林郎。祖邑庠生好信，封奉直大夫。父国学生鸿，赠武信佐骑尉。方城，佐尉公之第三子也。生于乾隆戊辰十一月初八日午时，少笃至性，重气谊，遇事果敢，不避艰险。年二十六，由本郡镇标行伍晋授中营外委。上官识其能而勤，屡膺荐擢。年三十六，补枫岭营左哨千总。阅七载，赴京引见。又三载，升授粤西提标中营守备。抵任未二年，楚南苗疆不靖，方城奉檄协剿。甫至，即率所部力战，身先士卒，大破贼众。督师者见其奋勇可任，急令乘势进取。翼日，复率兵攻贼寨，遇伏中创，堕马被杀，时乙卯八月二十七日也。大帅以闻于朝，奉旨特赐葬祭，入祀昭忠祠，子俊挺荫授云骑尉，世袭罔替。并命礼部行查事迹，付史馆制传。呜呼，方城之死不朽矣！爰为之赞曰：

人谁不死，死得其所之为难。若方城之奋力王事，捐躯阃外，非特宗乘之荣，乃史策之光也。死重于泰山，其是之谓乎？

### 双孝赞

海盐朱方增

所生无忝，相敬如宾，鉴废离于乌鸟。表可陈情，凜适所于鸣鸡；礼可从事，望金篦而疗疾。抚黄口以成人，鹿车共挽；允推白璧之双，马磨承颜。为谱《蓼莪》之什。

宝应朱士彦

孝乎惟孝，礼贤之乡。粤在成童，父丧母盲，弟妹幼弱，大母笃老。夫妇蒸蒸，悼髦用保。絮餐馨膳，此左彼右，扶杖浣髓，我先尔后。乃康于家，乃寿于身，式谷似之，勗哉后人。

## 西安余本敦

人各有子，孝子难云，孝亦常事，纯孝罕闻。繁惟朱氏，夫妇克谐，起居饮食，手自安排。厥考疾革，母盲于目，药必亲尝，倡随祇肃。侍奉大母，康强其身，教养弟妹，备历艰辛。伦常坊表，曾冈高风，宜膺纶綍，余庆无穷。

## 授墨轩铭有引

宋 俊

衙斋湫隘，仅东偏有破屋三楹。稍增葺之，辟长廊以为轩，杂置古今书史，容膝其间。昔柳待制司教此邦，其流风有足思者。因颜曰授墨，而为之铭。

洪惟道传，文章正印，师友相资，潜溪渊颖。

## 清如许池铭有引

宋 俊

轩之前有隙地一区，前人畚土为墙，注如覆釜。踵其旧而浚之，竟勿涸，蓄金鲫数十头于中，活泼泼也。目之曰清如许。

凿土袤丈，春流盎盎；鱼环游之，天空月朗。

## 天苗园铭有引

宋 俊

屋旁有废圃，环以城壕，规为园。杂蒔蔬笋之属，仍以家居所置“天苗”二字名之，示故吾也。

桃李多，荆棘少，土墙苔径清溪绕，助予鼎俎课园丁，奚必三饘求一饱。

## 客座铭

宋 俊

惟此东轩，萧然静寄，左右图书，纤尘不至。有客到门，绝无拘

忌，涵泳性情，名教乐地。粗粝浊醪，簋不过贰，淡薄家风，寻常位置。莫问荣枯，勿谈势利，有一于斯，点汤见意。

### 答毛滂书

宋 苏 轼

轼启。比日酷暑，不审起居何如？顷承示长笺及诗文一轴，日欲裁谕，因循至今悚息。今时为文者至多，可喜者亦众，然求足下闲暇自得、清美可口者，实少也。敬佩厚赐，不敢独享，当出之知者。世间惟名实不可欺，文章如金玉，各有定价。先后进相汲引，因其言以信于世，则有之矣。至其品目高下，盖付之众口，决非一夫所能抑扬。轼于黄鲁直、张文潜辈数子，特先识之耳。始诵其文，盖疑信者相半，久乃自定，翕然称之，轼岂能为之轻重哉？非独轼如此，虽向之前辈，亦不过如此也。而况外物之进退，此在造物之进退，非轼事。辱见贶之重，不敢不尽承。不久出都，尚得一见否？

### 与毛泽民书四首录二

公素人来，得书累幅，既闻起居之详，又获新诗一篇及公素寄二双石记。居夷久矣，不意复闻韶濩之余意，喜慰之余，无以云谕。久废笔砚，不敢继和。必识此意，会合无期，临书惘惘，秋暑万万，以时自厚。

新居在大江上，风云百变，足娱老人也。有一书斋，名思无邪，闲知之。寄示奇茗，极精而丰，南来未始得也。亦时复有山僧逸民，可与同赏，此外但緘而藏之。佩荷厚意，永以为好。秋兴之作，追配骚人矣，不肖何足以窥其粗。遇不遇自有定数，然非厄穷无聊，何以发此奇思，以自表于世耶？敬佩来贶，传之知音，感愧之极。数日适苦壅嗽，殆不可堪强作报，灭裂死罪。案：旧志误分为三，

今校正。

## 与循守周文之书

近蒙寄示画图及新堂面势，仍求榜名。岭南无大寒甚暑，秋冬之交，勾萌盗发；春夏之际，柯叶潜改。四时之运默化，而人不知。民居其间，衣食之奉，终岁一律，寡求而易安，有足乐者。若吏治不烦，即其所安，而与之俱化，岂非牧养之妙术乎？文之治循，似用此道，故以默化名此堂。如可用，便请题榜也。

## 与毛介川先生书

明杨继盛

忆自己酉仲秋，先生奉命出守瑞州，途中遇盛，示以尊贤为国之义，尽日而别，倏尔之间，不觉三载。仰怀高明，何日忘之，亦何忍忘之？上年盛在南都，七月下浣，适有一使自瑞来者，说瑞前多盗贼，民不畏法，惟自先生下车以后，明礼让，立教条，恤贫穷，惩奸慝，风俗忽改，大有汉时龚遂治渤海之休盛也。闻之不啻欢跃感慕，颂圣朝之有臣。他日高迁上国，辅弼左右，其功业岂易量哉？本年三月，仇鸾密遣家丁时义结俺答义子脱脱，使贡马互市。总督苏祐奏闻，仇鸾又与严嵩赞成其事。窃思俺答互市之言，即和议之别号，苟不谏止，祸必随至。盛因奋不顾身，题疏拜奏，言其互市之事十有不可。且言其彼倡为互市之说，以欺诳皇上者，其谬说又有五端。此等情词，本盛欲除外患，竭力保国之心。岂知疏上，为贼所诋，贬盛为陕西狄道典史，圜圜桎梏，几不能免。以此较视先生今日之不竞不綵，不刚不柔，而得以敷政优优者，其贤不肖为何如耶？及至盛赴狄道，不满一载，又闻先生调为宁国刺史。夫宁国者，固吾先生当年为御史而忤权，贬为推官而已治之邦也。盛想国中父老，其沐恩戴德，颂祝青天，当必有更胜于昔日者。而岂仅一二言

为盛之可得而拟赞哉？《诗》曰：乐只君子，民之父母。乐只君子，德音不已。此四语也，可为先生咏也矣。但盛碌碌进士，初登仕籍，徒以刚狂之性，在朝为贼所忌，不能上格明主，而致远谪他方，不知何日再睹先生懿范，殊为恨耳。今也盛居临洮山内，孤陋寡闻。伤山民之顽暴，性以先生之所以治瑞者，佐邑侯之万一。又尝于闲暇之际，进邑中诸生之贤秀者，相与讲说文义，以学先生当日途中所示尊贤为国之意。岂敢以地远人遥，而遂忘吾先生之至教也哉？词尽笔端，意溢言外，便中附布，伏冀鉴原。盛虽狂妄，不胜兢惕之至。

### 答何春泉论阴符书

徐 霁

承谕《阴符经》，乃战国阴谋之书。朱晦庵注释之，过矣。余以为不然。昔扬雄作《太玄法言》，以艰深之词，文浅近之说，好之者以谓过于六经。若《阴符》书中，极有至言，未可以诡异而忽之也。吾固表而出之，其曰：人知神之神，不知不神之所以神也。人有思虑知识，神矣，然有所住则有方，有方则限于一隅，而不能神天下之神。无思无为似不神矣，然而通天下之故，尽万物之变者，此也。非不神之所以神乎？此理《易》中具言之，非《阴符》杜撰也。性有巧拙，可以伏藏，九窍之邪在于三要。三要者何？耳、目、口也。人开眼便逐于色，闻于声，神驰形散，何能作主？惟于三者而制之，则外无所婴，内无所着，神定而形完，可以变钝拙而为巧智矣。又曰：瞽者善听，聋者善视，绝利一源，用师十倍。即庄子所谓用志不分，乃凝于神。瞽者听，聋者视，志不分也。故能善天下之视听，绝其一而专于一，则其功十倍矣。神之所以神，非以此哉？又曰：天发杀机，移星易宿；地发杀机，龙蛇走复；人发杀机，天地反覆。其盗机也，不可见，莫能知，似战国阴秘之书也。不知杀机者，只是变化

运用之机。如弩之发，而其机在牙，毫厘不可爽也。得其牙而制之，则阖揜在我，张弛在我，百发百中，而天下莫能违也。又曰：君子得之固躬，小人得之轻命。如汉唐诸名臣，得其机而善用之，故转移君心，枢纽时事，以成天下之大功。所谓君子得之固躬。固躬者，安其身以安乎国家。此机不可无也。仪、秦之徒，亦窥见此机，故揣摸之情，曲尽事变，纵横六国，世主无一不信其说。但其用之不善，以济其贪欲之私，故至于杀身，所谓小人得之轻命，此机不可有也。又曰：自然之道静，故天地万物生；天地之道浸，故阴阳胜。阴阳相推而变化，顺矣。余谓天地万物之道静，故生阴生阳，而万物化生，亦翕聚发散，理自然也。然天地之道浸，故阴阳相推而变化，顺浸之一字，最好玩味。阴阳渐渐消长，故能运化，寒暑之极，至于折胶流金，而物不以为病者，其变者渐也。使此两极者，相寻而狎至，则人之死久矣。圣人之化，如寒暑昼夜，亶亶而不能自己者，亦渐也。故虽变革之际，亦必已日乃孚，革而信之，不骇民以强其所不欲，天地圣人以浸哉？细详《阴符》前后三段，一论用功贵乎专，二论施为在乎机，三论成功在乎渐，而总之以不神之所以神也。《中庸》论至诚能经纶，大经立大本，知化育而归之以无所倚。《易》论范围天地，曲成万物，通乎昼夜之道，而知而括之，以神无方而易无体，相符合也。惟诚则不倚，惟神则无方无体，兹其成经纶范围之大业也。圣人岂欺我哉？《阴符经》出于鬼谷，鬼谷宗乎老氏，皆古之格言大训，不可以诡异之书而摈之也。

奉王龙溪先生书

徐 霏

家居十五年，曾筑室于文水之滨，究心于此学，如灰中一线，屡明屡灭，非我翁点化，终亦必亡而已矣。思一渡江就正门下，顾年迈弗克，自弃甚焉。先师崛起于千载之下，继往开来，如日中天，有

目者靡不快睹，矧在门之士耶？今同志谢世几尽，开口讲学者，如希世之凤麟，矧嚅啻者耶？我公倡道东南，如登千仞之巔，八窗玲珑，四面洞达，而凡高山大川、平原旷野，俱在其俯视之下。先师之学不赖是一明乎？大抵此学一在天在人，以孔子之圣，且曰：我非生而知之，好古敏以求之者也。明道亦曰：吾学虽有所受，然天理二字，却是自家体贴出来。学者可轻视之耶？孔孟以来，惟濂溪之学为得其真。其曰：无极而太极，朱子辩之详矣。又曰：定之以中正仁义而主静。夫中正仁义而非主静则谬，主静而非中正仁义则疏，惟定之以仁义中正而主静则体用合一，守之贵，行之利，措之天下国家，无所处而不当。后明道先生曰：动亦定，静亦定。与象山之求放心，先立乎其大者，则皆主静之说也。慈湖之学得之象山，慈湖在虚明阁问象山：何谓本心？象山厉声曰：只此扇讼，一是一非，便是本心。慈湖大悟，即礼拜。其后告人曰：我当时若再问一句，便不得也。盖天理只是自然，拟议即落意，见古人所以贵默识也。不知慈湖者，议为禅学；而知之者，亦未得其肯綮，故有杨子折衷之论，亦子莫之执中耳。慈湖之学在不起意，其得力处在是，其受病处亦在是。孟子明心，孔子毋意，意毋则此心正矣。则毋意之说，其可瞥乎？但其论孔子之格致诚正，与原曾之仁，皆以为非，则失之过高也。其诗曰：回也，三月不远仁，自是原曾少失真。一片雪花空著水，融融不复辨漓醇。曾子之力于仁，其果不知此乎？《圆觉经》曰：有人行住坐卧，不起妄念，于忘念不加了知，于了知不辨真伪，此最上乘。行持是人，便生佛果。或以慈湖之说有类于是耶？象山曰：敬仲说一，吾不说一。一者，其统体也；万者，其散殊也。天体物而无或遗，仁体事而无不在，岂以一者为仁而万者独非仁乎？慈湖之学与象山微有不同，故荆门之政，几乎三代，恐非慈湖所及，高明以为何如？便中幸指示。伫望伫望。

## 答万介公问游山书

明邹祗谟诂士

昨送览游记五篇，稍稍论叙所登涉处，并志时日，足下乃过为奖扬，至欲列之新志中，又欲以舆马助仆尽历须江之胜，如所为江郎、左坑、鹅笼、鹤鸣诸胜，凡穷山绝谷之境，瓌奇怪特之观，必得仆登临啸咏于其间，以尽发为文章而后快。仆顾何人？乃当足下勤渠之意如此哉？顾时方大夏，流金裂石，裹粮而往，仆马交困，是以仆虽好游，止徘徊于一二十里内，未能过此遽前也。噫！仆兹负足下矣。夫须江固闽、越、豫章之交，而士大夫来往之冲也。诸奔走信宿而去者，既不暇游，亦不好游，即为使君而至，止连旬累月，或不知游，亦不能尽游。而邑之人士，又鲜好事者，先之以游。故烟萝、接云诸洞，俱在大道之旁，而荒邱败莽，几于不可投步；宾阳洞高不数里，而黄冠樵客多不能知其处。仆是以徘徊于层崖峭壁之上，猿攀鸟蹶，而终未得尽窥其奥也。桂林地邃石奇，重冈透伏，觴咏竟日，但时非深秋，不见老树作花为恨。然居人都言虎嗥熊迹，时时满村。舍中同游者，谈之色变。仆固怡然，翻以为佳矣。陆舫地近孔道，游人殆无虚晷，然仆观其意，徒赏其形制诡丽耳，非真知泉石林麓之伟特也。使移置接云宾阳之际，又不几为空谷之跫然耶？嗟乎，山川之显晦，既系乎其地，亦异乎其人。须江道在冲要，而林泉稍僻，不能比于武林、会稽之胜，为达官显人之所眺览。庶几遁世绝尘之士，方能秘为己有。而仆披榛攀磴者累日，或至杳无人迹，想濯纓结庐之徒俱在远而不在近耶？仆浏览旧志，记游山水之文，十不得一，岂自有须江以来，遂无好游如谢康乐、嵇叔夜其人者？足下之得桂林兴不在康乐下，而仆好奇亦如叔夜。昔人有言：州有九，游其八；泽有七，涉其三。足下试稍待之，仆将登匡庐，泛彭蠡，而还至斯境，假车秣马而往，必历尽须江之奇胜乃已。仆意

已决，更不俟足下之劝驾也。山灵有知，足下其试为我告之。

### 柬毛惟静

明徐万壁

昨承教语，欲以贤友今日之积，尽散于穷民，以为将来义仓永远之举，甚盛意也。生谓一举之中，则赈恤之仁，救荒之政，为两得之矣。而吾友经济之学，亦于此可见。昔范希文自做秀才时，便以天下之事为己任；张横渠尝欲以井田之法行于一乡之间，初不以未遇而忘经济之心。今吾友此举，非即二公之心乎？宜速如来教，刻日行之，开起散过名数送来，以为同志者劝。闻风之下，其乐从者必众矣。生当以吾友之名，首闻于上也。

### 与刘羽泉巡抚书

明毛 恺

迹者，猥蒙赐教，示以减饷之查，具感我翁留神弗遗，自是人沾实惠矣，何幸如之！近又闻综核详慎，似有山荡之蠲，果无制肘，地方当百世俎豆翁无疑也。非佞春防整肃，即有一二汛奴，又往往歼之海上，绝无登陵，此实徙薪之功，视诸焦烂者远矣。两浙安堵，金汤隐然，某窃桑土余荫，宁敢忘所自耶？前曾奉启附谢，计达清览矣。敝邑新尹为徐元泰，宣城人也，德器粹然，当能为公分其忧者。但邑久凋瘵，而一二顽民又复梗于其间，惇大明作，二俱难废，倘蒙督之速任，喻以吃紧，即穷民受福无涯矣。

### 与余见田大尹书

昨台察惺庵公差人赍本至京，曾有书下及，谓公四月荣履矣。且述公沉毅简默，尺度森然，必能树远大之烈，私心窃慰。以彼此一见之间，便相知相信乃尔，虽惺庵公之藻鉴绝人，而公之笃实光辉自不可掩，有若此者。第念陋邑无足以烦牛刀，实微莫大之福

耳。大抵邑之赋役烦重，民多困疲，而俗习夸诈，负气好讦，其词往往诡诞，殊非事实。倘蒙寡讼省刑，轻徭薄赋，示民以俭，俾民翕然知所改弦易辙，是所望于明公不浅浅也。生碌碌无所取裁，每想海内善人君子，则必倾心焉，矧公为敝邦之贤父母，其为仰戴，又当何如？

邑令实系民生休戚，所谓父母云者，谓能抚字此赤子也。大抵崇俭朴，节才用，省刑罚，薄赋敛，均徭差，恤里甲，省词讼，革包揽，逐积猾，以礼让易风俗，以文行兴学校。禁千长应捕之下乡，而勾摄以里长；备盗贼水旱之不虞，而先事以无患。此皆敝邑之所最急者，固明公之所优为也。至于振纪纲，慎法守，广询博访，以尽民间之利病，父母一念，赤子一体，终始无二，自非学道爱人之君子，其何能臻兹？然微明公，亦不敢以此进也。

### 答徐东溪藩伯书

承示精舍之构，日与勉叔诸公，共寻圣门真乐，令人延颈以仰，如威风翔于千仞，视鸱鸢吓腐者，万不侔矣。生于此学，颇亦有志，愧尘土汨没，又鲜高明如公者，一剖其蔽，殊觉淹淹不振耳。行将脱此俗鞅，以就鞭策，未审远社肯容陶彭泽否？吾邑承平颇久，近日江闽之寇，不无震邻，筑城之举，实今日所急。不然恐卒有变，数十万生灵将坐视涂炭，而莫之控救也已。夫虑始之，民自昔难之，又人情只见目前，至背后之患，即明者亦未之或察。我翁须于当道处一言，倘得帑钱数千百缗，则可就事。若全取办吾民，则道旁之舍，毕竟虚谈耳。生昨已启之按院矣。草草附布，不尽。

### 答谷近沧巡抚书

恭惟开府吾浙，熟路旧游，士民岂特拜庆二天而已哉！但十余

年来，浙中困于军饷，盖昔无而今有者也。夫海汛之防，宁能去兵？尚恐屯戍欠要，老弱未祛，则所费为冗。向蒙剑门、羽泉二翁，前后题减各数万，民获一分之赐矣；今又不能不延颈吾翁耳。处州矿寇不时窥伺吾衢，每一窃发，乡间老幼辄窜匿深山不暇。即如生家，僻处一村落，族中眷属，无不皆然。联保甲以稽积冗，饬武备以折奸萌，似为要务。又今春台郡大水，金、衢、严、处率罹旱灾，缓征、议赈、备盗数者，目下至急也。至于惩贪奖善，薄赋轻徭，兴利去害，俾一段真精神、真命脉流行著察于所属郡邑之间，以致于太和，是在翁稍出其绪余云耳。

### 与王仁庵巡按书

愧无似，抱病伏枕者几一载矣，至今未愈。国恩莫报，念之惘然。然辱雅情，不一而足，已深惭感。兹复拜德音，兼登厚贶，其何以为报耶？敝郡望大驾之临，不啻饥渴。兹幸获遂所愿，何庆如之？明公持重端严，民怀吏畏，真台端白眉也。顾且虚己下问，不自满假，加于人数等矣。敝邑僻在山间，矿寇不时窥伺。近日余父母先生为吾民百世计，申之台下，欲城之。辱明公已允其议，且征派有方，经画无爽，毅然直任其事，可谓民之保障矣。乃吾民难与虑始，恐材力不继，颇怀二三。今闻台下欲停江饷五年以资之，众志翕然遂定。望蚤赐题请，则此工不日可成。倘尚有二三妄生横议者，斯枉是非之实者也。幸无惑其说，庶任事之人得展其志，以惠一方无穷也。愧乡居，离城四十里而远，邑中亦无寓舍。城之有无，筑不筑，于生无与。然所以不避尘渎者，实为桑梓数万生灵之虑耳。余公廉慎勤敏，诚学道爱人之君子，明公身激扬之任，敢贡其说于台下，非阿所好以目欺也。

### 上周乾明巡按启

恺蒙恩赐还山，卧病如昨。本不敢致书当道，以自取渎尊之罪，但近有民瘼，关系颇重，度情与势，俱不得不仰干清听。敝邑虚粮多赔，民户日窜，幸遇邵尹留心丈量，厥功垂成，止缘稻禾盈畴，未曾覆核。今俟秋收，便可举覆。偶传谷抚台复命有调繁之荐，未知然否？民心皇皇，若失怙恃，相率将控吁于左右，浼生为之先容。倘传闻非讹，愿借留数月，以终其事。如近日遂昌池尹之例，则粮不虚赔，户可渐复，江民世世无穷之庆也。

### 与邵养斋邑侯书

侧闻明公锐意清理田赋，信百世之利也。但生愚见，此事重大，必须委任得人，赏罚必信，又须躬履其地，手自校量，庶民获实福，不然徒滋弊耳。未审高明以为何如？鸡邑不足以烦牛刀，然民穷俗偷，便欲使之家给人足，而且回心向道，以易其旧染之风，非明公吾谁与望乎？

### 答赵玉泉巡抚书

敝邑城筑，实百世之利，况值余父母毅然不惑，直任其事，且经画详妥，众志翕然。计不日可成，又辱翁下采刍蕘之言，以五年江饷资之，民心益踊跃。子来矣，恨无缘缩地，一叩台下，为江民致谢也。倘蒙再赐檄催，俾于冬春之间竣事，则保障之庆当何如耶！

### 复赵方泉中丞书

明徐 阶

毛介川公节行，海内所稀，乃其夺官，实缘张齐获谴。近蒙恩复职，盖圣主激励缙绅，铨曹之表章正直，皆于是乎？见有不独慰

介川于九泉者？公山居久，不睹邸报，故偶遗之。至于不肖，则公议私情，皆不容默，是以冒昧撰次，庶几后之修国史作郡志者，或有征焉耳。

### 复毛礼卿书

明余一龙

读所寄乡约，曲尽人情，有体有则，不意妙龄英俊，便有此老成经济。贵乡来者，莫不道旄倪士庶，豪强奸猾，悉钦无哗。行之悠久，复古三代不难也。将来出仕，特游刃耳。忝在通家，喜而不寐，深贺介川翁积善之报。辱念贱生，谨此附谢不尽。

### 国朝

#### 上朱梁父夫子求开米禁书

康熙四十五年

姜亨肇

窃念江邑处万山之中，地广人稀，民皆力穡，既无蚕桑畜牧之资，又乏金锡鱼盐之利。凡地丁钱粮以及民生日用衣食之需，皆取资米谷。地方穷苦，财路不通，故岁凶有谷荒之病，而岁丰则有钱荒之忧。本年钱粮，荷蒙蠲免，其四十三年以前积逋，尚累万盈千。公庭敲朴，何术点金？此禁米之病民一也。江邑产米之乡，一秋之熟，可支数年。若必江民始得食江米，不惟正赋无由得供，将历年陈陈相因，终归红朽。布帛鱼盐，从何取给？此禁米之病民二也。况田间小民，当今农隙之时，南运浦城，西运永、玉，负戴相望，佣力升合，以糊其口，以养其孥。今皆禁止，为客者逐，贩米者罪，南者不得之北，西者不得之东，远近相通，农商不得相易。彼有余财不能得米，此有余粟不能得财，产户不能完粮，小民不得食力，贫富交困，公私两穷，通邑张皇，手足无措。此禁米之病民三也。四十二年奇旱，旧春粮食皆远贩苏、杭。若苏、杭遇余，则江民早馁沟中，安有今日？今始熟一秋，即行禁遏，倘再遇凶年，告余何郡？此禁

米之病民四也。江邑农民苟非大歉，未尝乏食。其地方匪类，游手好闲，不思务本，稍有艰难，则借端生事。往往以禁米为名，关津要道聚众白抢。上年春夏，犯案者甚多。今一闻风，群聚相庆。善良谨厚，势不聊生。此禁米之病民五也。今圣天子四海为家，遐迩一体，有无相通，农商皆利，雨露同天，宁遗一邑？伏乞赐详府宪，俯顺輿情，给示开禁，为山邑开财帛之源，为万民遂输将之愿，积逋可清，追呼不扰，恩同再造矣！

### 上朱梁父夫子书

姜亨肇会侯

邑乘者，将以悬之国门、垂之久远，使天下后世知所劝惩，大事也，公事也。今师台存肩盛典，任劳任费，固将与方策并传不朽矣。但文庙一件，杨公实与有力焉。今削其名，是以一人之私隙，而没千万人之公议也。道路闻之，人人骇愕，而未尝有一人向师台言者，以为事必无成，终当改易，故隐忍而不发耳。古人云：防民之口，甚于防川；川壅而溃，伤人必多。师台可不思其故乎？至于补载各传，尤宜详慎。刻不刻，自有机缘，何足介意？昔余恕庵矢公矢慎，可质鬼神，偶以徇一己之私，好为万公立传，至今罪之，以为口实。后之视今，亦犹今之视昔，可不畏哉！夫犯颜者，事君之道也；几谏者，事亲之道也；无犯无隐者，事师之道也。肇不才幸侧门墙，而师台饮食教诲，有逾君亲，又奉命校阅，故知无不言，言无不尽如此。伏惟垂鉴，幸甚幸甚。

### 复柴菊崖书

宋俊

瓠落荒斋，久图焚砚，谬因武陵公诤诿，勉效铅刀，但前志疏脱甚多，近复艰于搜访。顷承手教，知属望甚殷，灵石一碑，虽缺文断字，影响徒存，而古锦生香，犹堪摸索也。至若贵邑人文，旧编所

有，略在增删。而迩来行谊，例应附入者，必须广稽博采，始克信从。于令升有云：考先志于载籍，收遗逸于当时，非一耳一目之所能闻睹者。比闻有人赍持先世遗迹，觊得一登其姓名，乃始也，临渊而羨，继且抱璞而归。此又晏子所云：酒酸而不受，必有尼之而去者。俊亦不能为之曲说也。

### 柬宋学师

柴 圻

灵石庙建自宋政和间，迄今六百余年，颓檐败壁，渐即于圯。中有石碣一道，剥落不可卒读。每经过碑阴，爱其笔法遒劲，辄注视不忍释去。口诵心维，目力所至，手录之，什得二三，文之梗概备是矣。其他姓名爵里，都不可考。昔人游岳庙，好事者穷搜极览，不遗余力，甚而求诸瓦棘中，获片石只字，有若拱璧。斯碑如鲁灵光，岿然独存，顾使之湮没不章，可乎？敝邑自经闽寇蹂躏，诸名胜经前人品题者，渐灭殆尽。间有未罹兵火，恒在人迹稀到之处，至今沦于蔓草荒榛间，不知凡几。独怪庙属通衢，冠盖相望，谁有过而问焉者？窃思敝邑虽僻处弹丸，忠孝廉节，代有其人，载在邑乘，班班可考。至于身居寂寞之滨，匹夫匹妇，天性激发，捐躯不顾，可以昭日星，泣鬼神。在当时不求自白，又无缙绅先生为之揄扬，则懿行何由上达？此辈宜亟表而出之，为风俗人心劝。至于事之有关于国计民生，昔人或未举者，尤当博采舆论，编入简端。

### 谕各塾蒙师书 乾隆五十八年

蔡 英

谕蒙馆诸生童知悉：读书以敦行为首务，蒙养乃毕生之始基。盖人方幼年，知识初开，天性未漓。于此时教以善言善行，高明者即可从此立志向上，愚鲁者亦能记之终身不忘。故凡有训蒙之责者，宜先将孝悌忠信、礼义廉耻诸大节，及凡一切做人道理，时常亲

切讲明开导，或每日另立课程，将古人之善言善事，讲解数件，使学堂中长幼齐集敬听；或于讲书解字之后，特举书中此等意义，重加提醒，令其学此做人。所讲不可过多，多则易忘；不可太细，细则难晓；又或随时随地将学做好人的道理，明白指示，反覆告语；须要其如此着实学去，不可徒听其言，不可徒记其事；则无论异日读书成否，而使晓得学习好样，此是真实受益之处。此是蒙师第一要紧责任，幸各勉为之毋忽。特谕。

### 补黄节妇传跋

赵 桢廷坚

余修毛氏谱，作烈妇传以发宋孺人江氏之潜德幽光，以劝毛氏之妇矣。及录宋朝奉郎毛豫行状，又知豫三岁而孤，母太恭人黄氏守节自誓，鞠养教训具有法。及豫稍长，益命之学。以故豫文章政事，蔚为有宋名臣，而足以并驱江孺人之予随焉。黄恭人不幸早寡，而贞烈更表表实，卓冠毛氏之门矣。因书于谱，以补节妇传云。

### 贞烈赵女碑跋

蔡 英

贞烈赵氏，父名总，明末因乱避兵，由福建建宁府浦城县赵家村徙居江邑大东门鹿溪里。氏字常山王盛善之子永升为室。年十八未婚夫死，舅姑怜氏年少，欲令改字。父母以舅姑志，亦欲再为择婿。氏不从，吞金不死，投缳又不死，卒乃抱石自沉鹿溪。氏生于顺治十五年八月十五日丑时，死于康熙十四年七月十五日酉时。呜呼，矢志完贞，捐躯不顾，虽烈丈夫莫能过也。乃以年湮事远，未由闻诸当道，俾膺荣奖，良可惜已。爰勒石于其死所，用表幽芳，庶几过而问者，咸识贞操烈行，断不终归销没，亦砥砺风教之一助云尔。

## 《空山破寺残诗感旧图》跋

萧山王绍兰南陔

朱文正公为本朝第一人物，绍兰平生第一知己也。嘉庆甲戌九月，蒙恩抚闽，请觐，道经江山之苏岭，憩于萧寺，见公题壁诗三首，已残缺过半。此诗绍兰初宦游闽，曾读一过。是时公持节两粤，迨庚申被荐北行，又过读之。公时以官傅居台辅，黄发康疆，岿然无恙。辛未服除，奉命重陈闽臬，公则已归道山。黄昏到寺，不得以火来照，感恻而去。今且宰木拱矣。回忆公视学浙江时，绍兰风雪渡江，面试古今体诗，宏奖已殷，拔萃尤异，乃忽忽三十年，而音容邈不可即。习之、问卿相继下世，鲤庭亦阒其无人。惟冢孙涂以观察需次吴门。夫甘棠微树也，而歌者思废；岷碑片石也，而读者堕泪。以绍兰受知之深，而亲见公三代之盛衰，且于荒凉寂寞空山破寺之中见公所为诗，屡过屡读，而风景又屡不同，即其诗之遗墨，复为尘封虫蚀，日就剥落。卖茶啜粥之僧，罕有知爱护而藏弃之者。而绍兰孑然此身，年已五十有五，聪明不及前时，道德负于初心，欲求如公曩时之劝学道古而不可得，抚今感旧，不自知其涕之何从矣。诗缺后，僧或随时补之，字虽不类，句赖以存，自注亦幸可考。有楹帖一联云：云石江将疑浙字，风篁岭若误髯苏。公之哲兄竹君先生所自书，语奥而笔遒，虽在尘土中，若有精气光怪，不可磨灭者。三诗皆及之，友爱之笃，油然生感。兄弟以视学而交代仙霞，亦盛事也。因携至武林，付之装池，亲为补写完好，合其真迹，搨诸一椽，别摹副墨于版，归途并畀寺僧，且语之曰：此法宝也，可永镇山门。玉带无异苏留兰亭，莫被萧赚，若遇阑风徽雨，亟须暴以秋阳，毋使山中脉望饱食神仙字也。敬用原韵，系以二诗。其诗曰：古屋如窞黑，禅镫似豆青。旧题尘满纸，老泪雨倾瓴。石悟三生电，人怀二使星。丛残数行字，恍读壁中经。弟子头新白，吾

师眼旧青，短材椽取笛，险韵水翻瓴。阙补初三月，匡沉第六星。公字石君，行六，学者称为石君先生，亦称朱六先生。山僧勤保护，莫作换鹅经。诗不足取，自抒向往之诚云尔。又有同年谭兰楣二诗，一自作，一用公韵，谭亦吾师之弟子也。自作云：鸾凰流韵远，百鸟愧无声。其所以尊师者，亦云至矣。亟存之，足征吾友渊源之有自也。舟车击互，风雨寂寥，得好事者绘为《空山破寺残诗感旧图》，装成小册，以乞在位通人、处逸大儒之鸿笔丽藻者，共属和焉。

### 再跋

案跋中“兄弟以督学交代仙霞”句，今考公撰笥河先生神道碑，乃知乾隆四十四年，先生督学福建，明年以公代先生，题使院之寝曰：辘轳公至，与先生对床者半月，送先生于芋原舟次。则交代在学署，不在仙霞。前跋传闻误耳。道光五年十二月识。

### 三跋

嘉庆焉逢奄茂囊朕月元，绍兰马首北瞻，憩彼葦苏之岭，□太傅龙文南轡蝨于兰若之墙，缩版重摹，眉书载跋，思绘空山古寺残诗感旧之图。博访通人，大儒老师，知新之士，迭咏元音，萃成秘笈。曹不兴秣陵画屏，难逢妙手；扬子云甘泉赋时，谁吐绣肠！集染十五年，蹉跎六九岁，绍兰，今年六十有九。萎颓之梦，杼柚于裹者久矣。今也庚子之日，五经拜漱；戊子之秋，六法告备。此蔡茂才以平之复求，而张处士应躔所朽罢也。画家于人物必九朽一罢，谓先以土笔扑取形似，数修改，故曰九朽。继以淡墨一描而成，故曰一罢。见《画谱》。乍展新图，恍游初地，缘坡夭斜，篁岭风也；太古无人，山静空也；香积入云，寺古红也；支提处幽，曲径通也；兜罗摩诘，辘尘容也；香光庄严，梵志从也；开元八分，骑曹工也；金华八明，南本宗

也；张南本事，见《图画见闻志》。爰付装潢，思颺春也；乃袭锦囊，长吉缝也；漆书一卷，常握不离，西州胸也；蜀素廿年，将属善题，东园踪也；太傅三章，其犹龙也；卢郎入米，其为杠也；绍兰自谓。笙磬同音以雅，以南望诸公也；铿铿钹钹，东序镛也；郁郁葱葱，冬岭松也；岩岩嵒嵒，泰华峰也；浩浩汹汹，海瀛蓬也；大雅三十一，小雅七十四，群公揜之兑之戈而觶之弓也。夫容三十六，鸳鸯七十二，绍兰珍之，夏之璜而商之珙也。筒之封之崇之供之，俟它年下饮黄泉，可告先师于地下，赖今日中横碧落，柳子厚《陪崔使君游燕南池叙》：横碧落以中贯。共摘丽藻于天中也。自惭五字重和三章，其一曰：壁面九年白，此追忆屡经苏岭，面壁读太傅诗也。山腰万笏青。此因披图而念空山也。僧繇土察，僧繇谓应躔苏岭有寺无浮图，披图忽见之，方悟人间事，自有时无，自无时无，有有无无，如镜花水月，益惊昨梦矣。椽龠衬陶瓿，椽龠以平自号。邵真《定惠寺新造文殊菩萨记》：攻木陶瓿，椽在下。故云衬此怀古寺。脉望曾三食。太傅三诗皆有蝨鱼蚀处，是即三食神仙字也。此忆残诗。长恩又一星，绍兰自嘉庆丁丑罢官归里，思过观书，迄道光戊子，正十二年，一星终矣。长恩司书鬼。残诗藏古寺，空谷几人经。此总结全题而感旧情怀，亦见于言外矣。其二曰：鹵山松冢碧，太傅墓在顺天宛平县之西山二老庄吕村。公于嘉庆丙寅归道山，丁卯卜葬。至道光戊子，计二十三年。冢上之木拱矣。南峽竹林青。谓苏岭。仙境瞻霞岭，苏岭距仙霞不远。寒宵听雪瓿。甲戌自都还闽过此，大雪初霁。壮怀销昔昔，入此岁来，才力心思，一日不及一日。管子曰：今日不为，明日已货昔，昔日已往而不来矣。读之慨然。华发惜星星。绍华年在望七，虽无三千丈之白发，然种种者已有数十茎得秋霜而颂，则雪洒矣。夫子远行久，管子谓毁为远行，见《吕氏春秋·知接篇》。从谁问六经。其三曰：无双纒紫紫，紫紫谓紫纒及紫纒囊也。凡百佩青青，共识子朱子，何妨瓿咏瓿。《淮南子·精神训》：扣盆拊瓿，相咏而歌。言相咏是以盆咏瓿，瓿咏

盆，盆味盆，瓠味瓠也。西林濡瑞露，东壁酌文星。言诸公笔露可酬太傅之灵也。风月三千首，春秋十二经。春秋以况太傅诗，《庄子·天道篇》：孔子翻十二经释文。一云春秋十二公经。鄙人之言若炉火之荧荧也，庶几在位通人处逸大儒，若钟之有莛也；礼堂老师、鸿都新士，若鼓之有桴也。咸明以谕，有所受焉，若烛龙之照幽冥也。时在道光雕敦橘涂之月既望。

祭岳武穆王文德祐二年

宋徐应鑣

呜呼，惟王生焉义烈，死也忠良，恒矢心以攘狡寇，每锐志以复疆场。奇勋未入乎凌烟之阁，奸计先成乎偃月之堂。含冤泉壤，地久天长，中原涂炭，故国荒凉。叹狐奔而兔逐，恨狼竞以鸱张。王如在也，必能保全乎社稷；王今没矣，伊谁力挽乎颓阳？鰕生才薄，事类参商。方徙薪乎曲突，奈祸起于萧墙。立身迥异于禽兽，含污忍倒于冠裳。舍生取义，扶植纲常。来今往古，人谁不死？轰轰烈烈，万古流芳。罄南山之竹而书情无尽，决东海之波而流恨难量。大王之名，与天地同久；大王之德，与日月争光。呜呼哀哉，敬奠一觞，从兹永诀，于王是将。尚飨。

祭先师周二峰先生文

明徐 霈

自逸平之倡道兮，迨今寥寥而无闻，惟吾师之从阳明兮，乃振起乎斯文。进则膏泽乎岭之安，辰之沉兮，退则师范乎后人，其行凿凿兮，其貌萑萑，其政闷闷兮，其民醇醇。兹良知之用兮，奚所为而不准。惟迈志而存道兮，不揭揭求名与声。敛一元于幽默兮，自是为条风，为景星，而荣者悴者，咸嘘之而为春。聊著述以自见兮，披华剔秀，若太羹元酒之淡泊，而识者自辨其真纯。惜凤鸟之不至兮，仅睹夫圣道之涯津。祇鹿门之偃息兮，乃皓首于庞耘。霈等幼

承公海，中游王门，虽参差而互出兮，实寻绎乎旧闻。惟日月之云迈兮，虽枉死其奚论。冀一日之尚存兮，庶几嗅其余芬。夫何去此而返其真兮，纷涕泪之交茵。兹吾辈之日孤兮，夫谁共业之余殷。岂厌世之溷浊兮，飘然脱去，愀空山而愁人。呜呼，身为聚沫，世若浮云，无去无来，孰亡孰存？庶几不朽与不死者，在吾行与吾真。陈谏辞以一号兮，魂髣髴而来歆。

## 祭林阳溪文

徐 霈

翁之状貌嶷嶷，其容浩浩，其气俯视一世，孰云其盱？公之学术，开陈大端，上下古始，亶亶千言，孰云匪宜？譬诸巘岼之山，百寻之干，敛其英华于腹心，而毕吐其蕊，有不足以揭揭乎？而乃屡试屡抑，大玩于辞，而与世抹掇何耶？晚贰南陵，士论翕然，阨于儉壬，中路以颠，行殊见疑，竟尔偃蹇。呜呼，人有遗技，天无兼全，故巨才虽掀揭可喜，然外匏中槁，恒不适用。而突梯卷鬯，剡方规圆，为世所贤。遇与弗遇，于公奚嫌？所可恨者，方筑室于溪东，与西山、阳溪朝夕讲肄，以淑后人。胡旬日之间，相继沦没，使余涕洒横流，欷歔而不可禁。呜呼，公视死生如夕与晨，步不惮劳，疾不云呻，有化非亡，有隐非沦。我独何为，洒泪沾巾，侑此一觞，以写此心。

## 祭柴白岩文

徐 霈

万历己卯，徐某祭于处士白岩柴先生之灵。呜呼，维公性资超脱，与世绝伦。斗室安居，希环中之趣；气味萧然，似野外之僧。遐想黄虞不远，俯视宇宙纷纭。晚耽诗句，口不绝吟。不杂沙砾之内，超然元珠之寻。斯世斯人，而岂多云？所恨平生偃蹇，内无应门之童，外绝强近之亲。我窥其户，阒乎无人。钱一入手，随时飘

零。东户并无宿粮，西室有如悬罄。荣公老带索，原生衣结鹑。兼而有之，非公其人耶？抑又闻之，得乎天，不得乎人，不失为君子；得乎人，不得乎天，不免为小人。二者交勘，断乎云云。公东西闲走，足不暂停。穷冬欲入天台，谒敬所公于城中。余止之曰：公骨如柴立，气不周身，年过古稀，一旦不讳，谁与舆榘？公不为止，入台往返半月，抵家竟尔歛沉。伤哉！余退居林麓，与诸公晤语日新，胡数载之间，相继沦没？使余歔歔而不可禁。呜呼，公素入大雄氏之门，视死生如昼夜，等世界如空云，步不为劳，病不为呻，有化匪亡，有没匪沦。我独何为，涕泪沾襟，恨汤药之弗躬。徒怅望于门扃，睹宿草而生哀。庶明灵之我歆。尚飨。

国朝

祭玄坛驱虎文 康熙五十年

汪 浩

辛卯孟夏，有大虎二，乳虎一，由东岳庙戏于城之南门间，出入于何氏祠内。行者戒严，越三日不退。浩因躅吉备牲，告于玄坛祭之，明日虎遂去。

闻之虎豹在山，樵苏不采。况逼近我城郭，惊恐我人民耶？近者南门之外，三虎昼出，自辰达午不退。虽驯而不害，来匪其所。惟神威灵服猛，制虎之命，潜驱而阴率，俾归于深山密箐。我人民无恐，虎亦远害，神实职之，敢告。

周登瀛诔文 并叙

许汝璜

登瀛，字海仙，号春艇，姓周氏，江山南乡三十二都人也。父翔凤，字翊羽，邑武生，好为善。道光丙申，以赈事得议叙八品。子二，登瀛其次也。幼能诵读，承父母训，尝得二老欢。年甫冠，父歿，母毛氏教养成立。长操家政，弃举子业，援例入太学。秉性勤

俭，家虽裕，布衣蔬食，泊如也。与人交，恂恂自下，处事以诚，无少年浮靡习，能继父志。凡邻里戚族，婚嫁丧葬，有所求，无弗应。每至夏秋交，出谷平糶，终其身以为常。自邑遭匪扰，民不聊生。同治纪元，捐赀偕同志者于广丰、龙、江等处，设延喘局以赈，所活无算。次年，浙境以次肃清，时恪靖伯左方奉命巡抚浙江，统师入浙，驻军三衢，开同善局经理善后事，闻登瀛好善之诚，令往龙游赈，并掩埋遗骸事。龙邑被灾较酷，经费尤巨。登瀛倡捐钱二百余缗，复与同邑王开泰、姜柱业、江日曜分任劝捐，得白金三千七百余两，又捐良田一百余亩，为持久计。三年，复奉赈严属之建、桐二县，捐银四百两，前往桐邑之蒋家埠司其事。积劳病暑，一夕卒于赈所，时六月十日卯刻，年二十有三。妻汪氏，子一，名之铭。呜呼，哀哉！里党闻之，无不悼叹有流涕者。巡抚左公方以赈事相属，悯其有为善之志，而未竟其用也。檄学官以文纪其实，俾附诸邑乘以传，士论荣之。夫时当兵燹之后，流离琐尾，幸获安全，类皆竞为身家计者，亦情也。登瀛无司牧之责，而恻隐所发，不分畛域，见义勇为如此。是诚可以风矣。脱今天永其年，其造福于桑梓者，岂可量哉！是则既为登瀛惜，又不禁为一邑惜矣。呜呼，忠义之事，风教攸关。职任司教者，敢阙其文哉？爰次其生平，而为之谏。其辞曰：

猗欤周生，世德弥馨。汉有达士，赈散千金，唐官刺史，椒衍迄今。维祖维曾，积德累仁。生以淑姿，肯构堂基，纂戎祖考，矢志靡遗。孝实蒸蒸，友亦怡怡，睦姻任恤，扶颠持危，好善若渴，见义必为。乡党宗族，称道弗衰。运逢否塞，天降鞠凶。蠢尔丑类，来自粤东，扰我疆域，劳我师戎。如蝟如羹，红羊劫历，陈粟仓空，委骸山积，人其流离，鸿兮悲集。时维周生，心焉恻恻，满目疮痍，一腔热血。发粟散财，急公创始，有开必先，维桑与梓。侧闻邻境，沟壑填委，一视同仁，何分彼此。妻子相劝，行行且止。炎氛正骄，戾气

未解，赴义忘身，不恐何恃。生益难安，投袂而起，慨然叹曰，人饥犹己，待哺嗷嗷，曷云其已。爰集同人，载兴载奔，舫舟泛粟，给赈桐城，俾延残喘，沾恩拊循。慷慨周生，磊落奇瑰，如彼完璞，方耀其辉，如彼干木，方郁其材，奈何奄忽？璧毁柯摧，寝疾弥留，逝者莫追，呜呼哀哉！我闻古语，惠迪则吉，作善降祥，宜保天秩。如何斯人，而有斯疾？吉往凶归，灵輶返籍。巷哭街号，吞声失色。适子之馆，抚孤相泣。呜呼哀哉！我为生悲，复为生慰。古之君子，俟命不贰，身没名垂，表坊攸寄。文仲告彙，鲁人是志。李愷平泉，汉史褒记。旌善阐德，前贤弗弃。矧乃周生，仕版未登，毁家纾难，布公推诚，辘轩嘉悼，宠异频仍。何以诂德？报以斯文。用光史乘，永垂后昆。魂兮归来，庶安幽冥。呜呼哀哉！

《江山县志》卷之十一下

# 艺文志五

## 诗 赋 附：诗余

### 四言诗

#### 送周循州

宋 苏 轼

循州彦质，在郡二年，书问无虚日。罢归，过惠，为余留半月。既别，  
《和陶渊明答庞参军韵》六首送之。

我见异人，且得异书。挟书从人，何适不娱？罗浮之址，卜我新居。而非元德，三顾我庐。旨酒荔蕉，绝甘分珍。虽云晚接，数面自亲。海隅一笑，岂云无人？无酒酤我，或乞其邻。将行复止，眷言孜孜。苟有于中，倾倒出之。奕奕千言，粲焉陈诗。觞行笔落，了不容思。卯妙侍侧，两髦丫分。歌舞寿我，永为欢欣。曲终悽然，仰视浮云。此曲此声，何时复闻？击鼓其镗，船开舳鸣。顾我而言，雨泣载零。子卿白首，当还西京。辽东万里，亦归

管宁。感子至意，托辞西风。吾生一尘，寓形空中。愿言谦亨，君子有终。功名在子，何异我躬。

### 殉节诗

忠懿夫人方氏

昊天懵懵，四海淘淘。赵氏终衰，妖孽景从。一解  
我生不辰，咨嗟风雨。一木难支，劝君解组。二解  
妾身邀隐，君志尽忠。愿学仲连，甘蹈海东。三解  
举世须眉，何殊巾幗？偏我妇人，尚知报国。四解  
有女贞洁，有男才良。素解大义，不负纲常。五解

### 忠臣祝厂从二帝北行

叶琛

北方肆虐，靖康难作。二帝北行，根盘节错。一解  
忠臣祝公，披发相从。追随左右，一片精忠。二解  
黄沙四起，从君千里。血泪淋淋，跋涉山水。三解  
君为敌虏，臣作羁旅。道余行吟，相捍牧圉。四解  
鞭挞流血，万般磨折。推弃道旁，君臣离别。五解  
念君不已，触石身死。哀哉祝公，贞忠自矢。六解

### 祝亦若遇盗负母行

明郑骝

祝君亦若，江郎是托。纯孝性成，大义裁度。一解  
时有强梁，扰乱江郎。祝君于此，整植纲常。二解  
上有老母，下有幼子。权衡重轻，商度可否。三解  
妇曰子幼，待承世胄。亦若曰唯，且仰天祐。四解  
负母而逃，弃子而走。妻离子散，老母是守。五解  
孝感动天，贼意变迁。称为至孝，母子两全。六解  
倏然一哄，合家抱痛。幸得困囿，母云是梦。七解

事非苟且，至孝实寡。作负母行，待采风者。八解

国朝

读忠懿夫人诗并仿原体

武陵汪 浩东澜

宋室将倾，忧心反侧。诗以永言，悲歌大息。知废知兴，神明不忒。相彼忠节，劝隐实力。夫子不偕，知必死国。一息难存，先死远□。有女元娘，生也岐嶷。忠懿口授，古训是则。父兄偕死，贞珉并勒。呜呼忠懿，巾幗奚职。从容就义，永存其德。谁其媲之，万古之特。

双孝诗为朱上舍尚聪夫妇作

王泽沛

有鸟双飞，下上其音。情殷反哺，如鼓瑟琴。北堂昼永，南陔韵深。孝思不匮，实获我心。佳偶曰妃，夫倡妇随。鹿车共挽，鸿案齐眉。朱门徐榻，寿母令妻。同堂二代，金曰咸宜。遭家不造，早背椿荣。八旬祖母，依孰为生？嗟我寡母，沉痛丧明。奉觴撰杖，必敬必诚。如瓶其口，如璧其身。克勤克俭，和睦乡邻。多书忍字，乐道安贫。不貽亲忧，斯曰顺亲。中馈得人，婢媪皆喜。丙夜辛勤，不尚罗绮。斗米寸丝，惠沾桑梓。淑慎其身，克谐妯娌。不求闻达，偕隐江乡。皇天眷佑，前沉后扬。同膺旌表，邦家之光。永锡尔类，百世流芳。

五言古诗

到官病倦，未尝会客。毛正仲惠茶，乃以端午小集石塔戏作诗为谢

宋苏轼

我生亦何须？一饱万想灭。胡为设方丈，养此肤寸舌？迩来

又衰病，过午饭辄噎。谬为淮海帅，每愧厨传缺。爨无欲清人，奉使免内热。空烦赤泥印，远致紫玉玦。为君伐羔豚，歌舞菰黍节。禅窗丽午景，蜀井出冰雪。坐客皆可人，鼎器手自洁。金钗候汤眼，鱼蟹亦应诀。遂令色香味，一日备三绝。报君不虚授，知我非轻啜。

祷雨响应寄苏长公《东堂集》

宋毛滂 译

雨意不肯休，垂垂阁云端。余暖蒸衣裘，势作堕指寒。曛黄阴雨来，俄忽已瀰漫。空阶答檐语，跳珠上阑干。世尊俨无说，冻坐谁为欢？萧条僧舍影，痴兀依蒲团。相照怜短檠，坐恐膏油乾。劳生竟何如，岁月如走丸。七星在长剑，细事何足弹。尚想邱园人，颜颊时一丹。徘徊经屠门，饱意只自谩。顾惟淬牛刀，庶足厌一餐。不然学农圃，趁此筋力完。年丰得饱饭，日晏眠茅莞。咄嗟万里空，俯仰百岁殫。行止信流坎，所遇随足安。勋名片纸薄，天地如瓢箪。离骚幸相逢，浊酒聊自宽。谁与谈此心？夜气方漫漫。绝墙过饥鼠，翻倒争余残。

次韵毛滂法曹感雨

宋苏轼

江南佳公子，遗我锦绣端。揽之温如春，公子焉得寒？兴雨自有时，肤寸便濛濛。敛藏以自润，牛斗何足干。空庭月与影，疆结三友欢。我岂不足欤？要此清团团。所欢在一醉，常恐樽中乾。舍酒尚可乐，明珠如弹丸。但恐千仞雀，匆匆发虚弹。迨子间暇时，种子田中丹。一朝涉世故，空腹容欺谩。我顷在东坡，秋菊为夕餐。永愧坡间人，布褐为我完。雪堂初覆瓦，上簟无下莞。时时亦设客，每醉筒辄弹。一笑便倾倒，五斗得轻安。公子岂我徒，衣钵传一簞。定非郊与岛，笔势江河宽。悲吟古寺中，穿帷雪漫漫。

他年记此味，芋火对懒残。

送郑惟泰丞江山

宋张柏父

都城十两车，送子江之浒。目寄片帆飞，水国沿渔浦。怜子经世才，战笔文中虎。小试乘田车，暂为民父母。民社不轻寄，忧戚抱民苦。忠孝指心切，求不愧仰俯。青天遇有阙，思惟炼石补。效职了男儿，一扇醇风古。送子独钟情，淮河共乡土。

过毛达可友给事，览壁间旧诗，次韵二首

宋程俱

堂前清颺发，树外赤日西。坐令天壤间，气候忽不齐。解带席嘉荫，长哦壁间题。故应有神护，尘土不得迷。前年款我门，鸚鵡亦已啼。今年复羈旅，庭莎欲鸣鸡。西游有底急，触热忘卑栖。似为饥所驱，不计辙与蹄。绋袍意弥厚，盘殮洗羹藜。磊块久不浇，醇醪代朝蠶。襄阳乏佳句，夜直难相携。黄华非不佳，寒澹每见少。萧萧亦无言，怀抱不自晓。深嫌小桃天，欲伴霜松矫。窥丛尉寂寞，时有南飞鸟。主人真赏奇，灌植勤便了。徘徊傍东篱，高兴在尘表。坐有白头生，临风百忧绕。

明发平坦市案：《志》有平坦渡、平坦铺。

宋杨万里

花飞滋晓寒，乘擘新夜听。万象宿雨余，洁齐无欠净。霁曦辄欲吐，远峰忽复暝。林庐居者谁？户与碧山映。蔷薇上木末，不架得初性。彼卧晏未兴，我征漂靡定。惘然怀吾庐，花竹幽更盛。兹焉独足羨，自视不差胜。顾瞻江之西，心速路逾复。似闻前溪水，尽还旧沙径。

## 过仙霞岭

元贡师泰

连山界瓯闽，兹岭亦峻极，杰观奠方陲，高标丽圜则，淋漓割元气，黯澹带古色，绵亘姑蔑墟，苍翠欲四塞。仙霞高烛天，五采绚赫葩，万仞耸峥嵘，百里见孤特，棱角露毫芒，缕脉界缝紵。我行任纲纪，逾月来自北，道途多艰虞，况乃事登陟。初缘复磴危，渐转崇关侧，攒峰与叠嶂，尽日走崩劣，连冈蹶衙衙，绝壑瞰冒冒，远岫忽已违，近陇复相逼，跻攀苦分寸，跬步辄止愒，砢然造层颠，轩豁始有得。或列若屏帟，或限若户闕，或偃若覆釜，或俯若鼎钺，或恭若执圭，或竦若凭轼，或尊若受朝，或卑苦就职，或若孤鹤驾，或若万马勒，或若华盖张，或若夫容植，或净若新沐，或靓若初饰，或争先若驰，或严整若飭，或若进而拱，或若退而劾，或偃若将趋，或颠若将踣，或坚若长城，或错若列国，或联若串珠，或牵若徽纆，或搏若熊罢，或射若虺蜮，或冕若华旒，或屨若赤纆，或颀颀若昂，或踽踽若抑，或轩轩若举，或悄悄若默，或欣欣若喜，或慊慊若戚，或骇若蠢愚，或颖若岐嶷，或穹若龟曝，或直若隼革，或差若颉颃，或比若稻稜，或倚若弓剑，或罗若罟罟，或锐若戈矛，或卓若槩杙，或渥焉若丹，或黝焉若墨，或离焉若愁，或俛焉若晝，或俨焉若思，或惨焉若忆，或谿窅若噬，或铓削若剋。崎岖历万状，意态转惶惑，矫首劳胫脰，举膝撑胸臆，仆夫尽劬瘁，负担屡蒲伏，健駭猿猱势，快羨飞鸟翼。长风度林薄，草树纷偃仄，云归窅窅昏，润滴嵌岩泐，涓流乍逶迤，悬溜竞湍沓。豫章间榭楠，榛莽翳柞械，野草结山果，琐碎多不识。烂熳锦机翻，离披翠羽织，竹籁笙风鸣，藤雨渊珠滴。浓淡各异态，不丰亦不蓄。根露兽斗欹，株朽人立直。幽谷嗥怪禽，坳塘落鸕鶿。古柴蔓草荒，废井苔苏蚀。茅屋列二三，乱石罗万亿。水耕杂秔稌，火种饶黍稷。寒泉浸蹲鸱，饥食同稼穡，凭高漫徘徊，得

荫暂休息。掬水涤烦襟，坐爱清湜湜。仰看高空青，俯视深潭黑。其上浩无际，其下深莫测。岂惟龙蛇都，实乃虎豹域。前瞻已出险，后顾犹未即。我行既已远，我志敢不力，仓皇问前途，日挂半岩昃。峻坂注迢迢，忧心动惻惻。自从黄巢乱，近复多盗贼。败屋虽仅存，居者间逃匿。窗牖旋遮护，几案忙拂拭。颓然就床枕，强起具蔬食。新醅荐茅柴，晚饭订芦菔。岂不念驰驱，王事亦孔棘。江东战未已，闽南病尤亟。所当效微忠，孰敢怠晷刻。吾道岂无补，宪度亦有式。民风转移间，要在尽悃悞。岂徒慰凋疲，庶将别淑慝。追踪古闻人，上以报皇德。

### 送白岩公归

明杨 魁

别君倏几载，一见咨真诠，至道谅履素，丰采如登仙，马首逾千岭，到处辄盘旋，即旋岂君事？兀兀且穷年。泰岳陟日照，东海俯云烟，异人多相晤，奥旨传幽元，妙密竟深造，收敛何渊渊！微机寓风雅，六艺漱芳妍，车辙环禹迹，吊古嵩衡巅。歌声出金石，文辞追史迁，岂不舒襟抱？归根恐未然，何似净明室？凝神未发前，湛虚绝根翳，皓月空中悬，所如无悔吝，混辟归天全。岩树凌霜雪，鸛鹤任翱翔。

### 送何东白归江山《玉茗堂集》

明汤显祖义仍

市隐今无人，江山有东白，少壮类豪漫，老大务敦悻。偶回救世心，一试悬壶迹，虽少隔垣耳，能知数岁脉。卖药常以施，问病每如嘖，有奇复深稳，无厌普调适。腰腿谢车马，婆婆赴朝夕，典衣时为人，解纷翻借客。出入在府寺，谈笑贱金璧，洞户无可猜，通都相莫逆，口语无人损，心事有天益。仓公乃生男，扁鹊不受刺，忽忽动归思，移家旧泉石，姬孺走遮挽，贫病转愁剧。暂为去来期，终以江

山隔，五年予憩兹，朝集限于役。远愧全活手，去为人爱惜。羽翼何以报，肝胆在所积，昌溪眷余想，迟汝一回屐。重来不在兹，停云望归鸟。

### 题毛达和书舍

明王世贞

君卜清溪里，悠然何所期，云中辨越树，花外引桐丝。白鸟青洲路，孤林丛桂枝，下帷千卷足，排闼万言奇。匪藉处囊意，聊因捧檄时，披图知郡阁，芳草驻遐思。

### 送友人归江山

明毛允让

我当游帝京，送子归姑蔑。一夜长风生，依依不能别。桐江潮汐多，轻舟坐冥灭。去去两含情，梅花正堪折。

### 国朝

### 发江山

李 蔚景商

行役未云已，所见日以殊。受分有劳逸，安能厌驰驱？太末控须江。南北实要途。邑里一何敝，田瘠物色枯。自昔遘丧乱，锋镝气未苏。及今岁方馥，斗粟易明珠。悍壮揭竿去，稚弱为流逋。群盗隐岩砦，出没如豺獍。行侣饱凶嗟，曾无问斯须。守土急搜剿，滋蔓胡易图。兼闻虎为馘，白日逝通衢。磨牙恣吞噬，岂直矜负嵎。迢迢四千里，艰阻首兹区。知命复何惧，恻俗能无吁。遥市辘商舶，有里曰清湖。解鞍试休沐，昂首畏景晡。

### 雨中谒江郎山庙望三片石

钱塘汤可守

夙闻江郎山，今来值天雨。荒途横古庙，破殿围密树。烧烛拜阶墀，阴风檐角度。神明现灵异，徒众相惊惧。仰瞻三巨石，云际

自回顾。矗峙摩苍穹，戍削绝依附。幽明理可通，长途冀默护。愿言平稳归，独上层梯路。天池濯双足，披襟吸朝露。

### 江山道上

湘潭陈鹏年沧洲

信宿度重冈，绝壁踏寒雨。仙霞及江郎，连日堕烟雾。暝投清湖店，牛衣进草具。时艰少舟楫，欲济困跬步。吟眺出津亭，苍茫望烟树。虚谷鸣冻泉，层岩觅细路。不意岑寂中，冥搜得奇遇。琳宫跨绝壑，虬松势伛偻。木杪见江帆，人烟近可数。地幽往来阗，境绝幽灵聚。颇闻布金者，挂冠托情愫。丹梯渐荆榛，罟罟半朽蠹。将毋数年后，椽题委霜露。物理固难坚，飞光安可驻？我本萧放人，紫尘若箠笏。天寒日气瘦，道远岁云暮。对此生遐心，徘徊屡却顾。悠然松柏间，归寻遂初赋。

### 枫岭山行至梨岭

徐葆光

风泉聒旅枕，壁镜照客起。云木混初阳，蒙茸犹谷底。笳鸣惊宿禽，旌影照溪水。虹桥接枫岭，关程从此始。仰见梨山颠，雾行犹十里。阴崖竹梢空，寒碧光嶷嶷。山僧延客坐，孤亭翠微里。亭边方竹枝，乍见心尤喜。棱棱节目匀，端正比君子。我行既在险，所持非圆美。从僧乞杖材，中矩皆如砥。行行步亦步，扶我历濛汜。

### 登步鳌山访逸平先生遗迹

江左吴文龙问圃

巨臂舒青雯，金鳌幻奇诡。下有君子居，彷彿传芳轨。古洞披云根，回溪敞沙嘴。石床上藓斑，墨浪浮花蕊。几声杜宇啼，万古春风里。不见当年人，空余去后址。寂寞此山中，但闻响流水。

## 枫岭道中望江郎山

施廷枢

篮舆越平冈，超遥指连岭。便娟修眉呈，妍媸客能省。江郎最神秀，珪瑁地灵秉。孤掌绝众俪，离立冠天影。远峦争萦回，近甸分朝暝。我行日亭午，眩汗困炎景。安得御飏轮，缥缈凌绝顶。采摘遍岩幽，烦贖豁仙茗。山根良田畴，青青始抽颖。居人诉米贵，欲语似含鲠。山灵庶见哀，雨旻不待请。嘉谷其顺成，免饲糒与糗。乡少催租符，墟里日便静。柴扉逐山开，鼓腹真自幸。

## 东溪讲舍

柴天复

景峰郁岩峣，须水潴清冽。间气钟厥初，明时崛奇杰。结屋傍溪湄，启扉面林樾。端坐整素襟，神理自超绝。尘纷屏器杂，俗驾谢轨辙。诗书论其世，景仰多前哲。蚤岁得师承，良知有真诀。秋风越王台，游云耿明灭。松柏深自持，皋兰佩维洁。时招素心人，相戒酬佳节。朋来眇云龙，沧海幽思结。卷幔窥游鱼，烹茗吸寒雪。情同鹿洞高，教与龙门设。萧条南塘路，谁哉继芳烈。据宋《志》，是诗误刻《东溪集》

## 石螾有引

吴郡张德纯天农

汪东瀾寅长远惠石螾，饫此餐腹，适同年许都谏谨斋在座，纪以诗，同用昌黎《食虾蟆》韵，寄谢索和。

南烹有石螾，赋味不赋貌。徒然骇初瞩，劣与蝥蛄较。其肚固婪酣，其脊等魑魍。那知异产处，岩居非积淖。坐蛰清潺间，两部静弗闹。如何登食品，捕法谁所教？张橐篝夜火，掩取乘勿觉。致远可两日，出簏犹跳爆。我僚知我馋，走送敕衙校。我庖对攒眉，羹炙惧莫效。我姑试其真，勿使肉味挠。鲜烹适脆性，略以柄笋

罩。肌理玉既将，皮纹锦还稍。饫我及嘉客，幸此口同乐。指笑韩公诗，拙养亦单豹。掌蝮虽有禁，供蛙讵非孝。恋此倘再尝，鲈乡未回櫂。

## 前题和韵

汪浩

人物果一理，论真不论貌。须江有石螈，形与老蟾较。庞然臃厥腹，斑点惊癞疱。而性厌尘氛，蹲岩远泥淖。持颐如黑甜，脉脉对勿闹。何年登俎豆，烹调未闻教。口腹甚细微，岂亦有先觉。回想掩取时，把火如引爆。土人谓石螈夏月喜食虫尾有火光者，人以微火致之。一落承螭手，于人何所校。知味非易牙，走送兼法效。清标畏炎暑，戒勿令败挠。慙慙向碧渠，雨盖为笼罩。庶几先我口，意兴或稍稍。不谓引瑶章，津津投所乐。垂涎冀再尝，毋乃愧廉豹。意者荐胡考，张仲洵称孝。咏句识法良，尝试胜拔棹。

## 前题和韵

山阴宋 晟彦裔

石蛤有殊形，螯颐无异貌。水从鲮鲤游，陆与蝼蛄较。舒爪利于锥，曝腹掩其疱。不敢踞岩峦，每喜陷泥淖。蝮蛇为守门，鸢鸱反乘闹。嚙吻藉以伸，猛鸷不待教。入夏毒逾张，凌冬蛰难觉。塞雁倚芦枝，山魃惊竹爆。此际可登庖，丑类付群校。属餍又奚庸，驱风或小效。烧蕪皮始妍，饔酱骨可挠。有如豚用乳，亦曰鱼在罩。远饷莫嫌迟，一禽休见稍。比物定何如，击鲜差可乐。螭遁照影犀，鳖溃花文豹。未达敢摅忱，戒贪乃云孝。蛩户漫夸奇，龙编问归棹。

## 前题和韵

钱塘金绍昌

石螈以鱼名，毋乃爽厥貌。盘餐登异品，差可食蛙较。李长吉

诗，食熊则肥，食蛙则瘦。爬沙亚形钝，滑澁失肤胞。穴岩蛰深幽，离垢远泥淖。土人工掩捕，篝火息群闹。剝断收膳经，方法昧前教。昌黎詫南食，目击惊始觉。此物见未曾，鼎味遗剪爆。鳖臠与鼈羹，譬尔如列校。如何松南翁，指动时一效。尔雅误蟛蜞，兴味颇难挠。作诗夸隼永，韩柳受笼罩。嗟余困弹铗，侯鯖讵尝稍。蛙黽嗤吴依，亦未殊好乐。初疑终放筋，知味仅窥豹。河鲀珍玉腴，腊毒惧伤孝。石罅冬则啖蛇。舍旃南有嘉，清溪觅渔棹。

### 修城纪事

云南杨绍霆太和

按：邑城修于道光七年，一切兴工竣事，杨明府俱梓有记略。兵燹后，遗册无存。今于《味苍雪斋诗选》中得此诗，亟录之以资考证。

守土资城池，居民赖保障。奈何须江城，崩坏莫名状。如山空南来，若屏阙西向。东北将颓垣，如人病蛊胀。父老久关心，叹息空扶杖。道从官长来，此役无人倡。是邦人直干，急公不辞让。一朝集千金，司事胆气壮。役夫来如川，砖石堆如嶂。焕然雉堞新，有似春台上。玉叶得前因，金龙实先创。后先惨淡心，无需问哲匠。

### 田家吟

郑瑞麟云洲

田水听悠悠，野老驱黄牛。秋末淋夜雨，种兹来与牟。主伯戒亚旅，既播还须耰。赤缙兼埴垆，人事何敢休？日暄麦苗秀，露浥麦穗抽。穉穉多荒歉，但愿麦有秋。拜祷祈先嗇，开瓮陈新篛。藉此补不足，无致君王忧。

小麦方悬竿，大麦已垂芒。长至时已届，打麦早登场。同井四五辈，枷板声远扬。行人过陇亩，如闻饼饵香。今年麦大有，盈车庆穰穰。多此十斛收，穷氓数月粮。呼朋复引类，新可以彘尝。明

日再努力，正好趁朝阳。

年来二三月，春雨方如膏。乌糲食细草，负耒行东皋。家有十亩田，一日尽周遭。邻叟相过从，切切语儿曹。歉收为偷惰，多获惟作劳。息肩柳阴下，手披绿丝条。

耳听催耕鸟，声声唤插禾。沾体复涂足，风雨侵绿蓑。不辞泥滑滑，我劳应如何。青苗四五束，不烦秧马驮。蒸藜饷东菑，隔陇闻讴歌。闲看水田上，一一白鹭过。

西庄多晚稻，秋雨听浪浪。八月社鼓鸣，比户炊黄粱。肥田无恶岁，瘠田功更忙。上农勤力穡，凶歉幸无伤。秋露如珠圆，秋稼如云黄。九月方纳秸，十月始涤场。吾侪本小人，未敢称兕觥。愿得合颖禾，永为邦国光。

双孝诗为家南麓叔祖暨徐孺人作

徐家麒璞山

昔居大母丧，闻公溢焉逝。公与先大母同时谢世。哲人已云亡，泫然欲流涕。我亦恨终天，失怙悲早岁。奉侍重萱堂，一身承两世。处境与公同，立志未能逮。忆公年少时，孝恭克自励。更有同心人，内助多贤慧。祇承菽水欢，不图身家计。公寿已考终，公行永勿替。仰止在高山，私淑惟心契。

戊午纪事六百言

郑恒年月峤

畴昔谈丧乱，僉云语捕风。不信丁厄运，我躬竟亲逢。方春二月初，蠢动骚邻封。二月五日甯广丰。予时适在郡，仓猝回江东。弹丸蕞尔邑，战守具都空。急筹运卵石，众志希所同。海会开练局，市坊沸若淘。巡逻彻严夜，职俨鸡人充。捷音候文报，如早望灵霭。又如人病疟，寒退热复烘。将军忽天降，下马气腾虹。家风矢三箭，乔梓都元戎。薛协戎父子。健儿领四百，年少淮上雄。丰溪

界接壤，官溪扼其冲。力请营细柳，西南屹崇墉。妖星扫千尾，誓以偏师攻。争奈议不合，同寅少和衷。杨花懒无赖，飘泊随飞蓬。孤军坐不救，致令前摧锋。枵腹战三日，力疲途竟穷。时亦有义旅，激谕纠乡农。周郎计固妙，凤林周元礼。徐孺偏春容。泥坂徐叶中。小胜敢骄敌，夺马贪肤功。乡民杀贼十余人，夺得黑马一匹。知进不知退，伏莽愁深丛。奕奕灵鹫寺，借作屯粮宫。寒食方禁火，俄惊烈焰红。贼于二十二日从间道出，烧毁灵鹫寺。是日清明节。此关瓦已解，鸟散群分种。书生不惯阵，如水决奔洪。可怜白面郎，死事亦云忠。徐君于是日遭难。从兹毒遂陷，遍体胥流脓。官溪达凤林，四野遍沙虫。峡口亦波及，一矩伤祖龙。危哉九仙山，峡口上十里，予全家俱避此。隔此仅数峰。倘竟豕突至，定然遭磨砮。幸渠径直下，十日熄传烽。累卵危获安，惟天惟祖宗。先祖茔在此。登高试一望，城阙烟濛濛。故园不堪问，自分付祝融。俄传恶耗至，亲故半摧凶。若者饱豺虎，若者羈樊笼。始信崑冈火，玉石分奚从？予有急难弟，清阴茆双桐。入门共甘苦，那忍翔分鸿。伤哉燎原急，买舟去匆匆。萍泛踪莫卜，鱼函梗难通。全家十余口，责并予一躬。上有白发亲，下有黄口童。清夜每怀及，千钧担谁松？咄咄此石顽，石逆。安得来生公？又乏始皇术，鞭之投荒蒙。城孤业久踞，伪檄驰横纵。欺尔愚民愚，俨责包茅供。虎口即俸脱，狼性终愁凶。他族实逼处，忧心时忡忡。溯自开国初，魏杨纷内讧。耿藩继煽乱，榛莽驼埋铜。二百历余载，耕凿安愚蒙。大劫今复遭，杀运何日终？我生命如线，孰与叩苍穹？书此聊当哭，纪岁惟咸丰。

## 七言古诗

## 教子诗

唐淑德郡主

我本世胄深宫质，下嫁祝门妇道执。汝父从戎干戈戢，命我避难江郎入。下抚双雏时训饬，上侍老祖年九十。念汝生父丧原隰，生死茫茫不相及。人生励志应早立，汝宜经史勤时习。莫负我身亲炊汲，汝父汝祖各饮泣。

## 送周颖之京师

宋赵 抃

吾乡伯坚真丈夫，气刚色强言词疏。胸中一物不使有，日储月敛惟诗书。布裘落魄韦带缓，权门不肯低眉趋。朋友累百谁尔汝？人皆不与争揶揄。掩关啜菽苦意气，粪壤玉璧泥沙珠。宣慈中山我孤处，昨日走介遗吾书。书云诏下吁俊乂，父兄命颖之京师。古人求养志择禄，今而岂得逃驰驱？肩书手剑出门去，嗟咨肯复儿女如。我闻其语涕交下，人皆欲养翳我无。羨子之为与道合，劝子急往无踟蹰。明年得志拜堂上，岂非人子荣亲欤？

## 读《祝厂祝光焞忠孝合传》有感

明宋 濂

古往今来如过电，愚忠愚孝令人羨。常持此意论世人，求之茫茫皆不见。我读郎峰祝姓谱，内有忠孝相合传。子名光焞父名厂，读之感叹神无倦。意昔宋室都梁汴，金寇时来惊征战。掳掠二帝向北行，忠臣祝厂随后殿。万里从君天漠北，一臣二主作亲眷。此时惨澹不堪言，黄沙漠漠捣素练。挾之流血不许随，备极困苦经磨炼。两目昏花血泪飞，精忠报主殒沙甸。感动孝子祝光焞，万里寻亲奔救遍。入朝二帝五国城，君臣抱哭泪如线。只见二帝不见父，痛苦穿心类万箭。二帝告焞汝父随，狂风飘散花片片。未知生死在何方，急宜追寻莫空恋。光焞哀拜二帝前，回头远行别帝面。号

咷大哭望青天，哭倒长途目转眩。忽闻道旁有人言，魂魄频惊肉频颤。肉跳貌。谓汝父为宋忠臣，不忍忠骨轻弃贱。曾收父尸葬沙漠，佩玉镌名示无变。光熉因之见父茔，秋风飘摇捐团扇。开茔负亲望南回，雪满关山风漂霰。从此万里见君亲，忠孝两全邦家彦。我读遗传漫吟诗，史册表名应首选。

### 吊孝女徐元娘

明康 海对山

元娘孝烈千古奇，报国酬亲日月垂。自小读书解大义，从容殉节何如之！裂帛挥毫写壮语，生气犹能起风雨。君不见，后妃君王皆北行，令人愧死孝烈女。

### 吊烈妇

明徐 霏

春日杲杲照江湄，夫妇桥行携二儿。一儿失手堕波里，捐躯赴球夫亦死。夫死儿堕心剜伤，仰首吁天天茫茫。不忍见此形独在，为念姑娘无倚赖。晨昏奉养须有人，幸有孤儿可托身。嘱儿奉姑言已毕，苍林惨淡昏白日，吁嗟生同死不移，千秋涛浪魂相随。衷肠效死苦不蚤，岂论轻尘栖弱草。柏舟一逝何滔滔，珮环罗袜空江皋。桥边芳烈传已久，岁岁春风悲绿柳。

按：此诗考《东溪文集》，系吊周烈妇，诗有小序。旧志作徐烈妇，未识因何而误。今仍其旧，而补录小序于后。 妇姓周，须川人。夫忠，家事贫薄。夫力田，妇织经，仅供家口，未尝苟屈于人。有姑在堂，煦煦奉养不起。生子二，长胜宗，年十余岁；次子才襁负。一日，夫妇往东猗庙烧香，路便母家，欲先访之。过罗娘桥，夫抱幼子，半渡忽堕，乍浮乍沉，蹇裳援之，溺水中。周氏哀恸，谓其子曰：“吾儿既溺，夫又沉没，吾安能独生？汝归依祖母，莫惊惶。”除头髻付儿，挽发束身投下。儿哭牵之，弗能止，随夫而死。一县闻之，皆嗟叹，壮其节，竟为诗词以吊之。

## 赠余见田新城歌

明徐 霏

西域化城高突兀，神奇变化何超忽？天台赤城造物钟，横江跨海凝仙迹。人间异事乌可常？人代天工乃长久。自非裁成范围力，齐民胡然遂生息。须江古来无城郭，时际升平民可乐。强暴时从东谷生，事变无端奇祸乍。余侯莅政悯黔黎，为创乾坤不坠福。握奇制变自有机，设险山川爰守国。经始农隙时，趋没有常期。五月报成功，神速乃尔奇。工人靡疲病，品物若含滋。参差粉堞象翠革，峥嵘石郭惊虹霓。洞开重门交远风，周回叠嶂晴净曦。江空水净拖白练，壑窈钟声响翠微。庾公兴不浅，登眺何舒迟。越石坐清啸，月明照风姿。渺渺送春日，草树秀芳堤。鱼鸟得真性，歌咏适天机。四郊□静风尘隔，双塔并峙苍龙翔。星阁凌虚奠辰极，左右升陟参帝傍。循环七政破昏晓，岩峣八极惟青苍。对时足行乐，延景堪举觞。耕犁翻野绿，麦浪铺云黄，农有谄村曲。四民室家各胥庆，颂声盈路其洋洋。越东百□岂足淹？九天紫殿应明扬。卧辙恐难留，计日登明光。甘棠存遗爱，去思岂能忘？行当调羹商鼎彝，皇风穆穆挹黄虞。万间广庇远风雨，海隅日出咸熙熙。

衍川行伯宗毛次公自署其号曰衍川，因为赋之。

明王 问仲山

君不见，黄流西来洸洋渺无际；又不见，岷流出峡浩瀚无停湍。胡然乎，支分派别终古错纷衍，无乃源泉到海涵蓄空洞钟重渊。嗟哉，江河之势则如此，而况宗工厚积如巨川。江山挺秀发天目，元气萃聚生耆贤。致身位台斗万化，随运旋为国元老。望重三垣两朝开，济作舟楫凤瑞麟征相后先。古称继体难媲美，今见人文尺五天。必有巨浸乃发汪濊，自非世美孰广庆源。潢渠汤汤多灌沃，膏泽民物何无边。洪源方至委已接，但见扬澜演润，日夕连云烟。吾

闻伊陟象贤佐，商室西平绳武持兵权。清时共羨箕裘子，勋丛应联世德延。

国朝

吊徐正节先生

汪浩

呜呼正节代几人，从容就义天地塞。忆昔皋亭次元师，少帝三宫尽皆北。先生身无北军寄，谁骑大驷扫欃枪？先生职非平乐监，那能跨海斩长鲸？横经辟雍听钟鼓，峨冠博带一诸生。黑狐向我立，黄狐向我嘍。肝脑涂地留中原，儿女胡可为臣妾？天生忠孝萃一门，骨肉交勉乃心协。大儿乡贡琦，小儿乡贡崧。元娘一闺秀，正气弥苍穹。整衣祭拜岳王前，忠魂英魄如有着，酒肉餽仆任沉斲，吟诗共步梯云阁。阁中火起奴子惊，火灭何知泉未涸。仓皇未谗出何之，晓寻井头井水碧。井底蛟龙不敢侵，瞪目僵立万人辟。西子湖边照漆灯，六桥风景黯颜色。高梁异世请建祠，忠节垂名此为特。呜呼，武穆非得已，文山捐一身。宋室间气钟咸淳，咸淳钟我须江宵雅肆三之微臣。

金绍昌

皋亭阵云压城黑，三日钱塘枯海脉。轶道降王系组迎，青城覆辙嗟何迫。堂堂太学崇先师，三纲九法相维持。衿宏碧血留一士，赤手未可将天支。梯云余焰犹未冷，尽室相牵入深井。千载同招柴市魂，一泓尚浸银瓶影。

血衣行

刘侃香雪

明嘉靖中，吾邑徐东溪先生为监察御史，抗疏救贵溪相国，廷杖。藏其血衣于楮，以示后人。楮故在今方伯第楼中，扁镬甚固，人弗敢启。

一领朝衣三百载，层楼夜夜生光采。忠臣热血鬼神护，至今如见东溪在。东溪义烈夺三军，正气叱咤生风云。铸铁作肝气不慑，誓矢忠臣在致君。是时分宜气焰炽，外奸内蠹交相魅。黄阁宰臣结怨深，旋借河套售奸议。狱司锻炼白昼昏，一箭竟尔坠双翅。相臣将从盘水诛，壮士何忍西曹肆。先生草疏上明廷，救章字字挟风霆。神羊角触豺狼怒，慷慨拜杖朝衣腥。碧血淋漓身何有，但恨奸回奸国经。词人流涕上东门，边师遗恨风波亭。痛定思痛心犹热，遗衫珍藏励苦节。岂但侍中血勿浣，欲使后人效芳烈。

刘 佳眉士

仗马一鸣天动色，大呼伏阙请诛贼。满腔热血为谁倾？洒向君前死亦得。肃皇高拱分宜骄，京攸势焰倾中朝。阁臣朝衣赴东市，贵溪冤气何能消？吾乡给谏入中杰，救章夜半达天阙。午门朝开赤捧来，一片淋漓飞紫血。元老思将百口箝，微臣自有浑身铁。臣虽沥血未剖心，此中耿耿向谁说？解组归来辟小园，自焚谏草不开门。殿中补衮虚心事，屏后牵裾只梦痕。惟有故衣血未浣，年年被服总君恩。依然白发思明主，愿把丹心教子孙。我行曾到东溪宅，旧篋云初犹护惜。可怜一样物传家，不及魏微笏三尺。北阙伤心化宝衣，西风有泪流铜狄。衣冠髣髴魂归来，烈血千年不化碧。

旱灾行

徐文炳 磨伯

吁嗟乎，天胡为乎？惨降此灾，荒田禾稿，死人流亡。有田千亩，不满百硕仓，穷户安得复有颗粒藏。睹此景况迫中肠，能无悲泣呼穹苍。岁今旃蒙协洽当，前年两度早罹殃。秋穀歉收米价昂，道殍彼此遥相望。今春二麦喜登场，耕氓鼓腹幸少康。四月之杪雨沱滂，乘水翻犁遍插秧。继以耘耔颇匆忙，詎意从此日亢阳。咒

龙鼓角喧祷禳，嗟哉旱魃太猖狂。焦金烁石火伞张，罨田爇乾龟坼长。中间不乏小雨洒，甘浆禾复抽青苏。焦黄无如烈火炙，犹强敲阳啖啖生。角芒再发三发起复僵，枯茎虽有尽秕糠。间有大江近水乡，桔槔梯上挂山梁。其奈五里十里空皇皇，涓流早已竭池塘，及至秋分以后始得沛汪洋，屈指已逾百有二十之流光。自四月下旬一雨，阅五月、六月、闰六月、七月，俱不雨。可怜三时作苦脱袴裳，有秋失望空仓箱。从此妇子泣惶惶，剥榆掘草日不遑。噫嘻，日乌三足朝升翔，山蛇四翼告不祥。如此赤地遍村庄，灾黎何以度星霜？安得救荒大力济时方，田能续命起痍疮。积财积福试婉商，活人行见后褊昌。我作为歌写悲伤，拈毫堕泪涕双行。

### 刘贞女歌

汪澳瞻百泉

死节差易生节难，妇节女节犹两般。妇节尚因勉强致，女节更由天性安。卓哉闺秀刘氏女，少归予季拟待成凤鸾。蚕未及合季病革，呼女近前泪阑干。未曾通语含羞涩，欲前不前行蹒跚。死而复苏难目瞑，炯炯数向渠颜看。口口称恨声喑哑，恨月早缺光未团。自少丧母又丧父，异母一弟怜未弃。我死无子渠必嫁，嫁得新夫来姗姗。女时更不顾羞涩，抱哭几将身命拚。许夫一言夫瞑目，一马岂肯施两鞍。抢地呼天声呜咽，愿同郎死同郎棺。旁观岂乏轻薄辈，谓女年稚途曼曼。诘知心肠如铁石，任尔世路多风湍。孝事继姑抚幼叔，孤苦伶仃尽力殫。家贫惟自勤纺绩，闺步从不逾门阑。冬衣夏布常耐冷，日食粗粝难饱餐。归宁母欲夺女志，慰女愿女胸襟宽。谓未成婚春宜惜，免得秋风伤彫残。母今已择富家子，食饘酒肉衣素纨。女闻母言心急切，立誓露胆还披肝。此生愿作汪门鬼，心如古井无波澜。不顾天荒与地老，不怕风冷并霜寒。倘或中途有摧折，愿将心头肉万剜。此心母既不见谅，此地何可再盘

桓？瞥然不见别母去，翻然疾似飞羽翰。姑媳依依如母子，叔更能承母嫂欢。迩来叔子已承祧，祠给馐余人齐欢。乃知此事关天性，岳可崩兮海可乾，一意孤行日同赤。百折不回心成丹，从今夫族与母族，无不激赏相嗟叹。吁嗟乎，岂惟夫族母族激赏相嗟叹！

### 双孝歌

王 钰原名书升

嵩里之山高且庞，嵩里之水飞涛泷。笃生孝子孝妇成双双。  
一解

孝子朱，孝妇徐，天作合，两美俱。昼撰几杖，夕进盘盂，同心协力，不待招呼。父母其顺矣乎？二解

父病吁天，愿以身代。母盲侍寝，衣不解带。二十余年，力弗少懈。疇分其劳，曰惟厥配。三解

一朝风木厥考亡，呼天抢地哭断肠。上念孀祖母，白首谁扶将？聊复进饘粥，以孙代父奉高堂，千钧重任一身当。四解

有弟孱弱，泪盈盈矣；有妹幼稚，啼嚶嚶矣。无父何怙，难为兄矣。男婚女嫁，敢忘情矣。五解

孝妇年十七，孝子年十六，母命完姻，于焉成服。双双长跪吞声哭，愿母自爱无太速。六解

祖母寡母，以寿考终。寝苫枕块，不有其躬。三年泣血，高子之风。七解

丧尽哀，祭尽礼，送死养生，事事毕矣。父母翁姑，含笑于九泉；孝子孝妇，情犹靡已。八解

孝子乃梦，梦到洞府。一勺天浆，清入肺腑。仙人致词曰：惟孝子是予。九解

再梦伊何？梦开闾閤，画烛双行，光辉如月。天锡以高年，金牌挂瑶阙。大书五更叟，三字长不灭。十解

大吏书姓名，具奏闻至尊，天子诏曰：可给帑，旌其门。十一解  
谁非人妇，谁非人子？卓哉双魂，万古不死。十二解

朱 益原名履炳

我年八岁才读书，读到《孝经》思有余。今年二十稽公事，谁谓古今人不如？公家本住南山下，奇气名楼忆昔者。公今制行亦何奇？过客到门尽下马，钟毓应知崧岳峙。昔有忠世今孝子，孝子只守旧家风。为溯绕坛济其美，天生至行必有偶。内助有人操井臼，竭力重慈两心同。孝乎惟孝传人口，感神由来本至诚。五更叟赐启金函，更有香茗通别梦。会将偕老谢尘凡，昔年得睹公之貌，今日思公徒好乐。谁无父母谁非子？愿将此意天下教。大吏久已钦姓名，竟向九重代陈情。匾表巍峨来北阙，旌间我里亦增荣。古来富贵人震慑，没后名多扫落叶。百世流芳独有公，愧我与公同谱牒。

### 题江郎山人毛乐天《墨竹图》歌

郑瑞麟

毛公胸有千亩竹，个个天成构在宿。须臾满纸烟云生，每逢知己赠一幅。忆昔画竹有宗工，东阳柳霖西湖琮。手写琅玕兼水石，南山雷雨起苍龙。须江妙手亦可数，墨竹先推崇典翁。枝叶清劲原拔俗，自古贵瘦不贵丰。山人聪颖复杰出，笔墨崛强与之敌。静观疑入淇园游，幅幅簞笥张四壁。或如春气弄青葱，烟雨万竿潇湘中。或如盛夏烈日烘，十指拂拂引薰风。时而丛篁倚怪石，澹澹行云月当空。时而折枝似有声，积雪千丈透玲珑。虚心自宜友松柏，翠叶曾经栖鸾凤。天下名画总如林，谁与山人相伯仲？生平偃蹇叹遭逢，此画终为人珍重。

## 菊花石歌

刘 佳

嘉庆七年，邑峡口村山石夜裂，中有菊花纹，甚肖。邹鉴亭司马先生  
昇置署斋，属赋此诗。

五丁夜铲蛟龙穴，堕地雷声崖石裂。玉盘开出黄金花，鬼斧神  
工妙镌鐫。山灵毋秘屈灵均，自爱秋菊餐落英。地荒天老化为石，  
芒角突向胸中生。又疑柴桑老酒客，采菊归来卧醉石。此花办愿  
附石交，刻骨镂心永不泐。若使置向米颠袖，中比皱瘦，便是先生  
新制石华袖，不然持比壶中小九华，不数十丈青莲花，独恨当年女  
媧补天何不将此石使与。月桂露桃齐弄色，却笑宋家花石纲，纷纷  
四出空猖狂，我歌为公一沉吟，天与此石非无心，愿公之节如彭泽，  
愿公之治如郁林。

## 苍道士歌

前 人

道士姓毛，名苍，邑之清湖人。以能书名。余为之赋长歌。

一丁字与两石弓，少年白马真英雄。鸢肩猿臂霹雳手，射虎归  
来夜被酒。十指拂拂芒角生，乘兴一挥字如斗。自此书家擅重名，  
早将金币动公卿。横刀气健千夫慑，草檄书成一座惊。男儿意气  
厌长揖，掉头归卧湖边宅。黄冠羽服道人装，走向街头人不识。清  
湖之水何深深，道人家在青山岑。黑林老魅每相过，白日哀猿时一  
吟。道人大笑驴鞭堕，我学神仙且游戏。青天为绢湖为池，大书咄  
咄真怪事。非儒非侠非空门，寸管乃傲王侯尊。至今零落百年后，  
犹有残缣当子孙。

## 义賑歌

刘 侃

有皤者老，茕独无依；有嫠者妇，憔悴无归；有子者儿，日以啼

饥；有残疾者弗能作，谁为抚之？叶一解

蔡公惻然，念此方割。丁壮能自食，穷民乌活。穷民弗活，我心如劓。二解

邑有义士，奖其出粟；邑有正人，俾察其乡族。月给二十日，日有三合。叶三解

老人嘻嘻，扶杖而来。叶受米以归，是蒸是炊。四解

嫠妇茕茕，遣儿入城。受米以归，倚户笑迎。五解

孤儿衣裂，不笠不屨。头蓬脚垢，逢人指说。六解

残疾委靡，蹒跚以起。今此得食，将来不死。七解

蔡公仁厚，是我父母。蔡公仁厚，胜我父母。八解

蔡公来矣，我民饱矣。蔡公去矣，我民无告矣。叶九解

峡口吹

前人

峡口吹潭中，起晴久生风。天欲雨雨久，风生雨即止。风所被处田稻丰，是神所赐人无功。安得此风吹处处，麦头双穗禾无虫。

辛巳饥民叹

刘佳

去年盛夏天恒阳，浙东八郡嗟奇荒。斗米五百价日翔，草根木皮皆充粮。今年多雨麦又伤，麦花未吐麦叶黄。三月未种秧田秧，呜呼，去年无禾犹尚可，今年无麦饥杀我。老农日日田头坐，仰天呜咽泪交堕。我语农人汝勿哭，君王心似光明烛，许开官仓贷官粟。赎牛租具插新禾，且忍饥肠待秋熟。

秋赛

前人

广场日斜喧社鼓，人声爆声沸如雨。彩旗缚竹儿童趋，神之来兮灵輿舞。老巫喃喃掷筊卜，尊中有酒俎有肉。今年住溪南，明年

往村北。去年无雨禾尽枯，今年雨足麦大熟。神既醉止为汝福：愿汝营高仓，愿汝起大屋。升平有象观于乡，莫道从来举国狂。

观校射

前 人

县官高坐冠崔嵬，广场秋碧天四垂。豪猪之靴短后衣，是何年少丰容仪？腰间约束白羽箭，调管钩弦手轻便。弓声过耳捷如风，镞光瞥眼惊飞电。朱棚忽裂吏鸣鼓，喝采千人万人羨。书生文弱诚无用，毛锥头白苦吟弄。不能飞箭射天狼，枉教落笔惊鸣凤。对此不觉神飞扬，猿臂当年事可伤。一丁何苦弓两石，欲驰快马追黄麋。

牧牛曲

前 人

夕阳一角下平楚，牧童三五拍手舞。但愿四时青草肥，牛育不生犊如虎。短芦作篴筱为鞭，赤脚蓬头乱踏烟。隔水归来不唤渡，驮人牛背稳如船。

猛虎行

前 人

黄蒿蔽地绿箐密，白日无光依鬼泣。虎目睒睒双炬红，咆哮一声作人立。茅茨土壁三家村，阴风飒飒吹黄昏。歛然一虎挟篱入，倒衔七尺乌喙豚。磨牙砺吻咀复嚼，血光沥漉飞草根。尔虎何肥民何瘦，至今居者常声吞。我有腰间白羽箭，翎毛如雪镞如电。突从山坡匹马来，观者竦立色皆战。带血生擒雪夜麋，飞身仰接云端雁。况尔区区安足数，赤手欲探万穴遍。吁嗟尔虎亦太痴，会当食尔之肉寝尔皮。

## 左公来

郑恒年

左公来，左公不来民命哀。左公来，左公一来天心回。妖星千尾东境扫，万姓肉供虎狼饱，任尔眈眈莫敢撻，维公一来戈其倒。来何暮一月，呼天苦无路。来何速万人，额手愿尸祝。沧桑劫换红羊惊，斯人一出为苍生。吁嗟，唐令公曾入古乐府，谁欤继者并千古。公来贼仍东遁去，见民如虎见公鼠。

## 峡口至清湖道上感赋

前人

峡溪水来汨汨，江郎山雄屹屹。山明水秀灵气郁，兵燹莫解居民急。长街十字填车溢，曩日繁华顿萧瑟。瓦砾成邱草没膝，道旁骴骼空掩掘。破庙荒凉蛩唧唧，伤心更有断头佛。

## 祷雨行

王 钰蓼生

三伏骄阳猛如虎，东阡西陌成焦土。村农束手无如何，共设雩坛击鼉鼓。雩坛鼓渊渊，神巫执羽舞翩跹。雩坛鼓坎坎，神巫吹角声宛转。五里十里去迎龙，科头晞发发蓬松。途中一阵甘霖普，巫言吾村当得雨。归来四望天青青，吁嗟巫兮术不灵。

## 车水谣

前人

朝车水，暮车水，忍饥踏轮轮不起，可怜昨日已无米。一解  
非搏使过颍，非激使在山，自下而上，上越过千里关。吁嗟桔槔何时闲。二解

到田一勺水，浑身一把汗。汗乾仍复出，水干空长叹。三解

斗柄移，月正西，繁星历历鸡乱啼。终宵輶辖桔槔动，踏破千家万家梦。四解

水碓

前人

石围墙，茅编屋，引溪流，泻岩瀑。车一轮，贯横木，水激之，翻还覆。杵与臼，排五六，朝与昏，运机轴，势凌兢，声击触。如跃龙，如翔鹄，如兔起，如虎扑，骇犀腾，饥鹰啄，马龀槽，牛转轂，翻桔槔，挽轳辘，抑复扬，起仍伏。制何居？代手足。利何居？舂嘉谷。昔先民，智巧独。苇可杭，箱可服，矧稻粱，果吾腹。藉人功，安能速？凿与精，难遂欲。我作诗，纪实录，嗤曹交，空食粟。

五言律诗

月夜溪庄访旧

宋柴望

山山明月路，何处认梅花。石室冷疑水，溪流白是沙。清吟幽客梦，华发故人家。相见即归去，已应河汉斜。

姜林居别业 崧高山下。

宋柴元彪

结庐尘外境，流水绕平田。三径故人菊，一池君子莲。塔悬当户月，钟翳隔溪烟。自得平生趣，渔竿老渭川。

哭正节徐先生

宋谢翱

凄凉携子女，冠佩赴重阴。塌井千年事，青天此夜心。哀辞山石刻，恤典海舟沉。里族南薰梦，东都直至今。

毛刺史姑蔑高斋 汪浩《志》作《赠毛达和》。

明李攀龙子鳞

武陵看花处，二仲得相闻。雨白闽天合，山青越树分。书声出秋瀑，客梦过春云。府檄何年事，犹余猿鹤群。

明吴维岳峻伯

喜君多道气，筑室近清川。万境俱此彻，一瓢尝晏然。云霞开卷里，鱼鸟弄琴前。他日看花入，相寻渔父船。

须江道中

明王思任季重

百里皆卢橘，三家亦水湄。溪喧春自接，屋险树交支。鸟语深林碎，鱼行浅濑迟。游山不及老，灵运许心知。

过江山夜至候馆柬吴令亚父

明林大辂

寒色前村暝，荒林细雨长。不辞山路滑，真愧客旌忙。涧响紫新溜，篁疏夹野塘。旅愁谁为遣，南去近闽乡。

役役岁华暮，潇潇风雨寒。迷途惊人夜，候火度前滩。舍馆初留客，村钟欲罢餐。南迁犹斗禄，未敢厌艰难。

出门行数里，阒寂已黄昏。野静飘丹叶，天低下白云。风烟那免病，巾舄未离群。独念苏司业，能怜郑广文。

访柴白岩留宿草堂

明毛育鲁衍川

夙有通宵约，看山到草庐。黄花一径入，疏竹小窗虚。榻下更寒后，樽开月上初。山人遍爱客，谁谓与人疏？

国朝

舟过唐村

姜汉宗沔水

离怀接九秋，客子掉孤舟。远树晴方见，寒江净不流。人家临白水，吾兴属沧洲。偶发垂纶想，微风引棹讴。

双孝诗为朱上舍尚聪夫妇作

海盐朱昌颐

至行高闾里，期人不可攀。白头双老逝，丹诏九天颁。谱牒增光彩，关河独往还。鲜民吾抱憾，抚卷动惭颜。

春游王氏枕园

刘侃

门巷无车马，行来别有天。庭闲森立石，径曲递鸣弦。空翠生眉际，归云落槛前。招寻殊未已，得趣且流连。

渡清湖

前人

十里城南路，舟车此地纷。虹桥收浙雨，驿路入闽云。岸阔村烟密，秋深社鼓闻。行人真鞅击，客到坐斜曛。

风门汛

前人

出郭朝曛暖，风门散马蹄。夹山烟路小，颓堞石城低。垒旧余荒草，营开冷戍鞮。从来隆盛日，兵卒事耕犁。

长山头汛

前人

苍翠金纯下，三峰压我冠。霜风愁鬓老，荒堠戍旌寒。野暗催归犊，村冥罢晚餐。吾生艰足力，长路积悲酸。

郊行书事四首

祝敬棠爽亭

散步郊原外，行行到古村。黄茆编作屋，白板削为门。砭杵声声急，儿童处处喧。羲皇今已邈，风景幸犹存。

禾稼登场后，桑榆叶半乾。霜威摧鸭脚，风色老鸡冠。打鼓迎田祖，输粮赴县官。闲来无别事，临水更投竿。

半亩蔬畦窄，编篱鹿眼匀。芥孙才拆甲，姜子已含辛。抱瓮浑忘瘁，挥锄未厌贫。御冬饶旨蓄，沾酒待邻人。

落日千山暮，炊烟比户生。老翁驱犊返，稚子倚门迎。犬吠村逾静，鸦归树有声。客心愁景晚，回首望江城。

## 官溪春兴

杨奏瑟

杨柳东西岸，桃花里外村。板桥春雨滑，茅屋午鸡喧。地僻无车马，风醇长子孙。胜游吾已遍，此是武陵源。

## 怀杨响泉先生

刘侃

突兀骚坛主，高名四十年。一衿催白发，万事入吟篇。墓草方经宿，神珠已出渊。诗魂应慰甚，含笑向重泉。

## 山居

徐恕可亭

结庐泉石畔，岁晚爱幽栖。涤虑茶胜酒，司农鸟代鸡。日光临槛薄，霜气压檐低。伤蠹怜寒菜，青黄色不齐。

## 题王南陔中丞《空山破寺残诗感旧图》，

用朱文正公广福寺题壁韵

朱履升春埜

幽篁藏古寺，门外万竿青。椽破风生牖，檐空瀑挂瓴。上方沾法雨，初地驻文星。想像泥中爪，飞鸿几度经。

郎峰三片赤，古壁一灯青。修到丹成鼎，词高屋建瓴。堦篔联昔日，岁月感流星。文字空山寿，昆明劫可经。

太傅风流在，精神照汗青。名章辉黼黻，众响集盆瓴。笔润疑垂露，堂虚想聚星。山门留法宝，永护梵王经。

王 钰

骑鲸人已去，山色为谁青。寺绕千竿竹，烟飞百尺瓴。轮蹄销白日，故老剩晨星。赢得家乡近，参禅几度经。

师生传智慧，认得一灯青。人已鸿留爪，山如屋建瓴。诗赓坡颖句，光射斗牛星。读罢增惆怅，当年使节经。

石磴千盘古，烟鬟四面青。山深谁放鹤，涛吼欲翻瓴。索句逢今雨，笼纱记客星。老僧闲自在，一卷诵《心经》。

### 题杨响泉诗钞

前 人

罢奏《长杨赋》，归来琢句工。诗兼唐盛晚，名噪浙西东。梨枣闻鏤板，辘轳记采风。吟魂应慰甚，莫更怨奇穷。

### 游柴东山故第

钱唐王宝华

良将谁能匹？功高百战多。君恩无过此，臣节敢言他。富贵真如梦，勋名久不磨。门庭瞻冷落，往事慨当歌。

### 七言律诗

#### 哭赵思旦

宋赵 抃 闻道

五月炎方浸气浮，贼锋残忍入康州。肯抛孤垒偷生去？誓御群蛮竟死留。没世不名贤者耻，长为辱古人羞。嗟嗟潜叔今何在？愤血忠魂劲草休。

#### 答周循州

宋苏 轶

蔬饭藜床破衲衣，扫除习气不吟诗。前生自是卢行者，后学过

呼韩退之。未敢叩门求夜话，时叨送米续晨炊。知君清俸难多辍，且觅黄精与疗饥。

次韵惠循二守相会 方子容、周文之

苏 轼

共惜相从一寸阴，酒杯虽浅意殊深。且同月下三人饮，莫作天涯万里心。东岭近开松菊径，南堂初绝斧斤音。知君善颂如张老，犹望携壶更一临。

又次韵二守许过新居

苏 轼

数亩蓬蒿古县阴，晓窗清快夜堂深。也知卜筑非真宅，聊欲跼蹐看此心。闻道携壶问奇字，更宜登木助微音。相娱北户江千顷，直下都无地可临。

又次韵二守同访新居

苏 轼

此生真欲老墙阴，却扫都忘岁月深。拔薤已观贤守政，折蔬聊慰故人心。风流贺监常吴语，憔悴钟仪独楚音。治状两邦俱第一，颍川归去肯重临。

循守临行出小鬟复用前韵

苏 轼

学语雏莺在柳阴，临行呼出翠帷深。通家不隔同年面，公自注：文之与南圭令弟同年。得路方知异日心。趁著春衫游上苑，要求国手教新音。岭梅不用催归骑，公自注：文之尝伴韶。截镫须防旧所临。

寄毛达可内翰并录送魏公别录

宋李 纲

迂愚聊复隐清时，幽事相关只自知。满地落花看鹤舞，一轩春

雨对僧棋。闲中日月真消得，物外烟霞渐可期。坐致时康赖公等，不须深遁采商芝。

至日题江山驿

宋黄公度

客里萍蓬愧此身，天涯风俗对兹辰。云容山意商量雪，梅蕾葭灰漏泄春。岁晚旅怀元自恶，夜长归梦为谁频？遥怜儿女团栾处，应念江山飘泊人。

送刚中兄之官山阴

宋柴元彪

为爱鹅池可褷兰，謁来松下驻吟鞍。一家兄弟皆台宪，两世翁孙此县官。风度潮声来海口，雁将秋色下长安。白云凝伫山阴近，笑策潘舆奉母欢。

饯吉甫弟之维扬别驾

柴元彪

风檣留燕暮呢喃，行李催人春又三。幕府来迎晁别驾，油幢曾识李淮南。江都今古英雄会，宇宙中间化育参。见说监州簪芍药，早乘华步趣朝骖。

秋日江郎道中

柴元彪

豆花疏雨浥轻埃，野店新凉入酒杯。草带断烟栖古道，梅含殊霭翳荒台。湖光隐见萍分合，山色有无云去来。满眼秋光无老意，三峰万古碧崔嵬。

送监丞弟元亨参江陵间

宋柴望

北虏才闻郭子仪，上流决有退师期。诸公但酺临江酒，老子祗围别墅棋。露布夜传诛鞑鞑，蜡丸便递破符离。书生已办平淮表，

先寄鹤鹑原上诗。

和通判弟随亨书感韵

柴 望

风沙万里梦堪惊，地老天荒只此情。世上但知王蠋义，人间惟有伯夷清。堂前旧燕归何处？花外啼鹃月几更？莫话凄凉当日事，剑歌泪尽血沾缨。

中秋待月用弟察推元彪韵

柴 望

待月高楼月不明，百年虚负此宵情。浮阴乱向空中起，圆影偏从塞外清。江国潇潇凄露气，山城处处动笳声。何人独抱琵琶坐？泪滴冰弦暗恨生。

绝命诗

宋徐 琦

每说天兵出守疆，忽闻劲敌犯睢阳。火焚郡邑人民苦，血染江淮鬼物伤。忠报君恩名不朽，孝随亲死义难忘。皇天后土宜知鉴，白日英魂照剑光。

宋徐 崧

成仁取义在于斯，一死君恩报未迟。杲日当空存正气，狂澜砥柱起常彝。孔明未复中原鼎，鹏举空擎二帝旗。可恨奸回移宋祚，阖门厉鬼泣秦师。

宋徐元娘

毓秀含华十六龄，慈帏口授十三经。奇文不欲撑天地，大节偏教揭日星。何姓移刘亡汉室？谁人复楚乞秦廷？愿从一死明忠孝，碧血应留万古青。

弱质原归玉女峰，家亡国破恨重重。椿萱已遂抒忠愿，昆弟先教殉难从。热血千年啼杜宇，寒泉三尺照芙蓉。堪怜宫院齐收北，忍听天朝长乐钟。

太学同舍徐应鑣誓义沉井，后十年众为营墓立碑，

私谥正节先生

宋林德旸

高名不与魄俱沉，鱼腹孤忠耿至今。翠碣已书身后谥，寒泉犹照死时心。神游旧月山河改，梦断疏槐风雨深。埋骨誓终从武穆，栖霞岭树隔秋阴。

题苔衣集

元苏幼安

鲁港钲声耳不闻，归田幸得息纷纭。杜陵诗芒因忧国，贾谊书深极爱君。运厄丙丁知定数，天开南北验斯文。孤坟不瘞英雄气，化作长空五色云。

过江山县

元贡师泰

万山深处开孤县，下马入门风满庭。雨脚远垂松涧白，云阴低护稻田青。已知卖剑人归野，还忆弹琴客在亭。喜见寰区多卓鲁，最书时复到虞廷。

挽太学正节先生徐应鑣

元何梦桂

国破君亡一死宜，绝怜儿女死如饴。龙池竟负娲皇誓，蛙坎空遗烈士悲。洗骨不污唐六馆，沥心无愧赵孤儿。北行多少生还客？休向梯云读墓碑。

哭叔德载

明柴世良

弱冠登朝八九年，坚如金石直如弦。西楼十策忠何在？南海

三迁迹可怜。贾谊名垂千载后，祢衡骨葬大江边。固知人百身难赎，含涕长挥楚些篇。

### 送刘朝信之官江山

明何景明

江山县中山木苍，飒飒风林开豫章。岭石细通闽鸟道，涧流斜带楚人乡。青天岸帙时行郭，白日弹琴不下堂。同学共知年少志，岂将书剑负行藏。

### 宿江郎山馆

明朱应登

江郎二月点莓苔，白雾黄云惨不开。石碓自春知水长，布帆初饱觉风来。旗亭唤客春尝酒，驿路怀人晓见梅。世味已谙滩百转，山行明日又千回。

### 恭吊忠懿夫人

明王守仁

夫人兴废蚤知几，堪叹山河已莫支。夜月星精归北斗，秋风环珮落西池。仲连蹈海心偏壮，德曜投山隐未迟。千古有谁长不死，可怜羞杀宋南儿。

### 吊徐先生一门殉节

明海瑞

三辅烽烟接帝京，背城一战尚纵横。时文天祥请背城一战，陈宜中不许。家酬士死黄金散，公悉散家财，募死士勤王。身报君恩白骨轻。北极铜驼春草没，西风画鹞夜潮倾。后帝曷飓风大发，舟覆于海。阖门就义寻常事，遗恨犹闻鼓角声。

### 寄赠徐东溪观察

明柴惟道

东溪徐公，秉文河洛，按节荆衡。闾程氏之绪言，继羊公之伟绩。声

实上闻，帝心简在，载授贵阳总宪。龙场旧迹，实阳明夫子过化地也。逆哲人之流风，簸皇泽于边徼，不在兹行乎？因风染翰，聊用寄怀。

昔年画舸下神京，万里迢迢共月明。不厌驱驰缘圣世，从知出处慰苍生。扬旌洛下春风动，访古湘皋杜若清。山水幽光应焕发，却便到处洗心灵。

荆楚观风渺未回，贵阳新命日边来。殊方共是皇王土，屏翰须看经略才。青草湖光天浩阔，赤溪山色路崔巍。经行更访龙场迹，还有碑铭映绿苔。

吊徐先生一门殉节

明董其昌

何处悲风动铁冠，销魂犹记旧长安。一泓泉涌孤臣泪，万叠峰回古庙寒。光岳气分无国士，斗山人望有儒官。昏鸦老树空亭里，回首冬青掩面看。

自仙霞关至枫岭

明张 贵

仙霞高岭万峰巅，百丈丹梯鸟道悬。太息无诸凭绝隘，那教汉使下楼船。空山啼鵙穿林出，野店莺花向晚妍。瘴疠久恬烽火息，闲登石顶酌清泉。

国朝

晓晴发清湖镇舟中望江郎山

查慎行

砧床石濑响泠泠，爱入归人旧耳听。岸草绿痕移蟋蟀，水花红影带蜻蜓。樵争晓市秩初寄，风转荒湾櫂一停。云雾不遮南望眼，三峰回首逼天青。

## 度仙霞关题天雨庵壁

查慎行

虎啸猿啼万壑哀，北风吹雨过山来。人从并底盘旋上，岭下有龙井。天向关门豁达开。地险昔曾资剧贼，时平谁敢说雄才？一茶好领闲僧意，知是芒屨到几回？

## 自长安返止清湖，是为须江尽处，明日便发霞岭

周亮工

万滩腾掷众山斜，窃渺江流亦有涯。小憩乍如方出岭，频来直似倦还家。五株欲种门前柳，千树空题观里花。莫忆劳劳亭下月，送人风雨度仙霞。

## 夫子荣任江山诗以送别

閔秀左如芬

分符恰喜近龙游，一路棠阴旧泽留。单骑之官随小力，阻兵无计借前筹。未能箫鼓携家室，遥睇湖山作寓楼。错节可知须利器，好凭双剑落旄头。先翁起家龙游令。

案：左字信芳，号龙眠女史，左忠毅公女孙，姚文熊非庵氏妻。见《揅芷阁遗稿》。姚任事年分无考，旧志亦缺载。

## 送钟静远之江山

吴之振

西畴学圃叹年穷，夜验星河日验虹。杭稻芒竿黄雀雨，芙蓉花老鲤鱼风。较量身事嗟余晚，约略心期与子同。安得招他查十八，酒边按拍对羞红。

## 双孝诗为朱上舍尚聪夫妇作

钱塘费履升

采入轺轩盛事传，词新黄绢纪银编。日斜西树飞鸟曲，笙谱南陔艺黍篇。孺慕由来成大孝，人伦罕见此双贤。紫阳自是家风旧，

辉映前光史乘镌。

徐文炳

躬耕仰见古风淳，至行原来出性真。能聚一庭和气乐，兼扶两代病人身。承欢合奏姑恩曲，勤职常绵子舍春。只此倡随无懈志，双旌不愧勒珉新。

賑饥纪事诗

王恩诏金门

道光十五年，吾邑亢旱，饥民载道。邑侯冯公详请賑恤，延绅士等董理，凡八阅月事竣。感赋四章。

梓里频年庆岁丰，那堪厄运到旗蒙。岁在乙未。阳侯肆虐波涛险，前年水灾，城不没者三版。早魃为灾杼柚空。月纪黄杨知数极，是年闰六月。野无青草识民穷。米珠市价如潮涌，斗米钱八百。忍听哀鸣集泽鸿。

乡村禾黍尽萧条，极目郊原似火燎。高灶炊烟寒欲断，四民生计淡无聊。有书空乞颜公米，无路堪吹伍相箫。太息天灾恒代有，不图今岁值元枵。

大吏心存保赤诚，发棠重请为苍生。场开广厦依萧寺，设局城中海会寺。士集彼都仗老成。乞余邻封思济众，往江西各路买米。救荒善策仿常平。各乡设平糶厂。蹄涔何异甘霖沛，万口欢呼起颂声。

户口丁男簿籍操，灾黎白屋免逋逃。先立丁口册，计口给米。赈贫粮许持三日，每口给三日粮，周而复始。轮粟舟应集万艘。富室指困同鲁肃，各处劝捐谷米，有多至百硕者。通衢施食有黔敖。沿途有施粥者。梓桑情谊原须笃，惭愧当途四字褒。事毕蒙大宪奖给谊笃梓桑匾额。

## 漫兴

黄 鳌六亭

老我无心慕缙绅，肯将书剑伴风尘。满头白发须臾事，一榻青毡四十春。无俗可医便为乐，有儿能读未嫌贫。闲来寄傲南窗下，宛是羲皇以上人。

## 简郑修轩太守

刘 侃

解组归来三十秋，夜郎城郭忆边州。一麾远极牂牁路，五马闲寻太白楼。自许臣身堪报国，谁知壮志竟浮沲。从兹林下投闲后，风雨江阳老醉侯。

## 挽黄石庵总戎大谋

刘 侃

身作长城二十年，一方专阃肃兵权。牙旗寒卷千嶕雪，铁马晴麈五岭烟。前任温州，上年又移镇韶州。垂老功名真矍铄，还家痼疾尚林泉。风流端合称儒将，妙墨相看万纸传。公善书。

## 拟高季迪梅花诗

杨奏瑟

夭桃秣李作舆台，独伴孤松瘦竹栽。抱有芳心惊岁晚，从无俗客向山来。萧疏影泻寒潭月，冷淡香笼碧涧苔。为报人间春信早，一枝破腊最先开。

不着铅华半点痕，天然玉质抱香温。雪明野岸高低树，家在湖山里外村。萝幄岩扃寒彻骨，微云淡月黯消魂。阿谁冒冻遥相访？得得骑驴出市门。

铁榦槎枿已绝尘，纤纤素蘂更宜人。老苍自带风霜古，特立能开天地春。野店江亭迷月淡，断桥流水泻香频。似言似笑情何极，只恐徐熙画未真。

曾记罗浮与共依，天寒翠袖溢清晖。一杯酒向水魂酌，十里香随月影飞。雅淡靓妆谁貌得，凄凉荒径客来稀。平生为尔牵幽兴，踏遍琼林暮未归。

春日感怀四首，宰高密时作。

朱 晋尧蒙

退食刚闻腊鼓声，黄羊修祀最关情。春因地僻常迟到，吏与民安不立名。百丈崖会观海阔，十年泉忆在山清。平林几处浓阴幕，羨尔迁乔出谷莺。

醇风难得此邦人，古朴衣冠总率真。治简思删刑律志，心慈又现宰官身。三春景物留生意，五载风波证夙因。善政无多惟便俗，累他父老说津津。

经纶壮志已蹉跎，学制人还使尹何？新岁征鞍冲暮雪，频年乡梦阻春波。民良翻觉催科易，用俭常忧负债多。权理偏隅期报称，敢夸井里起讴歌。

生平戚戚果何为？琴韵消沉莫更悲。君有归缘亲一诀，我无他友比相知。课孙草续远游草，薄宦时逢避债时。两地襟怀书不尽，相酬短律笑吟痴。

山村杂咏

童起元莲史

迟迟日色映窗纱，暖意如今次第加。野老蕨拳供午饭，小姑葱指摘新搽。春云无碓牛旋磨，种树成林鸟住家。富贵十年凭领取，莫因食芋叹生涯。

拾翠山边复水边，唤将桃李作同年。石横尽有摩藤壁，溪小惟堪泛芥船。俗说荒唐谈传志，田家快乐赛神仙。千金声价须怜爱，慎此寒温不定天。

绝顶登临拍手歌，折松作杖下岩阿。谁家饲养将萍掠，到处祈

蚕得茧多。樵杂花枝都上市，泉流竹笕不生波。可怜古寺墙边佛，  
埋没尘埃迹已磨。

留春不住送春归，寂寞芳园绿已肥。花瓣忽经红雨堕，炊烟都  
化白云飞。衫才蔽膝难从俗，屋尽打头半掩扉。桑上女郎年十五，  
养蚕预作嫁时衣。

叠螺倏忽被云封，遮却青苍一万重。嘈杂人家春赌酒，荒凉野  
寺暮无钟。青丛古径休谈虎，紫气深山合卧龙。冷巷犬嗥真似豹，  
门前过客且从容。

搜索枯肠已九回，灯前得句费心裁。风声杂树丛中出，月色重  
峦缺处来。老蛤初更频吠鼓，早蚊二月已成雷。故园尺素无消息，  
锁住愁眉不肯开。

### 送汪澹园邑侯

三水崔廷杰

一到棠阴话别天，多君单父久鸣弦。风清雉陌同三异，雪印鸿  
泥共六年。旧雨曾偕甘雨集，福星且合德星悬。仁人自古常遗爱，  
刘宠临歧又选钱。

年年种树又栽花，记得成阴遍柳衙。别我春风无地主，送君明  
月到天涯。文章共见题黄绢，姓字还留护碧纱。此日迷津应问渡，  
门前桃李属谁家？

三水郭四维

琴堂缝帐仰高悬，身荷培栽已有年。春暖坐风欣得意，冬深立  
雪反无缘。门多桃李清阴满，心似松筠晚节坚。此日攀辕情更切，  
屏山汎水两茫然。

三水马鸣銮

虚堂静坐镜高悬，浩旷胸中别有天。只饮三泉一勺水，不需百姓半文钱。清风此去盈双袖，明月归来载满船。遮道攀辕留不住，寇君还愿借三年。

五言绝句

绝命词

宋徐应鑣

二男并一女，随我上梯云。烈士甘焚死，丹心照紫雯。

舟入清湖三日抵江山即事六首

明林大辂

野日晴沙渺，津云晚树重。鸬鹚飞不刷，渔艇暮相从。  
遥洲环净渚，高濑起寒烟。舟子招呼早，惊魂倍黯然。  
岁晚悲岑寂，乡书欲问谁。幽花寒色远，目断碧山涯。  
飘泊惭生理，妻孥喜共归。故园松菊径，何日薜萝衣。  
古树盘西浒，近村人语疏。仆人疑雨色，移舸买溪鱼。  
雪意千峰寂，湖光万木寒。一尊聊拨闷，渔唱杳前滩。

国朝

雨过江郎街

查慎行

奇峰登五老，秀岭度双姑。好笑江郎石，朝来却避吾。雨滴松杉径，烟迷罢棹乡。秋山行处好，何必识江郎。

送汪澹园邑侯

三水蒲增科

圣道今如古，宫墙旧复新。鼓钟隆祀典，礼乐继前人。

武邑弦歌重，文翁治化新。至今来学者，尽是读书人。  
积仓功本旧，减价政初新。粟给多千硕，恩全数万人。  
播种幽风旧，农桑劝课新。我公今欲去，继此又何人。  
驱驩风犹古，擒狼事独新。威能驯及物，德已感乎人。

## 七言绝句

### 江山道中

宋刘克庄

纯绵未觉中年暖，薄酒难禁二月寒。可惜一溪桃李树，贪程不得过桥看。

### 题须江驿诗

宋黄公度

归来已负百花期，闲拂尘埃看旧时。极目平芜三十里，乡心惟有杜鹃知。

### 江山道中蚕麦大熟

宋杨万里

黄云割露几肩归，紫玉炊香一饭肥。却破麦田秧晚稻，未教水牯卧斜晖。

新晴户户有欢颜，晒茧摊丝立地乾。却遣缫车声独怨，今年不及去年闲。

### 寄外见《诗话总龟》

宋毛友龙妻

剪烛亲封锦字书，拟凭归雁寄天隅。经年未报干秦策，不识如今舌在无？

读祝厂公《从二帝北行》诗有感

明商 轶

迫路吟诗写隐衷，奇情苦志有谁同？靖康大难当年作，劲节从君惟祝公。

报国精诚达上穹，满途血泪杜鹃红。从君万里身漠北，奇节天生名宦空。

国朝

江山道中

汤可宗

鸟道缠绵古木丛，连朝深入万峰中。仙霞阁上开襟坐，一派溪声响碧空。

涉园八景

姜亨肇

日暖风柔水拍堤，催耕春鸟傍人啼。软红尘畔劳劳客，何似南山老抱犁。南野春耕

银河西泻玉轮东，影落澄潭万籁空。试向平原高处望，清光如洗入怀中。东皋郎月

谁解乘风作快游，参差怪石拥中流。布帆此日真无恙，荻鸟汀花送客舟。白渡征帆

三山壁立见奇峰，凝眺苍然黛色浓。仙驭不归应有意，千秋幻出翠芙蓉。江郎远碧

叠嶂横空翠欲流，风回天籁静含秋。倦来一枕游仙梦，梦觉松花落满楼。牛岭松涛

积冷风吹冻渐消，云根微露旧山腰。零琼碎玉增诗思，遮莫骑驴问灞桥。鳌峰残雪

匹练横拖昼欲暝，堞楼郭树影亭亭。虎头纵有沧洲笔，难写迷

离一派青。江城晚烟

历乱渔舟古渡西，明星点点落清溪。沧浪一曲歌初罢，垂钓寒江月未低。鹿溪渔火

清湖旅店题壁

王 揆

越溪东去水溶溶，回首乡关隔万重。明日江郎山下过，碧云深处插芙蓉。

述哀二首

何 鲁

九旬大母发如丝，哭到无声分外悲。路上行人肠也断，伤心不独是孤儿。

寸阴劝我惜余曛，辜负劬劳廿载恩。纵使成名能有日，捷音未必夜台闻。

中元曲

刘 佳

钉盘罗列篆烟霏，画像家家启午扉。刚是城隍神过后，纸钱如蝶作团飞。

岭月初升夜色凉，秋声一径送啼螿。最怜挽手娇儿女，绕巷沿门插路香。

野冢累累接短桥，碧芜极目总萧条。孤魂坛外凄凉月，金箔成山彻夜烧。

中秋竹枝词

刘 佳

一炷盘香袅碧烟，黄昏悄拜画帘前。不知今夕天边月，得似儿家饼样圆。

灯花小朵缀银荷，薄醉妆台扫黛蛾。夜半敲门听吉语，愿依生

子此瓜多。

蚕词

王吉士申湖

神祠叠鼓闹春晴，处处祈蚕小妇情。生怕神前人窃听，低头暗祝一声声。

坐到更阑鸡唱初，犹闻轧轧响缫车。一帘拂动红灯影，妾自抽丝郎读书。

田家祠

朱益香史

商量布谷趁新晴，东作田功次第行。九九寒消春渐暖，百花深处鸟催耕。

肩犁人傍柳阴过，一片斜阳万缕拖。却好今年祈谷早，安排雨笠又烟簑。

一水弯环路转义，溪南溪北几人家。牧童小队骑牛背，杏雨村中饭落花。

须江竹枝祠

郑瑞麟

刻翠涂朱彩色嘉，斑斓如锦复如霞。堂前果有春常在，也抵琪园富贵花。

爆竹声声起翠烟，儿童夸说霸王鞭。近来新制还奇巧，平地一雷飞上天。

两两三三排马头，花冠玉貌逞风流。红牙一拍歌声起，袖领争夸谢素秋。

郭恒年

鱼龙杂沓万花迷，台阁装陈百戏奇。听说凤林灯最好，算来又

届十年期。

大麦黄时嫩秆擎，扇儿打惯女工精。荳棚闲坐谈新戏，月自团  
圞风自清。

### 采桑词

王 钰

东家女儿催晓妆，西家女儿呼采桑。何处采桑桑叶好？大家  
结伴同商量。

忆昨采桑桑叶少，蚕饥满箔结成团。拚依枵腹出门去，不采桑  
归不早餐。

梯倚墙头旭照红，怜他一树叶青葱。攀条不上最高顶，怕有行  
人偷看侬。

去年采桑侬十四，今年采桑侬十五。桑条却比去年长，未识侬  
身長几许。

### 书江山志爱吟后

荣 第及亭

琴鹤携来未几时，鳌峰鹿水系人思。此行竟把初心负，怕读诸  
君餞别诗。

一曲文溪活水来，延英阁尚待重开。门前多少新桃李，付与刘  
郎著意栽。

离亭踟躕又城隅，云树苍茫入望俱。最是不堪回首处，双双塔  
影尚模糊。

不容藏拙逐居鸠，到处营巢亦自由。底事清风偏笑我，好诗也  
向袖中收。

骊歌唱处等弦歌，雨点还输泪点多。清酒百杯诗一卷，者番争  
奈不廉何。

何须长物艳归装，志爱吟成即召棠。一字一缣酬不尽，况无佳

句贮奚囊。

赋

江郎书院赋

赵 铨

维时三峰矗立，四壁横空，崑峨形势，礧礧情衷。万古不磨，出没白云之外；千秋常在，参差碧落之中。罗列满胸星斗，离披两袖云风。形如图画之屏，横排江左；势似飞来之石，巧置浙东。山高骑石，路逼霞关；林围若幄，岫拥如环。钟鼓洞间，清风介旦；虎跑泉里，薄雾绕鬟。跨鹤羽衣，曾向弈棋而至；归真高士，常从负笈而还。斑驳满崖萝薜，清幽一路云山。厥惟祝公，遁迹江郎，抒写幽愤。萧疏茅屋，堆万卷之经书；黯淡心情，抛六朝之金粉。是谁伴我？友爱虬松；何以抒怀？花栽木槿。从此逝矣，伤心虞夏已遥；盍归乎而，会见风云日近。不竞词苑文豪，聊作云岩小隐。爰有月朗，江郎寻父，岩岫攀跻；造成书院，安父孤悽。五老峰头，不添萧瑟；三生石上，儘可品题。辟地盘于岭北，建高厦于岩西。瓦屋层层，千重鳞鬣；阑干曲曲，万丈虹霓。蓬荜新成，占断江郎之胜；茅斋小构，安排处士之栖。尔乃面面凌空，般般突兀，坐对三峰，环围万笏。当山罅石缺之际，佈置随人；在魏晋汉宋之间，流风未歇。四围蔚蓝，环中之檐角遥飞；一抹丹青，象外之峰头蓬勃。树有色而皆鲜，花无香而不发。由来名迹，多系奇人；最是清华，常余萝月。乘兴遨游，随行策杖，红日天边，白云岭上。来即实归，去定虚往。山中添落叶之声，月下送敲门之响。碧云一片，思出岫以初飞；绿树千重，欲归山而设想。槛外烟痕匝匝，月照山清；庭前花影参差，风过云朗。而乃笃志读书，经文讨论。狂吟则禽鸟能闻，得句则鬼神持券。文章假我，咸入钧陶；山水奇逢，顿成素愿。向渊

明以问讯，便觉心虚；望嵩岳以追寻，须凭脚健。猿啸怡情，鹤鸣消怨。八叉句就，敏念庭筠；七步诗成，才思子建。于是终日咏吟，平居啸傲；学问既深，精神能到。望云归里，仍跨吟驴；读雪闲居，常笼破帽。临轩制草，正银河放棹之时；据案吟诗，即仙侣同心之导。砥砺是端，鬼神来告。文昌坐子弟之宫，衣钵受家庭之诰。有不簪纓济济，跨鳌仙子为大成；书香绵绵，竹马儿童俱有造也哉？

### 江郎山赋

新安江 煊

巍巍乎岷哉，江郎之山万仞高，拔陆地而依青天，下根属鳌足，上与浮云连。品相峙而鼎立，剧不识其几经万千年。翳或造化之先，鬼斧所辟，崇崑岖嵌，崭岳旷落；昌黎无自缘其巅，五丁无所施其凿。挹彩眩目，仰高惊魄。盖自衡阳之南脉，盘五岭而迤北；左拂武彝，右陂蠡泽，憩乎仙霞，走夫林历，将赴三吴而汇两浙，特立此崔嵬之巨石。地辟徐王，野分婺女，华表三衢，磅礴千里。烂柯、怀玉其左肱，雁宕、天台其右旅；钱唐、东海，其所肆之筵；金华、四明，其所凭之几；东瓯特其左沙，南闽皆其余气。缅维此山，江姓所宅，昆弟三人，登而化石。日月晶华，岁增月益，是用有神，陟降帝侧，呼吸风云，呵护社稷。爰及大梁，载锡嘉名，封为石王，代禅世换，人移物易，岩岫不改，兹山如昔。未几而祝东山之游屐倏来乎，江丈人之娇客。盖斯山之郁秀，实绝尘而超俗；盼眄中天，呼吸太白。是以烟霞之交午，屡召高人之栖息。其上则奇岳崱峿，大谷谿谿，峰回嶙峋，路抱狭斜；远瞩千山，俛瞰万家；书览云物，应接不暇；禽鸟翔其巅，风雨蒸其下；北耸塔峰，南壑深壑，翠壁丹崖，鸟磴麋蹊。一下数千仞，各峥嵘而斗角。乃若窟隐龙潭，泉流虎跑，澎湃滌洄，砉訇渺淼；悬崖直漏，奔湍乱叫；雪浪飞于山阿，泉声咽于树杪；清如伯子之琴，泪若苏门之啸。至其绝壁亘天，嵌岩无路，树

拥云封，更穿石罅，曲躬径入，侧足举步；则见夫上广下奈，嵌空如陞，擘天光于一线，揽青云而竟渡；出入乎三石之间，盘回者二十余里。若乃引声一呼，飘来天风，聳然有音，如出谷中，投石掷之，响于层空。左应鞞鼓，石应特钟，嚙呖铿镗，田田齧齧。及夫回目仰瞩，丹丽如画，凹凹凸凸，如狗如马；垛垛堆堆，或大或小，变幻陆离，不知多少。依若虎头之痴，几费李斯之巧。物产之异，绝俗离群，文鲤跃于峰巅，玉桂芳乎三春；香攀枯柏之枝，茗剪惊雷之荚；檀麝之贵，失其氛氲；阳羨之品，逊其佳绝；芝草九茎，松箴七叶，北岫黄精，南山赤橘，益寿延龄，适口充食。林禽朝嘲，水鸟夜啾，珍禽奇畜，不可殚述。尔乃架僧寮于半岫，置书屋于高冈，掩映朝辉，徘徊夕阳，山烟林气，郁乎苍苍；野卉春华，薰风夏扬，空林待月，松凌霜极；娱游以豁目，骋予生之徜徉；盼高山其仰止，怅斯人之安往？访祝氏之遗贤，独爽然而伫望，巍巍乎岷哉，江郎之山也。其高不可攀，陡然直下，上大下小，安得奋身登其上。排闥阖入天关，数二曜之星躔，瞰尘寰之渺杳；憾羽翼其未生，曷禁予怀之悄悄。

国朝

文庙秋奠赋 康熙辛卯

会稽王汝为志宣

猗欤我朝，受命巩固，圣教诞敷，崇文靖武。会道统之源流，盛辟雍之钟鼓。三舍萃其衣冠，九重躬为忉舞。乃者翠辇时巡，省方所及，道三吴，历两浙，告河成，临禹穴；爰较艺于西湖，用采风于南国；增簧塾之恒规，广棘闱之定额。自是而罗刹江边，武林山侧，边徼岩疆，偏陬下邑，莫不家闻弦诵之声，户启党庠之色矣。乃有迂自礼贤，夙名儒雅，崇善街前，太平里下，西山爽气，独占鳌头；北海抟风，遥瞻鸱化，环景星而影落高檐，鞭骑石而峰回大厦。斯岂碑傅灵石，徒招江氏之魂；宅剩朱弓，仅祀偃王之驾也耶？则有地结

千秋之社，门窥数仞之墙；表列腾蛟，应山川之秀发；楼成仰圣，效宫殿之飞扬。金鲫池回，鱼龙争奋；碧莲沼永，芹藻均香；堂陞余古帝之风，茅茨不剪；宗庙具百官之富，车服犹藏。室因人而可迹，德以远而弥芳。是用棣星既辟，释奠成仪；千羽初临，作人无数。六经独注，不登权相之庭；五字陈言，岂顾漕司之怒？化石现尼山之象，依稀梦感苍龙；文溪衍汶上之灵，彷彿神垂湛露。吉宜刚日，肇启离明；序属中秋，每虞迟暮。惟功令之有常，庶明禋之弗误。维时白帝司晨，金天献瑞；揽西畴之稚穗，共效馨香；诵七月之瓜直，俱当甘脆；黑麻红蕒，携来仁寿之乡；白雉乌鸕，荐自文明之会；关联逐鹿，熊豹分禽；洞系覆螺，魴鲢共鲙。睹万宝之告成，较春祠而更备。况乎分符主鬯，濯来江汉之英；秉铎司香，阐自阳明之境。东阶荐币，拟同宗国观风；西序陈牲，原属杏坛将命。盖自先河后海，聿昭鄴邑之官；继往开来，实起殷人之殿；共传圭瓚，吐玉为书；载告牺尊，梦楹致奠。凤林红烛，光分天上长庚；仙岭明霞，瑞启人间金鉴。大祭方承，雅歌间作；稚坊群彦，持象勺而徘徊；石鼓誉髦，扣钟簋而酬酢。彻以俎豆之篇，乱以逍遥之乐。犹且多士周旋，群工踰躅；当年遗爱，曾留御史青骢；此日诒谟，争识尚书绣履。谁政成保障星楼，振元武之声；谁节著水霜金井，获冷香之誉。或潜心有室，还期启沃成编；或安定名山，犹望风流继绪；以至谣怨新法，青苗预绝其私；诗补梯云，碧血共成其是；固拟烟萝作院，无容炼丹鼎之需；海会成庵，不俟共伊蒲之贮者也。至若越国小儒，乌衣末第，十年负笈，聊陪弟子之班；两载担簦，幸睹裸将之礼。不烦鸾辂足归，乘马于中林；何事桑黹别慰，飞鸕于下里；于是暮而寝，旦而兴，诵进业，感离群，留连射圃，观望戟门，恍诸贤之戾止，俨至圣之亲承，盖莫不僂乎其有见而忉乎如有闻。

## 清漾灵芝赋有引

宋 俊

清漾灵芝者，外史宋俊徇毛子兆镛之请，而为之赋者也。毛子世居清漾，自宋暨明，登仕版者五十余人，皆以功烈文章，垂名史策。辛卯岁，毛子复举于乡，尝为余述其所居之后圃，十余年来，紫芝盛发，离奇变化，杂出于长林丰草中。余稔悉毛氏父子以行谊著闻于闾里，一门聚顺，肃肃雝雝，按瑞命记，以芝为仁慈之应。而王仲任亦曰：芝本属土，气和则生。至葛雅川所引，凡数十种，皆延年益寿之征。毛子日侍庭帟，与诸季纘承家学，则知植物效灵，无非积中发外之明验也。因为赋曰：

有清漾之名区，萃江阳之区族；繫州陵侯之苗裔，徙居于金纯之大麓。耸螺尖而峙鹅蕊兮，自曜岩而蜿蜒于平陆。萦松坪而映竹坞兮，若篔簹之回环于车毂。水发源于十二之奇峰兮，历夹漈而汇为鸣瀑；度练塘而东缙岭兮，崿嶭与澄泓而倚伏。维前修之大人兮，遗构犹传于书屋；食祖德于三余兮，奠宗祊于九穀。越百世而象贤蔚起兮，宁虑夫奔蜂之化藿。蠲春露秋霜，陟彼前冈，蘅芜溅绿，罢稯凝黄。曲径绣莓苔而留迹，平池矗菌苔以飘香。何灌莽之杂沓，忽熠熠其生光。有榦有柎，类谢家之宝树；不草不木，异冯氏之蛮姜。或径尺而扶疏于栝柏，亦肤寸而俛仰于笄笋。三秀迭呈，岂栽根于元圃；九茎横吐，疑移种于斋房。于是园丁转告，牧竖群嬉。聊停弦诵，暂憩芸芋，牵萝曳蔓，顾而乐之。按图考牒，厥号灵芝。检神农之绪论，披尔雅之鸿辞。说文足据，神契无私。在昔赞纪青龙，现长平之紫气。亦有岁当神雀，表涵德于铜池。何图朽壤，乃睹灵奇。方平旦而觐朝晖兮，若重锦焜煌于黼黻；更良宵而延皓月兮，似轻裕缟染于胭脂。蜗涎叠篆，鹿角分破，直如搢笏，围若覆鼎。镜面平铺翡翠，刷银塘而焕彩；罗纹暗繡珊瑚，抽铁网以

交枝。牺尊无藉于丹，黄泥封秘册；羽帜漫形其赤，白电绕重帏。笑桂蠹之纷拿，何似緜飞萤火？陋枫癭之偃蹇，岂如晕罨蟾犀？榆肉空乾，眇矣猢猻之眼；天花易萎，嗚然龙鳞之皴。状连鼓而实垂珠，洵菑园之未识，感瑶光而服云母，诘菌阁之能窥。尔乃小试鸦钗，横翻鸟扇；缙幕宵张，湘帘昼卷；酌旨酒于岩阿，聚落花为莞簟；召嘉客以来游，敕中厨而开咽。写生欲活，茯苓图鸟兽之形；分韵征诗，谗鼎铸蛟螭之面。口哇而不敢长吟，目眴而何暇置辨？则有孤屿梅仙、浔阳菊友，鲜木奴之干头，撷香玉于两手；喜川岳之呈祥，羨遭逢之非偶。跻彼公堂，酌以大斗，谓尔灵椿，貽君尧韭；累累若若，他年联玉笋之班；济济跄跄，此日卜金闺之秀。吾闻感之神者应之奇，出之多者培之厚。人生以积善为优，造物以深藏为久。惟泽媚与山辉，见坚贞而虚受。纵隐显之殊途，蕲令名于不朽。间尝过地肺而入商山，闻浩歌于茹芝之叟。歌曰：云为盖兮茧以金，畴其采之感予心，辟五兵兮集百福，宜尔子孙食天禄。芝兮芝兮犹在望，江郎之北有清漾。

## 词

浣溪沙 寒食初晴，东堂对酒

宋毛滂 泽民

小雨初收蛭作团，和风轻拂燕泥乾。秋千院落落花寒。莫对清尊追往事，更催新火续余欢。一春心结倚阑干。

踏莎行 早春即事

宋毛滂

堦影红迟，柳包黄遍，纤云弄日阴晴半。重帘不卷篆香横，小花初破春丛浅。凤绣犹重，鸭炉长暖，屏山翠入江南远。醉轻梦短枕闲欹，绿窗窈窕光风转。

念奴娇山河

宋柴望

登高回首，叹山河，胜国于今何有？台上金仙空已去，零落通梅苏柳。双塔飞云，六桥流水，风景还依旧。凤笙龙管，肠断何人重奏？闻道凝碧池边，宫槐叶落，舞马衔杯酒。旧恨春风吹不断，新恨重重还又。燕子楼高，乐昌镜远，人比花枝瘦。伤情万感，啼血暗沾襟袖。

摸鱼儿景定庚申，会史君陈碧柄

宋柴望

便无他、杜鹃催去，匆匆春事能几？看来不见春归路，飞絮又随流水。留也是，怎奈得、东风红紫还飘坠。天涯万里。怅燕子人家，沉沉夜雨，添得断肠泪。嬉游事，早觉相如倦矣。谢娘庭院犹记。闲情已付孤鸿去，依旧被莺呼起。谁料理，正乍暖还寒，未是晴天气。无言自倚，想旧日桃花，而今人面，都是梦儿里。

踏莎行戊寅秋，怀钱塘旧游

宋柴元彪

淡柳平芜，乱烟疏雨，雁声叫彻芦花渚。亭前落叶又西风，断送离怀无着处。切切归期，盈盈尺素，断魂正在西兴渡。满船空载暮愁来，潮头一和推将去。

如梦令题画

明毛恺

玉岫平临寒渚，茅屋深窥瑶树。隔浦有渔舟，偕问酒家何处？归去归去，休被梅花笑取。

沁园春东塾师白莲河秀才

明毛恺

越水储精，越山毓秀，产个豪雄。想春到兰亭、徘徊吊古。秋

回禹穴，慷慨歌风。万里云霄，几时腾踏，百尺龙泉两鬓蓬。风流甚，把芳樽酌月，彩笔摇红。名驰两浙西东，又何必神交梦寐中？况粉署仙郎，当年眼碧。王武部曾以莲河相荐黄堂太守，特地情钟。莲河时为季长沙高弟。壁立门墙，光生桃李，朔雪春风一样同。区区愿，看先后师弟，蚤晚夔龙。

**酹江月** 追吊孝烈徐元娘

明王世贞元美

西湖明圣，正钟灵闺秀，元娘尤绝。作赋题诗皆仅事，凛凛偏怀忠烈。十六芳龄，九天仙女，未绾尘缘结。生逢世变，不堪回首家国。甘蹈烈火焚身，银瓶堕井，却从容完节。粉坠香销，千载下，尚见裁冰剪雪。报国精忠，酬亲纯孝，都付真心洁。我来恭吊，一樽还酹江月。

**满庭芳** 宿太平寺，赠余舟庵

钟定承家

松径迂回，草桥斜欹，梵香飞彻中天。卧云衣冷，虚籁趁流泉。忆奏太平乐府，叹咸淳、古治依然。山河异，园廛风景，举目似当年。幽姿寻北郭，尚秉周礼，犹剩高贤。只爱招提境，不为逃禅。梦觉疏钟深省，匆匆起，检点书编。小童报，东方未白，窗影月光穿。

国朝

**如梦令** 江郎街遇雨

宋俊

林外岚封烟聚，遮断行人休去。冷翠扑征裘，疑是江郎欲语。无据，无据，三片石归何处？

偷声木兰花 清湖阻雪

宋 俊

同云漠漠搏青壁，峡口回涛帆影急。雪阵风开，万点梅花掠地来。灯摇红焰和衣拥，浊酒频呼邀旅梦。无那荒鸡，引得寒鸦两岸啼。

霜华 宿清湖旅店

金 垠 雪岫

披襟岸帻，喜到浦停桡，暂卸囊笈。旅店凄凉篱舍，版床支隔。屋角鼯鼠窥灯，砌畔蛩螿啼壁。梁月白，窗棂纸穿，淡影偷入。坐来不觉岑寂，且手把香醪，消磨此夕。奈是夜长霜冷，俞增愁戚。忽听乱唱邻鸡，起看星稀天黑。行半晌，才逢江郎片石。

瑞鹤仙 云轴精舍遣怀

毛兆镛 宣伯

幽斋容膝小，正篆火香销，清昼院悄。门掩无人到。有红蕖泛水，翠篁凝照。苔痕径绕，唤奚奴，落英轻扫。展牙籤，倚几沉吟，只恐风尘易老。多少霜桥月馆，雾市烟津，梦魂惊觉。故园归后，重回首，关河杳。忆长安，听遍柳眠莺啭，春色等闲过了。漫书空，独步闲阶，壮怀成恼。

## 《江山县志》卷之十二

## 拾遗志一

荒烟蔓草，见者怀思；断碣残碑，过焉增感。是以商容之间当式、柳下之垄宜封。思古抚今，有同慕焉。他若异瑞偏灾、方言俚语，事虽甚微，罗而辑之，亦所以广闻见、佐麈谈也。志拾遗。

## 古 迹

**武安县治** 证圣年，割常山、须江、弋阳置。以其地有武安山，故名。嘉靖《浙江通志》。《太平寰宇记》：武安故城，在龙游县。天启《志》引入江山古迹。汪浩《志》谓江山诸山无武安之名。今《浙江通志》亦引嘉靖《志》，姑仍之。宋成绥《志》。

**礼贤县治** 宋咸淳间，改江山为礼贤县。县治，即太平寺。天启《志》。案：宋成绥《志》沿革门引《九域志》谓县自礼贤镇迁今治，断自宋初。而朱彩《志》又谓元至元十三年迁今治。未知孰是。

**江山土城** 高寻二尺，今不存。惟濠水自景星门入，环县治如带。天启《府志》。案：汪浩《志》误作寻二丈。宋成绥《志》辨明之。

**元江山军营** 在江山县仙霞关。弘治《府志》。

**明远楼** 在县治内。宋知县程准建。天启《志》。

〔程准《明远楼》诗〕拥清亭上一楼过，占得江山万象多。帆带暮云归别浦，崖拖秋色落澄波。天连尺五银河挽，月倍寻常玉镜磨。安用藩篱障吾目，披襟千里快长歌。首句疑有误字。

**水星楼**即天乙楼。在县治东北，与景星山相对。邑素患火，故建。楼高六丈余，中供真武像。明知县余一龙建。义民郑桃等捐资重修，桃之子亭贤复创置田若干亩，以给香火。年久圯。国朝知县朱彩重修。汪浩《志》。

〔国朝何茹连《登水星楼和壁间韵》〕太乙楼高半接天，望中须女旧山川。溪流远挾千峰雨，暮靄遥连万井烟。古壁龙光腾剑气，上真法象耀星躔。一声清磬浮云外，仙梵依稀胜管弦。

**万卷楼** 在通和门外梅花墅。明邑人郑德徵建，今废。汪浩《志》。

**奇气楼** 在长台高斋山下。宋柴望建。天启《志》。

〔宋柴望《奇气楼》诗〕此斋全占崧高胜，更尽楼前第一奇。芳草碧连天水处，数峰青断暮烟时。山川不逐阴晴换，宇宙闲看岁月移。琴已懒弹书懒读，一帘花影咏春迟。

〔国朝毛元坤《登奇气楼故址》诗〕万峰秀气到楼奇，奇士居来定与宜。航海二王无寸土，归田四隐有遗基。曲江忠愤陈金鑑，屈子悲歌寄楚词。手泽至今同劫烬，独留奇气尚堪追。

**冷香亭** 在县治内。明知县方节愍召殉节处。

〔国朝陈扬善《冷香亭怀古》诗〕井底衣冠想像中，冷香淡宕出晴空。当轩剩有严城月，绕砌犹传素箏风。须水几人争一死，景星片碣纪孤忠。敬亭麦饭谁贲到，血迸秋山万树红。

〔周允协《题冷香亭吊方公》诗〕六字前驱拟岳侯，后先正气作同俦。忠魂已逐唐王去，长梦惟从高帝游。绝意求生明取舍，无钱埋骨任沉浮。当年冷

落无人识，千古英风井畔留。

〔何茹连《冷香亭吊节愍方公》诗〕雄关铁骑压危疆，遗老能言古战场。摩狄岂志离黍恨，怀沙空剩碧泉香。江枫半染苾宏血，庭树犹思召伯棠。何日西风持麦饭，景星山下哭斜阳。

**清风亭** 在县治分司前府馆内。明正德七年，同知孟周建。宋成绥《志》。

**梯云亭** 在文明坊。为入文溪书院之初阶。

**皆水亭** 在水中央文溪书院。有小桥可通，绿波红蕖，最宜销夏。

**一苇亭** 在航埠水次。明毛元敬建。汪浩《志》。

〔国朝周遐祚《秋日登一苇亭》离亭燕词〕客里光阴真骤，风物又逢重九。水色山光都不异，只恨缘稀红瘦，乘兴倚花栏，已过投衣时候。远浦未消回溜，催散鹭明鸥友。天末归航偏历历，数尽云樯如绣。慷慨一悲歌，惊落霜华满袖。

**始喜亭** 在江山县南面烟萝洞。宋嘉泰三年，县令黄汝嘉名之。《浙江通志》。

**江山奇观亭** 在江山县治西西山。邑人择胜为亭，宋令黄汝嘉题匾。《明统志》。

**一视亭** 在南城。知县余一龙建。今废。天启《志》。

**青霄亭** 县北兔桥上。知县黄纶建。今废。天启《志》。

**松山亭** 县北柘桥上。知县黄纶建。今废。天启《志》。

**双溪亭** 县北塔溪渡夹沙中。知县黄纶建。今废。天启《志》。

**华溪亭** 县东十里华清桥边。知县黄纶建。今废。天启《志》。

**三望亭** 县西南二十里。知县黄纶建。今废。天启《志》。

**萃贤亭** 在江山县礼贤镇。邑人周颖建。《名胜志》。

〔宋欧阳修《萃贤亭》诗〕君家富山水，占胜作高亭。坐听溪流响，能令醉客醒。阳生群木秀，寒入乱峰青。吾族东南美，人贤地益灵。

〔苏舜钦《寄题萃贤亭》〕君家作虚亭，跨涧复依山。游鳞俯可钓，佳木坐可攀。我思醉其上，与君开尘颜。缅邈未曾到，江望空长叹。

〔梅圣俞《寄题周源员外衢州萃贤亭》诗〕昨朝江南客，语子川上亭。有时飞雨来，不见前山青。卉萼人未识，鸟响日可听。既将迟贤者，无使童仆扁。

宋成綏《志》：此诗旧志不载，今从集中采入，但题为周源。考选举志，源为宝元元年进士，颖熙宁三年进士，相隔三十三年。岂源作之，而颖仍之？同是此亭，寄题有先后，故分属两人耶。至衢州之即为江山更无疑也。

**天一亭** 在仙霞岭天雨庵内。宋成綏《志》。

〔国朝柴炜《天一亭》诗〕绝巘开泉窦，亭闲水自流。白云归寺冷，清磬出林幽。翠滴千峰雨，寒生六月秋。尘心到此静，长啸叹蜉蝣。

**化石亭** 在江郎山。道光二年，僧乾裕募建。

**三近亭** 在县北二十五里大陈庄。道光间。里人汪如升建。亭有三层，飞阁八面，树木荫翳，峰峦环绕。每一登览，殊豁胸襟。

〔余以增诗〕三层突兀势凌空，八面窗开八面风。山色近依平槛下，书声高唱入云中。人家点点炊烟散，春树亭亭翠靄笼。雨后凭栏闲眺望，满楼诗景画难穷。

〔王景彝诗〕山势盘纡处，巍然杰阁开。环峰青入抱，古木绿成堆。岂但承先志，还期产异材。寄言贤父老，更与好栽培。

**登云亭** 在江郎街。同治十年建。

**介亭** 在仙居寺内。明毛端简公恺读书处。今废。

**日涉园** 在江山县东白岩。有飞瀑。宋靖康末，邯鄲李传正爱其秀拔，因治圃于此。弘治《府志》。天启《志》：在仙居寺前。

**赵氏园** 西山景盘赵氏园内有梅泉。弘治《府志》。

**枕园** 在雪泉左。明邑人王球建。汪浩《志》。

〔国朝车景铸《题枕园》诗〕负郭园林好，尘嚣自扫除。玉箫仙史曲，金错美人书。夜阁焚香后，春池涤砚余。别来频想像，不让辋川居。

〔杨世奇《题枕园》诗〕寂寂双扉僻处开，乌衣深巷旧亭台。一池春水明衣

镜，谁把红鹅换字来。层楼百尺倚山椒，桂影参差间柳条。有客不妨聊斗茗，雪泉正好坐清宵。

**涉园** 在鹿溪东。邑人郑鎡建。汪浩《志》案：涉园有南野春耕、东皋明月、白渡征帆、江郎远碧、牛岭松涛、鳌峰残雪、江城晚烟、鹿溪渔火八景。

〔国朝王汝为《晚过涉园访毛子恭居》诗〕别业临沙渚，高垣隐薜萝。林疏秋色近，山回暮寒多。蛩足幽情惬，横经胜友过。无嫌归响缓，隔水起樵歌。

〔姜亨肇《涉园八景》诗〕日暖风柔水拍堤，催耕春鸟傍人啼。软红尘外劳客，争似南山老抱犁。银河西泻月轮东，影落澄潭万象空。试向平原高处望，清光午夜正当中。我欲乘风破浪游，参差怪石砥中流。布帆安稳今无恙，芦雁汀花送去舟。三山壁立仰奇峰，凭眺苍茫远黛浓。仙驭不归归亦得，烟云幻出碧芙蓉。叠嶂横空翠欲流，风鸣天籁静含秋。倦来一枕游仙梦，梦觉松花坠玉楼。一夕风吹冻欲消，云根微露见山腰。零琼碎玉寻诗地，遮莫骑驴问灞桥。匹练横拖昼欲暝，望中城郭影亭亭。虎头纵有沧洲笔，难写迷离一派青。历乱渔舟古渡迷，明星点点映前溪。一声欸乃歌初罢，垂钓寒江月未西。

**松风馆** 未详。

〔宋郑魏珽《题松风馆》诗〕一壑萧然万里间，此身落得似云闲。蹁跹野鹤身同逸，来往樵人语不关。瑶草茂时春淡荡，乱溪交处水潺湲。偶怀知己携琴去，十里松风未出山。

**景星馆** 在江山县南五十步。宋汪大猷、辛弃疾皆有留题。《明统志》。

**梅花馆** 在石门。明毛介川退居之所。今废。汪浩《志》。

**白云庄** 在江山县南三十五里石门。有轩堂台榭之胜。宋邑人毛维瞻建。《舆地纪胜》。内有掬泉轩、平溪堂、晚望楼、懒归阁。天启《志》。

〔宋赵抃《次韵白云庄三咏》诗〕〔掬泉轩〕好山深处静开轩，日送孤云手弄泉。枕石堂无金玉富，濯缨家有子孙贤。初寻旧隐逢三伏，已发新吟近百

篇。闻说夜深炎暑散，凉飍浑似素秋天。〔平溪堂〕亭有休休古退藏，岂如溪上携虚堂。坐邀城市真潇洒，却谓江湖太渺茫。下笔新题无俗事，搯筇野服是家常。临流最有清风快，未见古人心已凉。〔眺望台〕治圃我依浮石滩，筑台君占白云山。三秋一日登临外，千里同风咫尺间。峰黛阴晴常黯黯，溜琴朝夕自潺潺。休官谁道何曾见，林下如今两处闲。〔又《题毛维瞻懒归阁》诗〕溪流回合运方池，轩槛前临面翠微。紫陌红尘行不顾，白云青嶂坐忘归。方荣即隐谁能继？未老先休世所希。我昔侵晨登阁会，主翁留散见蟾辉。〔案：朱彩《志》本天启《志》作柴望诗，今从《清献集》校正。〕

〔僧显忠《白云庄》诗〕门外高踪近翠岑，杖藜时得去幽寻。牛羊数点烟云远，鸡犬一声桑柘深。高下闲田如布局，东西流水若鸣琴。更听野老谈农事，忘却人间万种心。

**百客厅** 宋柴望建。在长台庄。宋成绥《志》。

**集翠堂** 未详。

〔宋毛滂《集翠堂》诗〕烟岫供寒翠，风帘舞小晴。短墙分竹色，虚户纳松声。弄笙云窗暖，煎茶玉醴轻。端知松桧月，独伴夜禅清。

**双溪堂** 江山县双溪泉，在县市巾。有双溪堂，为负邑佳处。《舆地纪胜》。

**祈年堂** 江山县登真岩有潭。唐刺史投龙祈雨，名为天泉。宋守范祖德作堂其址。天启《府志》。

**世学堂** 江山县柴禹功受业杨时之门，匾其堂曰“世学”云。弘治《府志》。

**夹溪草堂** 疑即石门别墅。宋成绥《志》。

〔明毛恺《夹溪草堂》诗〕烟树草离离，双江抱村曲。中有幽人居，茅屋数间足。风度响松篁，芝香走麋鹿。对景欲忘言，云白山更绿。

**资贤堂** 疑即毛尚书第。宋成绥《志》。

**怀舒阁** 在仙居院。前有水帘，宋毛谏议即其前为阁。弘治《府志》。

**芝洲精舍** 在茅坂。明徐进士紫崖为璩孝子伯彩筑。宋成绥《志》。

**兰香精舍** 在仙居寺。宋成绥《志》。

[明毛允让《兰香精舍》诗]君不见，终南之山足幽胜，昔有高人讥捷径。又不见，竹林仙刹起云中，登临莫得空闻钟。岂若兹山深可寓，栖迟回隔红尘路，洞门无际水为帘，瀑壁高悬雨增布。细如丝竹鸣大比，春雷怒石瀨，松涛白日间，幽香不断兰满山。古殿池南敞精舍，银台罗岫窥栏杆。凿沼成莲社，鳬鱼资考槃，考槃者谁子，懒慢不堪比，床头一卷书，字字涵至理。至理从来未易寻，高山流水自知音。阶前鹿豕浑忘我，溪上鸥凫惬素心。山空听伐木，乐处闻春禽。不识春禽信多少，山山次第啼春晚。梦回一枕水天空，窗开半榻烟霞绕。我友谁人入室来，共滋九畹歌尘表。

**潜心室** 在长台。柴禹声建。汪浩《志》。

[宋徐存《潜心室铭》]天在为吾性，觉处强名心，是心本无放，放处即非心。欲识真心状，光明常在今，白日当空挂，何曾待汝寻？古人云放心，正指流情说，流情虽不害，解为人汨没，视听言动间，浮云遮白日。遮处断永世，冥冥若暗室。智者辨当早，觉从萌处别，先立乎其大，小者胡能夺？转眼动常省，临流刚且决。久久转光明，吾身骑日月。

[明杨魁《次徐逸平潜心室铭》][韵]莹净常自在，曰心亦曰性；灵明湛真宰，曰性亦曰心。真心非有我，乌得有古今？后世不知心，形气外头寻。缘是不知性，多从后天说，憧憧往来间，真体为灭没。旦暮雾烟滃，云深那见日？日用了不知，谁克相尔室。屋漏果无愧，白黑晓然别，磨涅在亲民，勿为磷淄夺。动静互为根，无欲早自决，心体浑一致，长空片轮月。

**克斋** 江山县西山，宋徐复殷家于此。《名胜志》。

**菊所** 元毛德祥建。周伯温颜以 城市山林 。今废。汪浩《志》。

[明王朴《城市山林记》]三衢之江阳，有隐君子曰毛君德祥者，居于县东之闾闾间。其县南诸山，适当其门，而左右县后，环树以花竹槐柳松柏之类，阴翳茂郁，浮芬积翠。庭堂深靓而门闭雅洁，朝爽之气可揽于帘帷之间，烟岚

之耀日浮于几席之上。虽跣步塵肆，而喧哄之声、奔趋之尘，盖不能及其仞墙而接其耳目也。昔左丞番禺周公伯温，闻君之名，扣门往见，赏其所居之胜，因篆“城市山林”四大字以畀之。今年春，君以事至京师，余适相见于逆旅，目其貌温然以和，而清萃秀爽之气复津然见于眉目之间，吾意其必为山林有道之士也。因日与往来。久之，君乃征文记其所谓城市山林者。余曰：夫山林之与城市，其趣味之殊，不可同日而语明矣。盖城市者，小人射利之所便；而山林者，君子隐德之所乐也。是故，据康庄之衢，而通舟车之货，竞锥刀之末，而规三倍之利。君子固无所用于此焉。若夫探邱壑之幽而擅泉石之赏，藉丰草之色而坐茂树之阴，彼射利者亦不能一日安于此也。由此而论之，则城市、山林各适其适，而君子、小人之趋向，固不同矣。虽然所贵于君子者，心无适莫而不物于物也。彼山林城市，皆物迹之所寓，而君子之有道者，其心詎尝泥于迹哉？是故，君子之隐也，或伍编氓于城市之中，或侣麋鹿于山林之下，迹不同而心未尝有异。其在城市也，彼物欲之纷拿者，固不能以动其中。而在山林也，亦未尝枯形灰心，如偶人而已也。而或者不求其心而泥其迹，故于城市山林，辄有轻重去就，而复有大隐小隐之说，是皆物于物而不达于道者，夫岂知言也哉！毛君居城市之中，而有山林之趣，优游逸豫，以全其身，而以诗书礼乐淑其子孙。今年已六十余，其德弥邵而志气不衰，人皆曰：毛君乐夫城市之山林，而不肯出也。呜呼，孰知夫君之所乐，有在于山林城市之外者乎？故因记以验之。

〔明胡拱辰《菊所赠毛德祥》诗〕汉代名儒裔，元朝处士家。一轩偏种菊，九月尽开花。有酒须频赏，无钱不厌賒。灵根几已叶，秋色转交加。

〔宋濂《菊所为毛德祥赋》诗〕吾慕毛茛奕叶芳，幽栖种菊待重阳。一篱露浥花方发，三径风来酒亦香。坐对南山情更逸，饮来灵水寿偏长。悬知靖节风流在，不羨裴公绿野堂。

〔张輿《城市山林》诗〕大隐幽居何处寻，江阳城市有山林。闲阶鹤迹苍苔润，白昼棋声绿树阴。钟鼎已无他日梦，乾坤惟有百年心。虽缘门巷通车马，不受红尘一点侵。

〔林温《城市山林》诗〕阴阴杨柳绿临门，半似城居半似村。昼静白云楼竹

上，秋深黄菊绕篱根。岂无樽酒留宾客，亦有诗书遗子孙。隔屋红尘飞不到，人间何必问桃源。

**川上居** 在航埠山。明毛文兴建。汪浩《志》。

**水心居** 在上花园。万历间，邑人郑杞、郑谦同建。汪浩《志》。

**和鹤居** 在南门内。明徐藿心书舍。汪浩《志》。

**文石居** 在清湖。邑人毛应思建。汪浩《志》。

**濠上居** 在宝日桥左。明邑人郑德城建。汪浩《志》。

〔国朝陶之纲《题濠上居赠郑二雨植》诗〕好寄庄生达，长吟爱尔闲。夜蟾斜照水，晴旭远衔山。茗椀花间出，巾车竹里扳。不妨频过语，迟我听潺湲。

**高士居** 旧志不载。疑为周文兴故居。文兴致仕后，胡宗宪表其里为高士坊，或因以名其居也。宋成綏《志》。

〔国朝蒋际元《题高士居》诗〕烟萝兴好宦情疏，奕世犹传高士居。自有雄文惊日月，不妨大道寄樵渔。归来身世盈尊酒，老去行藏压架书。惆怅芳徽谁得似，软红尘里早悬车。

**石门别墅** 旧志不载。疑即夹溪草堂。宋成綏《志》。

〔明毛恺《石门别墅》诗〕石门俯幽深，迤迤旷周旋。两溪从东来，中有五亩园。诛茅庐其间，时挹肥遁贤。在御有琴瑟，披阅足简编。暮云景云媚，微颺扇和暄。平芜涨新绿，弱柳吹香绵。良朋亦萃止，被服恒新鲜。濯纓清流沚，振履崇邱巔。

**眠牛石** 在大陈村。其石横欹岭右，形似双牛对卧，四面有石栏围之。

〔国朝汪日丙《眠牛石》诗〕幻出双牛质宛然，路旁蜷卧已多年。曾谁说法看头点，可有要盟把耳牵。月出清宵休喘息，春生绿野任安眠。前身应历耕耘苦，天使高栖百尺巔。

**景星塔** 在县治南。明知县余一龙建。天启《志》。道光年间，邑人重修。

**百枯塔** 在县北水口山。明知县余一龙建。天启《志》。道

光二十六年，知县李玉典重建。

〔明徐霏《百祐塔碑记》〕我邑虽僻陋，而山水颇胜，结根自西南，逶迤数百里，至须川乃胎息焉。遂建为县治。南有景峰突起，若宝主然。乃于兹山建塔以标之。须之水自西来，回旋于县之东北，故水清而驶，号为文水，游人恣玩焉。惟北无水口为障，乃于县之十里两山夹处造一塔，于上望之，如莲花浮于水中，荡漾可爱。自有此县，即有此塔，不可一日无焉者也。近来二塔俱坏，而北塔则上侧旁穿，其坏尤甚。故尹兹土者往往不利，士子二十年无科第，人皆咎之。生员何应龙等以是告于本学文谷公，偕谒我侯见田。翁曰：天时人事，相符者也。今官敝而士蹶如此，岂皆庸琐齷齪不自振拔矣乎？或者南北二塔坏，火焚而水泄故也。夫火焚则木燔，水泄则精竭，文明之象渐矣。我侯蹶然而起曰：余之责也。乃毅然首倡，诸大夫从而和之，卜日鸠土，二塔并举，期月告成。南北遥望，如车两轮，改曰百祐，名实相应。是年秋，生员果中乡试，又明年，我侯征书交至，佾告余曰：塔之有征如此哉，我侯之功也，不可以无记。遂书其事，以镌于石。

〔附：汪浩《水口山记》〕江邑山高水驶，水经城东门北去，飞流约十里许。抵百祐，山东西对峙，如门户然。前人犹虑其山之未极峭峻也，建双塔以锁之，诚欲其纾缓停蓄，为一邑福。有山民周善长者，利其石可为灰，招工匠建窑厂，不数月而山势减。邑人士群吁请禁。余因与诸生谋曰：百祐山为一邑水口固已，而山则周山也。彼小人惟知利己，遑恤其他，一旦以彼显然之利，谕以一邑隐然之福而止之，彼则何知？且彼仰事俯育，幸生活之有计，而以法夺之，有所不忍，而异日偷掘之患，亦难尽息。诸生为一邑计，盍出重价购之。诸生曰善。于是周生三宅等贖资十二金，善长亦欣然出契。山既有禁，课无从办，因公议立户曰公山，附于衿图之前，岁扣通学廩粮约一钱，以完国赋。廩粮虽非公物，然亦一邑流传，无有定主，庶几公山与水口俱长云。公议水口山，户名江公山，计山十三亩，每亩该税六厘六毫，共该纳税八分。

**凝秀塔** 与百祐相对，高九层，尤为耸伟。万历三十一年，知县堵维垣建。又造塔庵十二间，邑士民蔡维范、徐允亨、王大统、王立、徐实等建。天启《志》。道光二十六年，知县李玉典重建。

〔明徐可求《凝秀塔记》〕余同年进士太冲堵侯来为令，问疾苦，拊饥寒，剔奸蠹，清赋刑，庶务丕整，百废爰举。升墟而望东北之阙，鹿溪注焉。旧塔孤锐，法宜雄置，并控捍门。询诸耆艾，金谋允谐，諏诸筮人，策兆献良，乃辨土物，课工徒，逾年造讫。集宾佐觴之，既登四瞻，五宿聚垣，华表双峙，山若增而高，水若浚而深。其方于卦值艮，于垣属天市，于气为六秀，因名之曰凝秀塔。盖高明之气，其蓄泄也。以时博厚之气，其蓄泄也。以理理者，山川之脉络得其理，斯得其秀，是生明智贤杰，佐皇家为世用，理气凝而呈为秀矣。用伐石镌功于塔山之麓。

〔李玉典《重建双塔碑记》〕须江，三衢剧邑也。距城北十里有双塔焉。东曰百祐，西曰凝秀。双尖夹峙，高出云表，若捍门然。汇南石鼓仙霞、东瓯源玉源、西湖塘白马泉诸水，曲折沿缘，直趋城东，而交汇于是。据箬坝之上游，作瞿塘之一束。文水滢洄，财源斗锁，所系非浅鲜也。详考邑乘，西塔创始于万历末年，邑令堵公置。而东塔则不详何自起，其载于志书者，隆庆元年知县余公重修，并云自有此县即有此塔。似宋移置县治，当即创建。原名无可考。其曰百祐者，则自余公重修后改易今名也，迄今凡二百余年矣。乃事势靡常，星霜递更，剥蚀日甚。西塔于道光甲午陡然倾颓，东塔则不知圯于何时。询之故老，无有能言其故者，大约不离百年者近是。夫山川不改，人物顿非，合前后参观之，甲第科名，昔之日何其盛，上下二三百年间，流风余韵，何忽焉遽衰？有志者按其舆图，览其风土，不胜有兴颓举废之思焉。岁乙巳，予来摄邑篆，公余与绅士谈及，咸欣然欲兴复旧规。爰于丙午春，倡议劝捐，并得公款二千金，为之嚆矢。经始于是年三月，迄丁未冬嘉平月，而二塔告竣。址仍其旧，而象取其新。计共去钱一万贯有奇，工坚料实，用省计周，隆隆然、兀兀然，遂成一县矩观。其一切经费度支，另刊一册，以信今而传后，兹不赘入，从简约也。名仍百祐、凝秀，亦不忘其所自云。

〔刘侃抵《百祐塔》诗〕峻嶒踰水起，塔势镇寒郊。绝顶簪斜树，危窗带弃巢。葭边潭影散，石外浪声敲。薄暮收帆处，间云尚恋坳。〔又《舟过凝秀山下》诗〕峭壁撑青嶂，斜阳荡水滨。涡旋圆髻晕，石皱乱麻皴。空穴时成响，饥鸥不避人。近山先堊暗，惆怅闷松筠。

〔徐庚瑞《百祐塔落成》诗〕我邑山川秀色明，重营百祐告功成。潺潺须水牢关锁，指顾争题雁塔名。旧址重番起七层，焕新气象倍峻增。江城对峙撑门户，合作云梯约共登。

〔郑调元和诗〕环城水秀更山明，有志果然事竟成。即看捍门撑半壁，好仍百祐署前名。浮图七级耸层层，舍旧谋新气象增。关锁财源全赖是，胜他年谷话丰登。

〔郑赞元和诗〕旧基依样认分明，百祐重题已告成。忽报抡元欣有兆，始知此举利科名。隔水遥瞻最上层，俯涵波影亦峻增。昂头已近青云路，奋翮何人快早登。

〔王郁堂《双塔落成》诗〕塔造自宋迹已古，塔修于今溯余堵。地灵人杰双管诩，久不见此幸复睹。有基可凭事易举，工竣丁未始丙午。七层九层仿前矩，城北十里水之浒。对峙东西若宾主，西曰凝秀东百祐。正直其身异病痿，玲珑其心启愚鲁。其脚樵者莫砺斧，其顶猎者莫试羽。为须锁钥捍门户，为须华表耀行旅，为须荣戟会主组，石旗南现塔延伫。帆笏北来塔招取，步蟾作梯青云侣。钓鳌作竿红日照，霞散绮时塔作杼。虹垂桥处塔作柱，岫鬣塔簪风鸾舞。波镜塔涵蛟龙伍，不号浮图困最巨。不藏舍利利最普，百倍其功神凝聚。天地人合祐秀府，塔铃琅琅风吞吐，闻得塔语如是语。

〔郑恒年《舟过双塔》诗〕忽过笠嘉渡，风来语远铃。天空飞鸟下，潭静蛰龙腥。作镇撑双阙，成功届十星。人文今兆启，长啸问山灵。

**俞嘉塔** 县东北三十里。万历十九年，知县张斗建。邑士民王立、徐世卿、叶臣等捐贖。塔与百祐、凝秀鼎立为邑关锁。今圯。天启《志》。

**华山塔** 在长台华山头。今圯。

**凤林塔** 在凤林水口。天启《志》。

**雅儒塔** 在雅儒水口。今圯。

**清漾塔** 在清漾对案。天启《志》。

**秀峰塔** 在二十一都。秀峰人建。今圯。

骑马尖塔 在东序。长台人建。今圯。

下睦塔 镇安人建。今圯。

镇松塔 在长台金榜山。今圯。

崑峰塔 在三十都柴村。旧志失载。

义塔 在北门外旧养济院基。近设以瘞无主骸骨。汪浩《志》。

## 拾遗志二

### 冢 墓

何王墓〔《府志》〕在礼贤镇。不知何代人，或侵掘，则暴风疾雨随作，人颇异之。

赵王墓〔《府志》〕亦不知何代人。在县东北一十里龙眼山下。

葛王墓〔天启《府志》〕在县西三十五里。不知何代人。旧有碑，田夫斲为磨，一日，雷震碎之。有取花砖者，雷复震。今莫敢动。

### 唐

祝钦明墓〔天启《志》〕在石魁潭。其地多祝姓，相传钦明葬此。又云道成乡相亭寺旧有碑存。

祝奢墓〔《浙江通志》〕在景星山下。武德九年，封妻陈氏为怀德县君，诏合葬。

衢州刺史周美墓〔天启《府志》〕在江郎山下留春坞。

### 宋

乐清令周颖墓〔《府志》〕在五里原。

王忠献公墓〔朱彩《志》〕在县东北崇善乡严讷。公姓王，失其名，世居汴梁，典禁旅金枪班。留守宗泽辟参议军机。建炎初，金人入滑，往援有功，累迁至枢密副使。金人攻扬州，留殿扼江渚，被执不屈，遂遇害。子撰时年十六，寻父尸于野，又庐其旁。事闻，乃录为官，迁公柩葬于此。

知县叶端墓〔天启《志》〕在县后大樟树下。案：今在署后园。

孝子王撰墓〔天启《志》〕在上花园。

逸平先生徐存墓〔《府志》〕在南塘景星乡。明知县黄纶访得之，立碑曰：宋大儒徐逸平先生墓。又访裔孙成章，才周岁，令守祠，仍置田六亩，以供祭祀。

〔明黄纶《徐逸平先生墓碑记》〕于维先生学有渊源，蚤与罗从彦诸君子同学于龟山杨公之门，则伊洛传心之统，惟先生得其传矣。学成而归，讲道于家，从学者至千余人。朱子屡拜其庐，每有所请，先生告以克己归仁、知言养气之说。初若未达，久而后悟。又谓放心之解，得力于先生为多。则先生之心，殆深契于文公之心矣。先生隐居山林，深藏不仕。时相秦桧欲识之，竟不可得。则其所立之高，殆若凤凰之翔于千仞矣。先生所著，有《六经讲义》、《中庸论》、《孟解》等书，惜乎不传。而托诸邑乘者，仅有《潜心室》一铭。今诵其铭，而究其蕴，则先生心洁而道尊，行纯而德立，真一代之真儒、百世之师范，岂特江阳之前哲与两浙之仪型而已！纶以疏慵来令兹邑，首拓厥祠，继表厥墓，所以追尚先生者不敢不尽其心焉。然先生之心流行于天地之间而未泯者，则固不以是为有所加也。酌清湖之寒泉，荐南塘之芳藻，用表此心之诚，求格先生之心而已矣。

〔汪浩《徐逸平先生墓勘案》〕康熙五十年，勘得先贤徐逸平先生墓在雉鸟渊，计税五亩。国初，嗣绝，有裔甥王云从承祀，办粮至诚。则云从之侄也，以盗砍具控到案。经本县亲丈其来龙，右盗墓二穴，姑念无碍，免其起迁，砍木二株，亦免深求，合将所丈弓口开明立案。今后樵苏必禁，敢有肆其剪伐者，必引三尺从之。计开来龙岭从逸平先生坟园四十二弓，直至岭上有二树为界，岭左十弓，岭右十四弓，周围一百六十弓。

〔国朝杨奏瑟《谒徐逸平先生墓》诗〕路缘重岭上，西去即南塘。断碣风霜

蚀，空山草木香。渊源寻洛水，著述老江阳。徙倚松楸晚，临行拜斧堂。

少师祝常墓〔天启《志》〕在溪滩。

江山丞郑极墓〔朱彩《志》〕在县北青霄桥。

殿中侍御史柴瑾墓〔天启《府志》〕在毛村石壁寺后。

刑部侍郎徐复殷墓〔《府志》〕在九都出青山内。翰涣之孙，正节公应鏞之祖也。

刑部侍郎周自强墓〔天启《府志》〕在礼贤镇圆觉庵。敕葬。

国史编修柴望墓〔天启《志》〕在长台高斋。案：高斋为国史读书处，其山即名高斋。

〔元苏幼安《国史秋堂柴公墓志铭》〕公姓柴氏，讳望，字仲山，号秋堂。其先卫人，始祖承事公仲紧避五代之难，徙居江山。四代祖讳元瞻，以孝廉著称，辟于朝。先从祖司封公天锡与弟天因同年进士，能以风节立朝，不附权贵。嗣后，太史公禹声、待制公中行、侍御公瑾、大理公卫、承务公复，皆以理学政事，伯仲后先，柴氏盖奕奕有声矣。承务公生朝奉公伯之，朝奉公生迪功公可用。迪功公生秋堂公。公生而颖异，五岁诵诗书，辄不忘。甫成童，博通经史，诸子百家，无不研究。方闭户力学，而篇什传播，流遍江左，咸推为天下士矣。理宗嘉熙间，为太学上舍，除中书省奏名。淳祐六年丙午，元旦日食，诏求中外直言。公素明象数，每夜占星斗，时复惨怛，悲歌慷慨，左右莫知其所为也。及闻诏，乃撰《丙丁龟鉴》一十卷，起周威烈王五十二年丙午，止后汉高祖天福十二年丁未，上下通一千二百六十年，为丙午、丁未二十有一，数其吉凶祸福于前，指其治乱得失于后。正月书成上进，忤时相意，诏下府狱逮诘，几不免。时，大尹尚书节斋赵公，上疏言柴望忠诚恳切，所述根据史传，未可重以为愆，得旨，放归田里。京师之人谓公谗论不容，无不叹息。公不以得失介意，既抵家，和渊明归去来辞以自遣。隐长台之高斋，有楼匾曰奇气，厅曰百客。宾友至，则相与啸傲物外。就之游者，褒其神采，飘飘起驭风之想。公性至孝，早丧父，太夫人毛氏孀节，授公学业。公在太学时，虽晨游结驷，无一夕不问安否。解职后，益加虔谨，于所居重构堂曰瑞萱堂，承欢甘旨，务竭其衷。居丧，哀毁成疾，蔬食庐墓，块然骨立。公家居，声名藉甚，当涂屡荐

之。景炎二年，端宗登极，三山孔大谏举奏，荐公以布衣直疏前殿，特旨授迪功郎、史馆国史编校，屡进疏论。是时，颠覆盖甚，忠志不遂，郁郁成疾，遂归山中。及宋亡，元朝物色旧臣。公杜门谢客，独卧一榻，而感慨激烈，每于吟咏间见之。其即事诗曰：翠华海上知何似，白首山中空自惊。又书感曰：堂前旧燕归何处？花外啼鹃月几更？其悽惋忠愤，读之可为下泪。公从弟通判随亨、制参元亨、察推元彪，俱宋旧臣，与公同志，遁迹不仕二姓，赓咏于烟露之间，耸动江湖，称柴氏四隐云。公生于宋嘉定五年壬申，卒于至元十七年庚辰，年六十有九，葬高斋之寄气楼下，即公所居也。公娶王氏，生一子希浚，为宋太学生，今不仕。

大理寺正柴卫墓〔朱彩《志》〕在云母山。今宝莲庵。

武略将军赵善孚墓〔旧《浙江通志》〕在县九都峰下。

进士柴随亨墓〔天启《志》〕在擇林九磔口。

〔明李遂《宋建昌郡大夫柴公墓碑记》〕往余守衢，以志籍多缺，而文献之靡征也。则尝博稽故实，收葺散佚，以为郡乘。虽简编未就，然一方之士，余盖得以尚论而近友之矣。其在宋有四柴者，建昌公其一也。公家学有承，筮仕不苟，登宝祐四年进士，知建昌军事，守己爱民，时称循吏。而仕当革命之际，乃与其兄国史望、弟制参元亨、察推元彪，俱隐于擇林九磔之间。盖知时事已去，不欲禄仕，人称柴氏四隐云。既而元物色旧臣，公自以宋室遗黎，耻事二姓，并不应征辟，而感愤激烈，特于兄弟唱酬中见之。黍离麦秀，悠悠之怀，盖终其身不一日释。呜呼！士何不幸而遭遇若此耶？余读《宋史》，见其当国事流离之际，一时忠臣义士效命毕力，沉江溺海，曾不悔恨。盖虽时移事去，犹灭名遁世，恋恋旧君，故国之思，论者以为宋礼贤养士之报。果然，则感遇酬知，宜自要近。乃或奋起孤远，期于自靖，而偷生南甯，忍耻北面，顾平日尊贵宠势者，为之何感应之不类耶？盖君子之任也，以行君臣之义。是故或远或近，或死或不死，盖君有见于义无所逃，而分当自尽，而彼以为为利禄而效忠者，亦浅之乎知士矣。建昌公审己揆时，守贞遂志，识微于几先，而允蹈于事后，虽志节未彰，而亦文、谢之流亚也。是碑为李大司马襄敏笔，载《罗山集》中。《柴氏四隐集》亦载之。与旧志所载微有不同。今从李公原本。

柴蒙亨墓〔朱彩《志》〕在秀峰下南安寺。

毛铁砚先生墓〔宋成綏《志》〕在沙堤。

毛夫人詹氏墓〔叶水心文集〕：葬衢州江山县南台寺绿秀山。

〔宋叶适《毛夫人墓表》〕故朝奉郎知珍州毛楫妻孺人詹氏，从其子为秦司买马干官，卒葬衢州江山县南台寺绿秀山。是时，吴曦断东道自王，方平虑其国，忘其家，先其君，后其亲，以节闻天下。他年自庐山来永嘉渚上，请余为夫人表于墓。余曰：史有状，壤有铭，具矣。复欲何所道？且必言子骂贼，是自表也。方平泣诉曰：诚然，吾得大罪于母四本。以贫故急升斗禄尔，乃浮江纬湖上，一线之峡，遭狂贼僭乱，震动仓卒，留无计，去无从，是不择便近，地危其亲，罪一也。曦盗蜀，无假南士，不亟东下，益西寄孥议使者坐，纵口骂曦，激士大夫心，为贼囚守。虽曦自毙，蜀复完，而母以忧愤终，是不量官守高卑，于亲何益？罪二也。曦死用乏，方增赋佐诸费，吾数语有位，治叛国，当明顺逆，今籍阴通贼十数大家，资数千万，何不给而重敛？疲民皆张目缩舌，不敢应。吾因大怒，题绝印纸，不可纳考功，是不度事难易，妄发无已无益，毛氏之祭由是缺焉，罪三也。既失事耕庐山，追忆吾母，暑风清，冬日燥，或率软车，妇扶前，孙挽后，山巅可休，水澁可息，今不及游矣。刲一豚魁，剥一苳荚，妻子皆得饱，吾母不及享矣。古人以代耕之禄不及为亲恨，吾以代禄之耕不及为亲悲，罪四也。夫忠不获其上，谤郁于下；孝不全其亲，罪积于身，故揭书之，使过而读者，无不彰也。雨渍风裂，石苟未漫，吾罪犹未已也。所以戒天下为人子者焉，余谓君前事幸未至陷胸碎首，虽然亦烈丈夫矣，而其辞约，其义隐如此，是可表也。

县令何程墓〔宋成綏《志》〕在裴家突九龙山。

治中何郁墓〔宋成綏《志》〕在下西山岭下。

徐正节先生衣冠墓在保福寺。

案：先生全家殉节，诸仆为具棺，殓殡于西湖金牛僧舍。后十八年，其同舍生刘汝钧，率儒生五十余人，收而葬之方家峪，私谥正节先生。具载万历《杭州府志》。是先生忠骨已寤，钱塘邑墓相传为瘞先生衣冠处，故表而识之。

## 明

知县陈仲进墓〔旧志〕在窑山下。

孝子何伦墓旧《浙江通志》：在坟前山。

刑部尚书毛端简公墓〔天启《志》〕在景星山。赐葬。

〔明徐阶《毛端简公墓碑记》〕公讳恺，字达和，别号介川。嘉靖辛卯，领乡荐；乙未，举进士。授行人，奉使肃藩，尽却其馈。己亥，擢御史，疏忤执政，调宁国推官。壬寅，召拜南京营缮司主事，分司芜湖。历员外郎、郎中，皆在工部。甲辰，改刑部。己酉，出知瑞州。辛亥，调宁国。甲寅，补莱州，迁山东按察副使。居三年，迁江西右参政。又三年，迁河南按察使，转右布政。辛酉，迁都察院右金都御史，巡抚保定，提督紫荆诸关。岁饥，为视赋缓急，次第征之，而尽罢诸役之无名者，凡活万余人。关故临边，严兵守诸要害，边事以宁。壬戌，迁右副都御史，总督漕运，巡抚凤阳。逾年，迁刑部右侍郎。寻改吏部。丙寅，迁南礼部尚书，复改吏部。穆宗即位，召为刑部尚书。道得脾疾，疏乞致仕，诏不允。戊寅夏，公始至，首请以中官之干纪者付法司，又奏释滞囚，辨雪其冤抑，风采凛然。己巳，疾复作，会有所不乐，连疏乞去，诏乘传归。公素癯，又纳于言，然操履严洁，不可以毫发犯。其断大事，排大奸，即鼎镬在前，不少挠屈。常曰：“吾行事，求谦于心。心所不安，虽死亦不敢为也。”故公自少至壮，以至于老，自谓未尝有一愧心之事。海内士大夫，闻而信之。其去位也，莫不顿足以惜云。

广东布政使徐霈墓〔天启《志》〕在上溪。

博士周亚卿墓〔天启《志》〕在梅泉。

副史郑骝墓〔天启《志》〕在十二都钟山。

孝子璩伯彩墓〔天启《志》〕在茅坂。

太守姜瓚墓〔天启《志》〕在新塘边。今按：在广丰。

中书徐惟辑墓〔天启《志》〕在本里。

鸿胪卿周文兴墓〔天启《志》〕在樟村垅。

邵武通判郑忭墓〔天启《志》〕在百石。

藩相鲁应华墓〔天启《志》〕在纸塘。

太守毛允让墓〔天启《志》〕在观音堂。

柴白岩先生墓〔天启《志》〕在长台经堂山。

通判赵洙墓〔天启《志》〕在金家垅。

赠承德郎徐公鹤秋墓〔宋成綏《志》〕在陌山岭下。

〔明韩爌《徐公鹤秋墓碑》〕越中江邑，山水多奇，屡产高士。有封君鹤秋徐公者，系予己未所举进士日葵之父。公世系出自宋南渡。其先世县尉公，卜居江之南门。五世景符公，以科第显，历六叶，生璘，璘生以明，以明生公。公生而颖异，倜傥不羁。幼习举子业，弱冠勿售，因挟策外游，与名贤相问难。归试于郡。太守易霍冈公奇之，始补邑庠，声名藉甚。四方负笈从游者，不远数百里。公多方造就，庠俊半出其门。秋闱屡蹶，意殊不怍。壬子，主政领乡荐。己未，捷南宫，乃养高泉石。公性至孝谊，笃友于，好施予，事叔以道，兄九龄生死无缺，视侄犹子，终始无二。与知识往来，虽倾困倒囊无难色。里中少年辈，微有善行，奖借不遑，稍匪彝即面斥，不少假。行善不令人知，为人解纷排难，事定不自以为功。府县延乡宾，岁时存问，甚为上官敬礼。公讳九皋，字汝贤，号鹤秋。生于嘉靖壬子正月二十一日辰时，卒于泰昌元年十月初一日辰时，享年六十有九。以子主政，覃恩赠承德郎、刑部江西清吏司主事。葬陌山岭下龟山。盖公精于堪舆，素所自择云。

刑部郎徐日葵墓〔汪浩《志》〕在杨柳园。

御史何远墓〔宋成綏《志》〕在下西山岭下。

署江山县知县方节愍公墓〔汪浩《志》〕在景星山。案：山麓有碑，题曰：明忠臣节愍方公墓道。

〔国朝何茹连《秋晚谒方公墓》诗〕苍凉松桧几经秋，凭吊忠魂土一坏。商鼎有归天北顾，鲁戈难挽日西流。残碑苔蚀龟犹卧，华表烟深鹤自游。空对寒风思剑佩，萧萧落叶满荒丘。

〔郑瑞麟《谒方公墓》诗〕节愍方方令，杀身仁已成。天心常北顾，臣志独

南行。陇外清风冷，松间白日明。偶然逢野老，犹自说忠贞。

何宾峰先生墓〔宋成绥《志》〕在十六都磔上湖山底。

御史陆和墓在陆家漾。

知府周任墓在二十五都宝峰。

王府长史周积墓在山下高山寨。

右佥都御史赵镗墓有《墓志》，载《艺文》。

## 国朝

孝子朱尚聪墓在下仓。与妻孝妇徐合葬。

提督黄大谋墓在十四都毛沉后门。

提镇毛秉刚墓在上尖。

状元林天彪墓在景星山前。

状元黄瑞墓在洋广马头山。

探花林天洛墓在乎山油车坂。

副将林向荣墓在杨柳园水碓顶。

副将朱昭荣墓在二十三都华山头。

潮州府知府何茹连墓在西乡檀柚坞。与恭人王氏合葬。

工部郎黄遐年墓在墟岭。

漏泽园即义冢。在县南东岳冈。正德十四年，知县吴仲立。地窄不堪葬，嘉靖间，知县黄纶捐俸五两，买治民蔡泽山地，周围三百余丈，植以松柏，园以墙堦。今竖石门，额曰义冢。天启《志》。

城西义冢 在通贤门外，步鳌山目连洞下。乾隆丙子年，邑人王、何、毛、郑、徐五姓捐助，并置田租，立耕寸会，为每岁培土，并供孟兰之资。

峡口漏泽园 在三门坳。乾隆三十八年，绅士郑敬德、王永煌、柴曾镛、徐邦瑯等捐建，知县宋成绥复创捐置田，供输粮税。宋

成绥《志》。

〔宋成绥《峡口三门坳义冢碑记》〕古者四闾为族，使之相葬墓。大夫掌令，国民族葬，使皆有私地域而掩骼埋胔，更著于《月令》，凡所以恤民者至矣。其或违首丘之义，委骨异土，行有死人，尚或殓之，则所以济仁政之不及，亦在因地而为制耳。江邑峡口，侨寄浮于土著，往来甚夥。设有客死，殡诸道左，暴露可怜。绅士郑敬德等捐金，购三门坳山地为义冢，而徐邦瑯又捐己山之相近者廓之，因以告余，冀立石垂久。余谓：“久远之道，在厚其资。重其事，付得其人。”爰捐金倡众，益置田，供输粮税，即交山源总口新建周王庙住持经理，且与之约曰：凡彼客死，讵无子孙，鬼犹求食，馁亦可悯，既已立冢，必次第编字，标以石棺，书年月、籍贯、姓氏于和，更设一簿，详悉记载，以俟死者子孙识认迁葬。其无名不识者，别作一丛冢，庶无相混。每岁春秋，即令庙僧作佛事，施食焚楮，如此则残魄知归，穷魄得所。邑人士之仁风，更余于掩埋之外矣。至义冢亩分四至，及增置田土，即刊碑左，众姓捐金多寡，皆例得书，使后有所考。是为记。

## 拾遗志三

### 祥 异

宋淳化三年四月，甘露降。

至道元年，大有年。

咸平五年，饥。

绍兴十四年，大水。

二十四年，饥。

淳熙六年，夏霖雨，秋大水。

八年，饥。七月不雨，至十一月。

嘉定三年，大水，蠲赋。

八年春，旱，至于八月乃雨。

十年，饥，多盗，郡赈之。

十四年，大旱，蠹螭为灾。

十五年，久雨，江涨，害民舍。

元至元十三年，大旱，饥，斗米钱五贯。

十九年壬午，有寇患，学宫火。

二十二年，饥。

大德元年，大水。

泰定二年，饥。

至正十八年冬，雨，黑黍，草木皆花。

明建文三年六月，蝗。飞蝗自北来，食禾穗、竹木叶皆尽。《通志》作五年。

永乐十四年秋，大水。

正统七年八月，天雨雹。雹大如鸡卵，鸟巢、屋瓦皆碎，人亦中伤。后复大旱，人多饥死。

景泰五年，大雪。自正月至二月，凡四十二日。深六七尺，鸟兽俱毙。

成化 年，大旱，饥。〔宋成綏《志》〕作成化初。

九年夏，大水。舟可入市，坏民庐舍。

弘治元年，紫芝生。儒学明伦堂桂树侧，紫芝丛生，从此科第联登。是岁，城南徐氏得金鱼于烟萝泉，畜之沼数年，黑云俄起，池水尽裂，有物苍鳞赤鬣，若麒麟然，腾空而去。

三年夏，霖雨。江水骤涨，冲坏田庐甚众。

十年，城市火。

十一年，大旱。鹿溪潭尽涸，见大石有“戊午天大旱”五字。

十二年，大水。坏田庐，视成化时尤甚。

十八年，火。九月十三夜，地震。大火焚庐舍殆尽，震处地生白毛。

正德二年，江郎山旗见。先是弘治间，赤旗再见，姜瓖、周任相继第进士。至是，黑旗又现，周文兴以书魁浙省，明年登第，邑人屢以为验。

三年，大饥。饿者载道。

四年，大饥，雨黑子。形与山中视子同。父老云：正统间，有此异，地方不宁者，凡三年。后桃源寇变，居民罹难，盖先兆云。

九年冬，大雪。连日纷下，寒冻极甚，林木俱瘁，有经春不生长者。〔宋成綏《志》〕作八年。

十五年六月，大水。宝陀岩屣出，楼虎皆漂坏，与三清山屣出同日。开化亦然。

嘉靖三年，旱，大饥。〔宋成綏《志》〕斗米一钱五分。

五年，大旱，飞蝗蔽天。

八年五月，大水。坏田庐，漂溺甚众。八月十一日，雨雪。

九年四月初五日，雨雹。大如鸡卵，林木皆秃，牛马有死者。秋旱，岁大饥。

十八年夏，霪雨。秋，旱。自四月霪雨至六月，大水坏田舍，漂溺人畜甚众。自六月至八月，旱，竹木皆枯，人多疫死。

十九年，蝗。

二十一年六月，蝗为灾。六月二十四日，有蝗蝻自北来，食禾粟殆尽。是时，飞盖天日。有司令民捕之。至七月初四日，方散。

二十三年四月至七月，不雨，民饥。

三十九年夏五月、六月，不雨。

四十年，大水，饥。知府杨准请赈。

四十一年夏五月，大水。知府李遂请赈。

四十二年春，霪雨，雨止即旱。

万历元年霜降日，雷电大作。

三年五月至七月，不雨。米价涌贵。

七年，虫食禾苗。东南乡尤甚。

九年，虎乱。东近括苍界多虎，内一虎有鬣，状如马，啮人甚众。知县易做之募人捕获，剖其腹，指甲盈升。

十年，大水。推官胡准出赈。

十六年，大旱，疫。

十七年，大旱。饥民载道，知县张斗赈之。

二十二年春，大风拔木。夏，大水。

二十三年春，大雪。惊蛰尤甚，风聚处，积深盈丈。虎至郭外。夏，大水。五月，旱。八月，大火。先是，元旦三日，居民拾得一钱，四面火字相向，中皆殊色。八月二十三日，自雅儒坊延烧百余家。时，讹传次月十九日当复发。是日，果复延烧，凡二十余家。自是，城西隅一日火三四发，太守岳万阶至邑，设祭，投前火钱于通明巷井内始安。是年为五异。

二十六年夏，大旱。斗米价二钱。知县蒋光彦立法于市乡，煮粥救饥。

二十七年夏，大旱。

二十九年八月，江郎山灾。是月二十七日，见中石之巔，微烟渐起，向晚纤雨，雨后闻雷击声，火势烛天，光映数十里，七昼夜不绝。烬余，古柏木从巔坠下，其香扑鼻。是年，矿监委官搜掘土青，一邑骚然。

三十二年秋，日中飞絮，疫作。俗名羊毛瘟，市乡死者甚众。

三十三年十一月初九夜，地震。

三十四年，大疫。

三十六年，旱。

三十七年，复旱。

四十年，大有。是年，县治内，翠柏开丹花，甚盛。

四十二年夏，九都出青山裂。压田数百亩。时有樵采者，忽移置隔陇前山。

四十三年，旱。

四十五年春，大雪。

四十七年二月，芝生簧宫。时，复有鹤飞入城中，栖灵宝经堂柏树上，三日乃去。

泰昌元年冬，木冰。乳枝俱折。

天启元年夏，十九都地陷。秋，旱，民饥。

三年春，城东隅地陷。陷广丈余，水震荡，碧色。夏四月，大水。

九清桥坏。

崇祯八年，大水。各乡同日出廛，漂没田庐。

十三年，大饥。知府张文达出赈。

十五年，步鳌山石崩，声如雷。占谓兵兴之兆。是年，廿七都闽人种旋者揭竿起，屠戮张村、石门、清湖等处。兵道檄知府张文达督金华游击讨平之。嗣后，土寇窃发无虚日矣。

十六年，旱。

国朝顺治三年，大旱。斗米八钱，人采木皮、土粉充饥。

四年，大旱，饥。

五年，闽寇魏福贤乱。福贤啸聚，亡命出没三省，结连九仙山。寇首杨文所在焚劫，田地荒芜。至十四年，三省会剿，始平。丁壮死徙殆尽，往往乡行竟日，绝无人烟。

六年，西乡虎为患。时有合村餐食无余者。

七年，西乡虎复为患。

八年，旱。斗米五钱，民多饥死。

十一年，旱。斗米三钱，复遭寇乱，饥窘为甚。

十二年夏，大水。秋，大旱。

十三年，西乡虎患。在西乡毛塘，一路二三十里间，白日食人。近山田地荒芜。

十五年，东乡虎患。猎户以弩射杀，抠出指甲数升。又东岳庙前石栏压毙一虎。凡六年，患除。

十六年，大水。

康熙二年，大水，坏田庐。

四年六月，大风雹。

五年，旱。

七年秋，大风，移木毁屋。

十年，大旱，蝗。禾苗尽稿，蝗食殆尽，民往数百里外负米糊口，死者甚众。

十三年，闽逆耿精忠叛，突至江山。时，男妇逃窜，贼兵四出搜劫，盘踞三载，难民避入深山，死无算。十五年八月，王师进剿，残黎欢呼载道，焚香迎请入城，共庆更生。自是始见天日。

十七年，大旱。

二十年，大旱。三月，暴风发。风自西来，雷雨大作，倒压房屋甚众。四月十六日未时，大风雨。其风骤起，大雨如注，满城房屋撼动，倒坏无数，压死人民。

二十二年，正月雨至四月。二麦尽烂，米价涌贵。

二十五年夏闰四月，大水。舟通城市，桥梁尽圯，田庐漂没，死者甚众。

二十九年，大冻。溪水合，草木尽殒。

三十三年秋，螟灾。

三十五年四月至五月，不雨。禾苗不得插。

三十六年夏秋，大旱，无禾。八月，雨雪。菽麦尽死，民采蕨以充饥。

三十八年八月，大水冲没田地。

三十九年秋，旱，大饥。

四十二年，旱。

四十三年，旱。

四十六年，旱。

四十七年四月初七日，雷震，步鳌山石笋折。七月十一夜，大水坏庐墓。

五十一年秋，虫食柏子尽。

五十二年六月，大旱，至十月乃雨。以上俱仍〔汪浩《志》〕。〔宋成

续《志》无续增

乾隆五十五年冬十二月，大雪木冰。枝断树折，坏屋伤人。

五十九年夏，无麦。冬十有二月，大雷电，雨雹。

六十年夏，大水。五月二十一日，狂雨经昼夜，山水暴涨，坏田地、桥梁、庐舍，淹毙人畜。

嘉庆四年夏，无麦，大旱。

五年夏，无麦，大水。

七年夏，大旱，饥。城乡绅富捐米设厂平糶，共一百余所。邑宰闻于巡抚阮书“义辅常平”字旌其门者十家，由藩宪给额以奖者十三家。

八年春，饥。穷民食草根树皮，绅富各捐贖、运米平糶。夏，麦大熟。

十三年六月，大雷雨，暴风。

十四年，立夏前三日，雨雪。禾苗尽萎。

十五年夏，麦大熟。秋，大有年。以上俱见学博蔡英《东轩遗集》。

道光三年夏，大水。

四年春，紫芝生黉宫。谕、训两署丛生非一，占者以为科名将盛之兆。

九年秋，江郎山火。七月十三日申刻，迅雷下震，俄顷火发，延烧两昼夜，十里外昏夜如白昼。

十三年，大水，饥。

十四年，大饥。秋，有年。

十五年夏，大旱。自四月不雨，至八月乃雨。田禾尽稿，民苦饥馑，绅富捐贖，设厂赈饥。岁虽大歉，民得安全。详经请旨，给奖有差。

十六年秋，大有年。

十七年，麦大熟。秋，又大获。

十九年六月，闻天鼓鸣。

二十一年十一月，茅木成冰。

咸丰二年,芝生六茎。产县治内,知县沈维祺谓灵芝有科名之兆。是岁,捷秋试者二人。三年夏,大水,饥。

六年秋,有虎患,岁大熟。

七年,麦大熟。

八年正月,竹实。城中竹尽结实,占者谓不吉。至三月,粤匪陷城。

九年六月,雨毛。

十年八月,西山白羊成群,倏不见。

十一年十二月,冰,河水尽合。

同治二年,大疫,饥。

三年,大疫。

五年夏,大旱。

六年夏,江郎山鸣。

## 拾遗志四

### 丛 谈

江山，旧名须江。唐昭宗乾宁元年，隶镇东军。后为吴越所据。宋太平兴国三年，钱氏纳土，罢镇东军，始有江山之名。汪浩《志》。

江山县，旧久无城，议立辄不果。有叩仙者，示云：“江山县欲城，直待金龙兴。”后知县余一龙至，城之。盖合余之姓名也。《涌幢小品》。案：汪浩《志》云：明嘉靖间，邑侯余公一龙始创为城。畚土时，得古钱一枚，有“金龙”二字，其文实应公之姓名。先是，民谣曰：“若要玉叶开，除非金龙来。”谓此地乃玉叶形也。叶或作匝。

余一龙为江山令，郊行，见妇哭夫于墓而不哀，有男子从。召问：“若与彼何亲？”曰：“妇夫友也。”廉其邻里，妇故淫，夫暴死，家无期功亲。收妇系狱。阴语狱卒：“来视妇者告我。”前男子频致其私。狱卒以告，执讯，吐实。邑称神明。宋成绥《志》。

三衢毛泽民以荐者召对，上问：“卿所居江郎山，高可几许？”泽民姑大言曰：“五千丈。”上问：“何以验之？”毛对曰：“臣日斜视景。”上喜其捷。《四朝闻见录》。

丙午、丁未，从古以为厄岁，阴阳家云：“丙、丁属火，遇午、未而盛，故阴极必战，亢而有悔也。”宋理宗淳祐中，柴望所上《丙丁龟鉴》十卷，自秦庄襄王五十二年丙午，迄后汉天福十二年丁未，通一千二百六十载，中为丙午、丁未者二十有一，备摭事实，系以论断。元至正中，又有续《丙丁龟鉴》者，补宋、元事之缺，前人已有此书。当考据故明三百年丙丁事，应以续二书之后。《池北偶谈》。

明周颐，字养浩，会稽人。英庙改元，迁福建左布政使，开江山浦城道。至今称便。《两浙名贤录》。

周文兴夙讲理学，而兼通摄养，能百日不食。试以木椎击颅骨，不作痛楚。嘉靖三十九年，寿八十二矣。偶微疾，预知死期，以刺遍别所知，而后属纊，归葬江山。群公为肖像故寓，祠之。《分省人物考》。

毛恺事母至孝。亲疾，辄泣祷，弗解衣。母卒衢城，几无为殓。瑞郡僚属远道驰奠，悉反贖金。有孝过黔娄廉方伯起之誉云。《万姓统谱》。

毛开，字平仲，礼部尚书友之子，仕止州倅。与尤遂初相友善，临终以书别之，嘱以志墓。尤既为铭，又序其集。《书录解题》。

按：开有《樵隐集》十五卷、词一卷。

仙霞入闽，良为要途。然汉代闽越由会稽海道而进，吴越取福州，自温州越海而南。元人入闽，多自明州济师。国初，平闽寇，一自江西出于闽，一自明州泛海竟掩福州，实未尝由仙霞也。夫用间道者多功，自昔然矣。《方舆纪要》。

今人度仙霞者，必乘竹兜子。淮南王安谏击闽越，书舆轿而逾岭。则知竹兜之制，汉已有之矣。今仕者乘轿，古无是制。轿字亦始见于此。《闽小纪》。

过窑岭以往，一岭一庙，皆祀关帝，独五显岭祀五显。山僧施

茶结客，多吾乡人，操土音慰劳。绵亘百里中，并无摩崖镌刻，以迄题名纪游之迹，是所慨也。然飞湍峭壁，近接几席；密树深篁，绿上衣带；奇花异卉，飞盖扶轮。日在尘嚣，乃知此境之幽邈。《榕城诗话》。

过霞岭，有廿八都。见邮舍壁上题记，其一联云：一官已脱鼯鼯穴，九度空过虎豹关。末署西湖十九松处士。意必陈倅世增也。宋成经《志》。

康熙十三年三月二十九日，福建耿精忠反，报闻。四月初三日，檄发本标中军副将王廷梅统领劲兵一千名，先赴衢州堵御仙霞关。初七、初十等日，赏赉官兵，勉以大义，命将至江山县援剿。十五年八月十七日，衢州大溪滩大捷，伪将军马九玉方遁衢为垒，我兵乘夜走出其后，直破大溪，此江山一师也。比其退奔仙霞，而三关已为我据，此常山一师也。程光祜《李文襄公年谱》。

康熙十三年四月初六日，据署江山县事县丞徐兆熊报称，据解流犯快手亲见，遣牌浦城开路，备牛十只，猪四十口，稻五十石，柴炭、鸡、鹅、酒伺候开路，至枫岭地方止。十一日，又据中军副将报，逆藩头站于本月初七日到廿八都，马千总封总兵官进去逆接，连夜赶出，驻扎峡口。杨把总带兵驻扎江郎街，里面进去不得，请星飞堵御。七月初五日，又据把总马伏秀报称，前往江山，一路侦探，至航埠河东一带，见逆贼拨兵在大路下帐房三十二顶，周围橘园，帐房皂旗甚多；河西有黄心皂旗八捍，红日皂旗不计其数。从江山间道乌石山出来，络绎不绝，乡民口称约有万余，四处催取粮草。又据小南门外探兵报称，自江山出来火器贼兵无数，至石门街下营，贼以全力聚札清湖，日窥侵犯。仙霞关，地当浙闽分界，系进闽咽喉，第一险隘。自恢复江山县之后，官兵直抵关口，分路夹攻。逆贼见我兵威重大，于本年八月二十日，有伪副将金应虎等二员、

伪千总金起彪等二员，首先投诚。我官兵随即四面齐进，于二十一日连夺三关。李文襄公奏疏。

查仙霞、龙泉、庆元、泰顺、分水关各处，皆山溪错杂，有险可据。我兵扼守，必择其两旁石壁中惟一路可通之所，两边垒石，恃为门户，埋兵设伏，中空一道，惟用多藏炮火。逆贼虽众，限于山路窄狭，势必不能参挤而前，俟其一至，火炮齐发，贼必少退。乘其步骤已乱，出兵奋击，不可乘胜远追，即回据原处。此时，火炮药弹又可装就，如贼再至，又如前法击之，贼锋必挫，自不敢侵突矣。更恐贼从两旁山顶突然而至，势不可禦，必于两边高处设鸟枪礮石，伏兵侦望，毋分风雨昼夜。一有侵犯，枪石自上而下，一可杀百。此正据险设奇，以少胜众、相机进止之要策。康熙十三年四月十五日，贼兵突犯清湖，攻逼江山。该副将王廷梅星驰赴援，千总高禄、陈国任、薛受益渡水奋击，闽寇大败，陈获马匹刀枪等件，贼随退回。十七年八月，檄选能员，前赴仙霞关、江山、凤林各处，确勘通达贼营要隘处所，多拨精兵扼守。如有贼徒宵遁，即便尾追，尽行剿杀。倘遇形踪诡秘之徒，严行盘诘拿究，仍差精细兵目，远侦确探，凡有情形，不时飞报，以凭调度。《别录》。

宋，县南峡口市山下祝大郎，富而不仁，斗斛权衡不一。乾道八年七月，有道人过其门，戒曰：“汝宜用心平等，如是必有灾。”一夕，梦二青衣来言：“汝家所用斗秤安在？”梦中与之。既觉，寻之已失矣。因忆道人语，为灾者火也，即尽徙室中之藏于山上。方稍定，地忽水涌，屋宇、钱帛，随流而下，所居冲旋为潭，家人尽死，独一小儿与一婢在山巅仅免。今呼为祝家潭。汪浩《志》。

璩源寺旁有龙湫。岁旱，僧法谨忽见白衣老人，谓曰：“翼午当雨。”且曰：“吾居此湫。”逮午，果大雨。湫旁，古木巉石，有大蟒，见则旱，祷雨辄应。政和中，县令苗仲先请于朝，立庙。宣德间，赐额

嘉泽寺。有铜钟二，甚巨。耿逆乱后，僧欲卖钟，柴自挺力阻得存。汪浩《志》。

明，程谦以小花浚峻石峻嶒，木簾经之，岁多溺，募工凿为通港，往来便之。汪浩《志》。

崧高柴汝招商于鲁之沂州，旅居四十余载，慕义好施，每岁散积于贫，俟刈获而偿。间有负者，竟置不问。尝携仆马至斜坊，见小池中黑云微起，俄轰霆四塞，有白龙挟之驾空而行，鳞鬣皆见。不一刻，下坠十步屯，已去二十里地矣，仆马无恙。际此奇险，匪有德，必罹其毒矣。汪浩《志》。

《元和郡县志》：灏水，在须江县东南一里。《一统志》谓：源出仙霞诸岭，汇于清湖，始通舟楫。《梁书》：天监二年，鸞鸞见于灏水。即此地也。后人但以兰溪为灏水，可谓溯流而忘其源矣。汪浩《志》。

万历丁酉秋，邑令蒋公建九清桥落成。是日，有二鹤自西北来，集于公署，浹月始去。邑人以为瑞，其子德璟作二赋以纪之。汪浩《志》。

明，毛介川、赵方泉二人，才名相埒。毛登第十年，赵尚未释褐。毛给假归乡，赵遥望其舆，走匿麦陇后。毛下舆迎之，遽趋握其手，联步归。又二年，赵始隼，毛官至尚书，而赵亦僉都宪。汪浩《志》。

石门太平桥，在昭明桥之南，相去约半里许，为入闽要道。自二十五年洪水冲圮，行者病之。尝询诸邑人，谓郡庠生徐芝兰之父名良梓者，乐善好施，于三十八年相度地形，捐资重建，往来者得免褰裳濡足之患，迄今如新。汪浩《志》。

城北有七里桥，陆行之要道也。圮于涨。知县汪浩将合群力以鳩工，谋诸乡校，毛一清请独任。告成，遂刑牲落之。先是，一清

再建毛塘桥，费甚巨，再为水毁。汪浩《志》。

方氏，钱塘人，国子司直徐应鑣妻也。咸淳末，劝应鑣归隐，欲椎髻练裳以从。应鑣曰：“朝廷养士三百年，岂可效巢由高蹈？”氏曰：“妾夜观乾象，宋室将亡。不忍见子女被发左衽也。”遂作短歌以明志，投后园之瑞莲池以死。应鑣乃敛而葬之于西湖之八盘岭。汪浩《志》。

崇义公者，周后也。仁宗嘉祐中，以世宗本柴姓，择比部郎柴詠封之。熙宁中，司马温公留守西京，欲废柴姓而立郭氏。王介甫极言艺祖受禅于恭帝，不可使世宗绝祀。由是柴氏世世承袭，后徙居于衢。朝廷有大祀，则入侍。至绍兴五年，柴叔夏入觐，乞就衢州景福院安奉崇、懿、庆三庙，从之。三庙，本在郑时河南，已沦于金也。考邑志，乡荐有柴天夏袭封崇义公，住长台。或自郡而迁于此欤？至顺间，鄱阳吴德昭序《柴氏宗谱》云：余干柴氏自衢迁饶，历世几四百年，如疆恕、南溪、蒙堂，谓之三柴先生。按：南溪进《龟鉴录》案：南溪为柴中行，进《龟鉴录》是柴望。得罪，在理宗丙丁之际，而云迁饶几四百年，案：迁饶，是南溪，非柴望。则袭封在衢者，或别有一宗耶？《朝野杂记》。

江郎山有灵石庙碑记，莓苔剥蚀，仅存形似。略曰：惟神振自一门，光于千载。暨英灵之浸显，宜名号之增崇。有司考礼，弼臣以闻。虽疏侯国之封，未慰士民之望。牲饩用献，祀事惟诚。其可句读者如此。又曰：鳩工于政和七年之冬，告成于宣和三年之秋。屋大小五十间，糜金谷五百万。董其事者，进士祝珙。考旧志选举、人物，并无祝珙名姓，岂他方之士客游于此者欤？汪浩《志》。

宋端宗景炎二年丁丑，有事于祈谷坛。徐宗文为赞礼郎，读祝称旨，赐敕褒谕，表其里曰祝礼镇。事载家乘。汪浩《志》。

城西门外不数武，有枕园，为耆儒王朴所居。引雪泉于屋窠，

杂树果木数百本。登楼远眺，万马飞青，半郭半村，致足乐也。汪浩《志》。

蒋公光彦宰邑时，民间多逋赋，积年不清。公先期颁示曰：“蚤完者给赏。”及比较，案头置素箒若干。上纳者，辄书“江郎主人”款畀之。自是一邑争先，夙负不逾月而毕。万历间，王公臣纪莅斯邑，外若不解事，而内则洞然。有积蠹乘催征逋赋，假公手笔为勾票，遍吓乡愚，伺视事繁剧时，以伪票混入，辄拘民户赴比。公廉得其状，于判笔内藏一利针。唱比之际，检真票置座隅，因呼某某向案前，曰：“何为而假吾笔耶？”蠹张皇失措，俛首就刑。嗣后，无敢舞文者。汪浩《志》。

顺治五年正月初一日，白寇千余突砍西门入城。县令吏舍印越墙以避，役众杀伤无数。东门防守鲍带兵冲散，城库获全。是月，白寇何五十又率党千余自东乡来，过河，战于航埠山。射死其首，余各溃窜，寇势自此渐孤。汪浩《志》。

康熙十三年甲寅，闽寇乱。时有俚言曰：“今日躲鹿穴，明日卧豹蹊。饥寒我自忍，何以掩儿啼？”又俚言曰：“不怕连日雨，只怕一朝雪。雨湿犹可耐，雪迹恐难灭。”又俚言曰：“山深犹未深，谷幽犹未幽。莫落悍兵手，宁吞猛兽喉。”自王师进剿，江山残黎始得出水火之中。汪浩《志》。

顺治五年，巨寇魏福贤聚党作乱。其始巢穴在建宁府浦城县蛟溪壁垄地方。十年正月十二日，破秀峰。义勇周旌等御之，连发七矢，杀贼党七人。后旌以矢尽为余贼所擒，不屈死。乡人称其勇烈。自是破长台，破镇安，迁巢于廿七都青草潭上，藏马山中。各乡罹害，秀峰与茅坂为甚。三省会剿，负固不服。秀峰周公瑾，一名玉，有勇略，精武技，以千总防守长台，密探福贤出没。十三年八月，只身潜入寇巢，生擒福贤斩之。事闻，分守道亲行犒赏，申详各

宪，咨部，录功擢守备。汪浩《志》。周允协述。

顺治五年，永丰、玉山大饥。土寇杨文屯据九仙山，结寨以拒官兵。逆党杨双管、应谢、毛豆等分寇江山四乡，劫杀数岁。九年六月间，焚掠茅坂殆尽。是岁，三省会剿，杨文飞炮殒命，九仙山寇四散。有余孽魏福贤、陈红旗、赖白旗等哨聚浦城、遂昌、江山界上。十年正月，张村、长台焚杀更惨。是时，官兵东守则劫西，西守则劫东，焚劫礼贤、石门亦如长台等处。乡人大半入县城居住。逆寇乃向浦城、遂昌去。十四年，又至长台。守兵对战，始退。由是三郡会剿，魏福贤带十余逆潜藏廿七都青草塘。官兵带领土人追捕，福贤死，患始平。汪浩《志》。

康熙十三年，耿逆叛乱。四月十二日，伪先锋江元勋领众出仙霞关，屯驻清湖。十五日，破城，兵出掳掠。十月间，移营九龙山，与官兵隔河对垒。江山住屋内地发掘煎硝，寺观钟磬及民间铜铁器皿，皆取铸炮。十五年案：当是十四年。八月十五日，进剿至航头，大战，群逆尽歼。是夜，九龙山伪都督马九玉、江山县伪都督朱怀德俱遁。次日，大兵追逐，居民始安。汪浩《志》。以上二条，柴自挺述。

甲寅之变，江阳沦陷。有伪帅设座于文庙，发号出令，蹂躏不堪。祭器书籍，或铸炮，或制甲，无一存者，且并先圣木主，委弃于地。戡定后，有老役严律捧主而至，乃乘间携归者，因斋沐而复登于座。汪浩《志》。

大岭以东，与括苍接壤。深山穷谷，伏莽为虞。明末，矿寇之害，四境蔓延。今矿禁甚严，而他方流寓，以种麻为业。土人嗜其微利，立券招租，聚散不常，不可不防其渐。宋成绥《志》。

宋建炎时，吕求中为江山令。以仁宗所赐先世文靖公玺书勒碑于璩源寺。其玺书曰：古人有语，髭可疗疾。虽无痊验，为吕夷

简力了契丹再好，今朕翦髭与夷简合汤药，表朕意也。见今卿久病，两地甚是关人，今中书、密院臣僚，全然并不勾当公事。令卿密奏勾当可以委任臣僚五三人来，朕要点使。卿更调摄，副朕眷焉。更有西北两处事，子细一一奏来。庆历三年三月十五日午时，朕髭付吕夷简。人第知唐太宗剪须疗徐世勣之病，而仁宗之事，人未之知。宋成绥《志》。

柴仲山进《丙丁龟鉴录》十卷，忤时相，下狱。赵节斋汝愚救之，案：是赵与慧，非赵汝愚。获免。其《归田》诗曰：白发无人念，青山奉旨归。而《别诸友》诗有曰：见妻还指张仪舌，痛国谁怜贾谊书？同里苏幼安题其遗集曰：运厄丙丁知定数，天开南北验斯文。宋成绥《志》。

正德丁卯，浙闾中式周文兴。相传本房原拟作元。主考读其《颜孟表》，批曰：文品名贵，识力超尘。此子有山林气象，无台阁规模。因真第四。后举进士。历官鸿胪寺卿。隐于吴山紫极宫之侧。督府胡梅林作高士坊以旌之。按：丁卯表题系拟宋以颜孟配享孔子，二氏子孙谢表。其略云：立政莫大于崇儒，报功宜先于毖祀。臣祖回、臣祖轲，悟其卓尔，妙契跃如。闻所闻于约礼博文，发未发于知言养气。才佐王而稽四代礼乐之制，道承先而著七篇仁义之书。德业相望于后先，其揆则一。志行不同乎潜见，易地皆然。粤自晋武以来，代加封赐。至我艺皇而下，世有赞扬。既陪九鼎之荣，复厕两楹之邃。回虽不寿，实永寿于人心。轲固未亨，而大亨于世道。岂特宠昭二姓？实将典式百王。臣等分叨章掖，属在云初。惟一瓢之是甘，奚万钟之敢望？粗承家学，过受国恩，必使一圣二贤之言，不徒口诵；将见三王五帝之治，实幸躬逢云云。无所谓山林气象也，或是全场总评流传之误耳？附此以志典型。〔宋成绥《志》〕按：表题注云：元丰八年。考：神宗乙丑三月，裕陵已上宾矣。

《宋史》称七年者为是。

江西《广信府志》有夏梦龙祠。注云：在玉山县南二下里。唐进士，官至兵部尚书。兄为太保。自信安清湖徙居于此。兄弟能御寇。既歿，乡人立祠祀之。然则夏氏兄弟自清湖而徙玉山，是皆江山人也。宋成绥《志》。

邑人以五月十五为城隍诞辰。相传姓陈，讳策，见正一真人府牒文，曾为此郡节推。而《忠节录》又谓：徐正节为本邑城隍。总以正直为神，理所当然耳。宋成绥《志》。

过礼贤镇十里，土名川石，乃凤林、峡口之大路。地广四十余丈，南通浦城，西接永丰。康熙二十五年，水涨潴为深潭。郡庠姜鼎于四十八年，乘冬月水涸，鳩工垒石为堤，往来者便之。宋成绥《志》。

骑石山，即步鳌山，有目连洞。旧志云：目连修行处。政和间，凿池，得青提夫人碑，乃目连母也。按释典：目连作大目犍连，婆罗门种，为世尊左面弟子，因救母设盂兰会。彼时象教未入真丹，安得修行于此？或前代土人效中元河灯之说，建刹山上，因以附会其事耳。汪浩《志》。

《宋史》：建炎四年，毛随为朝散大夫。金人将饮马于江，高宗惧。范宗尹荐随有甘石学，因召对便殿，奏谓岁星当躔不足虑。已而果然。按：《毛氏族谱》，居镇安。汪浩《志》。

邑侯杨公憲清丈田亩，亲历数年，艰难拨草莽，履涂泥，沐雨排风，手足胼胝，竟以遘疾乞归。临行之际，士民攀辕卧辙，相向悲号。公曰：“尔无然，士各勤于学，农各力于田，是予所望于若辈者也。若地与山塘，虽未竟予志，后人必有继予而终其事者。尔辈俟之可也。”观邑庠诸生朱秀儒长生颂言云：往者，邑多变故，人共迁移，版籍无稽，井疆难辨。豪强享独霸之租，细弱有代赔之税。所

幸上苍有眼，特遣召父绘图，丈熟除荒，捐资给米。虽减此必致增彼，而一均自可无贫，归户维新，与民更始云云。则士民之感戴可知已。汪浩《志》。

邑中有十大书院，而终以东溪讲舍。徐孔霖方伯自粤藩归，与司教谢文谷、邑人林阳溪辈讲学于此。而大令邵养斋、薛鸣宇先后从之。会中条约，皎如日星，姚江一派，阐发为多焉。汪浩《志》。

双异谣者。顺治末，有宝应君令斯土，以操切为能，瓜连蔓引，血洒肉飞。妇女负银铛，桎其指，夜则圈而押诸隶。民乃谣曰：“宝应宝应，如何报应？扫尽江山，不留一命。”后量移贰守，卒无后。越数年，有临汾君者，以鞠藁为性命，讼庭隐几，鼻息如雷。案列石卵数十，稍拂意，即飞掷之，群哄而走，如避丸。复有谣曰：“临汾草，千里来，醉倚琴堂眼倦开，阶前石子积成堆。”宪使廉得其实，遭白简去。汪浩《志》。

顺治丙戌，江邑尚称隆武二年。八月初七日，县令方讳召，闻衢城已下，适坐堂，随役寥寥。有执苏白扇者，唤其将扇置案头，题诗一首于上，有云：独守孤城谁是伴？只留烈骨可招魂。俄而报云：“王师临境矣！”遂退。时，领兵都司，单骑直入，吏民迎之。进署寻县令，已投井死。王师初十日遂长驱入闽，秋毫无犯。先是，城中营兵万余，势如鼎沸。居民移避乡村十有六七，新邑侯苏多方招抚，遗黎渐集，然大半已为白地矣。汪浩《志》。

明末，南粮之弊，流祸无穷。江邑旧额共二万七百余石，分十段当差。吏胥上下其手，每每卖富差贫。顺治初，四邑早有均摊之法，独江山尚仍旧例。庠生徐元选具呈本县，哀吁府道，转申督抚，驳查数次，始获一概均摊，官收官解，邑人乍免赔累之苦。汪浩《志》。

江郎山有湛甘泉刻石，景星山有易惟做刻石，渐山有徐逸平刻

石,烟萝洞有赵阅道、辛幼安刻石,今惧剥蚀,字迹莫可考已。汪浩《志》。

旧志,于真岩寺注云:白鹿女仙修真处。于广惠寺注云:杰峰祖师道场。然不详何代人,并无碑记可考。杰峰,见宋潜溪慈云塔碑。汪浩《志》。

柴家巷有三圣祠。相传明洪武时,马后患目疾,医罔效,夜梦三金甲神,谓之曰:“此疾得衢郡须泉水洗之乃痊。”问其姓,曰柴氏兄弟。寤而遣使购水拭目,果愈。因敕访柴氏三人,弗得。悟其为柴家巷三圣之神,遂封为顺应保和大王。迄今附近之家,相沿有会,所有封敕供神炉前。咸谓开看必罹火患。又查须女泉注,旧志载系唐时某后病目,有女道士汲泉拭之,遂愈。与此所传又互异。汪浩《志》。

泰山行宫,在泰阳山。有一天门、百丈崖、十八盘、远眺台诸景,俱仿泰山名之。其巅有池,深不可测,大旱不涸。有黑云起即雨。俗传有龙潜焉。雩祷立应。汪浩《志》。

泰山行宫所祀碧霞元君,状类普门大士,不知者以观音目之。案:李谔《瑶池记》:黄帝建岱岳观,遣七女焚修以迎崑崙真人,元君其一也。又按:汉明帝时,石守道妻金氏,名玉叶,得曹仙指,入天空山黄花洞,丹成,依于泰山。初为石像,宋真宗时易以玉,建昭真祠。明成化改为宫。弘治间,更名灵应碧霞元君。天启间,有以铜铸为像者,秀峰祝、黄、周等姓建行宫,恭诣泰山,迎其像而祀之。神灵显吓,四方瞻礼如泰山。汪浩《志》。按:是山铜佛有四,遗失已久。嘉庆十七年,有樵子于丛棘中得其一,礼奉寺中。是夜,环寺红光,庙祝梦神语:“三佛尚在故处。”往觅,携归,貌如前。邑人黄文楷有记。

嘉庆七年,南乡峡口镇山石夜裂,中有菊花纹甚肖。同知邹鉴亭大训昇置署斋,嘱举人刘佳等赋诗。蔡英《东轩遗集》。

峡口东面，万山丛叠。有风洞在峡里潭，洞口石壁上有“天地呼吸处”五字。每夕大风刮耳，彻夜方息，人称为峡口吹，六七里以外寂无闻。风至处，禾稼尤美。相传雨久闻风即晴，晴久无风即雨。居人以此占验，历应。贡生刘侃有诗。蔡英《东轩遗集》。

峡山义民陈颜，元至正间人。时，郑百花等纠众焚掠，被义兵堵截，遁藏括苍，复逸出。颜父子儿媳共七人擒戮贼首，捣散巢穴。当道上其事，未果封。颜没，尸香三日，民奉为神。至明洪武年，封“忠义贯日”四字，儿妇俱膺封爵。今塘源口等处六社，香火极盛，咸称为陈相公云。

长台柴国史秋堂墓有树同根异茎，大祇盈拱，高仅丈余，南枝荣而北枝枯。荣者，冬不落叶，非桧非梓，人不知名。重刻《柴氏四隐集》跋。

南乡茅坂徐氏，聚族而居，向称著姓。顺治四年，九仙山寇杨文、魏福贤乱。生员徐良枚率众抵御，为贼所围，纵火焚杀，一时老幼死者千余人。至今丛葬之所，邑人犹称为千人坟。野老遗闻。

西南乡南坞地方，为杨姓聚族，有八角井，极灵异。每井内若铜钲鸣，即有登科者。前明杨孝廉在廷，雍正时孝廉杨灿获隼，俱有验。后乾隆壬子，王应麒中式，乃寓居此地者。人以为奇征云。野老遗闻。

通和门内金街巷岳武穆王庙，建于元，毁于明。旧基有樟树，大合围。隆庆年间，邑人王守伐为梁，树内现“岳王庙在此”五字，墨迹宛然。守惧即为武穆王刻像，就其地建庙奉之。野老遗闻。

廿三都大罗山，相传为明征南将军毛伯温出身地。闻七八岁时，尚未行走，后遇术者，谓：“此子器宇不凡，非偏隅所能长。”乃试以红氍毹贴地，始行。遂携之去。其祖墓在山之阳，峰峦排列若旗鼓。野老遗闻。

南乡保安街素乏水，屡罹火患。雍正初，毛云騄出赀掘小圳，引溪水流绕街道，而火患有备。居民至今并资饮汲焉。野老遗闻。

南乡镇安里毛氏祠前，水忽成墨，墨香扑鼻，以巾拭之，亦香。越三十六日始止。

十四都龙井，非井也。天生怪石，状如井。涧水下冲，碧波中亘。次井蜿蜒，隔有界石。越半里，水势悬崖而下，复成一井。俱深不可测。又有牛鼻桩者，巨石由涧中突起，端有孔，形如牛鼻，水绕左右，碧窅而深。相距里许。隋石巉岩，下有幽壑，水深无底，名曰龙潭。村人尝误投铁器于此，岁久浮出。

峡口苏家岭广福庵，幽篁成林，过客往来多题咏。乾隆时，大兴朱文正公典闽试，督闽学，屡经此地，叠韵留题，一时和者甚众。其前任闽省督学筭河侍御，即文正从兄也。曾于庵内留楹联云：云石江将疑字浙，风篁岭若误髯苏。暗藏浙江苏岭四字。后萧山王南陔中丞抚闽，见旧题残缺过半，揭付装池，并绘《空山破寺残诗感旧图》，系以跋语，俾寺僧珍守，谓不啻东坡玉带。道光二十三年，同安苏鳌石观察过此，又为重装加跋。中丞为文正门下士，而观察乃中丞门人也。鸿爪雪泥，一段佳话，从此为苏岭生色矣。

咸丰戊午正月，处州土匪张开发以法水煽惑廿七都等处。知县余以增捣散之。逾月，粤匪窜永丰，逼近江界，招集义民数千，堵御官溪。相持至三月初一日，城溃。盘踞百日，始退。十年三月，有股匪经西乡过，未入城。十二月，由常山窜踞。林协镇文察克复之。十一年三月，由华埠复窜入城，旋遁处州。八月，又自广丰度仙霞来，往窜处州。十二月，李方伯元度统兵来防，修城开壕，为固守计。同治元年正月，贼由处州、金华两路来，薄县城不克，屯聚东乡累月，并筑贼营于花园冈。三月初五日，驻扎峡口，曾镇台元福兵溃。适左恪靖伯统大师来，檄李方伯会剿，尽焚其营，遂遁。时

三月廿六日也。

戊午开发之变，官民协力，故能克日殄除。自是城乡皆致力于团练。逮粤匪乱，或占据，或窜扰，踪迹靡常。各乡团随时防剿，自戊午迄壬戌，五年中没于王事者，千有余人。而首先死事者，为生员徐凤诏。被祸最烈者，则长台、大陈两村。事平奏闻，蒙恩恤奖有差，并敕建忠义祠，以祀死难诸人。此一役也，在国家固为旷典，亦数百年培养元气之所致也。

《江山县志》卷之末

## 邑人纂述书目

### 宋

《中庸解》

《论语解》

《孟子解》汪浩《志》并作《中庸论孟解》。

《六经讲义》汪浩《志》作《六经正义》，《府志》作《五经讲义》。

《书籍义》正德《志》。以上俱徐存著。

《系易集传》汪浩《志》作《易系》，《宏简录》作《系易》，府志载柴中行著。

《论语童蒙说》汪浩《志》作《语论》，讹。

《书集传》

《诗讲义》

《六经正义》《府志》：俱柴中行著。宋成綏《志》、《宏简录》不载，疑即《六经正义》之误。

《春秋解》《明统志》：柴中行叔元振著有《春秋解》。

《太极图说》一卷《府志》：徐霖著。

《禹贡指南》一卷焦氏《经籍志》：毛晃著。

《礼部韵略》《内閣书目》：宋衢州进士毛晃增补。

《诗集》十卷汪浩《志》作《诗文奏表》

《毛氏世谱》一部汪浩《志》作《世谱》。

《地理五龙秘法》一部《宋史·艺文志》：俱毛渐撰。按：旧志此书不载，汪浩《志》有《三坟书》，系毛渐著。宋成綏《志》：考《宋史·艺文》：《三坟书》三卷，毛渐所得，非渐著也。姑存以俟考。

《蓬山类苑》

《元浩正谟论》

《清高集》《府志》：俱祝常著。

《斋峰集》弘治《府志》：周彦质著。

《奏议》汪浩《志》：毛注著。

《东堂集》六卷、《诗》四卷、《书简》二卷、《乐府》二卷、《东堂词》一卷《书录解题》：毛滂泽民撰。宋成綏《志》：考《宋史·艺文志》作《集》十五卷，连词。

《伯坚文集》汪浩《志》：周颖著。

《非非国语》一卷

《刺刺孟》一卷

《补过斋拙稿》《府志》：俱刘章著。又一作龙游人

《宪度权衡》

《须江集》弘治《府志》：江山柴绂著。汪浩《志》作《须川文集》。杨廷望《府志》：《须江集》，刘敏士著。《须川文集》，柴绂著。宋成綏《志》：敏士与绂同保吉州者，岂亦江山人耶？疑有误。

《退翁集》

《文选类要》正德《志》：俱柴瑾著。

《丙丁龟鉴》十卷《戒庵漫笔》：淳祐中，中书省奏名柴望上。

《秋堂集》弘治《府志》：柴望著。一作《道州苔衣集》、《咏史集》、《凉州

鼓吹》。汪浩《志》：《秋堂集》与《道州苔衣集》并见宋成綬《志》。考：至正杨仲宏序公诗有《道州苔衣集》、《咏史诗》、《凉州鼓吹》。《凉州鼓吹》，诗余也。

《烂柯集》汪浩《志》：毛友著。

《公明文集》汪浩《志》：郑升之著。

《长台诗集》汪浩《志》：柴蒙亨著。

《瞻岵居士集》汪浩《志》：柴随亨著。

《袜线稿》汪浩《志》：柴元彪著。

《柴氏四隐集》秋堂十一世孙复贞编，重刻于明万历戊子。知县张斗《序》。钱唐吴志上抄本《跋》：名虽四隐，实止秋堂、瞻岵、泽癯三人，制参吉甫公无一字。岂刻本原完，辗转抄录，遂失之欤？按：是集刻板，久已无存。族裔柴文晃抄本，以元柴登孙所著《芳所唵稿》足成四隐。道光二十五年，柴氏修《谱》，同里学博朱家麒履升促其付梓，并为《序》而《跋》之。

《金陵杂录》

《山居疏草》《府志》：俱何郁著。

《卓斋集》郑魏挺著。

《芹说》

《奏议集》俱柴卫著。

《溪上翁草》严瑀著。

《校学正书》蒋文祉著。

《韩昌黎集注》祝充著。

## 元

《三峰集》正德《志》：祝君翔著。

《同声录》正德《志》：龚宗传辑。汪浩《志》误作宋人。

## 明

《白下集》正德《志》：伍盛著。

《西山吟稿》

《政家遗范》汪浩《志》：俱毛鼎元著。

《小窗论草》

《十史断》汪浩《志》：俱毛瑚著。

《明孝宗实录》《府志》：正德中，周任登进士预修。

《元峰文集》崇禎《府志》：周任著。

《读易管见》

《启沃录》

《图说》

《山中日录》

《二峰摘稿》崇禎《府志》作一峰。汪浩《志》：以上俱周积著。

《一斋集》十二卷正德《志》：赵桢著。

嘉靖《衢州府志》

《留斋漫稿》七卷汪浩《志》：俱赵镗著。

《赵氏家谱》六卷《分省人物考》：赵镗著。

《薛文清读书录抄释》

《奏议》八卷

《介川文集》汪浩《志》：俱毛恺著。黄氏《书目》：《毛恺文集》四卷。

《世德乘》

《道器真妄谱说》

《东溪文集》六卷汪浩《志》：俱徐霏著。

《发笕集》汪浩《志》：郑忬著。

《紫崖遗稿》汪浩《志》：徐惟辑著。

《明德楼稿》汪浩《志》：朱夏著。

《潜夫漫稿》

《音韵通考》汪浩《志》：俱徐伯知著。

- 《玩梅亭集》汪浩《志》：柴惟道著。  
《高园漫稿》汪浩《志》：柴天复著。  
《燕山遗稿》汪浩《志》：璩一桂著。  
《青来阁草》汪浩《志》：施幼学著。  
《和鹤居集》汪浩《志》：徐日葵著。  
《墨林辨体》汪浩《志》：周相著。  
《活人宝鉴》十卷正德《志》：伍子安著。  
《栖碧录》正德《志》：杨起溟著。

## 国朝

- 《介庵集》宋成绥《志》：姜汉宗著。  
《笠斋雪老集》宋成绥《志》：柴自挺著。  
《续丙丁龟鉴》二卷柴自挺著。  
《秋晓堂集》宋成绥《志》：柴炜著。  
《泻心草》宋成绥《志》：蒋钟著。  
《碧梧楼稿》宋成绥《志》：姜亨肇著。  
《云轴诗草》宋成绥《志》：毛兆镛著。  
《响泉诗钞》杨奏瑟著。  
《西缘草堂诗集》何茹连著。  
《香雪诗存》刘侃著。  
《毛补南稿》毛元坤著。  
《钓鱼篷山馆集》、《钓鱼篷山馆制义》俱刘佳著。  
《紫霞山房诗钞》朱家麒著。  
《笔帚试帖》王钰著。  
《须江诗谱》十卷王钰辑。现未梓行。

## 旧志纂修姓氏

明正德十五年庚辰创修

明嘉靖二十三年甲辰重修

明天启三年癸亥重修

知 县	吴 仲
知 县	黄 纶
教 谕	谭景韶
训 导	蒋 爵
	张 琛
主 簿	陈 学
生 员	郑思仁
	伍 聪
知 县	张凤翼
前知县	蒋光彦
进 士	徐日葵
教 谕	张大基
训 导	龚应科
	许继善
举 人	郑世熙
生 员	施于国
	璩国贤
	胡大经

国朝康熙四十年辛巳重修

程廷楨  
知 县 朱 彩  
教 谕 朱长吟  
训 导 王 溥

国朝康熙五十二年癸巳重修

知 县 汪 浩  
教 谕 宋 俊  
绅 士 柴自挺  
毛一清  
周允协  
周三宅  
郑维城  
王蕴生  
王增锦  
郑尔溉  
姜日肃  
周賚纁

国朝乾隆四十一年丙申重修

知 县 宋成绥  
举 人 仁和 陆 飞  
教 谕 彭昌年  
训 导 施凤起  
候选州同 王名铤  
前阜城县知县 郑之望  
举 人 柴 沅  
毛 钱  
林天潮  
拔 贡 王锡琼

贡 生 何 平  
陆上眷  
王 震  
王名键  
郑 醇  
毛志青  
生 员 何元方  
周 祝  
郑文烈  
监 生 王凤来  
何隆吉  
王元和  
何 博  
郑学滨  
郑学准

## 附刊：修辑志书告示

为修辑志书，以光盛典，而资观感事：据绅董姜桂芬等稟称，窃惟河渠、食货，俱关太史之陈；土俗、民风，亦备辘轩之采。所以征文考献，志乘为先。而激浊扬清，纂修独重也。江邑，星分牛、斗，地接闽疆，为全浙之藩篱，作三衢之保障。绮霞焕彩，外环六岭之雄；练影澄波，内挹双溪之秀。访逸平之门巷，只剩斜阳。考正介之亭台，仅余烟草。即此遗徽可溯，已能兴起于闻风。从知往训昭垂，更足观摩而效法。是志之较于他邑也，为尤要矣。在前明始集成书，尽湮诸罔象支祁之虐。即国朝亦经续辑，又毁于苍鹅铜马之氛。残编鲜有孑遗，版片久经霉烂。职等同居块土，景仰先型，互切旁搜，只留二部。虽云陈编未坠，直如硕果仅存。辗转传抄，几迷亥豕；重行检校，庶免辛羊。况续修至今，已届百年，则其间轶事，不可枚举。忠孝节烈，忍令湮没无闻？表暴流传，詎可迁延再缓？职等商诸同好，共乐书捐。既众志兮克成，遂僉谋之悉协。非敢陈言务去，遽思舍旧谋新，实因往事就湮，亟宜摭遗补阙。酌议清单，装钉捐簿。公叩转稟，示谕采辑、纂修等情，据此。查邑之有志，犹家之有乘。阅世未修，中多更易。分头广采，远藉考稽。书写固不惮勤劳，搜揽实深虞遗漏。虽出门合辙，权衡自具于匠心。而集腋成裘，荟萃还资于群力。除会同儒学，转稟各宪，并将捐簿

印发。劝捐纂修外，为此示仰阖邑绅士、耆民、书吏人等知悉：凡志中应载事宜，各照后开条例，迅速呈报。为忠孝，为节义，多多益善；或选举，或宦达，历历俱陈。遗闻谔谔下衣冠，轶事问襄阳耆老。将见嘉言懿行，偕倬汉而为章；直教潜德幽光，与景星而并寿。共襄盛事，勿负厥心。特示。

计开：

一、自乾隆四十年后，凡有贤良方正、忠臣义士、孝子悌弟、贞孝节烈妇女，已请褒荣，或确有奇异事实，共见共闻，并名公巨卿传记可据者。

一、自乾隆四十年后，历任峡口分府宪并知县、县丞、巡检、典史暨学署各官以及枫岭营游戎本城都阉官衔姓名、籍贯、履历、政绩。

一、自乾隆四十年后，文武进士、举人、正途贡生暨仕宦、贡监并邀恩荣封典，应行采入志书者。

一、有关忠孝节义、艺文及著名坛庙、古迹

一、本邑人物有品学兼优、义行卓著，素为乡闾矜式，以及寄寓贤良，确有事实可指者。

一、有关学校、兵制、赋役诸事增添裁减者。

一、山川、关津及城垣、公署应行添载者。

一、祥异及风俗、物产可以采入志乘者

同治十年十月 日给